



# AOAOGA A PERESITENE O LE EKALEZIA

HAROLD B. LEE





AOAOGA A PERESITENE O LE EKALEZIA  
**HAROLD B. LEE**

Lolomi ma faasalalauina  
O Le Ekalesia a Iesu Keriso o le Au Paia o Aso e Gata Ai  
Aai o Sate Leki, Iuta

E talisapaia o outou finagalo faaalua ma fautuaga e uiga i leni tusi. Faamolemole ia auina mai i le Curriculum Planning, 50 East North Temple Street, Floor 24, Salt Lake City, UT 84150-3200 USA.  
E-mail: [cur-development@ldschurch.org](mailto:cur-development@ldschurch.org)

Faamolemole ia tusi mai lou suafa, tuatusi, uarota, ma le siteki. Ia mautinoa ua tusi mai ai le igoa o le tusi. Ona tuuina mai ai lea o lou finagalo faaalua ma fautuaga e uiga i mea o loo lelei ai le tusi ma vaega foi e ono faaleleia atili.

© 2000 e le Intellectual Reserve, Inc.  
Ua taofia aia tataua uma  
Lolomiina i le Iunaite Setete o Amerika

Faamaonia le faa-Peretania: 5/00  
Faamaonia le faaliliuina: 5/00  
Faaliliuina o le  
*Teachings of Presidents of the Church: Harold B. Lee*  
Samoan



# Faasino Mataupu

Ulutala	Itulau
Faatomuaga	v
Aotelega o le Faasolopito	ix
O Le Soifua Auauna o Harold B. Lee	xiii
1 O le Ala i le Ola e Faavavau	1
2 O Ai A'u?	11
3 O le Tamai Mamoe na Fasia Talu Ona Faavaeina le Lalolagi.	21
4 O Muai Mataupu Faavae ma Sauniga o le Talalelei	30
5 Savali i le Malamalama o le Molimau	41
6 Ina ia Faalogo i le Siufofoga o le Alii	52
7 O Tusitusiga Paia, "O Faatanoa Tetele o Vai Faaleagaga"	65
8 Iosefa Samita, Perofeta a le Atua Soifua	76
9 Gauai Atu i le Avefeau Moni a Iesu Keriso	85
10 Auaunaga Alofa ma le Faamaoni Faale-Perisitua	96
11 O Oa e Lē Mafaatauina o le Malumalu Paia	107
12 O le Faamoemoega Paia o le Faaipoipoga	118
13 Aoaoina Atu o le Talalelei i Totonu o le Aiga	129
14 Alofa i le Aiga	139
15 O Aafiaga Amiotonu o Tina	150
16 Tutu faatasi e Laveai Agaga	158
17 Fetufaaiina o le Talalelei	165
18 Saunia i le Ala a le Alii	177
19 Faaavanoa se Taimi e Faapaia Ai	188
20 Ola i le Tulafono o le Lēgaviā	199
21 Taumafai ina ia Faaatoatoaina	209
22 Ia I Ai le Filemu i Lou Agaga	221
23 O Le Toetu, o se Taula o le Agaga	232
24 Ua I'u Lava ina Taunuu Saogalemu i le Fale	241
Lisi o Ata Vali	251
Faasino Upu	252





# Faatomuaga

O Harold B. Lee, o le Peresitene lona sefulutasi o le Ekalesia ma e sili atu i le tolusefulu tausaga o avea ma Aposetolo, sa ia molimau faamaualalo ma se loto ua faatumulia, “O loo soifua le Atua, o Iesu o le Togiola o le lalolagi”<sup>1</sup> Faatasi ma se molimau maumaututu i tausaga o auaunaga, na ia faapea mai ai , “O la’u tatalo faamaualalo ia maua e tagata uma i mea uma le malamalama atoatoa e uiga i le taua o le togiola a le Faaola mo tagata uma, o le na tuuina mai ia i tatou le ata o le Faaolataga, o lē o le a taitai i tatou i le Ola e Faavavau, i le afioaga e afio ai Le Atua ma Keriso.”<sup>2</sup>

O le malaga toe foi i lo tatou Tama o i le lagi sa avea ma se vaaiga tutotonu o aoaoga a Peresitene Lee i tagata o le Ekalesia. Na ia apoapoi malosi i fanau taitoatasi a le Tama Faalelagi ina ia “maua e ia lava se molimau le faamaluelueina lea o le a tumau ai ona vae i luga o le ala lea e taitaiina moni atu i le sini faaeaina o le tino ola pea ma le ola e faavavau.”<sup>3</sup>

“O le savali sili ona taua e mafai ona ou tuuina atu ia te outou ma le lalolagi atoa o le tausia lea o poloaiga a le Atua,” ua faapea mai ai Peresitene Lee, “aua o le ala lea e mafai ai ona faagavaaina outou e maua le taitaiga faalelagi a o e nofo ai i lenei lalolagi, ma i le lalolagi a sau, ia saunia e fetai ai ma lo outou Togiola ma maua lo outou faaeaga i le afioaga o le Tama ma le Alo”<sup>4</sup>

Ua faatuina e le Au Peresitene Sili ma le Korama a le Au Aposetolo e Toasefululua le faasologa o *Aoaoga a Peresitene o le Ekalesia* e fesoasoani i tagata o le Ekalesia ia faalolotoina lo latou malamalama i mataupu faavae o le talalelei ma faalatalata atili ai ia Iesu Keriso e ala i aoaoga a perofeta i lenei tisipenisi-one. O lenei tusi o loo faalauiloina ai aoaoga a Peresitene Harold B. Lee, o lē na saunoa mai:

“O tulafono a le Atua na aumaia i tagata o loo aofia ai i totonu o le fuafuaga o le talalelei, ma o le Ekalesia a Iesu Keriso ua i ai le matafaioi mo le aoaoina atu o nei tulafono i le lalolagi.”<sup>5</sup>

“Ia mumu i totonu o o outou agaga na aoaoga o le a faatumauiina ai e le aunoa lou tepa taulai atu i le sini e faavavau ina ia le iuvale ai lau faigamalaga i le olaga nei, ina ia saunia oe, pe puupuu pe umi lou soifua, pe a oo mai le aso e te ulu ai i le afioaga o Le o loo e umia lona suafa i le avea ai o oe ma se tagata o le Ekalesia a Iesu Keriso i nei aso e gata ai.”<sup>6</sup>

O mataupu taitasi o lenei tusi o loo aofia ai ni vaega se fa: (1) o se fesili o loo aumaia ai se oototoga o le autu o le mataupu; (2) O le “Faatomuaga,” o loo faaalua ai le savali o le mataupu ma se tala poo se fautuaga mai le susuga a Peresitene Lee; (3) “O Aoaoga a Harold B. Lee,” o loo tuuina atu ai aoaoga faavae taua mai le tele o ana savali ma saunoaga; ma le (4) “Fautuaga mo Suesuega ma Talanoaga,” o loo uuna’ia ai iloilogia ma suesuega a le tagata lava ia, o nisi talanoaga faapoopo, ma le faaogaina po o le faatatauina i o tatou olaga e ala i fesili.

---

### E Faapefea ona Faaoga Lenei Tusi

*Mo suesuega a le tagata lava ia poo suesuega faaleaiga.* Ua faamoemoe lenei tusi e faalautele ai le malamalama o tagata taitasi e uiga i mataupu faavae o le talalelei na aoaoina malosi mai e Peresitene Harold B. Lee. O le faitauina ma le agaga tatalo ma le suesue loloto i ai, o le a maua ai e tagata taitoatasi sana lava molimau i nei mea moni. O le a faapoopo atu foi lenei lomiga i le potutusi faaletalalelei a tagata o le ekalesia, ma o le a avea o se punavai taua o faamatalaga mo aoaoga faaleaiga ma suesuega i le fale.

*Mo talanoaga i le vasega i Aso Sa.* O lenei tusi e mo le Korama a le Perisitua Mekisateko ma le Aualofa i vasega i Aso Sa. Na aoao mai Elder Dallin H. Oaks o tusi o loo i le faasologa o *Aoaoga a Peresitene o le Ekalesia* “o loo maua ai aoaoga ma mataupu faavae. E tamaoaiga ma talafeagai lelei ma o tatou manaoga i nei aso ma e matua maoa’e mo le aoaoina atu ma mo talanoaga fetufaai.” E tatau i faiaoga ona taula’i atu i le aano o le mataupu ma mau e faasino i ai. E pei ona faamalamalamaina mai e Elder Oaks, “E lei valaauina se faiaoga o le talalelei na te filifi-

lia le mataupu o le lesona, ae ia aoao atu ma talanoaina mea ua faatonuina.”<sup>7</sup>

E tatau i faiaoga ona aumai ni fesili o loo i le faaiuga o le mataupu e uunaia ai le talanoaga a le vasega. O le faitauina o fesili ae lei amataina le suesueina o saunoaga a Peresitene Lee e mafai ona aumaia ai se vaaiga loloto faaopoopo i ana aoaoga.

E ao ona taulai atu vasega o le Aso Sa i mataupu faavae o le talalelei, o faaitaiga faaletagata patino e aoao atu ai nei mataupu, ma molimau o le upumoni. Pe a sailia ma le lotomauualalo e faiaoga le Agaga i le sauniuniga ma le taitaiina o le lesona, o i latou uma lava e auai o le a faamalolosia lo latou malamalama i le upumoni. E tatau i taitai ma faiaoga ona uunaia tagata o le vasega e faitau i mataupu ae lei talanoaina i le vasega i le Aso Sa. E tatau ona latou faamanatu atu i tagata o le vasega e aumai a latou tusi i a latou vasega ma e tatau ona aloaia sauniuniga a tagata o le vasega e ala i le aoao atu mai i saunoaga a Peresitene Harold B. Lee. Pe a faitauina e tagata o le vasega mataupu ae lei oo i le aso Sa, o le a saunia ai tagata e fea’oa’oai ma faamalalamaina e le tasi le isi.

E le tau manaomia le toe faatau e tagata o ni tusi faaopoopo o faamatalaga ma tusi e maua mai ai faamatalaga e lagolago ai mataupu ua i ai i le tusi. Ua uuna’ia tagata e liliu atu i tusitusiga paia po o mau ua fautuaina atu mo le suesueina atili o le aoaoga faavae.

Talu ai o lenei tusi ua fuafuaina mo suesuega a le tagata lava ia ma o loo maua mai ai faamatalaga faaletalalelei, e tele mataupu ua uumi tele mo le aoaoina atoa i le vasega i le Aso Sa. O le mea lea, e taua ai lava le suesue i le aiga ina ia maua ai le atoaga o aoaoga a Peresitene Lee.

Na silafia e lenei perofeta a le Atua le ala e toe foi atu ai i lo tatou Tama o i le Lagi ma sa ia tuuina atu le faasino ala ia i latou uma o e faalogo. “Afai e te faalogo ma faia mea ua e faalogo i ai, o le a taitaiina oe i lenei nofoaga mamalu ua faaigoaina e le na o le fiafia ae o le olioli foi. O le olioli o lona uiga ua e ola i se olaga ua e saunia e ulu atu ai i le afioaga o le Alii.”<sup>8</sup>



## *Faamatalaga*

1. Lauga i le faapaiaga o le falelotu o le Uarota a Westwood, Los Angeles, Kalefonia, 12 Aperila 1953, Matagaluega Faamaumauga o Talafaasolopito, O le Ekalesia a Iesu Keriso o le Au Paia o Aso e Gata Ai.
2. "To Ease the Aching Heart," *Ensign*, Aperila 1973, 5.
3. *Stand Ye in Holy Places* (1974), 319.
4. I le Conference Report, Konafesi FaaEria a Mekisiko ma Amerika Tutotonu, 1972, 120.
5. *The Teachings of Harold B. Lee*, ed. Clyde J. Williams (1996), 19.
6. *The Teachings of Harold B. Lee*, 627.
7. I le Conference Report, Oct. 1999, 102; poo le *Ensign*, Novema 1999, 80.
8. Lauga i le konafesi a le aupalavou i Billings, i Montana, 10 Iuni 1973, Matagaluega Faamaumauga o Talafaasolopito, O le Ekalesia a Iesu Keriso o le Au Paia o Aso e Gata Ai, 17.



# Aotelega Faasolopito

O lenei tusi e le o se talafaasolopito, ae o se tuufaatasiga o mataupu faavae e pei ona aoaoina mai e Peresitene Harold B. Lee. E ui o lea, ina ia mafai ona malamalama i aoaoga e tusa ai ma mea na tutupu i le talafaasolopito, o lea ua saunia ai le lisi o loo i lalo e aotele ai nisi o mea tetele ma maoae i lona soifua ia o loo i ai se sootaga pito sili ona felata'i ma ana aoaoga.

- 1899, Mati 28: Na soifua mai Harold Bingham Lee [i ona matua] o Samuelu Mariona ma Luisa Emeline Bingham Lee i Clifton, Oneida County, Idaho.
- 1907, Iuni 9: Papatisoina e Lester Bybee, i Clifton Idaho (8: o fuainumera o loo faapuipuiina o loo faaalai ai tausaga o le matua o Harold B. Lee)
- 1912, tautoulu: Ulufale atu i le Oneida Stake Academy, Preston, Idaho, ma lana uo faaleaoaoga o Ezra Taft Benson (13).
- 1916, taumafanafana: Uulufale atu i le Aoga Faafaiaoga a Albion State, Albion, Idaho (17).
- 1916–17, taumalulu: Faiaoga i le Aoga o Silver Star, latalata ane i Weston, Idaho (17).
- 1918–20: Puleaoga o le Aoga faaleitumalo i Oxford, Idaho (18–21).
- 1920–22: Faifeautalai, Misiona Western States, Denver, Colorado (21–23).
- 1923, taumafanafana: Auai i le Iunivesite o Iuta. Mulimuli ane na faamaeaina lona tikeri e ala i suesuega e faia i le fale ma auina atu galuega faatonuina ma suega i le meli (24).

- 1923, Novema 14: Faaipoipo ia Fern Lucinda Tanner i le Malumalu i Sate Leki(24).
- 1923–28: Puleaoga o le Aoga a Whitter ma le Aoga a Woodrow Wilson, Aai o Sate Leki(24– 29).
- 1930, Oketopa 26: Faamanuia i le tofiga o le peresitene o le Siteki o Paionia, 1930–37 (31).
- 1933, Novema 7: Filifilia i le Au Faatonu o le Aai o Sate Leki, auauna mai le 1933–37 (34).
- 1935, Aperila 20: Tofia Harold B. Lee e le Au Peresitene sili e sailia se polokalama e fesoasoani ai mo e matitiva (36).
- 1936, Aperila 18: Valaaulia e avea ma pule faatonu i fuafuaga tau le puipuiga a le Ekalesia (sua mulimuli ane i le polokalama o le uelefea a le Ekalesia) (37).
- 1939, Aperila 16: Faamaeaina le uluai fale teuoloa i le Welfare Square i totonu o le Aai o Sate Leki (40).
- 1941, Aperila 6: Lagolagoina o se tasi o le Korama a Aposetolo e Toasefululua (42). Faauuina i le aso 10 Aperila, 1941.
- 1954: Faataunuaina ni konafesi a alii fitafita i Iapani, Korea, Okinawa, Filipaina ma Guam (55).
- 1958, Aokuso: Malaga i Aferika i Saute ma le Nuu Paia (59).
- 1960, Mati 27: Faatuina le siteki muamua i Europa i Manchester, Egelani (60).
- 1961, Setema 30: I le taitaiga a le Au Peresitene Sili na faasalalauina ai se fuafuaga mo le tuu faatasia o polokalama uma a le Ekalesia (62).

- 1962, Setema 24: Maliu o Fern Lucinda Tanner, faletua o Harold B. Lee (63).
- 1963, Iuni 17: Faaipoipo ia Freda Joan Jensen i le Malumalu i Sate Leki (64).
- 1966, Aokuso 27: Maliu o Maurine Lee Wilkins, afafine o Harold B. Lee (66).
- 1970, Ianuari 23: Lagolagoina e avea ma Peresitene o le Korama a Aposetolo e Toasefululua ma le Fesoasoani Muamua ia Peresitene Iosefa Filitia Samita (70).
- 1972, Iulai 2: Maliu o Peresitene Iosefa Filitia Samita (73).
- 1972, Iulai 7: Faauuina ma faamanuiaina e avea ma Peresitene o le Ekalesia (73).
- 1972, Aokuso 25–27: Pulefaamalumalu i le konafesi a le eria i le Aai o Mekisiko (73).
- 1972, Setema 20: Faatuina le Paranesi i Ierusalem a le Togalaau o loo i ai le Tuugamau o le Faaola (73).
- 1972, Oketopa 5: Faasalalauina o le polokalama o le uelefea i le lalolagi atoa (73).
- 1972, Oketopa 6: Lagolagoina e avea ma Peresitene o le Ekalesia i se potopotoga paia (73).
- 1972, Tesema 14: Faatulagaina le Misiona faava-o-malo a le Ekalesia (73).
- 1973, Mati 8: Faavaeina le uluai siteki i Asia i Seoul, Korea (73).
- 1973, Aokuso 24–26: Pulefaamalumalu i le konafesi a le eria i Munich, Siamani (74).
- 1973, Tesema 26: Maliu Peresitene Harold B. Lee i le Aai o Sate Leki (74).

1973, Tesema 31: Faamaumauga faafuainumera i le faaiuga o le tausaga: 3,321,556 tagata o le ekalesia; 630 siteki; 4,580 uarota; 108 misi-ona; 17,258 faifeautalai; 15 malumalu.



# O le Soifua Auauna o Harold B. Lee

O le faamatalaga o loo mulimuli mai i le soifuaga o Peresitene Harold B. Lee sa tusia e Elder Gordon B. Hinkley o le na avea ma se tasi o le Korama a le Toasefululua, sa lomia i le *Liabona* ia Novema 1972 (“O se Faamalo ia Peresitene Harold B. Lee” 2–10). Na fesoasoani le faamatalaga i tagata o le Ekalesia e faamasani atili ma Peresitene Lee, o le ua faatoa avea nei ma Peresitene o le Ekalesia.

“O le tala ia Harold B. Lee, o le Peresitene o le Ekalesia, e mafai ona faamatalaina i ni nai fuaiupu: *Na soifua mai i le aso 28 Mati, 1899 i Clifton, Idaho, o le alo o Samuelu Mariona ma Luisa Emeline Bingham Lee, o se tasi o le fanau e toaono. Na aoaoina i se aoga o le lotoifale, o le Oneida Academy e latalata i Preston, o le Aoga a Albion State Normal i Albion, Idaho, ma mulimuli ane i le Iunivesite o Iuta. Na amataina se galuega faafaiaoga i le 17 o ona tausaga, na avea o se puleaoga i le 18 o ona tausaga, ma mulimuli ane sa avea ma se puleaoga o ni aoga se lua i le Itumalo o Sate Leki, Iuta. Na faaiipoipo ia Fern Lucinda Tanner i le aso 14 o Novema 1923. Na maliu o ia [Fern Lucinda] i le aso 24 o Setema 1962. Na toe faaiipoipo ia Freda Joan Jensen i le aso 17 o Iuni, 1963.*

*“Na pulea le Foundation Press, Inc. i le 1928–33. Na galue o se Komesina mo le Aai o Sate Leki i le 1933–37, ina ua avea o ia ma pule faatonu o le polokalama o le uelefea a le Ekalesia. Na tofia o se tasi o le Aufono a le Toasefululua ia Aperila 6, 1941, ma o le Peresitene o le Aufono a le Toasefululua ma le fesoasoani muamua i le Au Peresitene Sili i le 23 Ianuari, 1970 ma na faauuina ma faamanuiaina e avea ma Peresitene o le Ekalesia i le aso 7 Iulai, 1972.*

“O nai motuga ‘afa na o lona soifua. Peitai o lena olaga ua agavaa lea mo se faamatalaga auiliili sili atu.

“Pe a faatusatusa atu i le tele o taulaga ma aai, e matua laitiiti lava Clifton, ma e mamao ese mai le aualatele. Ae peitai a o faagasolo pea tausaga, o le a lauiloa lenei nuu o le nuu na soifua mai ai le Peresitene lona sefulutasi o le Ekalesia.

“Na malaga mai Samuelu Mariona, le tama o Peresitene Lee i Clifton mai se isi taulaga, o Panaca i Nevada i Saute. Na maliu le tina o Samuelu (le tinamatua o Peresitene Lee) a o valu aso o lona matua, ma sa vave fanau mai le pepe ae lei oo i le taimi e tatau ai, ma o lona laitiiti tele sa mafai ai ona faaofiina se mama tuulima i lona lima ma faasolo atu ai i lona ogalima. Sa faaogaina se tama’i faagaau tuluimata e fafagaina ai o ia. Sa nofo le uso o lona tina i Clifton, ma i le 18 o ona tausaga, sa alu atu ai le tau-lealea agai i matu e nofo ai ma lona aiga.

“O iina na la feiloai ai ma Luisa Bingham o se tamaitai e lanu uliuli lona lauao ma ona fofoga. Na faaipoipo i laua i le Malumalu i Logan. O le fale sa la faatuina ma fanauina ai le fanau e toaono, sa tu i luma o le auala pe tolu maila i matu o le faleoloa. O lea faleoloa, sa na o le pau lea o le pisinisi i totonu o le taulaga. O le auala o se auala palapala, sa pefua i le taumafanafana, na faatumuliaina i le kiona i le taumalulu, ma palapala i le tautotogo ma le tautoulu.

“O i, sa tuputupua ae ai Harold, e leai ni seevae, ma na ofuina ni ovalola, o se tamaitiiti faatasi ma isi tamaiti o le nuu. Sa faia taelega i le Vaituloto o Tatelio [Dudley’s Pond], ae sa le faia i le aso Sa. O lona tama sa i ai i le Au Epikopo, o lona tina sa i ai i le [faalapotopotoga a Tamaitai Talavou]—ma sa avea le Aso Sa ma aso paia. E faapena foi se vaituloto i le faatoaga o Bybees, sa papatisoina ai Harold B. Lee.

“Sa matua itiiti lava tupe i na aso. Sa maua fua o faatoaga peitai e laitiiti se tupe na maua mai i le saito ma le pateta. Sa faaopoopoina e tamā le tupe maua o le aiga e ala lea i le faia o sana konekarate e tipiina le saito, eliina vaieli ma fauina ala vai. Ae sa lei iloa e fanau a Lee sa matitiva i latou. Sa sauniaina e le aiga ma le Ekalesia ni avanoa mo faafiafiaga. O le mea sa pito faapelepeleina i totonu o le fale, o le piano. O se tamaitai mai Sikotilani sa ia sasaina le tamaitiiti ta piano pe a sese lona taina o se nota, sa aoaoina o ia [Harold] e taina le piano.



O le susuga a Peresitene Harold B. Lee



“Sa pito lelei lava le tātā piano a Harold. O se mea sa maitauina o le fiafia i le musika, sa totoina i na aso, sa aliali mulimuli ane a o avea o ia ma Taitaifono o le Komiti o Musika a le Ekalesia.

“O se taavale solofanua, sa masani ona aveina e lona tina, sa feaveaiina ai le fanau i maila e lua i le aoga ma le toe foi mai. E laitiiti lava le faapaologa sa maua mai i lea taavale a o agi malosi mai matagi mai matu ia Ianuari, ma o le palapala sa avea ma se faafitauli ina ua liu suavai le aisa i luga o le ala. Peitai o le olaga lava lea i Clifton. E pei ona fai mai Peresitene Lee sa ia te i matou mea uma e le mafai e tupe ona faatauina. Ma i nei mea sa ia te i latou sa mafai ona suitulaga mo mea e lei mafai ona maua. Sa mama ma manino le ea ma sa toeitiiti suamalie i le tofo. Sa peiseai o se tioata faasolo le manino o le vai, ma sa faigofie ona iloa atu le iila mai o maa i le taele o le vai. O fetu o le po sa tutu mai e peiseai o ni tagata—ma o mafaufauga o tamaiti na faamatalaina mea sa vaaia i le lagi. O timuga i le tauvevela sa peiseai o se manai sa pa’u i lena vaomatua, ma aumaia le ola i le eleele. Na oo mai le tautotogo i le aumaia o le lanu meamata i vaega o le eleele sa alu i ai le palau ma le fili saito. O enesini patapatatu, ma le asu sa fafaga atu ai le paoa e ala i pa’u tetele agai i masini sa gaosia le saito i lea taga ma lea taga o saito, sana vao ma le karite. . .

“Ina ua faamaeaina vasega o le aoga i le latou nuu, na ‘tuua [e tama] le aiga’ ina ia auai atu i le Oneida Academy, o se aoga faaitumalo a le Ekalesia i Preston e 15 maila lona mamao. Sa 13 tausaga o Harold i le taimi lea ma o iina na ia uluai feiloai atu ai ia Ezra Taft Benson [o lē sa avea ma Peresitene lona sefulutolu o le Ekalesia). Ona sosoo ai lea ma le Aoga a Albion State Normal i le isi itu o Idaho. O ina i le 17 o ona tausaga, na maua ai e Harold B. Lee lona tusipasi faafaiaoga. O se aso fiafia lea mo ia ma lona aiga. Sa ofoina atu e le Komiti o Aoga a le itumalo ia te ia se galuega e avea ma faiaoga i le Aoga laitiiti e tasi le potuaoga a Silver Star e i le va o Dayton ma Weston, i lalo mai o Clifton. E onosefulu tālā le totogi i le masina. E tausavali o ia i le sefulu maila i le solofanua i faaiuga o vaiaso.

“. . . O le tausaga na sosoo ai, na tofia ai o ia e le komiti e avea ma puleaoga o le aoga a Oxford e fa ona potuaoga. O se avanoa

sili lea mo se alii e 18 tausaga le matua. Sa malaga o ia i le solofanua mo le fa maila i le alu ma le toe foi mai i aso taitasi tusa lava pe timu, pe la, pe lelei le tau, pe leaga foi. Ona o ona tomai i le atiaaina o le taleni i musika ma le taaloga o le pasiketipolo, o lea ia aofia ai i gaoioiga faaalaalafaga i ona taimi avanoa. O aso ia a o avea lona tama ma epikopo, na faatoa tagai ai Harold i le polokalama o le uelefea a le Ekalesia, e pei ona sa ta'ua ai mulimuli ane. I lona taimi e pei ona i ai nei, o le Epikopo sa i ai le matafaioi o le tausaga lea o i latou o e na manaomia le fesoasoani. Sa faagaoioia e Epikopo Lee lona lava fale teuoloa, o oloa na aumaia mai lona lava potu teuoloa. I le po na vaaia e lona aiga o ia aveina se taga falaoamata, latou te le i iloaina pe o fea e ave i ai, talu ai ona sa matua tausisia tulaga o le le faalau'iteleina o i latou o e na puapuagatia, ina nei talanoa i ai nisi ma tupu mai ai le maasiasi o i latou oe na manaomia le fesoasoani.

“I lona taimi e pei ona i ai nei, o le aia tatau ma le tiutetauave o le Epikopo o le fautuaina lea o alii talavou mo ni misiona. Ua 21 nei tausaga o Harold ma ua fa tausaga talu ona faiaoga. Na oo mai se valaauga mai ia Peresitene Heber J. Grant ina ia galue i le Misiona a Setete i Sisifo.

“I totonu o faila o loo lokaina a le Matagaluega o Faifeautalai a le Ekalesia, o loo i ai se lipoti i le Au Peresitene Sili e uiga ia Elder Lee. O loo tusia ai le aso 30 o Tesema, 1922 ma na sainia e Peresitene John M. Knight. O loo tuuina mai ai le umi o lana auaunaga— mai le aso 11 o Novema, 1920, i le aso 18 o Tesema, 1922. Ona taliina lea o ni fesili eseese: ‘O lona agavaa—O se failauga “Lelei Tele.” O se tagata pulefaamalumu, “ Lelei.” E i ai sona malamalamaaga lelei e uiga i le Talalelei? “Lelei Tele.” Pe sa malosi o ia? “Lelei Tele.” Pe sa lava le tofa ma le uta ma pe na ia faia ni faatosinaga lelei? “Ioe”. Nisi faamatalaga: “Sa pulefaamalumu Elder Lee i le Konafesi a Denver i se tulaga maoae mai ia 8 Aokuso, 1921 e oo atu i le 18 Tesema, 1922. O se faifeautalai tulaga ese.”

“Sa i ai i lona misiona i le taimi lava lea se tamaitai talavou mai le Aai o Sate Leki, o Fern Lucinda Tanner. Sa lausilafia o ia e e na masani ia te ia, o se tamaitai atamai, lalalei ma o se tamaitai sa i ai sona atamai tulaga ese i tusitusiga paia. Ina ua faamaloloina

mai Elder Lee, na toe foi o ia i Clifton mo sina taimi puupuu ona toe alu ai lea i le Aai o Sate Leki e saili ma faauo atu i le tamaitai na ia maitauina ma mataiina i le misiona. Na faaipoipo i laua i le Malumalu i Sate Leki pe tusa ma le sefulutasi masina talu ona toe foi mai o ia.

“Na fananau mai ni o la alo teine lalelei se toalua, o Elena (o Mrs. L. Brent Goates mulimuli ane) ma Molini (o Mrs. Ernest J. Wilkins mulimuli ane). O le fale o Lee na avea ma se nofoaga e potopoto i ai tupulaga talavou i lena eria. O uiga tauagafau ma le tomai o le Faletua o Lee i le taulimaina o tulaga faigata na maitauina ma mata’ina e i latou o e na iloaina o ia. I se tasi mea na tupu sa faafilemuina ai e ia ni alii iloga se toalua na faitioina se tasi o tagata na latou fegalegaleai, ma faapea atu “Aua nei galo ona agalelei, i a oulua taumafaiga e faia le mea sa’o.”

“Sa toe aloaia foi uiga lelei na avea ai [Harold B. Lee] ma puleaoga o aoga e lua ina ua 18 ona tausaga. Ina ua toe faaaauu lana aoga i le Iunivesite o Iuta, sa filifilia o ia e avea ma puleaoga, muamua i le Aoga a Whitter, ona sosoo ai lea ma le Aoga a Woodrow Wilson i le Itumalo o Sate Leki. . . .

“Sa nofo o ia i le Siteki a Paionia ina ua maea lana faaipoipoga, ma sa faalausosoo ona maua e ia lea tofiga ma lea tofiga i le Ekalesia. Ma i le 1929, sa filifilia ai o ia o se fesoasoani i le au peresitene o le siteki. O le tausaga na sosoo ai na valaauiina ai o ia e avea ma peresitene o le siteki. Sa 31 ona tausaga i le taimi lea, o le peresitene o le siteki pito laitiiti lea i le Ekalesia.

“Sa pagatia le atunuu ma le lalolagi i le tulaga pau o le tamao-aiga. Sa matuai vave le pau o tau o oloa e pei o le pauu i lalo o poloka laau pei ni fagu i faataavalega polo. Sa le toe mafai ona nonoina mai ni tupe mai faletupe. Na tapunia faletupe ma ua lei-loloa ma le toe maua mai le miliona o tupe teu. Na matua faateleina le leai o ni galuega. Sa pule tamaloloa i o latou ola, ina ua faaleaogaina penefiti sa latou gapatia ai e faigaluega i tausaga e tele. Sa i ai ni fale e maua ai supo mo e manaomia, faapea foi ma laina uumi o tagata mo ni falaoa maua fua. Sa i ai le lagona faavaivai ma le faanoanoa. E silia ma le afa o tagata o le Siteki o Paionia sa leai ni galuega.

“O se luitau lea, o se luitau faigata mo le peresitene talavou o le siteki. Na popole, na tagi, na tatalo o ia, a o vaai atu o ia i alii sa femitai ma faatamaoagaina i le taimi muamua, ae ua solomuli ona o le le maua o ni galuega ma oo atu ai i se tulaga ua le mafai ona latou fagagaina o latou aiga. Ona oo mai ai lea o se musumusuga ina ia faatuina se fale teuoloa e mafai ona faaputuina ai meaa ma oloa ma tufatufaina atu i e matitiva. Sa faia ni galuega tuufaatasi, e le gata ina ia faaleleia le alaafaga, aemaise ai lava, ina ia mafai ai e alii ona maua le avanoa e galulue ai mo mea na tuuina atu i ai. Na talepeina se fale tuai na faia ai se pisinisi ae faaoga mea e fausia ai se faletaalo o le siteki mo mafutaga ma gaoioiga faafiafia mo tagata.

“Sa faia foi ni galuega tuufaatasi faapea a isi siteki, ma ia Aperila 1936, sa faatulagaina ma tuufaatasia i se polokalama na uluai ta’ua e Peresitene Heber J. Grant o le polokalama mo le saogalemu, ua ta’ua nei o le polokalama o le uelefea a le Ekalesia.

“Sa valaauina Harold B. Lee, o se taitai talavou a le Siteki o Paionia, na te faata’ita’ia pe faafoe le sã fou [polokalama o le uelefea] lea ua faatoa tuuina ifo i vasa sousou o na aso faigata ma le mativa. Sa matua ogaoga faafitauli. Sa matua faigata tele ona tuufaatasia faatoaga ina ia maua mai ai meaa ma fausia ni fale mo le gaosiga ma le teuina. Na sili atu foi le faigata o le taulimaina o uiga o tagata na faitio i le mea sa faia e le E kalesia ma ē na manatu sa tatau ona faatautaia e le malo le uelefea.

“Ae peitai, o le tatalo ma le faatauanau, o le galulue malosi ma loimata, atoa ai ma faamanuiaga a lē na ia ta’ua o le perofeta, na femalagaai solo ai o ia i siteki uma o Siona, ma i’u ina tulai, ma faatupulaia ma faamanuiaina le polokalama.

“O le tele o mea o loo faaogaina i le polokalama o le uelefea i le asō— o faatoaga ua faatupulaiaina le fuainumera, o nofoaga e gaosia ma tuuapaina ai meaa, o fale tetele mo le teuina o fatu meaa ma nofoaga e faamalūina ai, atoa ai ma isi galuega tuufaatasi o loo salalau solo i Amerika—o le faauauina lea o taumafaiga umi ma le maoae na faia i le amataga. E ui ina osofaiaina pea tulaga o polokalama o fesoasoaniga a le malo, ae o loo faauau

pea ona maua e polokalama a le Ekalesia le faamalo ma le faafetai mai tagata o le lalolagi atoa. Ua faasaoina ai le faitau miliona o tupe a tagata totogi lafoga ona o le laveai ua faia e le uelefea a le Ekalesia. Ua maua galuega aogā mo le faitau afe o alii ma tamaitai, e aofia ai i latou e le atoatoa le malosi o le tino ma le mafaufau o e e mafai ona maua avanoa e galulue ai mo mea latou te manaomia. O i latou o e na taliaina mea mai i lenei polokalama ua laveaiina mai 'i le fetuu lea o le ola paie ma le leaga o le maua fua o se mea e aunoa ma se galuega.' Na faatupulaiaina lo latou ola i le faamaoni ma le faaaloalo. Ma o le toatele o alii ma tamaitai o e na auai i le totoina ma le gaosiaina o meaai, ma isi galuega e tele, na molimauina le olioli e maua mai i le auauna atu i isi ma le le manatu faapito.

“E leai se tasi na molimauina aafiaga o’oo’o ma taunuuga matagofie o lenei polokalama e mafai ona lē faamaoniaina le agaga o faaaliga na mafai ai ona faataunuaina lea mea ma faateleina ai lona malosiaga mo le lelei. E tatau ona tuuina atu le faamalo ma le faafetai ia Peresitene Harold B. Lee, o lona uluai pule faatonu ma o se taitaifono i se taimi umi i le Komiti o le Uelefea a le Ekalesia, ona o le taitaiga musuia. I lona agaga maualalo na te teena ai lena mea, ma e sa’o lava, aua o le a ia tuuina tonu atu le faafetai ma le faamalo i le Alii. Ua silafia e le Alii, i le faamaluina o lana auauna, lona naunautai ma lona faatuatua. . . .

“Ina ua maea ona tofotofoina i le afi o na aso o le faigata o le faatoa amatalia o le polokalama o le uelefea a le Ekalesia, sa tofia loa e Peresitene Heber J. Grant ia Elder Lee e avea ma aposetolo, ma sa lagolagoina e avea ma se tasi o le Aufono a le Toasefululua i le aso 6 Aperila, 1941.

“I lena mea na tofiaina ai, na tusia e Elder John A. Widstoe i se mekasini e uiga i lona uso fou: ‘E tumu o ia i le faatuatua i le Alii; e faatumulia o ia i le alofa i ona uso a tagata, e faamaoni i le Ekalesia ma le Setete; na te faagalo o ia lava ona o lona nanautai i le Talalelei; ua faamanuiaina o ia i le atamai, malosi ma le sogasoga; ma ua faamanuiaina foi o ia i le mana faafailauga e aoao atu ai le afioga ma le finagalo o le Atua. O le Alii o lē na te alu i ai mo le fesoasoani o le a faia o ia ma tufuga aao malosi i le tauaveina i luma o le fuafuaga e faavavau o le faaola-

taga o tagata. . . . O le a foaiina ia te ia le malosi e sili atu nai lo se malosi ua ia iloa, a o tatalo tagata i le Alii mo ia.’ (*Improvement Era*, Me 1941, 288.)

“O upu moni lava nei e faamatalaina ai, ma o upu foi o valoaga.

“O lana tala . . . o se tala faamaoni i le paia tele o le faatuatua-ina o se aposetolo, o lona valaauga patino o le avea lea ma se molimau faapitoa ‘o le igoa o Keriso i le lalolagi atoa.’ [MFF 107:23.]

“I le faataunuaina o lena tiutetauave, na malaga atu ai o ia i le faatonuga a le Au Peresitene Sili i vaega e tele o le lalolagi, ma sii a’e ai lona siufofoga faafailauga, e folafola atu le paia o le Togiola o tagata.

“E masani ona ia ta’ua upu a Paulo i le au paia i Korinito: ‘Aua foi a faaletonu le leo o le pu, o ai ea se na te sauni e tau?’ (1 Korinito 14:8.) E leai se mea sa faaluafesasi i le savali a Harold B. Lee. Sa ia tuuina atu lana molimau i e maualuluga tulaga ma e foi e maualalalo, e aunoa ma lona faaaogaina o ni upu faauigalua e punitia ai le mea moni, faatasi ai ma lona mautinoa e maua mai i lona talitonuga maumaututu. E lei tausolomuli lava mai i lona tiutetauave o se auauna a le Atua i le tuuina atu o le molimau i le mea moni. Na faaosofia le galulue punouai o faifeautalai, o tagata o le Ekalesia ua faateleina lo latou faamoemoe ia ola ai i le talalelei, na tuia foi loto o tagata sailiili ao ia fofogaina lana molimau. Sa le i manumanu ia te ia lava ma sa ia tausisia se faatulagana maoti o ana mea e faia, e oo lava i taimi o le tulaga lamatia o lona soifua maloloina. Na iloaina e i latou na latalata ia te ia se vaitaimi umi sa aunoa ai o ia ma ni tiga. . . . O lona feagai ai ma ma’i ua faatupulaiaina ai lona lagona alofa mo puapuaga o isi. Sa avea o ia ma se tasi e malaga atu i atunuu mamao ma latalata foi e faamalosiau ma faamanuia i le Au Paia. O loo i ai i latou mai atunuu eseese ua molimauina ma le loto faafetai le ofofofia o le mana faavavega o le perisitua sa faaaogaina e lenei auauna a le Alii mo i latou.

“Sa faapea foi ona ia lagona le popole mo e ua tuua toatasi, o e atuatuvaale, faapea foi luitau o loo feagai ma alii o loo auauna i vaegaau. I tausaga o le Taua lona II a le lalolagi, o le Taua i Korea, ma le taua i [Vietnam], na ia faatonutonuina ai le poloka-

lama o alii fitafita a le Ekalesia. Ua atulasi ona faaalua ona lagona i le usoga i le manaomia o le tuuina atu ia i latou o loo auaua i vaegaau, le polokalama atoa a le Ekalesia, faatasi ma faamanuiaga ma avanoa uma o loo maua mai ai. Na malaga atu o ia i le laueleele ma le vasa ina ia feiloai ma tagata o le Ekalesia o loo auaua i vaegaau. I le 1955 na ia asiasi ai i Korea ao avea ma se nofoaga tele o le vaegaau ma na latou laeiina ni ofu malo mo galuega mamafa. . . . O le a le faagaloina lava e i latou na feiloai i ai lona agalelei, lona popolega, poo lana molimau i le pule sili-sili a le Atua i fuafuaga a tagata. Sa ia faamafanafana atu ia i latou, sa ia apoapoai atu ia i latou, sa ia laveiina le toatele mai le pauu atu i tulaga matautia.

“Sa ia faamafanafana ia i latou o e ua loto faavauvau. Mai mea na tutupu ia te ia ua ia iloa ai le tiga o le toesea o e pele. Na tuua e ia le Aai o Sate Leki ina ia auai i se konafesi a le siteki a o tau-fao le mai ma le magalo i le soifua o lana soa faapelepele. Sa malaga atu o ia i le po atoa, a o faanatinati atu i le mea o loo taoto ai o ia, e taunuu atu ua maliu. O i latou na latalata ia te ia i aso o le pogisa ina ua mavae lona maliu, sa lagonaina se faalagona loloto o le faanoanoa na oo i ai o ia. Na tupu lena mea i le 1962. I le 1965 sa maliu ai foi lona afafine faapelepele o Maurine a o i ai Elder Lee i Hawaii i se tofiga o le Ekalesia. Sa tuua e ia lana fanau e toafa.

“O nei aafiaga tiga na oo i ai o ia, e faigata ona onosaia, na faatupulaiaina ai lona lagona alofa i mafatiaga o isi. O i latou ua i ai foi i tulaga o le motusia o mafutaga ona o le oti ua latou mauaina se uo faamalosiua ma o se tasi ua tofotofoina lona lava faatuatua ma ua avea lea ma puna o le malosia i latou.

“I le 1963 na ia faaiipoipo ai ia Freda Joan Jensen, o lē sa faatoatoaina ai lona soifua i se tulaga ofoofogia. O ia [Freda] o se tagata atamai faaleaoaoga ma maoae, ae ua nofo i le fale i le sosaiete e aupito sili. O ia o se tamaitai e tulaga ese ni mea na ia ausiaina i lana lava aia tatau. Na aoaoina o ia e avea ma faiaoga, ma sa faiaoga i aoga, ona siitia lea i tulaga eseese tau i le pulega ma avea ma supavaisa o aoga tulagalua i le Itu Faaleaoaoga o Ionatana i le Itumalo o Sate Leki. Na galue foi o ia i le au faatonu aoao a le Faalapotopotoga a le Peraimeri. O le aiga sa ia faatau-

taia sa avea o se nofoaga filemu mo lana tane ma o se nofoaga sa talia ai ma le agalelei i latou uma sa mafai ona ulufale atu i ai.

“Ina ua silafia e Peresitene Tavita O. Makei le atamai tele o Elder Lee i polokalama a le Ekalesia, ma le faamaonia o ona tomai i mea tau pulega, o lea na tofia ai loa o ia e avea ma taitaifono i le komiti faamaopoopo a le Ekalesia. O iina na afua mai ai se iloiloga tele o mataupu o aoaoga sa faaaogaina mo ni tausaga se tele, faatasi ai ma se suesuega auiliili o faalapotopotoga uma ma mea e fai ai aoaoga. O le taumafaiga tele sa faia i lalo o lana taitaiga na mafua ai ona maua le maopoopoga o mataupu e aoaoina ia ua fuafuaina e faasafua atu ai le malamalama e uiga i vaipanoa uma o gaoioiga ma aoaoga faavae o le Ekalesia, ma galueaina ai le ola faaleagaga o tagata auai. Sa maitauina le malosi o lana taitaiga i lenei galuega. Sa tumau o ia i le naunautai ma le faagaetia, sa manino foi le faaupuina o ona faamoe-moega. Ua aea le Ekalesia atoa i lana auaunaga.

“O le maliu o Peresitene Makei, ma le suitulaga atu ai o Iosefa Filitia Samita e avea ma Peresitene, sa avea ai le susuga a Lee ma Peresitene o le Aufono a le Toasefululua, ma sa filifilia e Peresitene Samita e avea o ia e fai ma ona fesoasoani muamua. Ona o nei tulaga manaomia, sa faamalolo mai ai loa o ia mai le avea ai ma taitaifono i nisi o gaoioiga sa ia tauaveina muamua, ae o faamoemoega lava e tasi na tulimataia i lalo o lana taitaiga aoao. Sa faatulagaina polokalama ina ia faaleleia atili ai tulaga o faiaoga i le Ekalesia. Sa faagaioia se polokalama e aoao ai epikopo. Sa faamalosi le polokalama faafaifeautalai i le lalolagi atoa.

“Ina ua toesea filemu Peresitene Iosefa Filitia Samita mai lenei olaga ina ua maliu i le afiafi o le aso 2 Iulai, 1972. Sa leai se faaletonu i mafaufau o le Aufono a le Toasefululua poo ai o le sui e avea ma Peresitene o le Ekalesia. I le taeao o le aso Fraraile, 7 Iulai, na latou potopoto faatasi ai i le potu faapitoa paia o le malumalu i Sate Leki. I lena nofoaga filemu ma le paia, faatasi ai ma loto faamaulalo, na latou saili atu ai i musumusuga a le Agaga. Sa foliga ua tasi o latou loto e tali atu ai i na musumusuga. O Harold Bingham Lee, ua filifilia e le Alii, sa aoaoina mai lona laititi i mataupu faavae o le talalelei toefuataiina, sa polesiina ma faaleleia mo tausaga e tolusefulutasi i lana auaunaga faaapose-



tolo, sa avea ma Peresitene o le Ekalesia a Iesu Keriso o le Au Paia o Aso e Gata ai, perofeta, tagata vaai ma tali faaaliga. Sa faaee aao o i latou uma sa aofia ai, i luga o lona ulu, ma sa faauuina ai o ia e avea ma lē ua faauuina e le Alii i lea valaauga mamalu ma le le mafaatusalia.

“Sa tulai o ia o le faitaulaga sili pulefaamalumu i le malo o le Atua i le lalolagi, a o lagolagoina e ala i le faatuatua ma tatalo a le Au Paia i le lalolagi atoa.

E 17 masina ma aso e 19 sa galue auauna ai le susuga a Persitene Harold B. Lee o le perofeta a le Alii. I lea taimi o suiga ma le faatuputeleina, sa faafoeina e Peresitene Lee le faatuina o uluai siteki i Chile ma Asia i Korea. Sa pulefaamalumu o ia i uluai konafesi faaeria i le Aai o Mekisiko, i Mekisiko, ma Munich, i Siamani. Na ia faalauteleina le auaunaga a le polokalama faauelefea i le lalolagi atoa. Na maliu o ia i le Aso 26 Tesema 1973 ina ua 74 tausaga o lona.



# O le Ala i le Ola e Faavavau

*E faapefea ona tatou ausia la tatou sini autu—o le toe foi atu lea i le Atua, o le na aumaia le ola ia i tatou?*

## Faatomuaga

I lana auaunaga atoa, na faamamafaina mai ai e Peresitene Harold B. Lee o le faamoemoega autu o le talalelei a Iesu Keriso ia mafai ona tatou toe foi atu i le afioaga o lo tatou Tama Faalelagi. Na masani ona ia aoao mai le taua o le savavali ma le faatuatua seia oo ina tatou taunuu i la tatou sini faalelagi.

Sa fetau tonu lava le auaunaga a Peresitene Lee ma le vaitaimi o le amataliaina o sailiiliga i le vateatea i le vaitau o le 1960 ma le amataga o le vaitau o le 1970. I se faalavelave na tupu i le 1970 na faamalositia ai le auvaa o le vaa o le vateatea o le Apolo 13 e toe vave foi mai i le laueleele mai vaega o le masina, na maofa Peresitene Lee i le malupuipua o le taulai atu i faatonuga ma le faatinoga patino e manaomia mo le aumaia saogalemu o nei alii i le fogaeleele. Na ia faatusalia lenei mea na tupu i le faatuatua ma le usiusitai e manaomia ina ia taunuu atu ai la tatou faigamalaga mai le olaga faitino e agai atu i lo tatou aiga faalelagi. I se lauga i le konafesi aoao ia Oketopa i le 1970, na ia faaaogaina ai le tala i le vaa o le vateatea o le Apolo 13, o le Akarasi, e faaalua ai le taua o le tausisia o le ala ua fuafuaina e le Alii mo i tatou e mulimuli ai.

Sa faaaauu pea ona faamamafaina i savali a Peresitene Lee o le sini autu o lenei faigamalaga i le olaga nei, o le toe foi atu lea i lo tatou Tama o i le Lagi. O nei savali e mafai ona fesoasoani ia i tatou ia iloa “o soo se mea tatou te faia i le olaga, soo se faaiuga tatou te faia, [e] fuafua faatatau lava i le atinaeina o se olaga e mafai ona faatagaina ai i tatou e ulu atu i le afioaga o le Alii lo tatou Tama Faalelagi.”<sup>1</sup>



Na tofia Peteru ma Anetelea e Iesu Keriso. E manaomia le Togiola a le Faola ina ia taunuu ai le ata o le faaolataga a le Tama. E mafai e tagata taitasi ona taunuu saogalemu atu i lana “faigamalaga mai lenei olaga e agai atu i lona taunuuga faatumutumuina—o le toe foi atu lea i lona Atua na foaiina mai ia te ia le ola,” e ala i le mulimuli i le Faola.

O lenei mataupu, o loo faataatia mai ai e Peresitene Lee le ala e mafai ai ona tatou toe foi atu ma le filemu ma le saogalemu i le afioaga o lo tatou Tama Faalelagi.

## **O Aoaoga a Harold B. Lee**

---

### **E faapefea ona taitaiina i tatou i le saogalemu i nei taimi o faigata?**

I ni nai masina talu ai, na taufai faatalitali atu ai ma le popole ma le naunautai le faitau miliona o tagata maimoa ma tagata faalogologo i le malaga matautia a le Apolo 13. E foliga mai na taufai tatalo le lalolagi atoa mo se taunuuga taua e tasi: o le taunuu saogalemu mai lea i le laueleele o alii totoa e toatolu.

Ina ua faasilasilaina mai ma le popole e se tasi o i latou se faamatalaga faateia, “Ua i ai se mea ua pa o la matou vaal’ na saunia vave loa e le nofoaga faatonutonu i Houston i latou uma e i ai le agavaa ma le aoaoina faasaientisi o e, i tausaga e tele, na fuafuaina ia auiliiliga uma e faatatau i lena faigamalaga.

O le saogalemu o i latou na e toatolu ua faalagolago nei i ni agavaa taua se lua: o le faamoemoe lea i le tomai ma le malamalama o le aufaigaluega i le nofoaga faatonutonu autu i Houston, ma le matua usiusitai lelei o alii o le auvaa o le Akarasi i faotunuga uma mai le aufaigaluega o e, ona o lo latou malamalama i faafitauli o le auvaa, na faaagavaa atiliina ai i latou i le mauaina o ni vaifofo taua. Na tatau ona matua sa’o atoatoa faaiuga a enisinia, semanu e faitau fia afe maila e sē ese ai le Akarasi mai le laueleele.

O lenei mea matautia na tupu e tai tutusa ma nei taimi [fesouaina] ua tatou i ai nei...E toatele o loo matatau pe a latou vaai ma faalogo i mea e faigata ona talitonuina o loo tutupu i le lalolagi atoa—o faiga masalomia faaupu fai, o taua ma fefinauaiga i soo se mea, o atugaluga o matua i le taumafai e taulimaina faafitauli faalevafealoai o loo lamatia ai le paia o le aiga, o atugaluga o le fanau ma le autalavou a o feagai ai i latou ma luitau i lo latou ola amiotonu ma lo latou ola mama.

E na o *lou* naunautai lava e te faalogo ma usiusitai, e pei ona sa faia e le auvaa o le Akarasi, e mafai ai ona taitaiina oe ma lou

auaiga i le puipuiga aupito maualuga ma le saogalemu i le ala a le Alii lava ia. . . .

Mai i le mea na tupu i le Apolo 13..., o le a ou avea sina taimi e tuuina atu ai se oototoga puupuu o le fuafuaga ua matagofie lona fuafuaina e faatautu i le usiusitai lea o loo faalagolago i ai le faaolaina o agaga uma lava i lana faigamalaga i le olaga faitino e agai atu i lona taunuuga faatumutumuina—o le toe foi atu lea i lena Atua na foaiina mai ia te ia le ola. . . .

---

### **O a faamoemoega o le fuafuaga a lo tatou Tama Faalelagi?**

O lenei fuafuaga ua iloagofie i se igoa, ma o le faamoemoega autu ua tuuina atu manino i se faasilasilaga i le Ekalesia i le amataga o lenei tisipenisione faaletalalelei.

E sili atu ma se senituri ua mavae na faailoa mai ai e le Alii:

“Ua faapea lava ona ou auina atu la’u feagaiga e faavavau i le lalolagi, e fai ma malamalama o le lalolagi ma e fai ma tagavai mo lo’u nuu, ma nuu ese e saili i ai, e avea ma avefeau mo a’u e teuteu le ala i o’u luma” (MFF 45:9.)

O lenei la fuafuaga, sa avea o se feagaiga, lea na faaalua ai se malilie e faia i se tagata e sili atu ma le toatasi e faaaafiaina ai le sili atu i le tagata e toatasi. E tataua ona avea ma se tagavai mo e filifilia a le Alii ma mo le lalolagi atoa e manuia ai. O lona faamoemoega ia taulimaina ai tulaga manaomia o tagata uma, ma saunia ai le lalolagi mo le afio faalua mai o le Alii.

O e na aofia ai i le faataatiaina o lea fuafuaga i le muai olaga i le lalolagi o agaga, o fanau agaga uma lava a lo tatou Tama Faalelagi. O a tatou tusitusiga paia aupito leva, mai lava i tusitusiga a perofeta anamua o Aperaaamo ma Ieremia, o loo faamautuina ai foi o le Atua, poo Elohimia, sa i ai iina; o lana Atalii Ulumatua, o Ieova; Aperaaamo; Ieremia; ma isi tagata taua e toatele sa i ai foi iina.

O malamalama uma sa faatulagaina ae lei faavaeina le lalolagi, o e na avea ma agaga, sa i ai iina, e aofia ai ma le toatele o e tau-taua ma le maoae o e ua faagavaaina i latou i a latou galuega ma a latou amioga e avea ma pule ma taitai i le faataunuaina o lenei fuafuaga e faavavau. . . .

Na faia ma faatulagaina le lalolagi, ma mea uma o i ai, i lalo o le poloaiga a le Tama ma le taitaiga a Ieova. Sa latou “poloai” atu, “vaaia” ma “sauniuni” le fogaeleele. Na latou fono e tusa ai ma le aumaia o ituaiga uma o mea e ola i le fogaeleele ma mea uma e aofia ai le tagata, ma saunia o ia mo le faataunuuina o le fuafuaga, lea e mafai ona tatou faatusaliaina lelei i se ata faataatia o se fale, lea e mafai ona aoaoina ma faamalamalamaina ai le fanau a le Atua i mea uma e tatau ai mo le faamoemoega faalelagi o le faataunuuina lea, “i le mamalu o le Atua,” o le avanoa e mauaina ai e agaga uma “le tino ola pea ma le ola e faavavau.” O le ola e faavavau o lona uiga o le maua lea o le ola e faavavau i lena malo selesitila i le mea o loo affio ai le Atua ma Keriso, e ala i le faia o mea uma ua poloaiina ai i tatou. (Tagai i le Aperaamo 3:25.)

---

### **O a mataupu faavae autu o le ata o le faaolataga?**

Na aofia i le fuafuaga ni mataupu faavae maumaututu se tolu:

Muamua, ia maua e agaga taitasi le avanoa e filifili ai mo ia lava le “saolotoga ma le ola e faavavau” e ala i le usitaia o tulafono a le Atua poo le “faatoilaloina ma le oti” i mea faaleagaga ona o le le usiusitai. (Tagai i le 2 Nifae 2:27.)

E pito atu i le ola lava ia, o le filifiliga saoloto o le meaalofo aupito sili lea a le Atua i le tagata, ua aumaia ai le avanoa silisili mo le fanau a le Atua e alualu ai i luma i lenei tofi lona lua o le olaga faitino. O se taitai perofeta i lenei konetineti na ia faamalamalamaina lenei mea i lona atalii e pei ona sa tusiaina i se tusitusiga paia o anamua: ina ia faataunuuina ia mea, o faamoemoega e faavavau o le Alii, e tatau ona i ai le faafeagai, o se faatosinaga i le lelei i le tasi itu ae faapea foi i le leaga i le isi itu, pe o le faaupuna foi i le gagana o tusitusiga paia “o le laau lava ua faasaina e feagai ma le laau o le ola; e suamalie le tasi, ae oona le isi.” Sa faamalamalamaina atili mai e lenei tamā, “O le mea lea na foai mai ai e le Alii le Atua le faitalia i le tagata. O le mea lea e le mafai ai ona filifili le tagata, sei iloga ua faaosoina o ia, e le tasi po o le isi.” (2 Nifae 2:15-16.)

O le mataupu faavae maumaututu lona lua i lenei fuafuaga faalelagi na aofia ai le manaomia o le sauniaina o se faaola ma o lana togioala na avea ai ma o tatou Faaola le Alo sili ona pele o le Atua,

o se “Tamai Mamoe na fasia talu ona faavaeina o le lalolagi” (Faaliga 13:8), e pei ona sa faaalua ia Ioane i le Motu o Patamo. Na faamalamalamaina mai [e le perofeta o Liae] ia le misiona a le Alo o le Atua o le “fautua. . .mo le fanauga uma a tagata; ma [o] i latou o e faatuatua ia te ia, e faaolaina i latou (2 Nifae 2:9.)

Tatou te faalogo soo mai i nisi e itiiti lo latou malamalamaaga e uiga i le mafai ona faaolaina o se tasi i le na’o le alofa tunoa lava. Ae peitai e manaomia le faamalamalamaga a se isi perofeta ina ia malamalama ai i le aoaoga faavae moni o le alofa tunoa a o ia faamatalaina i upu ‘anoa nei:

“Aua” na faapea mai ai lenei perofeta “ua matou galulue ma le maelega ina ia tusitusi e faaoleole i a matou fanau, atoa ma o matou uso, ia talitonu ia Keriso, ma ia lelei ma le Atua, aua ua matou iloa e faaolaina i tatou i le alofa tunoa pe a uma ona faia mea uma tatou te mafaia.” (2 Nifae 25:23.) E moni e faaolaina i tatou e ala lea i le toto togiola a le Faaola o le lalolagi, ae peitai e faalagolago lea i le mae’a ona faia e tagata taitasi o mea uma na te mafaia ina ia galue ai mo lona lava faaolataga.

O le mataupu faavae sili maumaututu lona tolu i le ata o le faaolataga o le sauniaina lea o le “faaolaina o tagata uma lava, pe a tausia poloaiga ma sauniga o le Talalelei” ( Mataupu Faavae o le Faatuatua 3.) O nei tulafono faavae ma sauniga lea e oo mai ai le faaolataga o loo manino lona faataatiaina mai.

Muamua, o le faatuatua i le Alii o Iesu Keriso.

Lona lua, o le salamo mai agasala, o lona uiga o le liliuese mai agasala o le le usiusitai i tulafono a le Atua ma ia le toe foi atu lava i ai. Na fetalai manino mai le Alii e uiga i lenei mataupu. Na faapea mai o ia: “...ina o atu ia ma aua le toe agasala; a o lē agasala (o lona uiga o le toe foi i agasala ua ia salamo mai ai) o le a toe foi mai ai agasala muamua, o loo faapea mai ai le Alii lo outou Atua.” (MFF 82:7.)

Lona tolu, o le papatisoga i le vai ma le Agaga, ua na o le pau nei o sauniga, e pei ona sa aoaoina e le Matai ia Nikotemo, e mafai ai e se tasi ona vaai pe ulu atu i le malo o le Atua. (Ioane 3:45.)

O lenei lava aoaoga sa uunaia malosi mai e le Faaola toetu i le au paia i lenei konetineta, i se tulaga e foliga mai o lana sau-

noaga mulimuli i lona au soo. Na aoao atu le Matai i lana au paia faamaoni “E le sao atu i lona malo se mea ua le mama, o le mea lea e le sao atu ai se tasi i lona malologa, na o i latou o e ua faamamaina o latou ofu i lo’u toto, ona o lo latou faatuatua, ma le salamo i a latou agasalala uma, ma lo latou faamaoni e oo i le gataaga.

“O le poloaiga lenei, ina salamo ia outou tuluiga uma o le lalolagi ma o mai ia te au, ma ia papatisoina i lo’u igoa, ina ia faapaiaina outou i le Agaga Paia tou te talia, ina ia outou tutu ma le le pona i o’u luma i le aso gataaga.

“E moni, e moni, ou te fai atu ia te outou, o la’u talalelei lenei...” (3 Nifae 27:19-21.)

---

### **O a faamanuiaga ua folafola mai mo i latou o e faamaoni?**

Afai e usitaia e le fanau a le Atua, e aofia ai i latou uma i luga o lenei fogaeleele tusa lava poo le a le nuu, lanu poo le lotu, le valaau a le avefeau moni o le talalelei a Iesu Keriso, e pei ona sa faia e le auvaa e toatolu i luga o le Akarasi i alii tomai faapitoa i le Nofoga Faatonutonu i le itula o le faalavelave, o le a i ai le taimi e vaai ai tagata taitasi i le Alii ma iloa o loo i ai o Ia, e pei ona folafola mai e le Alii....

O lenei folafolaga o le mamalu o loo faatalitali mai mo i latou o e faamaoni e oo i le iuga sa faalia manino i le faataoto a le Matai i le Atalii Faamaumau oa. I le atalii sa faamaoni ma na te le’i lafoaia lona tofi o le ulumatua, o le tamā, o lē o loo i le aoaoga a le Matai o lo tatou Tama ma lo tatou Atua lea, na folafolaina atu i lenei atalii faamaoni: “Tā e, ta te nonofo pea ma oe, o a’u mea uma foi o āu ia.” (Luka 15:31.)

I se faaaliga e ala mai i se perofeta o ona po nei, ua folafola mai e le Alii i e faamaoni ma e usitai i le asō: “...o le a tuuina atu ia te ia mea uma o i ai i lo’u Tama” (MFF 84:38)

Pe tatou te pei ea o i latou o e valea i luga o le vaitafe i luga ae o le Afu o Naiakara o e na agai atu i ave malolosi matautia o le vai? E ui i lapataiga a leoleo o le vaitafe ia agai atu i le mea o loo i ai le saogalemu ao lei oo i se tulaga lamatia, ma i le matua le



amaniaiaina lava o lapataiga, na latou taliē, na latou sisiva, na latou feinu, na latou tauemu, ma na faaumatiaina lava i latou.

Semanu e faapena foi le taunuuga o le auvaa e toatolu i luga o le Akarasi pe ana latou teenaina le usitaia o faatonuga pito sili ona itiiti mai le Nofoga Faatonutonu i Houston. Sa faalagolago o latou lava ola i le usitaia o tulafono autu lea e puipuia ma puleaina malosiaga o le vanimonimo.

Na tutulu Iesu a o ia molimauina le lalolagi o loo siomia o ia i ona aso lea na foliga mai ua valelea ma na tauemu pea i lona faatauanau atu ina ia latou o mai ia te ia i le “ala sao ma le vaapiapi,”lea na matua manino lona faataatiaina mai i le ata o le faaolataga e faavavau a le Atua.

Oi, pe ana mafai ona tatou toe faalogo i lona faatauanau mai i le asō e pei ona sa ia aioi atu ai: “Ierusalem e, Ierusalem e, o lē fasiotia perofeta, ma fetogi i maa i e ua aauina atu ia te oe; ua tele lava o’u manao e faapotopoto i lau fanau, e pei o le moa ona ofaofatai i lana toloai i ona apaau a e lei mafafai outou! (Mataio 23:37.)

Oi, pe ana mafai ona vaai le lalolagi i se isi faataoto ia Ioane le Tali Faaaliga i foliga paia o le Matai o loo valaau mai ia i tatou e pei ona sa ia faia ia i latou o Ierusalem:

Na fetalai le Matai, “Faauta ou te tu atu i le puipui ma tu’itu’i atu, ai se tasi e faalogo mai i lo’u leo, ma tatala mai le puipui, ou te ulufale atu ia te ia, ma te tali sua foi ma ia, o ia foi ma au.

“O lē manumalo ou te avatua ia te ia ma te nonofo faatasi ma au i lou nofoalii, e pei o au foi ona ou manumalo, ua ma nonofo foi faatasi ma lo’u Tama i lona nofoalii.” (Faaliga 3:20–21.)

O lenei la, le ata o le Faaolataga e pei ona aoaoina mai e le Ekalesia moni, o loo faavae i luga o aposetolo ma perofeta, faatasi ma Keriso, le Alii, o le maa tulimanu (Efeso 2:20), lea e na o le filemu e oo mai ai, e le pei ona aumaia e le lalolagi, ae e pei ona aumaia e na o le Alii lava, ia i latou o e faatoilaloina mea o le lalolagi, e pei ona sa faia e le Matai.

“E leai foi se tasi ua i ai le ola, e leai lava se isi igoa i lalo o le lagi ua foaiina mai i tagata e mafaia ona faaolaina ai o i tatou.” (Galuega 4:12). . .

---

## **E mafai faapefea e a tatou amioga i aso taitasi ona uunaia i tatou i luma i le ola e faavavau?**

I se tasi sauniga lotu talu ai nei na ou faalogo ai i se molimau faamafanafana loto a se tamaitai talavou. Na tigaina lona tama i se mai na taua e fomai o se mai ua le mafai ona togafitia. I se tasi taeao ina ua maea se po o le tiga ma le mafatia na fai atu ai ma ni lagona sili lenei tama mafatia i lona toalua, “Ou te matua faafetai lava i le asō.” “Mo le a?” o le fesili lea a lona toalua. Na ia tali mai “Mo le avanoa ua aumaia e le Atua ou te toe faatasi ai ma oe mo se isi aso e tasi.”

O le asō ou te manao ai ma lo’u loto atoa ina ia mafai e i latou uma o loo faalogo mai i le leo o lenei faasalaluga ina ia faapena ona faafetai i le Atua mo se isi aso e tasi! Mo le a? Mo le avanoa e faamaeaina ai ni feau e lei maea. E salamo ai; e faasa’o ai ni sese; e faia ai ni aafiaga lelei mo se tamaitiiti ua faalogogata; e aapa atu ai i se tasi o loo tagi mai mo le fesoasoani—pe a faapuupuuna, ia faafetai i le Atua mo se isi aso e tasi e saunia ai e fetaii ma le Atua.

Aua nei taumafai e ola ma le manatu o loo i ai pea ni aso se tele o loo i le lumanai. Saili mo le malosi e taulimaina ai faafitauli o le asō. I lana Lauga i luga o le Mauga, na apoapoi mai ai le Matai: “O lenei, aua tou te popole i le aso a taeao; aua e popole le aso a taeao i ana lava mea. E tatau i le aso lona lava leaga.”(Mataio 6:34.)

Fai mea uma e te mafaia ae tuu mea o loo totoe i le Atua, le Tama o i tatou uma. E le lava le faapea atu, o le a ou faia le mea sili ou te mafaia, ae peitai ia faapea atu, o le a ou faia mea uma e oo i ai lo’u malosi; o le a ou faia mea uma e tatau ai.<sup>2</sup>

---

## **Fautuaga mo Suesuega ma Talanoaga**

- O a ala o loo faaalua ai e le ata o le faaolataga a le Tama Lona alofa tele mo i tatou?
- E faapefea e se malamalamaaga i le ata o le faaolataga ona aumaia le filemu i lou olaga?

- Aisea e tatau ai ona i ai le filifiliga saoloto pe afai tatou te toe foi i le Atua? Aisea e tatau ai ona i ai le Togiola? Aisea e tatau ai ona tatou usitai i mataupu faavae ma sauniga o le talalelei?
- O a nisi o taunuuga o le alu ese mai le ala ua faataatia mai e le Tama Faalelagi mo i tatou e mulimuli ai?
- O a ni mea e mafua ai ona le iloaina e tagata i nisi taimi le sini o le toe foi atu i le afioaga o le Tama Faalelagi? O a apoapoaiga e mafai ona tatou tuuina atu i tagata o aiga poo isi ua leiloa lo latou ala?
- Aisea e taua ai le auauna atu i aso taitasi? le faaalua o le loto faafetai i aso taitasi? le salamo ma taumafai e faatoilaloina o tatou vaivaiga? E faapefea ona fesoasoani le faia o nei mea taitasi e saunia ai i tatou e fetai ai ma le Atua?

### *Faamatalaga*

1. I le Conference Report, Oketopa 1946, 145.

2. I le Conference Report, Oketopa 1970, 113–17; poo le *Liabona*, Me 1971, 30.



## O Ai A'u?

*E fesoasoani faapefea lo tatou iloaina pe o ai  
i tatou mo le mauaina o le ola e faavavau?*

### Faatomuaga

“**S**a [sau] se faiaoga talavou o le Aoga Sa i se tasi aso e tuuina mai se fesili le mautonu na fesiligia ai o ia e lana vasega i le aso Sa na tuana'i atu,” na saunoa atu ai Peresitene Harold B. Lee i se faapotopotoga o le Au Paia. “Na faamatalaina e ia sa latou talanoa e uiga i le muai olaga, ma le olaga lenei, faapea le olaga a sau, ma sa fesili se tagata talavou o le vasega o le Aoga Sa, “Na faamutaina le muai olaga ina ua tatou fananau mai i lenei olaga faitino, o le olaga lenei e faamutaina pe a oo mai le oti; o le a le tau-nuuga o le olaga a sau? Pe o le a galo atu ea? Sa faapea atu le faiaoga talavou o le Aoga Sa, ‘E le o ia te au le tali.’”

“Ao o’u mafaufau e uiga i ai na ou faapea atu, tatou te soona faaaogaina upu pe a tatou talanoa e uiga i le ‘muai olaga, ma lenei olaga, ma le olaga a sau’ e peiseai o i tatou o se pusi e tele ni ola ae o le mea moni e tasi lava lo tatou ola. O lenei olaga o loo tatou talanoa i ai e lei amataina i lo tatou fananau mai i le olaga faitino. E le iu foi lenei olaga i le oti faaletino. O loo i ai se mea e lei foafoaina pe gaosia foi. Na ta’ua e Tusitusiga Paia lea mea o le ‘agaga’, lea na i ai se tulaga faapitoa na faatulagaina ai e aveva ma se ‘tagata agaga.’ Ina ua uma ona tuputupu ae lona agaga i se tulaga faapitoa, ona tuuina lea i ai e le Tama o lē ona le poto uma lava, o le avanoa e oo atu ai i se isi laasaga mo lona atinaeina. Na faaopoopoina atu ia te ia, ma ina ua uma ona soifua ai i le umi e tataua ona ola ai i le olaga faitino ma ua ia mauaina lona faamoemoega i le olaga faitino, ona oo foi lea i se isi suiga. O le mea moni, tatou te le o atu i se isi olaga, ae tatou te o atu i se isi laasaga o le ola lava e tasi. O loo i ai se mea e lei foa-

foaina pe na gaosia foi, ma o se mea e le oti lava, ma o lena mea o le a ola e faavavau.”<sup>1</sup>

O lenei mataupu o loo talanoaina ai lo tatou tupuaga e faavavau ma le ala o loo aafia ai o tatou olaga i le iloaina o lenei tupuaga.

## O Aoaoga a Harold B. Lee

---

### **E faapefea ona faamanuiaina i tatou i lo tatou iloaina o i tatou o atalii ma afafine faaleagaga o le Atua?**

O ai ea i tatou? Na tusia e le Aposetolo o Paulo: “Auā foi sa ia i tatou tamā o o tatou tino e na aoai mai ia i tatou, sa tatou faalogo i ai, a e le sili ea i se a ona tatou usiusitai i le Tama o o tatou agaga tatou te ola ai?” [Eperu 12:9] o loo faaalai mai ai o i latou uma o e o loo ola i luga o le fogaeleele o e o loo i ai o latou tama i la le tino sa faapea foi ona i ai se tama o o latou agaga... . . Na faapea atu le Alii ia Mose ma Arona, “Ina vavae ese ia oulua i lenei faapotopotoga, seia ou faaumatia i latou e pei o se emo o le mata.” Na faatupuina lona toasa i nei tagata amioletonu, ae peitai na ifo toele Mose ma Arona ma faapea atu, “Le Atua e, o le Atua o agaga o tagata uma, a agasala le tagata e toatasi, e te toasa mai ai ea i le faapotopotoga uma lava?” [Numerā 16:21-22.] Pe na maitauina le faalupeina o Ia? O le Atua o agaga o tagata uma. . . .

O se tasi o tusitusiga paia aupito sili ona loa ua oo mai ia i tatou i se auala faavavega— ua ta’ua e i tatou o le Penina Tau Tele. O se tasi o tusi sili o lena tusitusiga paia taua, ua ta’ua lea o le tusi a Aperaamo. I totonu o lena tusi. . . o loo tatou mauaina ai nei faamatalaga:

“O lenei, sa faaali mai e le Aii ia te au, o Aperaamo, agaga na foafoaina a o lei i ai le lalolagi ma sa i ai faatasi ma i latou uma na le toatele o e tautaua ma le maoae;

“Ma sa silasila atu le Atua i ia agaga ua lelei, ma sa ia tu i lo latou lotolotoi ma faapea atu: O le a ou faia ia avea i latou nei ma au faipule aua sa ia tu i le lotolotoi o i latou o e o ni agaga, ma sa ia silasila atu ua lelei i latou; ona ia fetalai mai lea ia te au: Aperaamo e, o oe lava o se tasi o i latou ia; na filifilia lava oe ae e te lei fanau mai.

“Ona tulai ai lea mai ia i latou o se tasi ua faapei o le Atua, ma ua faapea atu i e na i ai faatasi ma ia: Ina tatou o ifo ia i lalo, aua o loo avanoa lava, ma tatou ave nei mea ma tatou faia ai se lalolagi e nonofo ai i latou nei;

“Ma o le a tatou faataitai ai i latou, ia iloa ai, pe latou te faia mea uma e poloaia ai i latou e le Alii lo latou Atua;

“Ma o i latou o e e tausia lo latou uluai tofi, e faaopoopoina ia i latou, a o i latou o e le tausia lo latou uluai tofi, o le a latou le maua le mamalu o lea malo, faatasi ma i latou o e na tausia lo latou uluai tofi; ma o i latou foi o e e tausia lo latou tofi lona lua, o le a faaopoopoina i luga o o latou ulu le mamalu e faavavau faavavau lava.” [Aperaamo 3:22–26.]

O lenei e tele mea moni taua o loo maua i totonu o lenei mau. O le mea muamua, ua tuuina mai na o se faaataataga ia i tatou, ua na o se ata faaemo i le mea ua ta’ua o le agaga. O agaga, e pei ona e faalogo atu ia Aperaamo na faapea mai, o se malamalama faatulagaina lea na ola o se agaga a o le’i i ai lenei lalolagi. O le amataga muamua lea o lo tatou malamalamaaga i le mea ua ta’ua o le agaga. O se malamalama faatulagaina lea na ola o se agaga ae lei i ai lenei lalolagi. E faapei la foliga o le agaga? O le a le ituaiga malamalamaaga ua e maua e uiga i lenei agaga? Ua tuuina mai e le Atua e ala mai i le Perofeta o Iosefa Samita, se tali musuia, o se vaega o lenei tali e faitauina faapea: “O le mea faaleagaga e foliga lava i le mea faaletino; ma o le mea faaletino, e foliga lava foi i le mea faaleagaga.” Faafofoga foi, “o le agaga o le tagata e foliga lava i lona tino, faapea foi le agaga o le manu, ma isi meaola uma lava na foafoaina e le Atua.” [MFF 77:2.]

Ua lelei, ua outou vaai mai ia te au i le taimi nei, o au o se tagata matua faaletino. O loo i ai se vaega o au e le mafai ona outou vaai i o outou mata faaletino—o lenei vaega faaleagaga o a’u o loo vaavaai atu e ala i o’u mata ma aumaia ia te au le malosi e gaoioi ai, ma aumaia ia te au se fuataga o le potu ma le malamalama. . . .

O le mea moni muamua la lenei ua tatou aoaoina—sa i ai se malamalama faatulagaina na ta’ua ... o le agaga. O iina afio ai le Alii (o Ieova), o lē na avea ma lenei agaga maoae silisili e faapei o le Atua (le Tama), faatasi ma na malamalama faatulagaina ma ta-

'ua o agaga, ma na Ia fetalai atu ia te i latou, O le a tatou faia se lalolagi e mafai ai e outou o agaga ona nonofo ai, ma o outou o e ola agavaa iinei i le lalolagi o agaga e mafai ona o atu i lalo i lena fogaeleele ma o le a faaopoopoina ia te outou. Ma o agaga la na tutumau i lo latou faatuatuaga, pe faapea na agavaa foi, sa faatagaina e o mai i le lalolagi, ma faaopoopoina atu i o latou tino faaleagaga, se tino faaletino iinei i luga o lenei fogaeleele. . . . O le tulaga o le i ai o oe ma au iinei i luga o lenei fogaeleele faatasi ma se tino faaletino o se faamaoniga lea sa tatou i ai faatasi ma i latou sa tausia lo tatou uluai tofi; sa pasi le tatou suega ma sa faatagaina ai i tatou e o mai iinei. Pe ana fai e le pasi la tatou suega semanu tatou te le i ai iinei, semanu ua tatou i ai faatasi ma Satani i le lalolagi e taumafai e faaososo i latou o loo i ai se tino. . . .

---

**Aisea e tatau ai ona tatou faamaoni i luga o lenei fogaeleele ina ia mafai ai ona faamaeaina a tatou misiona na muai faauuina ai?**

Ina ua uma nei la ona faatulagaina lo tatou faasinomaga i le muai olaga, pe o ai i tatou—o atalii ma afafine o le Atua ae lei i ai lenei lalolagi, pe o ai le Tama o agaga o tagata uma o e o loo soifua i la le tino i luga o le fogaeleele—ma o lea la ua tatou saunia nei e faasolosolo atu i le isi tali o le fesili. Mai le mea sa ou faitauina atu ia te outou mai le tusi o Aperamo i le fuaiupu e 23 ua outou faalogo ai sa ta'u atu ia Aperamo sa faauuina ma filifilia o ia ae lei fanau mai. Ou te le iloa pe ua outou mafaufau i lena mea. Sa ta'uina atu foi ia Mose lena lava mea. . . .

“Ma a o ia valaau atu i le suafa o le Atua, sa vaai e ia [Mose] lona mamalu, aua ua i ona luga, ma sa ia faalogoia se leo ua faapea mai: Amuia lava oe Mose, aua o Au o le Atua e ona le malosi uma na filifilia oe; ma o le a faateleina lou malosi ia sili atu nai lo vai e tele, aua o le a latou usitai i lau upu e faapei o oe o le Atua.” [Mose 1:25.] O lana misiona lena o le avea ma se taitai sili ma le malosi. Na faapea foi ona fetalai le Alii ia Ieremia, “Na a'u iloa oe a o lei faia oe e au i le manava; na au faapaiaina oe a o lei fanau mai oe, na au tofia oe e fai ma perofeta i nuu.” [Ieremia 1:5.] Sa faamatalaina faafaigofie mai e Iosefa Samita ina ua ia faapea mai ia te i tatou. “Soo se tagata ua i ai sona valaauga e talai

atu i tuluiga o le lalolagi, sa faauuina o ia i lena lava valaauga i le Fono Tele i le lagi ae lei faia lenei lalolagi.” Ona ia faapea mai lea, “Ou te manatu sa faauuina au i lenei lava tofi i lena Fono Tele.” [History of the Church, 6:364.]

Ae o se lapataiga taufaamatau lenei. E ui i lena valaauga, ae na tuu e le Alii i le mafaufau o le Perofeta o Iosefa Samita ma na ia tusia ai. . . . “Faauta e toatele e ua valaaauina, ae toaitiiti e ua filifilia.” I se isi faaupuga, . . . ona ua i ai lo tatou saolotoga iinei, o lea sa toatele ai e na muai faauuina i se galuega e sili atu ae ua itiiti lo latou saunia iinei. Sa ia faapea mai, “E le filifilia foi i latou i se a? Ona ia tuuina mai lea o mafuaaga e lua e ala ai ona le faia e tagata o latou valaauga. Muamua “aua ua faapea ona manu-manu o latou loto i mea o lenei lalolagi,” ma le lona lua, latou te “manao i viiga mai tagata, latou te le aoaoina lenei aoaoga e tasi—O aia tatau a le Peresitua ua fesootai e le mavavaeeseina ma mana o le lagi.” [MFF 121:34-36.]<sup>2</sup>


Aua nei faaseseina outou faapea o lena valaauga ma lena muai faauuina o le a muai iloa ai mea e ao ona outou faia. Sa saunoa manino se perofeta i lenei konetineti i sisifo e uiga i lenei mataupu: “O loo ua valaaauina ma saunia talu le faavaeina o le lalolagi, e tusa ma le silaisla mamao o le Atua, ona o lo latou faatuatua tele ma galuega lelei, ina ua muamua ona tuuina atu e filifili i le lelei ma le leaga.” (Alema 13:3) . . . Atonu sa valaaauina ma filifilia e le Atua tagata i le lalolagi o agaga poo lo latou uluai tofi e faia se galuega faapitoa, ae pe latou te taliaina lena valaauga iinei ma faalateleina e ala i le auauna ma le amiotonu ma galuega lelei a o i ai i lenei olaga faitino, o se tulaga lea o la latou lava aia tatau ma le avanoa e faaogaina ai la latou filifiliga saoloto e filifili ai le lelei poo le leaga.<sup>3</sup>

---

### **E aafia faapefea le faaogaina o lo tatou saolotoga pe a tatou iloa pe o ai i tatou?**

O a nisi mea ua ta’uina mai e uiga ia i tatou? O i tatou o ni tagata e tutoatasi ma ua i ai se saolotoga ma ua manatu ai nisi tagata e fai lava le mea tatou te loto i ai, ae e le o le sa’o lena. O loo i ai lo tatou saolotoga, ae sei ou faitauina atu se mea e uiga i lena mea. Sei outou makaina le 2 Nifae mataupu e lua, fuaiupu





O Iesu Keriso ma tamaiti mai tuluiga uma o le lalolagi. O i tatou uma o atalii ma afafine faaleagaga o le Tama Faalelagi. Afai tatou te talia le atoatoaga o faamanuiaga o le Togiola a le Faola, o le a mafai ona tatou toe foi atu e mau ma lo tatou Tama ma lo tatou Faola.

e 15–16. Ou te tau atu ia te outou ou te manatu o se popolega sili lea o lo tatou Tama i le auina mai o i tatou i lalo nei ma le avanoa o lo tatou saolotoga lea e filifili ai. Ina ia mafai la ona faia la tatou filifiliga ma maua o tatou tau e faavavau, e i ai se mea e ao ona tupu ia i tatou. Ia maitau mai—o loo faamalamalama atu

i i e se tamā i lona atalii lenei lava mea. “Ua ao lava ina ia faatau-nuuna ana mataupu faavavau i le iuga o tagata, ina ua uma ona faia e ia o tatou matua muamua, ma manu vaefa o le vao, ma manu felelei, ioe o mea uma ua faia, ua ao ina i ai le faafeagai, o le laau lava ua faasaina e feagai ma le laau o le ola, e suamalie le tasi, a e oona le isi.” [2 Nifae 2:15.]

O le ala lena e masani ona faalogoina ai, o mea e faasaina o mea ia e sili ona suamalie ma manaomia, ae o mea e sa’o mo i tatou e i ai taimi e avea ma fualaau e oona i le tofo ae suamalie i le manava pe aoga mo le tagata, e pei ona tatou gagana ai. O lea, ina ia mafai ona tuuina atu i le tagata le avanoa e filifili ai, “O le mea lea na foai mai ai e le Alii le Atua le faitalia i le tagata. O le mea lea e le mafai ai ona filifili le tagata, sei iloga ua faaosoina o ia e le tasi po o le isi.” [2 Nifae 2:16.] Ina ia mafai ona avea ma se tagata tutoatasi i le faia o filifiliga, o lea e tatau ona i ai e le gata na o le lelei ae e tatau foi ona i ai le leaga ina ia mafai ona tatou filifili i mea e lua. Sei e mafaufau lava e uiga i lena mea mo sina taimi. Pe ana fai e lelei mea uma i le lalolagi ma e leai lava se mea leaga, pe mafai ea ona e filifili i se isi lava mea nai lo le lelei? Pe ana fai e leaga mea uma i le lalolagi, ma e leai se lelei e filifili ai, pe mafai ea ona e filifili i se isi lava mea nai lo le leaga? Pe afai e te mafaufau i ai mo sina taimi, e na o le pau le ala e mafai ona mauaina ai le filifiliga saoloto i tagata taitoatasi o e o loo soifua i luga o lenei fogaeleele o le i ai lea o le lelei ma le leaga ma ua tuuina mai ia i tatou taitoatasi le avanoa e filifili ai mo i tatou lava. . . . Ua e iloaina nei, e aofia ai i le filifiliga saoloto se tulaga lamatia. Na finagalo le Alii e tuuina mai lena tulaga lamatia ina ia mafai ona tatou savavali ai ma le faatuatua ma, i le avea ai ma tagata tutoatasi ma se saolotoga e filifili ai, ia filifili ai le mea tonu.<sup>4</sup>

---

**O le a le tulaga e mafai ona faavavau ai i tatou  
i le avea ai ma fanau a le Atua?**

O le faamoemoega o lenei olaga o le faataunuuna lea o le faaofuina o le tagata i le tino ola pea ma le ola e faavavau. O le uiga o le tino ola pea o le mauaina mulimuli lea o se tino e le toe oo i ai ni tiga o le olaga faitino, e le toe oo i ai se oti faaletino, ma e le toe pala, ma o le a mavae atu mea muamua. O le mauaina o le

ola e faavavau o le aia tatau lea e nofo ai i le afioaga o le Faavavau e Toatasi, o le Atua lea, lo tatou Tama Faalelagi ma lona Alo, o Iesu Keriso. O faamoemoega nei e lua ua tuuina mai ai i tatou uma i luga o le fogaeelele.<sup>5</sup>

Ua tatou i ai iinei i le asō e saunia ai mo le tino ola pea, “o se taimi e le gata mai, o le taimi lea o le olaga moni o le tagata.” O i tatou uma o ni agaga maoae, aua na tatou o mai e ala mai i se tupuaga tautupu. E ia i tatou le aia tatau e avea ai ma tupu ma taitai ona o vaega sa tatou faia i le lalolagi o agaga ae tatou te lei o mai iinei. Sa filifilia i tatou e o mai i lenei aso ma lenei taimi, ma ua faamoemoeina i tatou mo le tino ola pea e pei o fanau talavou uma a lenei ekalesia. E tatau foi ona “ua’i atu a tatou tau-mafaiga silisili i mea taua e faavavau ae aua [tatou te mâtele] i mea e mate”

Sei ou faitau mai le Mataupu Faavae ma Feagaiga vaega e 132. . . . “O lenei foi, e moni ou te fai atu ia te oe, afai e faaipopopo le tane i le ava i la’u upu, o la’u tulafono lea ma i le feagaiga fou e faavavau ma faamaufaailogaina ai ia i laua e le Agaga Paia o le folafolaga,” ma o le a ou faamisia nisi upu ina ia tuuina atu ai ia te outou le uiga, “o le a faia ia te i laua mea uma ua tuuina atu e la’u auauna i o laua luga, i lenei olaga, e oo lava i le faavavau; o le a faatumauina atoatoa foi pe a o ese atu i laua mai le lalolagi, e ui atu foi i laua i tala ane o agelu, ma atua, ua faatuina i lea mea e oo i lo laua faaeaga ma le mamalu i mea uma.” Ia faalogologo mai i le mea lenei: o le a “fanafanau pea lava pea e faavavau faavavau lava.” [MFF 132:19.]

Sa saunoa mai le Perofeta o Iosefa Samita, o lona uiga o i latou ua faaipopopoina i le feagaiga fou e faavavau ma faamaoni ia latou feagaiga, pe a maea ona ui atu i le toe tutu, o le a mafai ona latou toe nonofo faatasi o le tane ma le ava ma maua le mea e pei ona ia ta’ua i i, o le fanafanau pea lava pea. Poo le a le uiga o lona mea? Sei ou faitauina atu ia te oe mai se isi mau: . . .

“I le mamalu selesitila, e i ai lagi po o tikeri e tolu;

“E ao foi i se tagata ina ulu i lenei faatulagaga o le perisitua (o lona uiga o le feagaiga fou faavavau o le faaipopoga) ina ia na maua le tulaga aupito i luga;

“Afai foi na te le fai faapea na te le mafai ona maua”.

“E mafai ona ia ulu atu i le isi, ao le iuga lea o lona malo, e le mafai ona ia uluola.” [MFF 131:1– 4.]

Uluola faapefea? O le faatuputeleina o fanau. I se isi faaupuga, usiusitai i Lana poloaiga faalelagi, o i tatou nei o tagata ola ua tuuina mai ai le mana e galulue faatasi ai ma le Atua i le foafoaga o se agaga ola iinei, ma tua atu o le tuugamau ina ia maua le faatuputeleina e faavavau i se mafutaga faaleaiga pe a mavae atu le iuga o lenei fogaeleele i ana galuega.

. . . Ou te tautala atu nei e uiga ia i latou o tagata toetutu o e sa tausia le feagaiga o le faaiipoipoga paia ma ua faamauina e le Agaga Paia o le folafolaga. “Ona ave a i lea o i laua ma Atua, aua e leai so laua iuga; o lea o le a i ai i laua e faavavau faavavau lava, aua e tumau pea i laua o lea e aupito i luga lava i laua i mea uma aua e pule i laua i mea uma. Ona ave a i lea o i laua ma atua, aua ua maua e i laua mana uma, ma e auauna agelu ia te i laua.” [MFF 132:20.] . . .

. . . Ia tatou ola ina ia le vaavaai mai ia i tatou ē uma ua faatasi ma i tatou ae ia vaavaai atu i mea faalelagi mai le Atua, ma i lenei vaaiga i lo tatou faasinomaga ma le tulaga e mafai ona tatou oo i ai, ia tatou maua le malosia ina ia maualuga atili ma agai i luga mea tatou te aeaina, ma agai atu i lenei sini silisili o le ola e faavavau, o la’u tatalo lea i le agaga maualalo i le suafa o le Alii o Iesu Keriso, amene.<sup>7</sup>

## **Fautuaga mo Suesuega ma Talanoaga**

---

- O le a se mea na faamalosia ai lau molimau o le Atua o lou Tama?
- Aisea e le manuia ai taumafaiga a tagata i nisi taimi i le faatau-nuina o le galuega na muai faauuina ai i latou e faia i lenei fogaeleele?
- O le a le filifiliga saoloto? Aisea e manaomia ai le i ai o le faafeagai ina ia faaaogaina ai la tatou filifiliga saoloto?
- E mafai faapefea ona aafia a tatou amioga i aso taitasi i le iloa-ina lea o le tulaga e mafai ona ave ai i tatou e faavavau?
- O le a se mea o loo tuuina atu ia te oe le malosia “ina ia maualuga atili ma agai i luga mea e te aeaina, ma agai atu i lenei sini silisili o le ola e faavavau?”

## *Faamatalaga*

1. Lauga i le falelauasiga o Edwin Marcellus Clark, 5 Aperila 1955, Lauga a Harold Bingham Lee (1939–73), Matagaluega o le Nofoaga e Teuina ai Talafaasolopito, O le Ekalesia a Iesu Keriso o le Au Paia o Aso e Gata Ai, 11.
2. “Who Am I?” lauga i le Aoga a le Au Arona Sinia a le Siteki o Kurene, 18 Fepuari 1957, Matagaluega o le Nofoaga e Teuina ai Talafaasolopito, O le Ekalesia a Iesu Keriso o le Au Paia o Aso e Gata Ai, 4–7.
3. *Decisions for Successful Living* (1973), 168–69.
4. “Who Am I?” 9–10.
5. *The Teachings of Harold B. Lee*, faatonu e Clyde J. Williams (1996), 30.
6. *The Teachings of Harold B. Lee*, 73.
7. “Who Am I?” 11–12, 14.



# O le Tamai Mamoe na Fasia Talu Ona Faavaeina le Lalolagi


*E faapefea ona faatoilaloina e le Togiola a Iesu Keriso le Pau o Atamu ma mafai ai ona tatou toe foi atu i le afioaga o le Tama?*

## Faatomuaga

**S**a aoao mai Peresitene Harold B. Lee e tatau ona tatou malamalama i le Pau o le tagata ina ia mafai ai ona malamalama i le Togiola a le Faaola, lea na faatoilaloina aafiaga o le Pau ma mafai ai ona maua le ola e faavavau. Sa ia faapea mai, “E matua taua tele. . . le malamalama i le Pau, ma ua manaomia ai le Togiola—o le misiona lea a le Alii o Iesu Keriso”.<sup>1</sup>

E masani ona molimau mai Peresitene Lee i le misiona paia a le Faaola, pe ana le seanoa o ia semanu e le mafai ona laveaiina i tatou mai le maliu ma le agasala. Na ia faailoa mai “O le alo o le Atua. . . e ia te ia le mana e faia ai lalolagi, ma faatonutonu ai. Na afio mai o Ia iinei, o le Alo e Toatasi e faataunuaina se misiona, e avea ma se Tamai Mamoe na fasia talu ona faavaeina le lalolagi, ina ia aumaia le faaolataga i tagata uma. Na Ia tatalaina le faitotoa i le toetutu, e ala i le tuuina atu o Lona soifua ma aoao mai le ala tatou te maua ai le ola e faavavau, o lona uiga o lo tatou toe foi atu lea i le afioaga o le Tama ma le Alo. O ia lena o Iesu i Lona matagofie uma.”<sup>2</sup>

O lenei mataupu o loo talanoaina ai le Pau o Atamu ma Eva, o le Togiola a le Faaola na faatoilaloina ai aafiaga o le Pau, ma o tatou tiutetauave pe afai tatou te mauaina le atoatoaga o faamanuiaga o le Togiola.



O lenei ata vali o le Faaola na avea o se ata e sili ona fialia i ai Peresitene Harold B. Lee ma sa tautau i totonu o lona ofisa.

## O Aoaoga a Harold B. Lee

### Sa mafai faapefea ona aumaia e le Pau o Atamu ma Eva faamanuiaga o le olaga faitino?

O Atamu ma Eva... sa faaaogaina lo la'ua saolotoga ma i lo laua lava maliliega na laua aia ai le fua, o le lauu na faatonuina i laua e aua le aai ai, peitai ua gauai atu i laua i le tulafono a Satani. I lena le usiusitai na faatagaina ai le Atua e asiasia i laua i le faamasinoga. Ina ia laua aoaoina e ui o le Atua o se Tama alofa, ae o ia foi o se Tama Amiotonu, ma ina ua laua solia le tulafono, o lea sa tuuina ai i laua ina ia faasalaina, ma sa tulia ese mai i laua i lena faatoaga matagofie. Sa asiasia i laua i le tele o suiga eseese o le olaga talu mai lena taimi, ma amata mai i lena taimi, ona aafia ai tagata uma. Ina ia laua aoaoina e ala mai i lo laua le usiusitai ua la maua ai se faasalaga o se faamasinoga amiotonu. Sa faamalosia i laua e galulue mo le mauaina o a laua meaa ma le afu o o laua mata, aua ua avea nei i laua ma tagata ola.

. . . O le tiga, pagatia, (faanoanoa) oti, na mafua uma mai ia i laua, a e faatasi ma lena tiga, e faapei lava o mea na tatou aoaoina mai i lena taimi e oo mai i le taimi nei, na maua mai ai se tomai ma se malamalamaaga semanu e le mafai ona ausia sei vagana ua tigaina. . . .

. . . Faatasi ai ma le aafiaga o Atamu ma Eva i le Pau, na mafua ai ona oo mai se suiga i o laua luga; o lena lava suiga na aafia uma ai le natura faaletagata, ma le natura uma o le foafoaga, le foafoaga uma o meaola, lauu—o mea uma e i ai le ola ua suia. O le lalolagi lava ia ua oo i ai le oti..... Pe faapefea ona tupu, e le mafai e se tasi ona faamatalaina, ma soo se tasi na te tau-mafai e faamalalamaina, o le a oo atu i se mamao ese nai lo le mea na tau mai e le Alii ia i tatou. Peitai sa oo mai se suiga tele i le foafoaga ma e oo atu i lena lava taimi sa le mafai ona oo i ai le oti. E amata mai i lena taimi, o le natura atoa o mea na oo i se tulaga o le oti malie atu seia oo i le taimi e oo mai ai le oti faaletino, ma pe a maea lena o le a manaomia le toefuataiina mai i se tulaga toetutu.....



. . . O se tasi o lauga sili, ou te manatu o le lauga pito puupuu lava lea na laugaina e se tagata, o le lauga sa fofogaina mai e le Tina o Eva. . . .

“Ana le seanoa la ta solitulafono, semanu ta te le maua ni fanau, ma le iloa le lelei mai le leaga, ma le olioli o le togiolaina o i taua, ma le ola faavavau e tuuina mai e le Atua ia i latou uma o e usiusitai.” [Mose 5:11.]

O lea e tatau ai ia i tatou, faatasi ma Eva, ona olioli i le Pau, lea na faatagaina ai le aumaia o le malamalama o le lelei ma le leaga, lea na faatagaina ai le aumaia o fanau i lenei olaga faaletino, lea na faatagaina ai le mauaina o le olioli o le togiolaina ma le ola e faavavau e tuuina e le Atua i tagata uma.

E faapena foi Atamu, sa faamanuiaina i le meaalofa o le Agaga Paia. “Ma sa viia e Atamu le Atua i lena aso ma sa faatumuina o ia i le Agaga Paia, ma sa amata ona ia perofeta ane e uiga i aiga uma o le lalolagi, ua faapea atu: Ia viia le suafa o le Atua, aua o lau soligatulafono ua pupula ai ou mata, ma o le a ou maua le olioli i le olaga nei, ma o le a ou toe vaai i le Atua i le tino.” [Mose 5:11.]

Tau ina ia tuuina mai e le Alii Lona malamalama e uiga i lena faamanuiaga sili ua oo mai ia i tatou, ma e tatau ona tatou faamamaluina i o tatou mafaufau ma a tatou aoaoga i lena meaalofa sili na tuuina mai ia i tatou e Atamu ma Eva, e ala i le faaaogaina o lo la’ua saolotoga, na la aia ai le fua ma maua ai e i laua fanau i le olaga faaletino ma aumaia ia i tatou, o e tupuga mai ia laua i le tuufaasologa mai o augatupulaga o taimi, lena faamanuiaga sili e mafai ai ona tatou maua le olioli i le togiolaina o i tatou, ma o le a tatou toe vaai atu ai i le Atua i le tino ma maua le ola e faavavau.<sup>3</sup>

---

### **E faapefea ona faatoilaloina e le Togiola a le Faaola aafiaga o le Pau?**

Na tulia ese e le Atua Atamu mai le Faatoaga o Etena ona o lona le usiusitai. Sa ia puapuagatia i le oti faaleagaga. . . Ae peitai, faauta, ou te fai atu ia te outou o le Alii o le Atua, na tuuina atu ia Atamu le folafolaga e le oti lava o ia i le oti faaletino, seia vagana ua ia auina atu agelu e folafola ia i latou le salamo i le

suafa o lona Alo pele e toatasi ma o lona maliu e mafai ai ona toe faatuina mai i le ola e faavavau (tagai MFF 29:41–43)... Ina ua tulia Atamu mai le Faatoaga o Etena, sa ia puapuagatia i le oti faaleagaga, o le tuueseeseina lea o se mafutaga vavalalata ma le afioaga o le Alii.<sup>4</sup>

Pe aisea na auina mai ai le Faaola i le lalolagi? O le Matai lava ia na ia tali i lona fesili ao i ai o ia i lona talaiga ina ua Ia fetalai: “Aua e lei auina mai e le Atua lona Atalii i le lalolagi ina ia faasala i le lalolagi, a ia faaolaina le lalolagi ia te ia.” (Ioane 3:17)....

E faasaoina mai i le a? Ina ia faaolaina mai i le a? Muamua o le faasaoina lea mai le oti faaletino e ala mai i le toe tutu mai o e ua oti. Ma i se isi tulaga, ua faasaoina i tatou e ala mai i lona taulaga togiola. Ua faasaoina i tatou mai le agasala.<sup>5</sup>

[O le uiga o lea mea] i se tagata o le Au Paia o Aso e Gata Ai, o le faaolataga, o le tuufaasaolotoina lea mai le nofo pologa ma le iuga o agasala e ala mai i le filifiliga saoloto mai le lagi, le laveaiina mai le agasala ma le faasalaga e faavavau e ala mai i le Togiola a Keriso.

Ou te manatu e leai se isi nofoaga e sili atu tatou te maua ai se faamalamalamaaga lelei e uiga i le fuafuaga o le Togiola nai lo tusitusiga a Iakopo, o loo maua lea i le Tusi a Mamona, i le 2 Nifae, ao lona mataupu e 9. O lea ou te tuuina atu mo lo outou silafia, ma uunaia outou e faitau ma le faaeteete ma saga faitau i ai ma le faautauta i lona faamalamalamaaga aupito i taua...

“E! O le silisiliese o le alofa o lo tatou Atua, o Le Paia o Isaraelu! Aua na te laveai ona tagata paia ai lona faaiteite matautia, o le tiapolo lea ma le oti ma seoli ma lona lepa afi ma le teio, o le tiga lea e le iu lava.

“E! O le silisiliese o le paia o lo tatou Atua! Aua ua silafia e ia mea uma, ua leai se mea ua le silafia e ia.

“E afio mai foi o ia i le lalolagi ina ia faaolaina e ia tagata uma, pe afai latou te faalogo atu i lona siufofoga, aua faauta, e onosai o ia i tiga o tagata uma, e moni, o tiga o tagata ola uma, o tane ma fafine, atoa ma le fanau i le aiga o Atamu.”

“Ua onosai o ia i nei mea uma ina ia oo le toetu mai i tagata uma lava, ina ia latou tutu mai i ona luma i le aso tele ma le faamasinoga.

“Ua ia poloai mai foi i tagata uma, e ao ina latou salamo ma ia papatisoina i lona suafa, ia atoatoa lo latou faatuatua i Le Paia o Isaraelu, a leai e le mafai ona faaolaina i latou i le malo o le Atua.

“Afai foi latou te le salamo ma faatuatua i lona suafa ma papatisoina i lona suafa ma tumau e oo i le iuga, e faasalaina i latou, aua ua fetalai mai ai le Alii le Atua, o Le Paia o Isaraelu.” [2 Nifae 9:19–24]. . . .

Ua faamalamalamaina faapea...o le faaolataga o le tagata lava ia, lea e maua e tagata taitoatasi e faalagolago lea i ana lava amioga ma lona lava olaga. Ae peitai e i ai (foi) le mea ua tatou maua ua taua o le (faaolataga) “lautele” e oo mai lea i tagata uma, e tusa pe latou te lelei pe leaga, mauoa pe mativa, ao latou ola ai, e leai sona eseesega. E maua e tagata uma le faamanuiaga o le Togiola ma le Toetutu e tuuina atu ia i latou se meaalofo foai fua ona o le taulaga a le Faaola...

O le mea lea, o nei aoaoga faavae, ua faataatia manino mai e faapea ona o le mana o le togiola, o lea e faasaoina ai tagata uma aua e pei ona oti uma ia Atamu, e faapena foi ona ola uma ia Keriso, e aunoa ma se tasi e sao mai ai. E faapena foi atalii o le malaia o e faia le agasala e le mafaamagaloina, o le a toe tutu faatasi mai ma isi o le fanau uma a Atamu...Ua tatou maua lena folafolaga i le Mataupu Faavae o le Faatuatua, “Matou te talitonu e faaolaina tagata uma lava i le togisala a Keriso pe a tausia poloaiga ma sauniga o le Talalelei.” [Mataupu Faavae o le Faatuautua 1:3.]<sup>6</sup>

---

**E mafai faapefea ona tatou maua faamanuiaga atoatoa o le Togiola pe a tatou faatuatua ma usiusitai ia Iesu Keriso?**

O le matua manaomia o le malamalamaaga e uiga i le Faaola ma lana misiona paia, na faamamafaina lea e le matai i se tasi o taimi ina ua ia fetalai atu i le Au Faresaio o e sa siomia o ia, o le latou masani o le taumafai lea e faamaasiasi pe tau maileia o ia, “Se a so outou taofi i le Keriso?”(Mataio 22:42)....

I le taimi o lana misiona sa i ai nisi o i latou sa leai se faatuatua, o e na fai a latou tautinoga e uiga Matai. I lona nuu o Nasareta na latou faapea atu ma le faatauemu:

“E le o le atalii ea lenei o le tufuga? E le o Maria ea le igoa o lona tina? O ona uso foi o Iakopo ma Iose, ma Simona, ma Iuta?...Ona latou tausuai ai lea ia te ia.” [Mataio 13: 55, 57.]...

Pe a faatusatusa i le eseese,....o ona soo faatuatua e pei o Peteru o ia o le taitai o le au aposetolo na ia tautino mai: “O oe o le Keriso, o le Alo o le Atua soifua.” (Mataio 16:16)—ma sa faapea mai foi Mareta, o le na faatuatua ia te Ia, “Ioe, le Alii e, ua ou talitonu lava, o oe o le Keriso le Alo o le Atua, o le malii mai i le lalolagi.” (Ioane 11:27.) Ma mai se isi o ona soo, ina ua ia vaai ma tagotago i le Faaola toetu, na faamamafaina mai e Toma i lana molimau i upu faigofie nei, “Lou Alii e, ma lou Atua e”! [Ioane 20:28.] . . .

O loo ou mafaufau nei i ni mea eseese se lua na tutupu. Na maua e se uo pele se tasi o na savali faamomoiloto: “Matou te faanoanoa e faailoa atu le fasiotia o lou atalii i le taua.” Na ou malaga i lona fale ma vaaia ai le aiga ua nutimomoia loto, sa latou maua mea uma e mafai e tupe ona faatau—o le tamao-aiga, o tulaga [faale soifuaga nei], o mea e ta’u e le lalolagi o le mamalu, ae o lenei ua nutimomoia o latou faamoemoega ma o latou moomooga, ua latou taofimauina nei se mea latou te le i ola ina ia maua, ma sa foliga mai latou te le i mauaina mai lea taimi i lea taimi. Sa lē i i ai iina le faamafanafanaga semanu e mafai ona latou maua.

Na ou faatusatusaina lona vaaiga ma se mea na ou molimauina i luga i le Falemai AAG pe tusa o le ono masina talu ai mai le aso lenei, a o i ai se tasi o o tatou Peresitene faatuatua o le misiona sa faasolosolo malie atu ai lona soifua. Sa matua tigaina o ia, ae sa i ai le olioli i lona loto aua na ia iloa o mafatiaga i le tele o taimi e aoao ai e tagata le usiusitai, ma le sootaga ma lē na sili atu ona mafatiaga nai lo le mea e mafai e se isi o i tatou ona onosaia. Na ia iloina foi, le mana o le Alii toetu. .

O le aso lenei e tataua ai ona tatou fesili ifo ia i tatou lava i le fesili e tali ai le fesili a le Matai ia te i latou i ona po na, “Se a lo outou taofi i le Keriso?” E ao ona tatou fesili e pei ona tatou faia i le aso nei, “Se a so tatou taofi i le Keriso?” Ona tuutuu mai lea o le fesili i le tagata lava ia ma fesili ifo, “O le a so’u taofi i le Keriso?” Pe ou te mafaufau ia te ia o le Faaola o lou agaga?” Pe ou

te mafaufau ia te ia e aunoa ma le masalosalo i lou mafaufau o ia lea na faaali i le Perofeta o Iosefa Samita? Pe ou te talitonu o ia lea na faavaeina lenei Ekalesia i luga o lenei fogaeleele? Pe ou te talia o ia o le Faaola o le lalolagi? Pe o ou faamaoni ea i au feagaiga i le vai o le papatisoga, pe na ou malamalama ea, o lona uiga o le a ou tu e ave ma molimau ia te ia i taimi uma, ma mea uma, ma nofoaga uma, ma soo se mea ou te i ai, seia oo lava i le oti?<sup>7</sup>

O le a faamanuiaina i tatou e le Alii e tusa ma le maualuga tatou te tausia ai ana poloaiga. Sa faapea mai Nifae:

“Aua ua matou galulue ma le maelega ina ia tusitusi e faaoleole i a matou fanau, atoa ma o matou uso, ia talitonu ia Keriso, ma ia lelei ma le Atua, aua ua matou iloa e faaolaina i tatou i le alofa tunoa pe a uma ona faia mea uma tatou te mafaia.” [2 Nifae 25:23.]

E faasaoina i tatou i le toto o le Faaola, ma Lana togiola, ae sei vagana ua tatou faia mea uma tatou te mafai ina ia faasaoina ai i tatou e ala i le tausia o ana poloaiga. O mataupu faavae uma o le talalelei, o mataupu faavae ia o folafolaga, o loo tatalaina mai ai ia te i tatou fuafuaga a le Silisiliese.<sup>8</sup>

E tatau i tagata taitoatasi uma ona faia mea uma e faasaoina mai ai o ia i le agasala; ona mafai lea ona ia maua faamanuiaga o le togiolaina e ala mai i Le Paia o Isaraelu, ina ia faaolaina tagata uma i le usiusitai i tulafono ma sauniga o le talalelei.

E le na o le agasala a Atamu na togiolaina e Iesu, ae faapena foi agasala a tagata uma. Ae o le faaolataga o le tagata lava ia mai le agasala, e faalagolago lea i ana lava taumafaiga, ma e faamasi-noina le tagata lava ia e tusa ma ana galuega.

Ua faamanino mai e Tusitusiga Paia i le taimi e oo mai ai le toetutu i tagata uma, e na o i latou lava o e usiusitai i le Keriso o le a maua le lautele o faamanuiaga o le faaolataga e faavavau. Sa faamalamalama mai e Paulo i tagata Eperu e uiga ia Iesu, “ona ave ai lea o ia ma tupuga o le ola e faavavau ia i latou uma o e usiusitai ia te ia.” (Eperu 5:9.)

O la’u tatalo ma le lotomauualalo, ia malamalama atili tagata uma i soo se mea i le taua o le togiola a le Faaola mo tagata uma, o le na tuuina mai ia i tatou le ata o le faaolataga e taitai-ina atu ai i tatou i le ola e faavavau, i le mea o loo afifio ai le Atua ma Keriso.<sup>9</sup>

## Fautuaga mo Suesuega ma Talanoaga

---

- E faapefea ona e talia le fesili lenei “Po o le a sou taofi e uiga i le Keriso?”
- Aisea ua taua ai le Faaola o le “Tamai mamoe e fasia ae lei faavaeina lenei lalolagi?” (Faaaliga 13:8).
- O a ni auala na avea ai le Pau ma se faamanuiaga faapea foi ma se tofotofoga mo Atamu ma Eva? E faapefea foi ona avea ma se puna o le olioli ma le faanoanoa mo i tatou?
- O a ituaiga tomai ma malamalamaaga e mafai ona maua mai i le na o le onosaia o tofotofoga ma faafitauli o le olaga nei?
- O le a le oti faaleagaga? E faapefea ona faatoilaloina le oti faaleagaga?
- O a faamanuiaga o le Togiola e oo mai i tagata uma o se meaalofa maua fua? O a ni mea e tataua ona tatou faia ina ia olioli ai le tagata lava ia i faamanuiaga o le Togiola?
- O le a se aoaoga o le taua o le faatuatua ia Iesu Keriso na aoaina mai i tala e lua o ni tagata ua feagai ma le oti sa faamatalaina e Peresitene Lee?
- O a ni mea na oo i lou olaga ua faamalosia ai lau molimau e uiga i le Togiola a le Faaola?
- E mafai faapefea e le Togiola ona “taitaiina atu i tatou i le ola e faavavau, i le mea e affio ai le Atua ma Keriso?”

### Faamatalaga

1. “Fall of Man,” Lauga i taitai o le Institute ma le Seminare a le Iunivesite a Polika Iaga (BYU- Brigham Young University) 23 Iuni 1954, Matagaluega a Talafaasolopito, O le Ekalesia o Iesu Keriso o le Au Paia o Aso e Gata Ai, 6.
2. Lauga i le Autalavou o Long Beach, Kalefonia 29 Aperila 1973, Matagaluega o Talafaasolopito, O le Ekalesia o Iesu Keriso o Aso e Gata Ai, 24.
3. “Fall of Man,” 15, 17, 19–20.
4. Lauga i le Fonotaga faaseminare i Jordan, 26 Fepuari 1947, Matagaluega o Talafaasolopito, O le Ekalesia a Iesu Keriso o Au Paia o Aso e Gata Ai, 4.
5. I le Conference Report, Oct. 1956, 61.
6. “The Plan of Salvation,” Lauga i taitai o le Institute ma le Seminare a le Iunivesite o Polika Iaga 1 Iulai 1954, Matagaluega o Talafaasolopito, O le Ekalesia o Iesu Keriso o le Au Paia e Gata Ai, 4–6.
7. I le Conference Report, Oketopa 1955, 54-56.
8. *Stand Ye in Holy Places* (1974), 246.
9. “Ina ia Faamafanafanaina ai le Loto Mafatia,” *Liabona*, Aperila 1974, 6.



# O Muai Mataupu Faavae ma Sauniga o le Talalelei

*E mafai faapefea ona tatou saga ola faamaoni i le usiusitai i muai mataupu faavae ma sauniga o le talalelei ma tumau ai e oo i le iuga?*

## Faatomuaga

O le mama atoatoa ma paia i le olaga ma uiga, o le faanau-nauga lea o tagata faamaoni o le Au Paia o Aso e Gata Ai. Sa aoao mai e Peresitene Harold B. Lee, o le ala i le faamamaina ma le faapaiaina o le taliaina lea o muai mataupu faavae e fa, ma sauniga o le Talalelei—faatuatua i le Alii o Iesu Keriso, salamo, papatisoga, ma le mauaina o le meaalofa o le Agaga Paia—ona tumau lea seia oo i le iuga i le tausia o poloaiga uma a le Atua. Na ia faapea mai:

“O tulafono a le Atua ua aumaia i tagata o loo aafia i totonu o le fuafuaga o le talalelei, ma ua i ai i le Ekalesia a Iesu Keriso le matafaioi mo le aoaoina o nei tulafono le lalolagi. E tasi lava le faamoemoega natuuina mai ai e le Tama Faalelagi, o oe lena ua pulea e le tulafono e faasaoina foi e le tulafono ma faaatoatoaina ma faamamaina ai, po o le faapaiaina ai foi (Tagai MFF 88:34). O le meaalofa sili o meaalofa uma ua tuuina mai e le Atua ia i tatou, o le meaalofa lea o le faaolataga i Lona malo.”<sup>1</sup>

Sa ia aoao mai foi, “O le malamalama i le Atua ma Iesu, Lona Alo, e matua manaomia lea mo le ola e faavavau, ae o le tausia o poloaiga a le Atua e tatau ona muamua i le mauaina o lena malamalama poo le atamai.”<sup>2</sup>

O lenei mataupu o le a talanoaina ai pe faapefea e muai mataupu faavae muamua e fa ma sauniga o le talalelei, ma le tumau seia oo i le iuga i le amiotonu ona taitaiina atu ai i tatou i le ola e faavavau.

## Aoaoga a Harold B. Lee

---

### O le a le faatuatua, ma pe faapefea ona faatonutonuina a tatou taumafaiga ina ia maua le ola e faavavau?

O le faatatauina o le faatuatua i le talitonuga faalelotu, o lona mataupu faavae autu lea ma o le puna moni lea o le amiotonu uma e taitaiina ai le tagata i ana taumafaiga ia maua le ola e faavavau i le lalolagi a sau. E totonugalemu i le Atua, o ia lea e ala i le faatuatua ua lauiloa o le puna lea o mana uma, ma le poto uma i le vanimonimo, ma o ia o le Malamalama faatonutonu i “mea uma ua vaaia poo le le vaaia foi e faailoa mai ai lona poto.” O lona uiga, e ala foi i le faatuatua i le Atua, e mafai ai foi...e oe, ona felata'i ma Lē soifua pea lava, ma o le mana ma le poto e te maua mai i lou Tama Faalelagi e faaaoaga ai mana o le vanimonimo e fesoasoani ai ia te oe i le itula e manaomia ai fofo o faafitauli ua lē gafatia ona foia e lou malosi po o lou atamai faaletagata soifua.

E faapefea ona [tatou] atinaeina lea faatuatua? O le tali e ala leai i le suesue, e ala i le galue ma le tatalo. Sa fesili le Aposetolo o Paulo, “Pe faapefea ona tatou faatuatua i le ua latou le faalogo atu i ai? Ma pe faapefea foi ona latou faalogo atu pe a leai se talai atu? (Roma 10:14) E tatau ona tatou tali atu, latou te le mafai. E faatoa maua lava la le faatuatua e ala i le faalogo i le upu a le Atua mai i e talaiina le upumoni. O le talaiina o le upumoni e uiga i le Atua ma ona faamoemoega ua faatusaina lea i se fatu ua luluina, ma afai o se fatu lelei o le a amata ona totogo ma tupu i o outou loto i luga o le faia o mea nei: Muamua o le totoina lea i le eleele lelei, o le eleele malu o le loto faamaoni ma le naunautai moni, o lona lua, ia tausia lea e ala i le suesue ma le maelega ma le sailiili, ma le lona tolu, ina ia faasusuina i le sau o le agaga mafanafana ma faamafanafanaina i sulu o musumusuga e ala mai i le tatalo ma le lotomaualalo. O le seleselega mai na mea na toto, e na o le tagata e galue i luga o le upumoni, ua ia aoao ma toe faatulagaina lona olaga mai le agasala, ma ua ia faatumuina ona aso i le faamoemoe lelei e tausia poloaiga a le Atua o le ua ia faatuatua i ai, ma le auaunaga i uso a tagata.<sup>3</sup>



O le faatuatua e suia ai tulafono e sefulu mai le mauga o Sinai mai le na o se faaupuga faisoo a se tagata faifilosofia e avea ma se leo faititili o le pule mai luga, ma avea ai aoaoga a le au perofeta e faaalua ai le upu a le Atua e taitaiina ai i tatou i lo tatou aiga faaselesitila. . . .O le faatuatua e mafai ai ona tatou malamalama soo se mea lava e ofoina atu i lenei olaga i le tulaga faatulagaina lea a Iesu, “O lenei ia atoatoa ona lelei o la outou amio e pei o lo outou Tama o i le lagi e atoatoa ona lelei o ia”[Mataio 5:48], e mo lo lava tatou lelei ma lo tatou manuia e faavavau e ui lava atonu o lena faaleleia ma le faamamaina o loo i ai ma le aoaiga matautia a se Atua poto, “Aua o le ua alofagia e le Alii, ua aoai atu o ia ia te ia, ua sasaina foi e ia atalii uma ua talia e ia.”[Eperu 12:6.]<sup>4</sup>

E ao ona aoaoina e fanau uma, o le faatuatua e manaomia mo le faaatoatoaga ua na o le taulagaina e mafai ona atinaeina ai, ma afai na te le aoao ia taulagaina ona manaoga ma faanaunauga [faaletino] ina ia ususitai ai i tulafono o le Talalelei, e le mafai ona faamamaina o ia ma faapaiaina i luma o le Alii.<sup>5</sup>

---

### **Aisea e manaomia ai le salamo i aso taitasi?**

Ina ia fuga mai le lelei, e tatau ona atinaeina ma faagaioia pea lava pea e le aunoa, ma ina ia amiotonu ma le faamaoni lava, e manaomia ai i aso taitasi ona teuteu ma aveese mea leaga mai o tatou olaga, e ala lea i le salamo mai a tatou agasala i aso taitasi.

O a laasaga e tatau ona faia e a’e atu ai i le ala o le salamo ina ia mafai ai ona tatou agavaa e maua le faamagaloga mai le Atua, e ala i le faaolataga o le taulaga togiola a le Matai, ma avanoa o le ola e faavavau i le olaga a sau? O se Tama e ona le poto uma lava, na ia muai iloa e pauu nisi i le agasala, ma o le a latou manaomia uma le salamo, ma ua ia saunia ai i aoaoga o le talalelei ma e ala mai i lana Ekalesia le ata o le faaolataga e faamatala manino mai ai le ala sao i le salamo.

Muamua, e tatau ia i latou ua agasala ona ta’uta’u atu a latou agasala. “Tou te iloa faapea se ua salamo i ana agasala faauta, na te ta’uta’u atu ma lafoaia.”(MFF 58:43) O lena ta’uta’u atu [o agasala] e tatau ona faia muamua i lē ua sili ona ta’useseina i au amioga. O le ta’uta’u atu ma le agaga faamaoni e le na o se

ioeina lea o le lagona tausalaina ina ua faailoa mai le faamaoniga. Afai ua e “faatiga faaaliali i nisi,” e tatau foi la ona aoai faaaliali oe i luma o i latou ua faatiga i ai ina ia e faailoa atu ai lou maasiasi ma lou faamaulalo ma se faanaunauga e maua mai se aoaiga e tatau ai. A fai sa faalilolilo sau amioga, ma iu ai ina manua ai oe lava ia, ae le o se isi, e tatau foi ona e tautau atu faalilolilo, o lou Tama Faalelagi foi e faafofoga i le mea lilo, na te avatu faaaliali se tau i te oe. O amioaga e aafia ai lou tulaga i le Ekalesia, po o lau aia tatau i avanoa poo le alualu i luma i totonu o le Ekalesia e tatau ona tautau atu i le Epikopo o le ua tofia e le Alii e avea ma leoleo mamoe i le lafu ma ua tofia e avea ma faamasino o Isaraelu. E mafai ona ia faalogo atu ao tautau mai faalilolilo ma o le a ia taulimaina i se tulaga faamaoni ma le alofa, a o faagasolo nei faamasinoga. Pe a maea ona tau-tauina atu e tatau i se tasi ua agasala ona ia faia se faatulagana tatau i le malosi na te mafaia ina ia toefuatai ai se mea na ia ave-esea, po o le toe faaleleia o le leaga na ia faia, ma lē toe foi ai e faia nei mea, e mafai ona maua e ia lena folafolaga o le faamagaloina o ana agasala, pe afai na te lei faia le agasala e lē mafamagaloina, e pei ona faailoa mai e le Perofeta o Isaia, “e ui lava e pei o ofu mumu a outou agasala, e sisina ia e pei o le kiona; e ui lava ina mumu e pei o le ie ulaula e avea e pei o fulufulu mamoe.” [Isaia 1:18.]<sup>6</sup>

Tatou te ioe i leni mea. O i tatou uma lava ua faia se mea sa le tatau ona tatou faia, po ua tatou le amanaiaina le faia o mea sa tatau ona tatou faia. O i tatou uma lava ua faia mea sese, ma e tatau foi ia i tatou uma taitoatasi ona salamo. O lena tiapolo tuai na te faatalitonu oe pe afai ua e faia se mea sese se tasi, aisea la e le faaauau ai pea le faia o mea sese? O Satani lena o loo taumafai e tau atu ia te oe e leai se avanoa e toe foi mai ai. Ae e tatau ona faasaga ae ou fofoga i le la e oso ae, ma ia liliu ese mai le mea sese na e faia e ala lea i le salamom, ma aua le toe foi i ai. Na fetalai mai le Alii, “Ina o atu ia [i o outou ala] ma aua le toe agasala, a o lē agasala (o lona uiga o le toe agasala) o le a toe foi mai ai agasala muamua, o loo faapea mai ai le Alii le Atua” (MFF 82:7).<sup>7</sup>

Pe afai ua outou faia ni mea sese, ia amata i le aso nei ona sui o outou olaga. Ia fultua i le mea sese sa e faia. O le poloaiga e

aupito sili ona taua a le Atua, o le poloaiga lena e tasi o loo faigata ia te oe ona tausia i le aso nei. Afai o le tasi o le le faamaoni, afai o le tasi o le le ola mama, afai o le tasi o le taufaasese, o le le tautala sa’o, o le aso lenei e te galue ai i lena mea seia iu ina mafai ona e faatoilaloina lena vaivaiga. Ia faatoilaloina lena faafitauli ona amata lea i le isi tasi lena e pito sili ona faigata ia te oe le tausiana. O le ala lena e faapaiaina ai oe e ala i le tausiga o poloaiga a le Atua.<sup>8</sup>

---

### **Aisea e manaomia ai le papatisoga mo le sauniuniga e fetai ai ma le Alii?**

Ina ua tatou ulu ifo i le vai o le papatisoga, sa tatou osi feaiga ma le Alii o le a tatou faia mea uma tatou te mafaia e tausia poloaiga a le Atua, ma le malamalamaaga o le a tuuina mai e le Alii ana folafolaga ia i tatou ma o lona mamalu o le a faapoopoina pea e faavavau, faavavau lava, ma o le a tatou faatutagaina o tatou olaga ina ia tatou auauna atu e avea ma molimau a le Atua i nofoaga uma seia oo i le oti [Tagai Mosaea 18:8–10.] O le feaiga lena sa tatou osia ina ua tatou papatiso e avea ma tagata o le Ekalesia.<sup>9</sup>

O le papatisoga i le faatofuina mo le faamagaloina o agasala...e mo i latou ua oo i le tausaga e tata ai, o se sauniuniga manaomia lea e fetai ai ma lo tatou Atua. O le ala lea e avea ai outou “o fanau a le Atua i le faatuatua ia Iesu Keriso. Aua o outou uma lava na papatisoina ia Keriso ua outou oofu ia Keriso,” (Kalatia 3:26–27) pe i se isi faaupuga e ala i le papatisoga ua maua le “mana e avea ai ma atai ma afafine o le Atua.” [Tagai Mosaea 5:7.] O lenei fesootaiga e mafai ai ona outou faaogaina mo outou lava le toto togiola o Keriso, ina ia outou maua le faamagaloina o a outou agasala, ma faamamaina o outou loto, (tagai Mosaea 4:2) Ina ia agavaa mo lenei faamagaloga pe a maea ona papatisoina, e tata ona faamaulalo outou lava ma valaau atu i le Alii i aso taitasi ma savavali ma le punouai i le malamalama o aoga o le talalelei... ..

... E na o i latou ua salamo ma papatisoina mo le faamagaloina o a latou agasala e maua atoatoa le avanoa mo le toto faaola o lana togiola.<sup>10</sup>

Na papatisoina foi le Faaola e Ioane le Papatiso, e pei ona ia fetalai mai, “ina ia faataunuuna mea tonu uma.” (Mataio 3:15.) Afai ua faia ia te Ia, e faapefea i tatou? Na tau atu ia Nikotemo: “Afai e le fanau se tasi i le vai ma le Agaga, e le mafai ona sao o ia i le malo o le Atua.” (Ioane 3:5.) Sa lei tuua e le Matai se tulaga faaluafesasi i le pogai o le papatisoga na Ia aoaoina mai.

“E le sao atu i lona malo se mea ua le mama; o le mea lea e le sao atu ai se tasi i lona malologa, na o i latou o e ua faamamaina o latou ofu i lo’u toto, ona o lo latou faatuatua, ma le salamo i a latou agasala uma, ma lo latou faamaoni e oo i le gataaga.” (3 Nifae 27:19)

O le mafuaaga lea na apoapoi atu ai Peteru i e na faalogologo ia te ia, “Ina salamo ia ma ia taitasi ona papatisoina outou uma i le suafa o Iesu Keriso; mo le faamagaloina o agasala ; ona maua lea e outou o le mea foai fua mai o le Agaga Paia lea.” (Galuega 2:38.) Aua e ala i le papatisoina e se tasi ua i ai le pule, e mafai ai e lē ua papatisoina i se ala faatusatusa ona faamamaina ona ofu i le toto o le Alo o le Atua, o le na togiolaina mo agasala a i latou uma o e talia o Ia ma ui mai i le faitotoa o le lafu mamoe e ala i le papatisoina. “Ae peitai afai latou te le salamo,” na fetalai manino mai le Faaola, “e ao ina latou tiga e pei o au.” (MFF 19:7.)<sup>11</sup>

---

### **E faapefea ona taitaiina i tatou e le Agaga Paia i le afioaga o le Alii?**

O tagata uma o le Ekalesia ua papatisoina ma faaee atu i ai lima i o latou ulu, ma faapea atu toaina ia i latou pe a maea ona faamauina o ia e avea ma se tagata o le Ekalesia, “Talia le Agaga Paia.” Ona mafai lea e i latou ona toe faia upu na fetalai i ai le Matai i ona soo ina ua Ia fetalai atu ia te i latou e uiga i le Fesoaosani po o le Agaga Paia o le a oo mai: O le a ia faamanatu ia te outou mea uma. O le a ia aoao ia te outou i mea uma. O le a ia faailoa ia te outou mea e oo mai. [Tagai Ioane 14:26;16:13.] Ma afai o le a ou faamauina oe e avea ma tagata o le Ekalesia, ou te faamauina i ou luga le meaalofa o le Agaga Paia e avea lea ma sulu i ou vae ma taitai i ou ala, o le a ia aoao ia te oe i mea uma ma faamanatu ia te oe i mea uma, ma faailoa ia te oe mea uma o le a oo mai.<sup>12</sup>

Sa fetalai mai le Alii: “O lau talalelei foi lenei, o le salamo ma le papatisoga i le vai, ona oo mai ai lea o le papatisoga i le afi ma le Agaga Paia, o le Fesoasoani lea, o le a faailoaina atu mea uma, ma aoao atu mataupu tau i le filemu o le malo.” (MFF 39:6.)

Pe a i ai i le tagata le mea foaifua o le Agaga Paia, ua ia te ia le mea e mafai ai ona faailoa atu ia te ia mataupu faavae uma ma sauniga o le faaolataga lea e faatatau i tagata o i le fogaeleele.<sup>13</sup>

O se manatu fetau lelei lo tatou faapea ane pe a papatisoina se tasi i le vai ma maua faamanuiaga o le Agaga e ala i le faaee atu o lima, o ia o se tagata ua toe fanaufouina. O se toe fanaufouina ona ua toe aumaia o ia mai le oti faaleagaga i le mafutaga ma se tasi o le Aiga Atua, o le Agaga Paia lea. O le ala lea matou te faapea atu ai ia te outou pe a faamauina outou “Talia le Agaga Paia”. O lena meaalofa e tuuina atu lea i le ua talitonu ma ua faatuatua ma ua ola i le tulaga na te mauaina ai lena faamanuiaga, o le aia tatau e fesootai ai ma se tasi o le Aiga Atua ina ia faatoilaloina ai lenei oti faaleagaga.<sup>14</sup>

O le papatisoga i le faatofuina o le faatusa lea oti ma le tanumia o le tagata o le agasala, ma o le toe tulai mai le vai o le faatusa lea o le toetu mai o se tagata ua faafouina i le ola faaleagaga. A maea le papatisoga ona faaee atu lea o lima i luga o le ulu o le tagata faatuatua ua papatisoina, ma ua faamanuiaina ia maua le Agaga Paia. Ma afai e maua e le ua papatisoina le folafolaga poo le meaalofa o le Agaga Paia, poo le avanoa e toe aumaia ai o ia i le mafutaga ma se tasi o le Aiga Atua, e ala i le ususitai ma lona faatuatua, o le ua faamanuiaina o le a ia maua le taitaiga ma le faasino ala o le Agaga Paia i ana talanoaga ma savaliga i aso faisoo e pei lava o Atamu sa savavali ma fetautalatalaai ma le Atua lona Tama Faalelagi i le Faatoaga o Etena. Ina ia mauaina lenei taitaiga ma lenei faasino ala mai le Agaga Paia, e tatau ona toe fanauina faaleagaga.<sup>15</sup>

I mataupu faavae o le talalelei – faatuatua, salamo, papatisoga, ma le mauaina o le meaaofa o le Agaga Paia, o le mana lea e mafai ai ona faaalua mai mea uma, o le a amata ai ona tatou malamalama e uiga i se tasi o taimi na faapea mai ai le Perofeta o Iosefa Samita ina ua fesiligia o ia pe aisea lava ua ese ai lenei Ekalesia mai isi ekalesia uma—aua o loo ia te i matou le Agaga Paia. [Tagai *Talafaasolopito o le Ekalesia*, 4:42.] O le mauaina o lea

mana e mafai ai ona faaalua mea uma, ma ona o lena, na mafai ai ona faatuina le atoatoaga o le Talalelei a Iesu Keriso.<sup>16</sup>

---

### **E mafai faapefea ona tatou tumau e oo i le iuga?**

O a tulafono ma le ala e mafai ai ona tatou mauaina [le faamanuiaga o le mamalu faaselesitila]? O lenei, ua ia i tatou muai mataupu faavae ma sauniga o le Talalelei, faatuatua, salamo, papatisoga, ma le Agaga Paia, ma i le Malo o le Atua, o loo i ai tulafono e aoaoina mai ai le ala e tau atu i le atoatoaga. O soo se tagata lava o le Ekalesia o loo aoaoina e ola ma le atoatoa i tulafono taitasi o i lena malo, o loo ia aoaoina le auala e mafai ai ona faatoatoaina o ia. E leai se tasi o le Ekalesia e le mafai ona ola i le tulafono, o tulafono uma o le talalelei ma le atoatoa. E mafai e i tatou uma ona aoao e talanoa ma le Atua i le tatalo. E mafai e i tatou uma ona aoao e tausia ma le atoatoa le tulafono o le Upu o le Poto. E mafai e i tatou uma ona aoao e tausia ma le atoatoa le faapaiaina o le Sapati. O outou uma lava e mafai ona aoao e tausia le tulafono o le anapogi ma le atoatoa. Ua tatou iloa tausii le tulafono o le legavia ma le atoatoa, ua ia i tatou i luga o le auala e tau atu i le faatoatoaga.<sup>17</sup>

E mafai ona e fesili mai ia te au, e faapefea ona faapaiaina e se tasi o ia lava, ma avea o ia ma tagata paia ina ia saunia o ia e savali atu i le afioaga o le Alii?...Sa fetalai mai le Alii, “O lenei foi, e moni ou te fai atu ia te outou o le mea e pulea e le tulafono e faasaoina foi e le tulafono ma faatoatoaina ma faapaiaina ai lava.” (MFF 88:34). O a tulafono? O tulafono a le Alii o loo i le Talalelei a Iesu Keriso o le tausii o ia tulafono ma sauniga o ala ia e faamamaina, ma faapaiaina ai i tatou. O le tausii o tulafono uma na tuuina mai e le Alii ia te i tatou o se tasi lea o laasaga e sosoo ma le mauaina o le aia tatau e ulufale atu ai i se aso i le afioaga o le Alii.

Ua ia tuuina mai ia i tatou i se isi faaaliga le auala e mafai ai ona saunia i tatou lava a o faagasolo le tausaga. “E moni ua faapea mai le Alii. O le a oo i tagata taitoatasi o lē lafoai ana agasala ma sau ia te au, ma valaau mai i lo’u igoa, ma uisiusitai i lo’u leo, ma tausii mai i au poloaiga, o le a vaai i o’u mata ma iloa o loo i ai au.” (MFF 93:1). E faigofie, a ea? Ae toe faalogo foi...Pau o le

mea e tatau ona e faia o le lafoai lea o au agasala, sau ia te Ia, valaau mai i Lona suafa, usiusitai i Lona siufofoga ma tausia Ana poloaiga, ona e vaai ai lea i Ona fofoga ma iloa o loo i ai o Ia.<sup>18</sup>

O le galuega lenei a le Alii ma pe a ia tuuina mai se poloaiga i le fanauga a tagata, na te saunia le ala e mafai ai ona faataunuuina lona poloaiga. Afai e faia e ana fanau mea uma latou te mafaia e fesoasoani ia i latou lava, o le a faamanuiaina e le Alii a latou taumafaiga.

. . . E finagalo le Alii ina ia tatou faia mea uma tatou te mafaia e faasaoina ai i tatou lava, ma...pe a maea ona tatou faia mea uma tatou te mafaia e faasaoina ai i tatou lava, ona mafai lea ona tatou faalagolago i le alofa tunoa o lo tatou Tama Faalelagi. Na ia auina mai lona Alo, ma e ala i le usiusitai i tulafono ma sauniga o le talalelei e ono maua ai e i tatou lo tatou faaolataga, ae le mafai, seiloga lava ua tatou faia mea uma lava tatou te mafaia mo i tatou lava ia.<sup>19</sup>

Ua tuuina mai e le Alii ia te i tatou, e tofu le tagata ma lana lamepa e tauaveina, ae faalagolago le i ai po o le leai foi o suauu i a tatou lamepa ia i tatou lava. Pe tatou te tausia poloaiga pe leai ma saunia suauu manaomia e faamalamalama ai lo tatou ala ma taiialaina ai i tatou, e faalagolago lea ia i tatou taitoatasi. E le mafai ona tatou faalagolago i lo tatou avea ai ma tagata o le Ekalesia, po o so tatou gafa sili'ilagi [e aumai ai ni suauu mo a tatou lamepa]. Pe i ai pe leai foi ni suauu o a tatou lamepa, ou te toe fai atu foi, e faalagolago lava lea i tagata taitoatasi; e fuafua i lo tatou faamaoni e tausia poloaiga a le Atua Soifua.<sup>20</sup>

O mataupu faavae uma o le talalelei ma sauniga uma o le talalelei, o ni valaaulia ia i le aoaoina o le talalelei e ala i le ola ai i ana aoaoga. Ona pau lava lona—o valaaulia ina ia o mai ma ola ai ina ia mafai ai ona outou iloa. . . .E foliga mai ua manino ia te au, e mafai foi ona tatou faapea, tatou te le matua iloa lelei ni aoaoga o le talalelei sei vagana lava ua tatou faatinoina e ala i le ola ai ma tausia. I se isi la faaupuga, tatou te aoaoina le talalelei, e ala i le ola ai.<sup>21</sup>

O le savali aupito sili e mafai e se tasi i lenei tulaga ona tuuina atu i tagata o le Ekalesia, o le tausia lea o poloaiga a le Atua, aua o iina o loo i ai le saogalemu o le Ekalesia ma le saogalemu

o tagata taitoatasi. Tausi poloaiga. E leai se isi mea e mafai ona ou fai atu ai e fai ma savali aupito sili ona mamana pe taua foi i le aso.<sup>22</sup>

## Fautuaga mo Suesuega ma Talanoaga

---

- E faapefea ona tatou atinae le faatuatua sili atu i le Alii o Iesu Keriso? E faapefea ona fesoasoani mai le faatuatua ia i tatou ia ola i poloaiga, nai lo le manatu mama i ai? O anafea na mafai ai e lou faatuatua i le Atua ona fesoasoani ina ia mafai ona e taulimaina “faafitauli sili atu nai lo lou malosi po o le atamai faaletagata?”
- Aisea e taua ai le ta’uta’u atu [o sese po o agasala] i le faagasologa o le salamo? Aisea e tatau ai ona tatou amata nei ona salamo mai a tatou agasala ma suia o tatou olaga, nai lo o le faatalitali mo se isi aso.
- E faapefea ona faamamaina o [tatou] ofu i le toto o le Alo o le Atua i se ala faatusatusa?
- E tusa ma le saunoaga a Peresitene Lee e mafai faapefea e le mauaina o le meaalofa o le Agaga Paia ona fesoasoani ia i tatou e faatoilaloina le oti faaleagaga? O le a se mea e mafai ona tatou faia ina ia faaatoatoaina ai lo tatou maua o taitaiga a le Agaga Paia i a tatou “savaliaga ma talanoaga i aso taitasi?”
- O le a se mea o loo aoaoina mai e le MFF 93:1 e uiga i le taua o le tumau i le tausiga o poloaiga seia oo i le iuga?
- E faapefea ona avea le ola i se mataupu patino o le talalelei e fesoasoani ai ia te oe ia iloa ai le moni?

### *Faamatalaga*

- |  |  |
|--|--|
| <ol style="list-style-type: none"> <li>1. <i>The Teachings of Harold B. Lee</i>, faatonu e Clyde J. Williams (1996), 19.</li> <li>2. “ ‘And This Is Life Eternal,’ ” <i>Relief Society Magazine</i>, Aperila 1950, 225.</li> <li>3. <i>Decisions for Successful Living</i> (1973), 75–76.</li> <li>4. “ ‘Put on the Whole Armor of God,’ ” <i>Church News</i>, 30 Me 1942, 8.</li> <li>5. “For Every Child, His Spiritual and Cultural Heritage,” <i>Children’s Friend</i>, Aokuso 1943, 373.</li> </ol> | <ol style="list-style-type: none"> <li>6. <i>Decisions for Successful Living</i>, 94, 98–99.</li> <li>7. <i>The Teachings of Harold B. Lee</i>, 115.</li> <li>8. <i>The Teachings of Harold B. Lee</i>, 82.</li> <li>9. Lauga i le Faalapotopotoga o le Mutuale Faaleleia, 1948, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 5.</li> <li>10. <i>Decisions for Successful Living</i>, 116, 118.</li> <li>11. <i>Stand Ye in Holy Places</i> (1974), 316–17.</li> </ol> |
|--|--|



12. Lauga i le konafesi a le autalavou i Billings, Montana, 10 Iuni 1973, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 4.
13. *Stand Ye in Holy Places*, 51.
14. Lauga i le fonotaga a le seminare i Jordan, 26 Fepuari 1947, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 5.
15. *The Teachings of Harold B. Lee*, 95.
16. Lauga i le semina a peresitene fou o le misiona, 29–30 Iuni 1972, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 5.
17. Lauga i le konafesi a le itu a Lima, Peru, 1 Novema 1959, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 6–7.
18. *The Teachings of Harold B. Lee*, 166; parakalafa faaopoopo.
19. I le Conference Report, Konafesi o le Eria a Munich Siamani 1973, 7.
20. I le Conference Report, Oketopa 1951, 30.
21. “Learning the Gospel by Living It,” lauga i le konafesi faaletausaga lona 52 a le Peraimeri, 3 Aperila 1958, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 3.
22. *Ensign*, Aokuso 1972, faavaa i tua.



# Savali i le Malamalama o le Molimau

*E faapefea e le malamalama o a tatou molimau ona tuputupu e aveva ma se “malamalama o le mautinoa”?*

## Faatomuaga

**E**sili atu i le 32 tausaga, na aveva ai Harold B. Lee ma se molimau faapitoa o le Faaola o Iesu Keriso. Na ia tautino mai, “Ma le mamalu uma ma le paia, ma lo’u agaga atoa, ou te tuuina atu ai la’u molimau ou te iloa o loo soifua Iesu, o Ia o le Faaola o le lalolagi.”<sup>1</sup>

Ina ua ia saunoa pe faapefea ona maua se molimau, na ia ta’ua:

“Sa i ai se aso na asiase mai ai ia te au se alii talavou o se faifeau Katoliko ma se faifeautalai faalesiteki mai Colorado. Sa ou fesili atu ia te ia pe aisea ua sau ai o ia, ma sa ia tali mai, ‘na ou sau e vaai oe.’

“ ‘Aisea?’ o lau fesili lea.

“ ‘Vaai oe,’ sa ia faapea mai, ‘Sa ou sailiili i nisi o mataupu ou te le mafai ona ou mauaina. Ae ou te manatu ua ou mauaina nei i le faapotopotoga a tagata Mamona.’

“Na afa itula le umi o le talanoaga. Sa ou faapea atu ia te ia, ‘Tama, pe a amata ona ta’u atu e lou loto mea e le iloa e lou mafaufau, o lona uiga ua e maua le Agaga o le Alii.’

“Na ia ataata ma faapea mai, ‘Ou te manatu ua amata ona tupu lena mea ia te au.’

“‘Aua la e te faatali umi,’ o la’u tala lea ia te ia.

“I ni nai vaiaso mulimuli ane, na ou maua ai se telefoni. Na ia faapea mai, ‘O le aso Toonai a sau nei o le a ou papatiso ai e aveva ma se tagata o le Ekalesia, aua sa ta’u mai e lo’u loto ni mea e lē iloa e lo’u mafaufau.’

“Sa faaliliuina o ia. Na ia vaai i mea sa tatau ona ia vaai i ai. Na ia faalogo i mea sa tatau ona ia faalogoina. Na ia malamalama i se mea e tatau ona ia malamalama i ai, ma sa ia faia i ai se mea. Sa ia te ia se molimau.”<sup>2</sup>

## **Aoaoga a Harold B. Lee**

---

### **O le a le molimau?**

E mafai ona faamatalaina le molimau o se faaaliga paia mo le tagata faatuatua. Sa faaleoina e le faisalamo le manatu lava lea e tasi: “...o le molimau i le Alii ua mautinoa...” (Salamo 19:7.) Na faailoa mai e le Aposetolo o Paulo, “e leai foi se tagata na te mafaia ona ta’ua [pe iloa] o Iesu o le Alii, pe a na le seanoa le Agaga Paia.” (1 Korinito 12:3.) Sa aoao atili mai e le au perofeta afai e te “ole atu ai ma le loto faamaoni ma le manatu tonu i ai, ma le faatuatua ia Keriso, na te faaaliga le tonu ia te outou i le mana o le Agaga Paia tou te iloa ai le tonu i mea uma lava.” (Moronae 10:4–5). . .

O loo soifua le Atua! O Iesu o le Faaola o le lalolagi! O le tala-lelei a Iesu Keriso e pei ona i ai i le atoatoa i tusitusiga paia o aso anamua ma mau o aso nei, ua moni ia. Ua ou iloa nei mea i le molimau mai o le Agaga i lo’u agaga.<sup>3</sup>

Sei ou faamatalaina atu ia te oe se mea na tupu ia te au ma se tasi o le matou pulega faapisinisi. O lona toalua ma lana fanau o ni tagata o le Ekalesia ae lē auai o ia. Na ia faapea mai ia te au, “E le mafai ona ou auai i le Ekalesia seiloga ua i ai sa’u molimau.” Sa ou faapea atu ia te ia, “A e toe sau i Sate Leki, ona e sau lea ta te talanoa.” I ni vaiaso mulimuli ane ina ua maea la matou fonotaga faapisinisi sa ma talanoa ma ou faapea atu ia te ia, “Ou te le iloa po ua e iloaina e i ai sau molimau pe leai foi; po o e malamalama foi i le mea e ta’u o le molimau.” Ma sa ia manao e fia iloa po o le a le molimau. Sa ou tali atu ia te ia e faapea, “Pe a oo mai le taimi e ta’u atu ai e lou loto mea e lei iloaina e lou mafaufau, o le Agaga lena o le Alii o loo talanoa atu ia te oe.” Ona ou faapea tu lea, “E pei ona ou iloa oe, o loo i ai mea ua e iloaina i totonu o lou loto e moni ia. E leai se agelu o le a popoina lou tauau ma ta’u atu ia te oe o le mea lea e moni.” O le agaga o le Alii e pei ona fetalai mai le Matai: “E agi le matagi

i le mea e loto i ai o ia, e te faalogo foi i lona agi, e te le iloa le mea na sau ai, ma le mea e alu atu i ai, e faapena i latou ua fanauina i le Agaga.” (Ioane 3:8). Ona ou faapea atu lea i la’u uo, o se tasi o le pulega faapisinisi: “Ia manatua o lau molimau e le ala mai i se auala matautia ae afai e oo mai, o loimata o le fiafia o le a faasusuina ai lou aluga i le po. O le a e iloa, la’u uo pelē, pe a oo mai lena molimau”.<sup>4</sup>

Ou te tuuina atu la’u molimau ou te iloa o loo soifua le Faaola o le molimau aupito malosi e mafai ona e maua o loo soifua o ia, e maua lea pe a molimau mai le mana o le Agaga Paia i lou agaga, o loo soifua o Ia. E sili atu le malosi nai lo o le vaai, e sili atu le malosi nai lo le savavali ma talatalanoa faatasi ma Ia, o le molimau lena a le Agaga Paia e faamasinoina ai oe pe afai e te liliu ese mai ia te Ia. Ae o le tiutetauave lena o outou uma, o lou tiutetauave foi lea ina ia faavaeina lena molimau. Ua fesiligia pea i tatou, pe faapefea ona maua e se tasi faaaliga? Sa fetalai atu le Alii i se faaaliga i taitai na i ai muamua, “O le a ou faaali atu ia te oe i lou mafuafau ma lou loto i le Agaga Paia. O le a nofo i totonu ia te oe. O le faaaliga lena na taitaiina ai e Mose le fanauga a Isaraelu i le Sami ulaula ma sopoia ai.” (Tagai MFF 8:2–3) Pe a molimau mai lena Agaga i o tatou agaga, o le faaaliga lena mai le Atua Silisiliese.<sup>5</sup>

[Ina ua oti Lasalo, na faailoa atu e le Faaola ia Mareta,] “O au nei o le toetu ma le ola: o le faatuatua mai ia te au, e ui lava ina oti ia, a e ola lava ia. O tagata ola uma o e faatuatua mai ia te au, e le oti lava e oo i le faavavau.” Ona ia silasila atu lea ia Mareta ma ia fetalai atu, “Po ua e talitonu mai ea i lena mea?” Ma ona o le lotomauualalo tele o lona tamaitai, na fagua mai ai se mea ma sa ia faapea ane ai e pei o la Peteru. “Ioe le Alii e, ua ou talitonu lava, o oe o le Keriso le Alo o le Atua, o le maliu mai i le lalolagi.” [Ioane 11:25–27.]

O fea na ia maua mai ai lena tali? E lei mauaina mai i le faitauina o tusi. E lei mauaina mai i le suesueina o mataupu tau lotu po o le faasaienitisi, poo le faafilosifia. Sa ia maua se molimau i lona loto, e pei lava ona maua e Peteru. Pe ana fai e tali mai le Matai, semanu ua ia fetalai mai: “Amuia oe Mareta, aua e lei faailoa atu e aano ma le toto ia te oe, a o lo’u Tama o i le lagi”...O

le mea e aupito sili ona anagata o mea uma e mafai ona e maua, o le mauaina lea o se molimau i lou loto e moni nei mea.<sup>6</sup>

E le toatele nisi ua faafesagai ma le Faaola i lenei olaga faaletino, ae o i tatou uma taitoatasi ua faamanuiaina ia maua le meaalofa o le Agaga Paia ina ua maea ona papatisoina, e mafai ona maua le tulaga mautinoa atoatoa o loo soifua o Ia. E moni, afai e ia i tatou le faatuatua i le moni o loo soifua Ia, e ui ina tatou le vaaia, e pei ona faamamafa atu e le Matai i Lana fetalaiga ia Toma, e sili le manuia o i latou “o e le vaai mai, a e talitonu mai pea”(Ioane 20:29), aua “o le faatuatua ua matou savavali ai, ae le o le tino mai o mea” (2 Korinito 5:7). E ui ina le o vaaia, ae o loo faatuatua ia te ia tatou te olioli ai ma le fiafia e le matalatalaina, e silisili ese lava; i le mauaina foi o le iuga o lo tatou faatuatua, o le faaolaina lea o o tatou agaga (tagai 1 Peteru 1:8–9).<sup>7</sup>

Pe mafai ona tatou tuufaatasia nei mea ma faapea ane, o soo se tagata ua mauaina se molimau faamaoni, ua ia mauaina se faaaliga mai le Atua soifua, pe semanu ua leai sana molimau? O soo se tasi ua ia te ia se molimau, ua olioli i le meaalofa o valoaga, ua ia te ia le agaga o faaaliga. Ua ia te ia le meaalofa lea ua mafai ai e perofeta ona tautala i mea e faatatau i o latou tiute.

Ia fesoasoani le Alii ia i tatou uma ia taumafai e maua lena molimau sili ona taua i le tatou sauniuniga mo le iloa. Mulimuli ane ina ua tatou maua lena manatu paia e tasi o Iosefa Samita sa avea ma perofeta, ma o ia lava o se perofeta, ma e moni le tala-lelei, o isi faafitauli uma e faafoliga mai e liu suavai atu e pei o le kiona mamafa ae le i oo ina oso a’e le la.<sup>8</sup>

---

### **E faapefea ona tatou saunia i tatou lava ia maua se molimau?**

Na ta’ua faapea [o le Faaola] na fetalai mai “...ua i ai lava ia te outou le malo o le Atua.”(Luka 17:21.) O se faaliliuga e sili atu ona tonu e tataua ona faapea, “O le malo o le Atua, ua ia te outou, po o i totonu o lo outou lotolotoi,” ae ao ou mafaufau atu i le isi faamatalaga lena, “Ua i ai lava ia te outou le malo o Atua.” Ou te toe manatunatu i se mea na tupu ia te i matou ma se faalaotopotoga o tamaiti aoga mai le Iunivesite o Polika Iaga le fale sa

nofo muamua ai Polika Iaga, ma o iina e toasefuluono, na fai ma sui o atunuu e sefuluono mai fafo, na faatonu e tutulai ma faamatala mai pe na faapefea ona latou iloa e uiga i le talalelei ma latou taliaina, ... ma tuuina atu a latou molimau. O se afiafi sa sili ona faatupu manatu. Sa matou faalogologo atu i ni alii ma tamaitai talavou mai Mekisiko, Atenitina, Pasila, o atunuu mai Scandinavia, Farani, ma Egelani. E tutusa lelei le tala. Ina ua amata ona latou faamatalaina mai le ala na latou maua ai le talalelei, na faapea: Sa latou fia maua le mea moni. Sa latou sailia le malamalama. Sa le faamalieina i latou ma i le taulotoaiga o la latou saililiga, na sau ai ia i latou se tasi ma le upumoni o le talalelei. Sa latou tatalo e uiga i nei mea ma saili atu ma le nautai i le Alii, ma le faamoemoega, ma o latou loto atoa, ma sa latou maua ai se molimau paia lea na latou iloa ai o le talalelei lenei a Iesu Keriso. . . .Ma i totonu o agaga o tagata uma, o i latou uma o e saili ma le faamaoni i le mea moni, pe afai e ia te ia le manao e iloa, ma susesue ma le manatu moni ma le faatuatua i le Alii o Iesu Keriso, ua i ai lava ia te ia le Malo o le Atua pe i se isi foi faaupuga, ua ia te ia le mana e maua mai ai.<sup>9</sup>

I le faavae o le molimau a le tagata lava ia e tatau ona faamaoni, ola mama, a le o lena e le mafai ona molimau atu le Agaga i le paia o le misiona a le Faaola poo lenei galuega i o tatou aso.<sup>10</sup>

O le mea muamua e matua manaomia...i le mauaina o se molimau o le faamautinoa lea o loo sologa lelei le “tulaga” faaleagaga o le tagata. E tatau ona mama lona tino ma le mafaufau pe afai ua ia olioli i le mafutaga o le meaalofa a le Agaga Paia lea e mafai ai ona ia iloa le tulaga mautinoa o mea faaleagaga.<sup>11</sup>

O le liliu mai e tatau ona sili atu lona uiga nai lo le na ona avea ma tagata o le Ekalesia e “feaveaiina se pepa” o se lisiti o le sefuluai, o se pepa faamaumau, o se pepa faataga o le malumalu, ma isi. O lona uiga o le faatoilaloina lea o uiga faitio po o le faipona ma taumafai pea e faaleleia o tatou vaivaiga i totonu ae le na o foliga vaaia i fafo.<sup>12</sup>

Pe malaga atu a tatou faifeautalai, tatou te faapea atu i e o loo galulue i ai, “Matou te le o valaau atu ina ia outou auai mai i le Ekalesia e tau ina tusia o outou igoa i luga o pepa faamaumau. E le o le matou popolega lena. Ua matou o mai ia te outou e

ofoina atu le meaalofo sili e mafai ona tuuina atu e le lalolagi, o le meaalofo lea o le malo o le Atua. O loo iinei mo oe pe afai na o lou taliaina ma talitonu.” Ma o le matou lui lena mo le lalolagi. “E mafai ona matou aoao atu ia te outou mataupu faavae o le Ekalesia a Iesu Keriso ma molimau atu i le paia o le galuega, ae o le molimau o le moni o mea matou te aoaoina atu e tatau ona maua mai i au lava sailiiliga.”

Matou te faapea atu i tagata o loo matou aoaoina, “O lea, ia e fesili atu i le Alii. Suesue, galue ma tatalo.” O le faagasologa lena o loo aumai ai tagata i le Ekalesia, ma o le auala lava lena e tutusa mai le amataga na aumaia ai i le Ekalesia e sa faamaoni i le agaga mai soo se mea.<sup>13</sup>

A o tepa ae i luga fofoga o Iesu i lana tatalo “ua lata lona taimi,” [tagai Ioane 17:1] na ia faaalua se mea moni loloto lea e tatau ai ona matua taua i tagata uma. “O le ola e faavavau foi lenei, ia latou iloa oe le Atua moni e toatasi, atoa ma le ua e auina mai, o Iesu Keriso lea.” (Ioane 17:3.) E ui ina loloto atu le taua o lenei manatu faaalua i lo le mea o le a ou talanoaina, ou te fia aumaia se manatu se tasi mai lenei mau. E faapefea ona e iloa le Tama ma le Alo?...E amata ona tatou mauaina lena atamai e ala i le suesue. Na fautua mai le Faaola ia i tatou “E suesue outou i Tusi, aua ua outou manatu tou te maua ai le ola e faavavau; o tusi foi ia o loo molimau ia te au.” (Ioane 5:39.) O totonu iina o le a mauaina ai le talafaasolopito o fegalegaleaiga a le Atua ma tagata uma i tisipenisione uma, ma galuega ma upu a le au perofeta e faapena foi galuega ma afioga a le Faaola lava ia ua tuuina mai “musumusuga a le Atua,” e pei ona faapea mai le Aposetolo o Paulo “e aoga foi ia e aoao ai, e aoai ai, e faatonu ai, ina ia atoatoa ona lelei ai o le tagata o le Atua, ia saunia lava ia i galuega lelei uma lava.” (II Timoteo 3:16–17.) E le tatau ona e tuua se aso e aunoa ma le faitau mai ni tusi e paia.

Ae e le lava lo tatou tau ina ia aoao e uiga i lona soifuaga ma ana galuega i le na o le suesue. O le Matai lava na tali atu i le fesili i le ala e mafai ai e se tasi ona iloa o ia ma lana mataupu: “Ai se tasi e fia fai lona finagalo, e iloa ai e ia.” (Ioane 7:17.) Pe e te manatu ea o se e pulea mataupu faasaientisi o se na te lei faia lava ni ana suesuega i totonu o le potu suesue? Pe e te matua gauai atu i ni manatu faitio o se tagata faitio i mea tau musika ae

leai sona malamalama tau musika, poo se tagata faitio i tagata tusi ata ae le tusi ata? E faapena foi, se tasi e pei o oe lava o le a “iloa le Atua” e tatau ona avea ma se tasi e faia lona finagalo ma tausia ana poloaiga ma faataitaia uiga lelei sa soifua ai Iesu.<sup>14</sup>

O le mauaina o le malamalama e ala i le faatuatua e le o se au-ala faigofie i le aoaoina. E manaomia le matua taumafai malosi ma le tauivi pea e ala i le faatuatua... ..

I lona aotelega, o le aoao e ala i le faatuatua e le o se galuega lea mo se tagata paie. Ma sa faapea mai se tasi, i se isi faaupuga, o se faagasologa faapena e manaomia ai le gagauina o le loto atoa, o le tuu faatasia o lagona loloto ma mafaufauga loloto ma faafesootai atu ma le Atua...e tatau ona faatulagaina le fesootaiga sao. Ona pau lena o le ala e maua ai le “malamalama e ala i le faatuatua.”<sup>15</sup>

---

### **O le a se mea e mafai ona tatou faia e faamalolosia ai a tatou molimau?**

[Sa fetalai atu le Alii ia Peteru,] “Ua manao tele Satani ia te outou, ia lulu ia te outou e pei o le saito; a ua ou faatoga mo oe, ina nei mavae lo’u faatuatua a o oe foi pe a liua mai oe, ona e faamalosi ai lea i ou uso.” (Luka 22:31–32). Ia maitau mai la, o loo ia fetalai atu nei mea i le taitai o le Toasefululua. Ua ou faatoga mo oe; ia alu atu ma liua mai oe, ma pe a liua mai oe, ona e alu lea e faamalosi i lou uso. O lona uiga (e mafai ona) lē liua i tatou e pei lava foi ona mafai ona tatou liua. O lau molimau o se mea e mafai ona e mauaina nei ae e mafai foi ona le tumau ai.<sup>16</sup>

O le molimau o se mea e faigata ona pueina mai e pei o se ave o le masina; e ma’ale’ale e pei o se oketi; e tatau ona e tapueina mai i taeao uma o lou olaga. E tatau ona faatumauina e ala i le suesue, ma le faatuatua, ma le tatalo. Afai e te faatagaina oe ina ia e ita, afai e te faatagaina oe e auai atu i se faapotopotoga sese, e te faalogologo i tala sese, o loo e aoaoina mataupu sese, o loo e auai atu i ni gaoioiga faasolitulafono, e leai se mea e sili atu ona mate, e pei o le aveesea o le Agaga o le Alii mai ia te oe seia pei lava ua e savali mai i se potu ua faamalalamaina pe a e ulufafo atu mai lenei fale, e pei lava ua e agai atu i totonu o le pogisa.<sup>17</sup>



O le mea e te mauaina i lau molimau i le aso lenei, o le a le avea lea mo oe a taeao seiloga e te faia i ai se mea. O lau molimau e foliga mai o le a faatuputeleina, po o le faaitiitia foi, e faalagolago lava ia te oe. Pe o le a e manatuaina la lau matafaioi? Ua fetalai atu le Alii, “Ai se tasi e fia fai lona finagalo, e iloa ai e ia le mataupu, pe mai le Atua, pe ou te tautala fua au.” (Ioane 7:17).<sup>18</sup>

E leai se tagata o le Au Paia o Aso e Gata Ai ua liua moni e mafai ona ola le mama. E leai se tagata o le Au Paia o aso e Gata Ai ua liua moni, e mafai ona le faamaoni, pe pepelo, pe gaioi. O lona uiga e mafai ona mauaina e se tasi sana molimau i le aso lenei, ae afai na te faata’uvalea ia te ia lava ma faia mea e feteenai ma tulafono a le Atua, o lona uiga ua leai sana molimau ma e tataua ona toe tauivi ina ia toe maua mai. O le molimau e le o se mea e mafai ona e mauaina nei ma mauaina pea. O le molimau e mafai ona tupu ma saga tupu pea e oo atu i le malamalama o le mautinoa, po o le a faaitiitia e oo atu i le leai o se mea, e faalagolago lea i lau mea o le a fai i ai. Ou te faapea atu, o le molimau tatou te mauaina i lea aso ma lea aso o le mea lea e faasaoina mai ai i tatou i mailei a le tiapolo.<sup>19</sup>

---

### **E faapefea ona avea se molimau ma taula o le agaga?**

Sa i ai se taimi a o faia le galuega talai a le Keriso na faailoa atu ai e Lana aposetolo sinia, o Peteru, lona faatuatua ma lana molimau i le paia o le misiona a le Matai: “O oe o le Keriso le Alo o le Atua soifua.” Ua tali atu le Alii ia Peteru e ala i le tautino atu, “...aue e le se tagata na ia faailoa atu ai ia te oe, a o lou Tama o i le Lagi.” Ma i luga o “lenei papa”...poo se isi faaupuga, o le molimau faaalua a le Agaga Paia, le faaalua mai o Iesu o le Keriso...Ua faavaeina Lana Ekalesia, ma o le a le mafaia foi “e faitotoa o seoli ona manumalo i ai.” (Mataio 16:16–18.)<sup>20</sup>

Ua oo i le taimi ma ua faafesagai nei ma oe...ae seiloga ua ia te oe le molimau o le mautinoa o nei mea [le talalelei, le Ekalesia ma isi mea] ua moni o le a le mafai ona e onosaia taimi faigata poo tofotofoga lea o le a pesi i ou luga ma taumafai e saeia oe mai le malupuipua o lou nofoaga i le aso nei. Ae afai e te iloa ma lou loto atoa ua moni nei mea..., o le a e iloa poo ai Iesu lou Faaola, ma poo ai foi le Atua lou Tama; o le a e iloa foi le uuna-

iga a le Agaga Paia. Afai e te iloa na mea o le a e tu e avea ma se taula e faasagatau atu i matagi o le a pesi mai i lou fale, e e pei ona faamatalaina i le faataoto a le Matai. O le e faalogo i ana upu ma tausia ana poloaiga e avea e pei o le fale na fausia i luga o le papa, ona to mai lea o uaga, ua oo mai foi tafega, ua agi mai foi o matagi, ua pesi mai i lea fale, ae lei pau lava ia; aua na faavaeina i luga o le papa. “Ai se faalogo foi i au upu nei, a e le faia, e faatusaina o ia i le tagata valea, na na faia lona fale i luga o le one-one, ona to mai lea o uaga, ua oo mai foi tafega, ua agai mai foi o matagi, ua pesi mai i lea fale, ona pau ai lea, ua nutipalaina lava” (Mataio 7:26–27).

Sa faapea mai le Matai, ma ua ou fai atu ia te outou i le aso nei, o uaga o faaumatiaga, o uaga o faigata, o tafega ma matagi o tofotofoga ogaoga o le a pesi mai i o outou fale uma taitoatasi. O le a i ai le faaosoosoina i le agasala, o le a i ai puapuaga, o le a i ai faigata e faafeagai ma outou i o outou olaga. Ma o i latou e le pauu pea oo mai tofotofoga, o i latou ia sa fausia o latou fale i luga o le papa o le molimau. Tou te iloa tusa lava poo le a le mea e oo mai, o le a le mafai ona e tumau i se malamalama e te nonoina mai. E na o le malamalama lava ua e maua mai le molimau a le Agaga, lea ua ia te outou uma le aia tatau e mauaina ai, e mafai ai ona outou tumau.<sup>21</sup>

E le lava mo i tatou le na o le avea na Au Paia o Aso e Gata Ai e mulimuli i o tatou taitai ma taliaina a latou fautuaga, ae ua ia i tatou se matafaioi sili atu e mauaina ai e i tatou lava se molimau e le faamaluelueina o le tofiga paia o nei alii, ma le molimau o mea ua latou ta’uina mai ia te i tatou o le finagalo lava lea o lo tatou Tama Faalelagi.<sup>22</sup>

Ua ou sau ia te outou i le aso nei o se molimau faapitoa ua i ai le tiutetauave o le tauina atu o lena molimau, i luga atu o isi mea uma. Sa i ai ni taimi vavalalata sa ou iloa ai ma le mautinoa. A o ou saili mo le Agaga e tuuina atu ai se tautalaga i le autu o le Eseta, le toetu mai o le Alii, sa na o au lava i totonu o se potu, ma sa ou faitauina ai tusi a Mataio, Mareko, Luka ma Ioane e patino i i le faasatauroga, ma le toetu, ma sa i ai se mea na tupu ia te au. A o ou faitau, sa peiseai lava o loo ou i ai iina i lena taimi, i le mea moni na tupu, ae lē na o se tala. Ona ou tuuina atu lea o la’u savali, ma tuuina atu la’u molimau o lenei, o se tasi o e au-

pito i itiiti o ou uso nei, o au foi na ou maua se molimau faale-tagata lava ia e uiga i le maliu ma le toetu mai o lo tatou Alii ma lo tatou Matai. Aisea? Aua sa i ai se mea sa mu i totonu o lo'u loto na mafai ai ona ou tautala ma le mautinoa ma tuua uma lafoai uma ai le masalosalo. E mafai foi e oe. Ma o le mea ua sili ona faamalieloto i le lalolagi, o le taula sili i lou agaga, i taimi o faafitauli, i taimi o faaososoga, o faigata ma galuega [o lea] e mafai ona e iloa ma le mautinoa e tetee atu ai i le masalosalo uma, o loo soifua le Atua.<sup>23</sup>

## **Fautuaga mo Suesuega ma Talanoaga**

---

- Aisea e avea ai faaaliga mai le Agaga Paia “o se molimau e sili atu ona malosi e mafai ona e maua” o loo soifua le Faaola?
- O le a le fautuaga na tuuina mai e Peresitene Lee e uiga i le ala e maua ai se molimau o le talalelei? O le a se mea na fesoasoani ia te oe i le mauaina o lau molimau?
- E faapefea ona aumaia i tatou ina ia iloa le Tama o i le lagi ma Iesu Keriso?
- O le a sou mafaufau i le uiga o le faamatalaga a Peresitene Lee ina ua ia foi mai “O le molimau o se mea e faigata ona pueina e pei o se ave o le masina;...e tatau ona e tapueina i taeao uma o lou olaga?”
- O le a se mafuaaga e faaitiitia ai pe mate a tatou molimau? O le a se mea e tatau ona tatou faia ina ia mafai e le malamalama o a tatou molimau ona “tuputupu i le malamalama o le mautinoa?”
- I le taimi lava tatou te maua ai se molimau, e faapefea ona tatou fesoasoani i isi e faamalosi a latou molimau?
- O a ni auala e avea ai le malamalamaaga o loo soifua le Atua ma taula i o tatou agaga i taimi o faafitauli? O anafea na avea ai lau molimau i le Faaola ma puna o malosiaga ia te oe?

## Faamatalaga

1. “But Arise and Stand upon Thy Feet”—and I Will Speak with Thee,” lauga na tuuina atu i le Iunivesite o Polika Iaga, 7 Fepuari 1956, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 2.
2. *Stand Ye in Holy Places* (1974), 92–93.
3. *Stand Ye in Holy Places*, 193, 196.
4. *The Teachings of Harold B. Lee*, faatonuina e Clyde J. Williams (1996), 140–41.
5. Lauga na tuuina atu i le konafesi a Lausanne Suisalani, 26 Setema 1972, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 8.
6. Lauga na tuuina atu i Pocatello, Idaho, 9 Mati 1973, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai.
7. *The Teachings of Harold B. Lee*, 93.
8. “Church and Divine Revelation,” 1954, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 17, 23.
9. I le Conference Report, Oketopa 1953, 26–27.
10. *The Teachings of Harold B. Lee*, 133.
11. *The Teachings of Harold B. Lee*, 137.
12. I le Conference Report, Aperila 1971, 92; poo le *Ensign*, Iuni 1971, 8.
13. *The Teachings of Harold B. Lee*, 135–36.
14. *Decisions for Successful Living* (1973), 39–40; parakalafa faaopoopo.
15. *The Teachings of Harold B. Lee*, 331.
16. *The Teachings of Harold B. Lee*, 138.
17. *The Teachings of Harold B. Lee*, 139.
18. *The Teachings of Harold B. Lee*, 135.
19. *The Teachings of Harold B. Lee*, 139.
20. *Stand Ye in Holy Places*, 40.
21. *The Teachings of Harold B. Lee*, 140.
22. *The Teachings of Harold B. Lee*, 133.
23. *Education for Eternity*, “The Last Message” aoaoga na tuuina atu i le Inisitiuti o Mataupu Faalelotu i Sate Leki, 15 Ianuari, 11.



# Ina ia Faalogo i le Siufofoga o le Alii

*E faapefea ona tatou maua faaaliga mai le Alii mo le tagata lava ia?*

## Faatomuaga

Sa faapea mai Peresitene Harold B. Lee i se tasi taimi “O loo ia te au se loto talitonu na amata mai i se molimau faatauvaavaa ao ou itiiti...ou te manatu e masalo pe o le sefulu poo le sefulutasi o ou tausaga. Sa ma faatasi ma lou tama i le faatoaga e mamao ese mai lo matou fale, sa ou taumafai e pisi i le faaaogaina o le aso seia oo i le taimi ua saunia ai lo’u tama e foi atu i le fale. O le isi itu o le pa mai la matou faatoaga, sa i ai ni fale ua pauu, e mafai ona tosina atu i ai se tamaitiiti sa tumu i le fia iloa ma sa ou fiafia e tafao ma vaavaai i ni vaai fou. Na amata ona ou ae atu i le pa, ma sa ou faalogoina se leo manino e pei ona e lagonaina mai lo’u leo o valaau mai i lo’u igoa ma faapea mai, ‘Aua e te alu i o!’ Sa ou liliu e tilotilo atu i lo’u tama e vaai poo i ai i le isi itu o le fanua. Sa le iloa atu se tagata. Na ou iloina, a o ou tamaitiiti, o loo i ai ni tagata e le mafai ona ou vaia, aua sa ou matua lagonaina lava se leo. Na amata mai iina, pe a ou faalogo ma faitau i tala e uiga i le Perofeta o Iosefa Samita, ua ou iloa foi la le uiga o le faalogo i se leo, aua sa tupu ia te au.”<sup>1</sup>

E ui lava atonu e le fetalai mai le Alii ia i tatou i lona siufofoga, a o tatou aoaoina e talanoa atu ia te ia ma iloa le ala na te fesootai mai ai ma i tatou, ua amata ona tatou iloa o Ia. Sa saunoa mai Peresitene Lee “ina ia iloa le Atua ma Iesu Keriso na ia auina mai (tagai Ioane 17:3), e pei ona tau atu e le Matai i ona soo, ia amata i le ala mautinoa e tau atu i le ola e faavavau i le afioaga o nei tagata ua faamamaluina.”<sup>2</sup>



Na sailia e le perofeta o Enosa le Alii i le tatalo faatauauau. E tatau foi ona tatou saili ma le maelega e “fesootai ma lo tatou Tama o i le lagi, ma maua ai se tali i a tatou sailiga ma le malosi mo o tatou aso.

## Aoaoga a Harold B. Lee

---

### O a ni auala e fesootai ai le Tama Faalelagi ma Ana fanau?

Sa ou faalogologo i se tasi o saunoaga musuia mai a Peresitene [J. Reuben] Clark i le Iunivesite o Polika Iaga. Na ia suesue auiliili ai le eseesega o ituaiga o faaaliga e oo mai. Na ia ta'ua mua-mua le faaaliga lea na ia faamatalaina o se mea na tupu, lea na faaaliga moni mai ai le Tama po o le Alo po o i laua uma foi, ma talanoa tuusao atu i se tagata. Sa talanoa faafesagai Mose ma le Alii (tagai Mose 1:1–4): Na i ai foi se faaaliga patino ia Tanielu, po o se faaaliga faaletagata lava ia [tagai Tanielu 10]. Ina ua maliu ae le Alii ia Ioane le Papatiso mo le papatisoina, ia e manatua na fetalai mai le siufofoga mai le lagi ma faapea mai, “O lou Atalii pele lena ua ou fiafia lava ia te ia.” [Mataio 3:17.] I le faaliliuina a Paulo,....na i ai foi le faaaliga patino, ma sa faalogoina se leo manino o tautala mai [tagai Galuega 9:1–6]. I le taimi foi na liua ai [Iesu] na malaga ai Peteru, Iakopo ma Ioane, ma le Matai i se mauga maua luga lea na faaali ane ai Mose ma Elia ia i latou, na toe faalogoina ai foi le siufofoga o tautala mai i le lagi, o faapea mai, “O lou Atalii Pele lena, ua ou fiafia lava ia te ia. . .” (Mataio 17:5.)

Masalo o le faaaliga aupito sili o o tatou taimi o le faaali mai lea o le Tama ma le Alo i le Perofeta o Iosefa Samita i le togalaau [tagai Iosefa Samita—Talafaasolopito 2:14–17]. Mulimuli ane i lena, na i ai isi faaaliga na oo mai, o se tasi lea o loo tusia i le mataupu e 110 o le Mataupu Faavae ma Feagaiga ina ua faaali atu le Faaola ia Iosefa ma Oliva... .

O se isi auala tatou te maua ai faaaliga lea sa tautala i ai le perofeta o Enosa. Na ia tusia lena faamatalaga sili ona taua i ana faamaumauga i le Tusi a Mamona. “Ina o faapea ona ou finau i le Agaga, faauta ua toe tulei mai le siufofoga o le Alii i lou mafau-fau...”[Enosa 1:10.]

I se isi faaupuga, o nisi taimi tatou te faalogoina le siufofoga o le Alii i o tatou mafau-fau, ma pe a oo mai, o faalogoina e malosi lava e pei lava o loo Ia iliaina se pu i o tatou taliga... .

I se tala i totonu o le Tusi a Mamona, na aoai faamalosi atu ai Nifae i ona uso, ma valaau atu ia i latou e salamo, ma tautala atu

i le manatu e tasi ina ua ia faapea mai: "...ma ua tautala mai o ia ia te outou i le leo itiiti ma le filemu, a ua le toe lagona e outou, ua le mafafai outou ona lagona ana fetalaiga...."(1Nifae 17:45.)

O lea, e aumaia ai e le Alii e ala mai i faaaliga ni manatu i o tatou mafaufau e pei o se siufofoga ua tautala mai. Sei ou tuuina atu lau molimau ma le lotomauualalo i lena mea moni? Sa i ai se taimi sa ou i ai i se tulaga e manaomia ai se fesoasoani. Sa silafia e le Alii lou manaomia o se fesoasoani, ao ou i ai i se misiona taua. Sa fafaguina au i le taeao po lava ma sa faasa'o ai au i se mea na ou fuafuaina e faia i se auala e ese mai, ma sa faataatia sa'o mai lena auala i ou luma ao ou taoto i lena taeao, sa mautinoa tonu e pei lava sa nofo se tagata i le pito o lo'u moega ma ta'u mai ia te au le mea e fai. Ioe, e oo mai le siufofoga o le Alii i o tatou mafaufau, ma e mafai ona taitaiina ai i tatou.

Tatou te maua foi faaaliga e ala i le mana o le Agaga Paia. Sa fetalai atu le Alii i le Perofeta o Iosefa Samita i popo fou o le Ekalesia, "Ioe, faauta o le a ou faaali atu ia te oe i lou mafaufau ma lou loto i le Agaga Paia, o le a tumau i lou loto. O lenei faauta o le agaga lenei o faaaliga...."(MFF 8:2-3) Na faamafanafana atu le Alii i Ona soo, tou te manatua, ao lei oo i lona faasatauroga na ia fetalai mai, "...afai ou te le alu ese, e le maliu mai le fesoasoani ia te outou ...Ae a maliu mai o ia [Agaga Paia] o le Agaga lea e tupu mai ai le upu moni, e taitaia e ia ia te outou i upu moni uma: o le a ia faailoa mai ia te outou mea e oo mai." (Ioane 16:7,13) "e faamanatu mai foi e ia ia te outou i mea uma...."(Ioane 14:26.) O lea ua tatou vaaia le mana o le Agaga Paia. Sa saunoa mai le Perofeta o Iosefa Samita e uiga i lenei, ma ia faapea mai ai, "E leai se tagata e mauaina le Agaga Paia e au-noa ma le mauaina o faaaliga. O le Agaga Paia o ia lea e faaaliga maia." (*Teachings of the Prophet Joseph Smith*, itulau 238.)

E mafai ona ou suia lena...ma faapea atu, soo se Au Paia o Aso e Gata Ai ua papatisoina ma ua faaee atu i ai lima i ona luga mai i ai laotu o loo galueaina le sauniga, ma faatonu atu ia te ia e talia le Agaga Paia, ma o se tasi na te lei mauaina se faaaliga o le Agaga o le Agaga Paia, e lei mauaina le meaalofa o le Agaga Paia lea e tatau ona ia mauaina. O i na tonu o loo taatia ai se mataupu taua tele. Sei ou liliu atu i le faamatalaga a le Perofeta o Iosefa Samita e uiga i faaaliga:



“E mafai ona faamanuiaina se tagata i lona iloaina o se uluai faailoga o le agaga o faaaliga; mo se faataitaiga, pe a e lagonaina le solosolo lelei o le atamai ia te oe, e mafai ona ia avatu ia te oe nai manatu faafuasei, o le mea lea e te maitauina ai, ma e mafai ona faataunuaina i lona lava aso po o se taimi vave; (o lona uiga) o na mea sa tuuina atu i lou mafaufau e le Agaga o le Atua, o le a taunuu; ma o le mea lea, o le aoao i le Agaga o le Atua ma malamalama i ai, o le a mafai ai ona e tuputupu ae i le mataupu faavae o faaaliga, seia oo ina e atoatoa ia Keriso Iesu.” [*History of the Church*, 3:381.]

O a ni mataupu e te ono maua ai se faaaliga? Pe o faateia oe i lou faalogo faapea o oe—ma tagata uma o le Ekalesia o e ua mauaina le Agaga Paia—e mafai ona maua faaaliga? E le mo le Peresitene o le Ekalesia, e lē mo le vaaia o mataupu e faatatau i le uarota, le siteki po o le misiona o loo e nofo ai, ae o tagata taitoatasi uma i lona lava tulaga o i ai, ua i ai le aia tatau na te maua ai faaaliga mai le Agaga Paia.

O tagata uma ua i ai le avanoa e faaaoga ai nei meaalofo ma nei avanoa i le taitaiina o mataupu faatatau ia te ia lava; o le tausiana o lana fanau i le ala e tatau ona ui ai; o le puleaina o lana pisinisi po o le ā lava le mea na te fai. O lana aia tatau le olioli i le agaga o faaaliga ma musumusuga e faia le mea sao, ina ia atamai ma faautauta, amiotonu ma lelei i soo se mea na te faia. Ou te iloa o se mataupu faavae moni lena, ma o le mea lena ou te manao ia iloa e le Au Paia o Aso e Gata Ai. Ma o le mea la lea, o i tatou uma e tatau ona taumafai e finafinau ma uai atu i manatu e faafuasei ona oo mai ia i tatou, ma afai tatou te uai atu i ia manatu ma ia iai se taliga e faalogo i nei musumusuga, o le a mafai e i tatou foi—i tatou taitoatasi—ona tuputupu ae i le agaga o faaaliga.

Ma e toe tasi lava le auala e ono oo mai ai faaaliga ma e ala mai lea i miti. Ia, ou te le tauina atu ia te outou faapea o au miti uma e fai o ni faaaliga tuusao mai le Alii...Ae ou te fefe i lenei vaitau o le atamai faalelalolagi, o loo i ai nisi o i tatou e toetoe lava ina mumusu e talia miti uma faapea e leai se uiga, ma e lē taua. Ae o loo tusia i le faagasologa atoa o tusitusiga paia, ni mea na taitaiina ai e le Alii Lona nuu e ala i miti. . . .

O le mea e tatau ia i tatou uma ona taumafai ia ola, e tausia poloaiga a le Alii, ina ia mafai ona ia tali mai i a tatou talosaga, o tatalo a e pele ia i tatou, o talosaga a le Au Pulega Aoa, mo i tatou. Matou te tatalo e le aunoa mo tagata o le Ekalesia, ma e matou te faafetai i le Atua pe a matou iloa o loo latou tatalo mo i matou. Pe afai tatou te ola agavaa, ona taitaiina lea o i tatou e le Alii—e ala i Lona faaali mai, po o Lona lava siufofoga, po o lona siufofoga foi e ui mai i o tatou mafaufau, po o faalogona i o tatou loto ma agaga. E le gata i lea, e tatau ona tatou faafetai pe afai e auina mai e le Alii se miti ia te i tatou e faaali mai ai le matafogie o le faavavau, po o se lapataiga foi ma se taitaiga e faamafanafanaina ai faapitoa i tatou. Ioe, afai tatou te ola ai i lona tulaga, o le a taitaiina i tatou e le Alii mo lo tatou faaolataga ma lo tatou manuia.

I le avea ai ma se tasi e sili ona lotomauualalo, ma tauaveina le tofiga o loo ou galue ai, ou te manao e tuuina atu lau molimau faamaulalo ua ou mauaina e ala i le siufofoga ma le mana o faaaliga le atamai ma se malamalamaaga o loo i ai le Atua... ..

Ou te tuuina atu lau molimau maumaututu o loo taitaiina le Ekalesia i aso nei e ala i faaaliga. O tagata uma ua i ai ma ua faamanuiaina ia maua le Agaga Paia, ua i ai ia te i latou le mana e maua ai faaaliga. Ia fesoasoani le Atua ia te oe ma au ina ia tatou ola i se auala e mafai ai e le Alii ona tali atu i tatalo a e faatuatua e ala mai ia i tatou.<sup>3</sup>

---

### **E faapefea ona tatou tatalo i lo tatou Tama o i le lagi ina ia mafai ona Ia taitaiina i tatou?**

E tele le eseesega i le faia o se tatalo ma le talatalanoa ma le Atua. O loo i ai nisi e toaititi o e ua ou faalogo o tatalo ma sa talanoa ma le Atua, o se tasi o i latou o le uso ia [Elder] Charles A. Callis ua maliu. Ou te le i faalogo lava o tatalo o ia i le fata faitaulaga paia i le malumalu, ou te lei faalogo ia te ia a o ma tootutuli faatasi i le tatalo ao ma i ai i se misiona faigata, ae sa peiseai ao ia tautala, ua ia tau atu i faitotoa o le Afioaga paia o lo tatou Tama, ma sa ia talanoa ma tagata paia. Aua le faia tatalo, aua le faitauina tatalo, ae ia aoao e talanoa ma le Atua ma o le talanoa

ma le Atua o le ituaiga tatalo lena ou te manatu na tautala i ai Moronae ao ia tusia le mataupu faaiu o le Tusi a Mamona . . . :

“Ou te apoapoai atu ia te outou, ia outou ole atu i le Atua, le Tama Faavavau, i le suafa o Iesu Keriso, pe le moni ea nei mea; afai tou te ole atu ai ma le loto faamaoni, ma le manatu tonu i ai ma le faatuatua ia Keriso, na te faaalua le tonu ia te outou i le mana o le Agaga Paia.” [Moronae 10:4.]

. . . O le mea leni ou te malamalama i ai o se tatalo o le faatuatua, . . . faatuatua i le Atua ma Lona Alo, o Iesu Keriso, a au-noa ma lena e leai se tasi e mafai ona talanoa ma le Atua.<sup>4</sup>

Na ou tau ane i se mea na tupu i lo tatou uso pele o Richard Evans [o le Korama a le Toasefululua] i se tasi o ana malaga. . . . Sa ia nofo i autafa o se tamaloa i le taumafataga i nai po ua tuanai atu, i autafa o se pule lauiloa o se fale gaosi oloa, o lē sa ta’uina atu ia te ia i nai fuaiupu faigofie le ala sa ia taulimaina ai faafitauli mamafa o lona olaga ma le auala na ia faia ai faaiuga o aso taitasi. “Pe a ou ala ae i le taeao, sa ia faapea mai “E masani ona ou lagonaina e le mafai ona ou taulimaina, ae pe a ou alu ifo i lalo i ou tulivae ma faapea na ona fai atu, ‘Le Atua e, fesoasoani mai ia te au ina ia ou faia mea e ao ona ou faia i leni aso,’ ona ou maua ai lea o le malosi, ma ou te lagona ua fetui lea mo au. Ma ou te mafaufau ia te Ia o lo’u tamā ma ou te talanoa ia te Ia i se ala faigofie ma tuusao e pei ona masani ona ou talanoa ai i lo’u tamā ao i ai o ia i leni lalolagi.” . . .

[Sa faamatala mai e le susuga a Evans:] “Sa ou matamuli ma faamaualaloina au i se uo faatauvaā ma le tuusao, lea sa ou nofo ai i ona autafa i le tasi afiafi. E le o se tagata o lo’u faatuatua, ae [i lo’u] lava ia talitonuga faamaoni, semanu e le mafai ona ia tautala atu i le Atua ma le matuā faamalieina ma le mautinoa pe ana mafaufau ia te Ia faapea ua na o se malosiaga, poo se mea foi e le mafaamatalaina i upu, le natura ma le faamoemoega o se mea e le i ai sona malamalamaaga, po o le leai foi o se mea e aumaia ia te ia le lagona mautinoa sa ia talanoa moni i lona tama.” . . .

E pei ona tau atu e Iakopo i lona aiga. . . . “E! o le silisili ese o le paia o lo tatou Atua! Aua ua silafia e ia mea uma, ua leai se

mea ua le silafia e ia.” (2 Nifae 9:20.) O lea afai o le a e faa-  
mauina lena i lou mafaufau ua i ai ia te oe se amataga o  
manatu, ua i ai se lua mafutaga ma Ia. O i tatou o Ona atalii ma  
Ona afafine. Ua Ia silafia i tatou. Na te silafiaina mea uma ma  
taimi atofaina e tutupu ai, ma le nofoaga tatou te nonofo ai, ma  
taimi tatou te ola ai. Ma ua na o Ia lava e mafai ona tatou faa-  
tuatuaina ma le atoatoa.<sup>5</sup>

O se tasi o mea e sili atu lona taua i mea uma e mafai ona tatou  
mauaina poo le malamalama taua e mafai ona tatou mauaina o  
le faafofoga mai lea o le Alii ma tali mai i tatalo—pe a tuu foi i se  
isi faaupuga, tatou te aoao e talanoa ma le Atua. O le tatalo e le  
na o le faia o faaupuga, e pei ona aoaoina e nisi Ekalesia, ae o le  
iloaina lea o le Atua, o lo tatou Tama Faalelagi, ma Lona Alo, o  
Iesu Keriso, o loo soifua i laua, o ni tagata moni ma e ala mai i le  
galuega a le isi o le Aiga Atua, o le Agaga Paia lea, e mafai ai ona  
tatou fesootai ma Ia, lo taotu Tama Faalelagi, ma maua se tali i a  
tatou saililiga ma le malosiaga mo o tatou aso.<sup>6</sup>

I le lotomauualalo, ia saunia e tautala atu faatasi ma Paulo,  
“Le Alii e, se a le mea e te finagalo i ai ou te faia?” (Galuega 9:6).  
Faatasi ma le lototoa tumau ia tatou faapea ifo faatasi ma le tama  
o Samuelu, “Fetalai mai ia, Ieova e, aua o loo faalologo atu lau  
auna.” (1 Samuel 3:9). Ia e lotomauualalo, ia tatalo, ona taitai-  
ina ai lea o oe e le Alii lou Atua, e faapena lava, ma tali atu i au  
talosaga [tagai MFF 112:10].<sup>7</sup>

Sa aoao mai e [Tavita O.] Makei ia i matou i se tasi aso i totonu  
o le malumalu. . . .“O te fia tau atu ia te outou se mea se tasi: Afai  
e tau atu e le Alii ia te oe se mea e ao ona fai, e tatau ona ia te oe  
le lototoa e faia ai, poo le aua nei e toe fesili atu i ai.” Ua ou ao-  
aoina foi lena lesona. O nisi taimi i le vaeluaga o le po ou te ala  
ai ma le mafai ona ou toe moe seiloga ua ou oso ese mai le  
moega ma tusia i se pepa le mea na ma tauivi. Ae e manaomia le  
tele o le loto toa e galue ai pe a uunaia o se tali i talosaga. <sup>8</sup>

O le anapogi mai i taumafataga e lua i le Aso Sa muamua o le  
masina ma totonu le tau atoa o na taumafataga e lua ua e  
misia.....Sa fetalai atu le Alii ia Isaia, o i latou e anapogi ma tufa-  
tufa atu a latou falaoa i e fia aai, e mafai e i latou ona valaau atu



Ia pei o le tama o Samuelu, e tatau ona tatou naunautai e fai atu, “Fetalai mai ia, leova e, aua o loo faalogologo atu lau auaua” (1 Samuelu 3:9) ona galulue ai lea ma le lototetele e tusa ai ma le tali o a tatou tatalo.

ma o le a tali mai le Alii, e mafai ona latou alalaga atu ma o le a fetalai mai o Ia, “O Au lenei.” [Tagai Isaia 58:6–9.] O se tasi na o ala e faatulagaina ai le fesootaiga ma le Alii. Faataitai i lenei tausaga. Ola ma le atoatoa i le tulafono o le Anapogi.<sup>9</sup>

Pe a tatou taumafai e filifili pe o le fea o faaiuga e lua e tatau ona fai, ia tatou manatua le mea na taua mai e le Alii e ao ona tatou faia: Suesue mae’ae’a le mataupu atoa i o tatou mafaufau seia maua se faaiuga; ma faamasani i tatou i tali faaleagaga—pe o le mu o o tatou loto i totonu ia te i tatou ina ia mafai ona tatou iloa ua sao la tatou faaiuga, poo le maua o le pogisa i le mafaufau tatou te faagaloina ai mafaufauga e sese [tagai MFF 9:7–9]. O lea la, e pei ona folafola mai le Alii: “...O le a tuuina atu le agaga ia te i (tatou) i le tatalo i le faatuatua.” (MFF 42:14.)...

Afai tatou te saili ma le maelega, e mafai ona tatou aapa atu i totonu o lenei lagi o agaga mo tali e faamautuina ai mo i tatou e le gata o faamanuiaga silisili, ae faapea foi ma le molimau maoae i totonu o o tatou loto ina ia mafai e a tatou gaoioiga, o o tatou

olaga, ma a tatou galuega ona maua le faamaufaaailoga o le talia-ina e le Alii ma Le na Foafoaina i tatou uma.<sup>10</sup>

---

**O le a le mea e mafai ona tatou faia e maua ai faaaliga mo le tagata lava ia mai le Alii?**

O le mea sili ona taua e mafai ona e faia o le aoao lea e talanoa i le Alii. Talanoa ia te Ia e pei ona e talanoa i lou tama, aua o Ia o lou Tama, ma e finagalo o Ia ina ia e talanoa atu ia te Ia. E finagalo o Ia ina ia e atinaeina taliga e faalogo ai, pe a Ia tuuina mai ia te oe uunaiga a le agaga e tau ia te oe le mea e fai. Afai tou te aoao e faalogo i manatu faafuasei e oo mai i o outou mafaufau, o le a outou iloa lava le oo mai o na mea i le itula tonu o loo outou manaomia ai. Afai o le a e atinaeina se taliga e faalogo ai i ia musumusuga, ona e iloa lea ona savali i le agaga o faaaliga.<sup>11</sup>

E faapefea ona tatou atinaeina le tulaga maualuga faaleagaga i o tatou uiga ina ia mafai ai ona faataunuaina i le atoatoa a tatou misiona i le lalolagi ma ogatasi ai ma le mana silisili ese o le Atua...?

Na tali mai e Amona lena fesili i sina vaega: “Ioe, o le ua salamo, ma faatuatua, ma ua fua mai i galuega lelei, ma ua tatalo pea e le aunoa—o i latou ia ua tuuina i ai e iloa mea lilo a le Atua....”(Alema 26:22). . .

O le faisalamo o Tavita, na ia aoao a o talavou i le puna o le mana faaleagaga. Na musumusu atu i ai le Agaga, “Ina soia, ma ia outou iloa o au lava o le Atua...o le Atua o Iakopo o lo tatou ‘olo maualuga ia.”(Salamo 46:10–11.)

Na aoao perofeta o anamua, e pei ona tataua ona silafia e tagata uma, pe faapefea ona fesootai ma le Alii e ala i le tatalo, ma talanoa ma Ia ona maua lea o tali i le ala a le Alii lava ia...

Na fetalai atu le Alii ia Elia, le perofeta: “Ina alu ia oe i fafo, ma e tu i le mauga i luma o Ieova. Faauta mai, ua afio ane Ieova; o le matagi tetele foi, ma le malosi ua lepetia ai mauga, ma momomo ai papa i luma o Ieova; e lei i ai Ieova i le matagi; ua mulimuli i le matagi o le mafuie; e lei i ai Ieova i le mafuie:

“E mulimuli i le mafuie o le afi; e lei i ai Ieova i le afi; e mulimuli i le afi o le leo filemu ma le itiiti.

“Ua faalogo ai Elia, ona ufiufi ai lea e ia ona mata i lona ofu tele, ma alu i fafo, ma tu i le gutu o le ana...”(1 Tupu 19:11–13.)

Ua masani tele pe a talanoa mai le Atua i lenei leo itiiti ma le filemu, e pei ona ia faia ia Elia i totonu o le ana, atonu e le mafai ona lagonaina i la tatou faalogo faaletino, e pei o se leitio ua faaletonu, e mafai ona tatou le malamalama i lē silisiliese.

. . . Ua masani tele i aso nei ona taumamao alii ma tamaitai mai mea faaleagaga, ma a oo ina talanoa atu i ai le Alii i o latou taliga faaletino, i o latou mafaufau e aunoa ma se leo e mafai ona faalogoina, pe ala atu foi i ana auauna ua tuuina atu i ai le pule o ē, a oo ina taitaiina e le agaga ua aveva ma ona siufofoga, ae na o se pao lava [e faalogoina e nei alii ma tamaitai] e faapei ona i ai i Ierusalem. E faapena foi, ona latou le maua se malamalama musuia, poo se faamautinoaina mai i totonu, e uiga i le mafaufau o le Alii ua ia fetalai ai e ala mai i ana taitai perofeta.

. . . O Enosa, le atalii o le atalii o Liae, ua ia aumaia ia i tatou se malamalamaaga i le mafuaaga e mafai ai e nisi ona maua se malamalama e uiga i mea a le Atua ae le mafai e isi. O loo faamatala mai e Enosa lana tauiviga ina ia maua se faamagaloga o ana agasala ina ia mafai ai ona agavaa o ia mo lona tofi maualuga.

Ona ia faaiuina ai lea faapea: “Ina o faapea ona ou finau i le Agaga, faauta, ua toe tulei mai le siufofoga o le Atua ia te au, ua faapea mai:Ou te asiasi atu i ou uso e tusa ma lo latou filiga i le tausiga o au poloaiga...”[Enosa 1:10.]

O lena ua i ai ia te oe, i se gagana faigofie, se mataupu sili: E le o le Alii na te taofia o ia mai ia te i tatou. O i tatou e taofia i tatou lava mai ia te Ia ona o lo tatou le usiusitai i ana poloaiga.<sup>12</sup>

Pe a tatou o atu i le Alii mo se faamanuiaga tatou te mananao ia tuuina tatou lava i se tulaga agavaa ia maua ia le mea o loo tatou talosia.<sup>13</sup>

Pe e te le manao ea e ola ina ia mafai ona talanoa mai le Alii ia te oe a o la foi e te mafai ona e lagonaina o ia, pe e te agavaa foi e te maua se asiasiga mai se agelu, pe saunia foi e ulu atu i le afioga o le Alii? Na faamatala mai e le Alii le ala e mafai ai ona tatou

saunia. O iinei na ia fetalai mai ai i se faaaliga maoae i nei upu: “E moni, ua faapea mai le Alii: O le a oo i tagata taitoatasi o le lafoai ana agasala ma sau ia te au, ma valaau mai i lou igoa ma usiusitai i lou leo, ma tausii mai i au poloaiga o le a vaai i ou mata ma iloa o loo i ai au.” (MFF 93:1).

Ina ua sau le leo mai le lagi i tagata i le nuu o Nuumau sa latou le lagonaina. Fa te i latou ua na o se fenumiaiaga o leo, ma ina ua faasaga tonu atu i ai o latou loto sa mafai ona latou lagona upu ae sa le mafai ona latou malamalama i ai; ae ina ua latou mafaufau i ai ma o latou loto ma mafaufau atoa, ona mafai lea ona malamalama i latou i le leo. (Tagai 3 Nifae 11:3–5.)<sup>14</sup>

Ia alofa mai le Atua ma fesoasoani mai ina ia mafai e i tatou taitoatasi ona ola ina ia mafai ona tatou olioli i lena fesootaiga ma le Atua e ala i le Agaga Paia, ma iloa e aunoa ma se masalosalo o loo soifua o Ia, ma ia saunia i se aso e ulu atu i totonu o Lana afioaga.<sup>15</sup>

## Fautuaga mo Suesuega ma Talanoaga

---

- O a mataupu e mafai ai ona tatou maua faaaliga? E faapefea ona faatupulaia lo tatou tulaga e lagonaina le leo o le Alii ma “ola ae i le mataupu o faaaliga”?
- O a nisi o ala tatou te maua ai faaaliga e ala i le leo itiiti ma le filemu o le Agaga?
- O a eseese o le faia o le tatalo ma le talanoa ma le Atua? O le a le uiga o le tatalo “ma le manatu tonu i ai?” (Moronae 10:4).
- E faapefea ona aveia lou iloa o oe o se atalii poo se afafine o le Atua ma auala e te faalatalata atu ai ia te Ia i le tatalo? E faapefea e lena malamalama ona fesoasoani ia te oe e faalagolago ia te Ia?
- Pe a faafeagai oe ma faaiuga taua, o a mea e ao ona e faia ina ia maua ai le taitaiga mai le Alii? Aisea e manaomia ai le loto toa e te gai ai i musumusuga a le Agaga?
- E faapefea ona tatou “taofia i tatou lava” i nisi taimi mai lo tatou Tama o i le Lagi? E faapefea ona tatou faalatalata ia te Ia i o tatou lava olaga ma totonu o o tatou aiga?



## Faamatalaga

1. *Stand Ye in Holy Places* (1974), 139.
2. I le Conference Report, Oketopa 1966, 115; poo le *Improvement Era*, Tesema 1966, 1142.
3. *Stand Ye in Holy Places*, 138–42, 144–45.
4. “How Primary Teachers Can Strengthen Their Testimonies,” Lauga i le Konafesi faaletausaga lona 47 a le Peraimeri, 3 Aperila 1953, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 6–7.
5. “To Be on Speaking Terms with God,” Sauniga lotu a Aoaoga o Mataupu Faalelotu i Sate Leki, 12 Oketopa 1973, faila a Faletusi o Talafaasolopito, O le Ekalesia a Iesu Keriso o le Au Paia o Aso e Gata Ai, 4–5, 7.
6. Lauga i le konafesi i Lausanne Suisalani, 26 Setema 1972, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 2.
7. *The Teachings of Harold B. Lee*, faatonu-tonu e Clyde J. Williams (1996), 126.
8. *Qualities of Leadership*, lauga i le fonotaga a le Faalapotopotoga a Tamaiti Aoga o le Au Paia o Aso e Gata Ai, Aokuso 1970, 5.
9. “Cram for Life’s Final Examination,” lauga i le Iunivesite o Polika Iaga, 5 Ianuari 1954, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 9.
10. *Ye Are the Light of the World* (1974), 115, 120.
11. *The Teachings of Harold B. Lee*, 130.
12. I le Conference Report, Oketopa 1966, 115–17; poo le *Improvement Era*, Tesema 1966, 1142–43.
13. *The Teachings of Harold B. Lee*, 129.
14. *The Teachings of Harold B. Lee*, 429.
15. I le Conference Report, Oketopa 1966, 119; poo le *Improvement Era*, Tesema 1966, 1144.



# O Tusinga Paia, “O Faatanoa Tetele o Vai Faaleagaga”

*E faapefea ona avea le suesueina ma le maelega o tusinga paia e faatupulaia ai lo tatou ola faaleagaga ma taitaia i tatou i le ola e faavavau?*

## Faatomuaga

Na malaga Peresitene Harold B. Lee ma lona faletua o Freda Joan Lee i Europa ma le Nu'u Paia i le 1972, e aoao faifeautal'ai ma tagata o le Ekalesia i mataupu o le talalelei. Sa latou malaga faatasi ma Elder Gordon B. Hinckley ma lona faletua o Marjorie Pay Hinckley. Sa ta'ua e Sister Hinckley: “O se mea mata'ina le vaai atu o agai atu Peresitene Lee i se tulaga. Ina ua matou feiloai ma faifeautal'ai, e masani lava o le taeao i se falelotu e faatumulia i faifeautal'ai faamisiona ma faifeautal'ai faavaitaimi mai lea lava nofoaga. A o ia tulai e lauga atu ia te i latou e le masani ona ia amata i se upu e faafeiloai atu ai poo ni manatu faatomata, ae susueina tusinga paia ma amataina loa se talanoaga. Na faigo-fie lona faagasolosolo i tusinga paia ma o nisi taimi sa faigata ona iloa poo ana lava upu, poo ni upu sii mai. Ina ua maea se fonotaga faapena sa ou fesili atu ia te ia pe na faapefea ona ia taulotoina mau...Na ia mafaufau mo se taimi ona ia faapea mai lea, ‘Ou te le manatu sa ou taulotoina ma le iloa se mau, Masalo ai ona o lo'u faaogaina tele ua avea ai ma se vaega o a'u ma a'u faaupuga’”<sup>1</sup>

## Aoaoga a Harold B, Lee

### Aisea e tatau ai ona tatou suesue i tusinga paia?

Pei ona sa manaomia le vai ma o loo manaomiaina pea i aso nei mo le olaga faaletino..., e faapena foi ona manaomia le tala-

lelei a le Alii o Iesu Keriso mo le ola faaleagaga o fanau a le Atua. O lena faamatalaga o loo faailoa mai i le fetalaiga a le Faaola i le fafine i le vaieli i Samaria, na ia faapea atu "...A o se inu i le vai ou te avatu ia te ia, e avea i totonu ia te ia o le vaipuna, e puna i luga i le ola e faavavau." (Ioane 4:14.)

O faatanoa tetele o le vai faaleagaga, e ta'ua o tusitusiga paia, ua saunia i aso nei ma ua malupuipua ina ia taumamafa uma i ai ma fafagaina ai faaleagaga, ma ia latou lē fia feinu. Ina ia manatu o tusitusiga paia ua sili ona taua, o loo faailoa mai i le fetalaiga a le Faaola, "E suesue outou i tusi, aua ua outou manatu tou te maua ai le ola e faavavau; o tusi foi ia o loo molimau ia te a'u." (Ioane 5:39); ma o le mea na tupu i tagata Sa Nifae lea na toe auina atu e aumaia papatusi apamemea o loo i ai tusitusiga paia, e matua taua mo le manuia o tagata. O le faaaogaina o na tusitusiga paia na ta'ua mai i le faamatalaga a Nifae ina ua ia faapea mai, "...auā foi, na ou faatatau tusi paia uma ia te i matou, ina ia aoga e aoaoina ai i matou." (1 Nifae 19:23.) . . .Mai lava i nei augatupulaga, o loo matua malupuipua ma puipua ma le faaeteete savali mai lo tatou Tama, ma maitau mai o tusitusiga paia i aso nei, e matua mama a'ia'i le mea na puna mai ai, e pei lava foi ona mama a'ia'i le vai e puna a'e i mauga; o le afioga mama a'ia'i foi a le Atua, ma e pito itiiti lava se avanoa e ono eleelea ai, o lena e ala mai i laugutu o perofeta soifua o e ua tofia e taitaiina Isaraelu i o tatou nei aso ma taimi.<sup>2</sup>

I tisipenisione uma ua tuuina mai e lo tatou Tama ia te i tatou o lana fanau o tusitusiga paia e ala mai i Ana musumusuga e faapoto ai i tatou ina ia manumalo i faaososoga e ala i le faatuatua ia te ia. O nei tusitusiga paia "e aoga foi ia e aoao ai, e aoai ai, e faatonu ai, e faapoto ai foi i le amiotonu:" Ina ia atoatoa ai ona lelei le tagata o le Atua, ia matua saunia faalelei i galuega lelei uma lava." (2 Timoteo 3:16–17.) E matua taua tele tusitusiga paia i le ata o le faaolataga a le Tama, aua o mea na tutupu ua faamaumauina ai, lea na poloaiina ai e le Atua le aveesea o le ola, ina ia mauaina tusitusiga taua aua a aunoa ma lea, o le a pauu ma faatauasoina ana fanau i le pouliuli o le lalolagi [tagai 1 Nifae 4:13].<sup>3</sup>

I taimi e le'i mamao atu sa sili atu ona tatou popole e faitau faamatalaga e tusia e tagata popoto e uiga i tusitusiga paia. Ae e leai se isi mea e sili atu nai lo le tatou fetagofi i tusitusiga paia ma



Na matua fiafia lava Peresitene Harold B. Lee i tusitusiga paia ma na faaaogaina i latou e aoao atu ai le Au Paia. Na ia saunoa mai, “Afai tatou te le o faitauina tusitusiga paia i aso taitasi, o lona uiga o loo faaitiitia a tatou molimau, o le a le faateleina le loloto o lo tatou faaleagaga.”

faitau i ai. . . [E] i ai se mea e sili atu ona segia ai, e sili atu lona faaleagaga, o se mea e sili atu lona uiga loloto pe a ou faitauina mai tusitusiga paia lava latou... E leai se isi mea e sili ona taua, sili ona manaomia i aso nei, nai lo le faamaua'aina i totonu o lau fanau le fiafia i tusitusiga paia lava latou.<sup>4</sup>

Na fautua mai le Matai ia i matou ina ia suesue i tusitusiga paia, aua tatou te maua ai le ala e tau atu i le ola e faavavau, aua ua latou tautino mai ai le ala e e tatau ona ui ai tagata ina ia maua ai le ola e faavavau faatasi ma Ia ma le “Tama o le na auina mai o [Ia]” (Ioane 5:30).<sup>5</sup>

---

### **E faapefea ona fesoasoani lo tatou suesue i le Tusi a Mamona e atinaeina ai ma faatumauiina lo tatou ola faaleagaga?**

E masani ona foliga mai ia te au upu a le Perofeta o Iosefa Samita i fautuaga e tuuina atu i le usoga, e faamamafaina ai le taua o le Tusi a Mamona, o se faatusa maoae nai lo le toatele o i tatou o pipii atu i ai. Sa ia faapea mai “Na ou ta’u atu i le au uso o le Tusi a Mamona o le tusi pito i sao lea i luga o le fogaeleele, ma o le maa auau lea o la tatou Ekalesia, ma e mafai ona latalata atu ai le tagata le Atua e ala i le ola ai i ona mataupu, nai lo se isi lava tusi” (*Talafaasolopito o le Ekalesia*, 4:461).

Ia te a’u o lona uiga e le na o tusitusiga nei tatou te maua ai se ata o le sa’o atoatoa o mea moni o le talalelei, ae e ala foi i lenei molimau lona lua e mafai ai ona faamautinoaina atili lo tatou iloa o uiga o aoaoga a le au perofeta anamua, ma faapea foi le Matai ma ona soo a o latou ola ma aoao atu i tagata.<sup>6</sup>

Afai e manao se tasi e fia latalata atu i le Atua, e mafai ona ia faia e ala i le faitauina o le Tusi a Mamona.<sup>7</sup>

E...leai se mea sili atu e mafai ona e faia e faatuputeleina ai lou fia taumafa faaleagaga ma faatumauiina ai lou faaleagaga nai lo le faitau, ma toe faitau i lea tausaga ma lea tausaga o mea taua o loo aoaoina mai i le Tusi a Mamona. Sa tuuina mai ia te i tatou le atoatoaga o le talalelei e ala mai i le agelu o Moronae ina ia tuuina atu i tagata. Sa i ai, mo se faataitaiga, se tala na faamatalaina ia i matou e Peresitene German E. Ellsworth, o le sa tuuina atu lana molimau i totonu o le malumalu sa i luma o isi au peresitene uma o misiona. Sa ia faamatala mai i tausaga ua mavae atu,

sa ia pulefaamalumu ai i le Misiona i Setete i Matu, sa i ai sana miti poo se faaaliga o loo ia asiasi atu i le Mauga o Kumora ma sa faatumuina i lagona o le mea na tupu ai i le nofoaga paia. O iina na oo ane ai ia te ia se lu'i e le mafaaseseina: "Ia talai atu i le lalolagi le Tusi a Mamona. O le a taitaiina mai ai le lalolagi ia Keriso."<sup>8</sup>

Afai e te manao e puipuia tamaiti aoga . . . mai aoaoga sese a tagata ua ta'ua o tagata atamamai o loo suesue i le Tusi Paia, ia tuu atu ia te i latou se malamalamaaga faavae taua o aoaoga a le Tusi a Mamona. Ia iloilo ina ma toe saga iloilo ina.

O le a le umi talu ona e le toe faitau i le Tusi a Mamona? Sa faateia laitiiti a'u i se taimi e le mamao tele atu i faatalanoaga ma ni alii se toalua o e sa auai i le matou polokalama faaseminare i ni tausaga ua tuanai atu ma o e ua oo atu i se isi tulaga faafai-aoga, ma ua maua o laua faailoga ua faau'uina. Ua la se'e ese mai i mea moni o le talalelei ma o lea ua la lu'itauina ma finau ma tau-mafai e faaumatia ma faipona i aoaoga a le Ekalesia.

Sa ou talanoa ia i laua uma, ma ina ua ou fesili atu i lo la faitauina o le Tusi a Mamona, na faapea mai se tasi o i laua ia te au: "Ua tusa ma le sefulufa tausaga talu ona ou le toe faitauina se mea i totonu o le Tusi a Mamona."

Sa faapea mai le tasi, "Ou te le manatua le taimi mulimuli na ou faitau ai i se mea mai le Tusi a Mamona. Ma o le a faapena i soo se tasi o i tatou, pe afai tatou te le faaauauina le faatumuina o i tatou i aoaoga o lenei tusi ua sili ona taua, lea ua tuuina mai e le Alii ia i tatou mo se mafuaaga—o lona uiga, ia faasa'oina ai mea sese uma ma fevaevaeiga i o tatou aso e pei foi ona Ia folafola mai i isi taimi.

Sa ou talanoa ma se alii taua i le Iunivesite o le matou Setete . . . A'o avea o ia ma tagata o le Ekalesia, sa ia faatupuina i se auuala faalilolilo le faateleina o manatu le mautonu sa faa-moemoe e faaumatia ai le faatuatua o nei talavou. Sa ia fai mai, "Ou te lei toe faia lava i lenei kuata mulimuli, le Uso e, Lee."

Ina ua ou fesili atu, "O le a le mea ua suia oe?" sa ia faia se faa-matalaga faatupu manatu:

"Mo le luasefulu tausaga sa ou le vaai lava i le Tusi a Mamona, ae sa tuuina mai ia te au se matafaioi i le Ekalesia ou te faia se

galuega. O lena galuega na taitaiina ai a'u i le suesueina o le Tusi a Mamona ma le talalelei, ma ua ou toe auai ai i le Ekalesia i nai masina ia ua tuana'i atu. O lea pe a o mai a'u vasega ia te a'u, ua fenumiai ona o aoaoga faafilosofia, ou te faapea atu ia te i latou i se taimi paganoa, 'O lea, aua nei faapopoleina outou. Ua outou iloa ma ou iloa foi e moni le talalelei ma e sa'o lava le Ekalesia.'"<sup>10</sup>

---

### **O a ni auala e saunia ai e tusitusiga paia se tulaga o le mea moni?**

I tausaga e le mamao atu na lolofi mai ai manatu ma filosofia faaleaoaoga, ua fesiligia ai tulaga tuai uma o lotu, o le ola mama ma sootaga faaleaiga. Sa galulue tagata o nei ona po e osofaia talitonuga ma tu masani. . . .ina ia faaumatia ai le faatuatua i aoaoga faatuatuaina ma ua faamaonia a tusitusiga paia [ae] suia i aoaoga e lei musuiaina, ma sa faia lava e tagata ina ia faatatau i le taimi ma le nofoaga.<sup>11</sup>

Ou te faapea atu e tatau ona tatou aoaoina o tatou tagata e saili a latou tali i totonu o tusitusiga paia. Maimau pe ana faapea e lava le tofā i tagata taitoatasi e tali atu ai e le mafai ona matou taliina ni fesili sei vagana ua mafai ona matou sailia se tali mai aoaoga faavae i tusitusiga paia! Ma afai tatou te faalogo atu o aoaoga mai e se tagata se mea e ese mai mea o i tusitusiga paia, e mafai ona tatou tofū iloaina pe sese mea o loo tautalagia—e matua faigofie lava. Peitai, o le mea e leaga ai, e toatele naua i tatou e le o faitau i tusitusiga paia. Tatou te le iloa poo a mea o i ai i totonu, ma o lea tatou te taumatemate ai ma aumaia a tatou lava fa'auigaga e uiga i mea e tatau ona tatou mauaina i totonu o tusitusiga paia lava ia. Ou te manatu o totonu iina o loo i ai se tulaga sili ona mata'utia ma e manaomia ai le tatou puipuiga ma se faaete-tega sili i nei ona po.

Pe a matou fono ma a tatou faifeautalai ma latou fesili mai i ni fesili e uiga i mea e faatatau i le malumalu sa, ou te faapea atu ia i latou pe a ou faaiuina se talanoaga, "Ou te le taliina atu a outou fesili seiloga e mafai ona ou mauaina se tali i tusitusiga paia po o i totonu o tautinoga sa'o a Peresitene o le Ekalesia."

Ua tuuina mai e le Alii ia i tatou i totonu o tusitusiga paia le auala e tatau ona tatou fuaina ai le moni ma le le moni. Tau ia ina ia tatou taufai uai atu i ana upu: “Ia e ave mea ua uma ona e maua, ua tuuina atu ia te oe i au tusitusiga paia mo se tulafono e taitai ai la’u Ekalesia” (MFF 42:59).<sup>12</sup>

E i ai pea lava pea se faaososoga faapea e alu i luga atu o se mea ua faaalua mai e le Alii ma saili e faaoga manatunatuga faiva-vale i nisi o tulaga po o le faatupuina foi o ni lagona faaletagata lava ia i ia aoaoga. Ou te talosia ia e manatua lena mea. Ne’i e tofotofa faasili lou alu nai lo o le mea na faaalua mai e le Alii. Afai e te le iloa, ia ta’u atu e te le iloa; ae aua e te faapea mai e te le iloa pe afai e tatau ona e iloa, aua e tatau ona avea outou ma tagata suesue o le tusitusiga paia. O fesili e uiga i aoaoga o le talalelei a Iesu Keriso e tatau ona taliina, i soo se taimi e mafai ai, mai tusitusiga paia.

Ua ia te i tatou ni mea ua le mafai ona mauaina e isi ekalesia: o tusi maoae e fa, o le upu moni, pe afai tatou te faitauina uma, e matua manino ma ua lē tatau ai ona tatou sese. Mo se faataitiga, pe a tatou mananao e iloa le faauigaina o le faataoto i le titania e pei ona faauigaina e le Alii, pau le mea tatou te faia o le faitauina lea o le faaaliga ua lauiloa o le mataupu e 86 o le Mataupu Faavae ma Feagaiga ma tatou maua ai le faauigaina e le Alii. Afai tatou te fia iloa se mea o loo i totonu o aoaoga o le Lauga a Iesu i le Mauga po o le tatalo a le Alii, e mafai ona tatou faitau i le isi faamatalaga ua sili atu ona sa’o i le mataupu e tolu o le Nifae. E tele ni manatu e peiseai e le manino, ua faamanino mai ma faamautinoaina i o tatou mafaufau.<sup>14</sup>

---

**Aisea e tatau ai ona tatou faaogaina tusitusiga paia  
pe a tatou a’oa’o atu le talalelei?**

O le matafaioi a i latou o e tatau ona a’oa’o atu i Lana fanau, o le aoaoina lea o mataupu faavae o le talalelei. E lei faauuina i tatou e a’oa’o atu ni lagona lē manino po o ni taumatematega i le mea moni. E lei faauuina i tatou e aoa’o atu ni filosofia poo faasaienisi o le lalolagi. Ua faauuina i tatou e aoa’o atu mataupu faavae o le talalelei o loo mauaina lea tusitusiga faavae e fa—o le



Tusi Paia, o le Tusi a Mamona, o le Mataupu Faavae ma Feagaiga, ma le Penina Tau Tele.

A tatou mafaufau faapea o iina e gata ai, o lo tatou avanoa le iloa o na mea moni, ma mauaina tusitusiga paia ua sili atu ona atoatoa ua lauiloa i le lalolagi. Na o tagata o le ekalesia e mauaina lena avanoa sili.

Ua matou talitonu o loo galala o tatou tagata mo le talalelei e le suia, faatasi ma ona upu moni ma malamalamaaga e tele...[Ia] aua nei tatou faia le mea sese o le faatupuina o le lē fiafia [o o tatou tagata]. . .i o tatou aiga po o vasega i le Lotu e ala lea i le tuuina atu ia i latou o ni inumaga ua suia o le talalelei ae ua tataua ona matua feinu ia malilie mai vaieli o le vai o le ola! . . .O loo i ai nisi e foliga mai ua galo ia i latou o aupega sili ona malolosi ua tuuina mai e le Alii ia i tatou e tetee atu ai i mea uma ua inosia, o Ana lava tautinoga, o aoaoga faavae manino ma le faigofie o le faaolataga o loo maua i tusitusiga paia. Ua faateia i matou ina ua matou faalogo atu o nisi o o tatou uso o loo i ai i faalapotopotoga ua taua o faalapotopotoga atamamai faalelalolagi...ua latou filifili e faaleaogaina mataupu faatulagaina mo suesuega ona o ni tautalaga eseese sa faia e faatatau i mataupu e itiiti so latou uiga tutusa ma upu moni faavae o le talalelei.

O mea uma tatou te aoaoina atu i lenei Ekalesia e tataua ona faavae i tusitusiga paia...E tataua ona tatou filifilia a tatou mataupu mai tusitusiga paia, ma soo se mea e i ai sau ata e faapupula ai i tusitusiga paia po o se faaaliga mai le Tusi a Mamona, ia faaoga, ae aua nei aumaia mai se isi puna a o lea e maua i tusi nei. Tatou te taua ia mea o tusitusiga faavae e faa le Ekalesia aua e lē suia lava. Afai e te manao e fuaina le mea moni, ia fua faatatau i tusitusiga e faa le Ekalesia...afai e le maua i tusitusiga paia, e mafai ona e manatu o ni taumatematega. O manatu lava o le tagata ia, pe a tuu i se isi faaupuga; ma afai e feteenai ma mea o i tusitusiga paia, ona e iloa ai lea o le faailoga lena e lē moni. O le tulaga lena e te fuaina ai mea moni uma. Ae afai e te le iloaina tusitusiga faavae, o lona uiga e leai sau fua sa'o e fua ai le mea moni.<sup>17</sup>

O loo ou mafaufau i tua...e uiga i le ala sa aoaoina ai au i tusitusiga paia a o avea au ma se tamaitiiti o le Peraimeri... Ia manatua, e tupu le faatuatua i le taalogologo atu foi o i le afioga a le Atua lea, pei ona fai mai Paulo [tagai Roma 10:17]. . .I la'u vasega o le Peraimeri, sa i ai so'u faiaoga lelei tele—e le maoae ona faapea sa ia mauaina ni faailoga o le atoatoa i le tulaga faafaioga, ae sa ia te ia se talitonuga. . . .e faapea ina ia atinaeina lona faatuatua ma le talitonu ia i matou, e tatau ona ia aoaoina i matou i tusitusiga paia.<sup>18</sup>

---

**Pe o tatou tuputupu ae ea i le molimau ma le faaleagaga e ala i le suesue ma le filifiliga i tusitusiga paia?**

Pe o...faateleina pea ea lau molimau e ala i le suesue ma le filifiliga i tusitusiga paia? Pe e i ai sou uiga masani o le faitauina o tusi paia i aso taitasi? Afai tatou te le o faitauina tusitusiga paia i aso taitasi, o lona uiga o loo faaitiitia a tatou molimau, o le a le faateleina le loloto o lo tatou ola faaleagaga. O i tatou lava ia, e tatau ona suesue i tusitusiga paia ma avea o se masani i aso taitasi.<sup>19</sup>

O le ala e te galueaiina ai le ola faaleagaga [o le] suesue lea i le talalelei.

Taumafai i totonu o lou aiga, ma aoao atu i isi, ia faaavanoa se taimi o aso taitasi ia maua se itula filemu, e mafaufau loloto ai. Ia i ai le suesueina o tusitusiga paia ia le itiiti ifo i le tolusefulu minute o aso taitasi. I se itula o le taeao po, po o le leva o le po, o se taimi e sili ona fetui mo au fuafuaga, ia e faatagaina oe e faaoga se itula e mafaufau loloto ai ma le agaga tatalo i se ala e mafai ai ona e tuuina atu lou mafaufau ma lou agaga i le Atua ma talanoaina ma Ia faafitauli e e lē oo i ai le malamalama o le tagata soifua, ma lē gafatia i le malosia faaletagata.<sup>21</sup>

Aua nei aunoa se aso ma le faitauina mai nei tusitusiga paia. Ae e le lava le na ona iloa e uiga i Lona soifua ma Ana galuega e ala i le aoao i ai. O le Matai lava na tali atu i le fesili i le ala e mafai ai e se tasi ona iloa o Ia ma Lana mataupu: “Ai se tasi e fia fai lona finagalo, e iloa ai e ia.” (Ioane 7:17.) Pe e te manatu ea o se e

pulea mataupu faasaienitisi o se na te lei faia lava ni ana suesuega i totonu o le potu suesue? Pe e te matua gauai atu i ni manatu faitio o se tagata faitio i mea tau musika ae leai sona malamalama tau musika. . . .? O lea foi la, o se tasi e faapei o oe e manao e “iloa le Atua” e tatau ona avea ma se tasi e faia lona finagalo ma tausia ana poloaiga ma faataitaia uiga lelei sa soifua ai Iesu.<sup>22</sup>

O loo tatou i ai i le galuega a le Alii. O loo ia te i tatou le aia tatou tatou te maua ai taitaiga faaleagaga, pe afai tatou te ola agavaa. Ua tuuina mai e le Atua ina ia tatou ola ma suesue i tusitusiga paia, ma avea lea o se faitauga masani tatou te faia ma le naunau i ai i aso taitasi, ina ia tatou lē faatalale i tofiga maualuluga ua valaauina ai i tatou i le Malo o le Tama.

## **Fautuaga mo Suesuega ma Talanoaga**

---

- O a auala e manaomia ai tusitusiga paia i lo tatou ola faaleagaga, e pei o le vai i o tatou olaga faaletino? E faapefea ona avea le suesueina o tusi paia e fesoasoani ai ia te i tatou e faaitoilaloina ai faaosoosoga?
- O a auala e taitaiina ai i tatou e le Tusi a Mamona ia Iesu Keriso? E faapefea ona fesoasoani le Tusi a Mamona ia te i tatou ia iloa ai le mea moni mai le sese? E faapea ona avea lou suesueina o le Tusi a Mamona e faaaafiaina ai lou olaga?
- O a ni mea ua oo ia te oe i le sailia o tali o a outou fesili i tusitusiga paia?
- Pe a tatou aoao atu, aisea e taua ai le faalagolago i tusitusiga paia ma aoaoga a le au Perofeta?
- E faapefea ona faia ina ia avea le suesue i tusitusiga paia ma faamuamua i lou olaga? E faapefea ona e faamalosia i lau fanau poo isi tagata o lou aiga e suesue i tusitusiga paia?
- E faapefea ona faatupulaiaina lo tatou malosia e faataunuuina ai “ia tofiga maualuluga ua valaauina ai i tatou i le malo o lo tatou Tama” i lo tatou suesueina lea o tusitusiga paia?

## Faamatalaga

1. *Glimpses into the Life and Heart of Marjorie Pay Hinckley*, faatonutonu e Virginia H. Pearce (1999), 21.
2. I le Conference Report, Oketopa 1943, 101.
3. *Stand Ye in Holy Places* (1974), 370.
4. *The Teachings of Harold B. Lee*, faatonutonu e Clyde J. Williams (1996), 152–53.
5. *The Teachings of Harold B. Lee*, 150.
6. *The Teachings of Harold B. Lee*, 154.
7. *The Teachings of Harold B. Lee*, 155.
8. “Restoration of the Gospel,” 1954, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 19–20.
9. *The Teachings of Harold B. Lee*, 157.
10. *Ye Are the Light of the World* (1974), 105.
11. *Decisions for Successful Living* (1973), 11.
12. *The Teachings of Harold B. Lee*, 153.
13. *The Teachings of Harold B. Lee*, 154.
14. *Ye Are the Light of the World*, 109.
15. *Ye Are the Light of the World*, 96.
16. *The Teachings of Harold B. Lee*, 450–51.
17. *The Teachings of Harold B. Lee*, 148–49.
18. “How Primary Teachers Can Strengthen Their Testimonies,” Konafesi faaletausaga lona 47 a le Peraimeri, 3 Aperila 1953, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 9.
19. Semina a sui risone, 12 Tesema 1970, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai, 10.
20. Faapaiaiga o le faatoaga o le uelefea a le Risone o Kalefonia i Saute, 6 Iulaia, Matagaluega o Talafaasolopito, O le Ekalesia a Iesu Keriso o le Au Paia o Aso e Gata Ai.
21. *The Teachings of Harold B. Lee*, 152.
22. *The Teachings of Harold B. Lee*, 150.
23. *The Teachings of Harold B. Lee*, 152.




# Iosefa Samita, Perofeta a le Atua Soifua

*Aisea e matua taua tele ai se molimau e uiga i le  
misiona faaperofeta a Iosefa Samita i a tatou  
molimau o le talalelei a Iesu Keriso?*

## Faatomuaga

Sa i ai i a Peresitene Harold B. Lee se molimau malosi i le Perofeta o Iosefa Samita ma e masani ona ia faaaogaina upu a le Perofeta ao ia aoao atu mataupu faavae o le talalelei. Sa ia silafia e matua taua tele i se molimau o le talalelei a Iesu Keriso, le i ai o se molimau i le misiona a le Perofeta o Iosefa Samita. Sa latou fetaiiai ma tagata e toatele sa le i ai ni molimau e uiga i le Perofeta. O se tasi o i latou o sau uo sa ia faitauina le Tusi Mamona ma sa talanoa i lona “faaaloalo i ona aoaoga.” Sa fesili i ai Peresitene Lee, “Aisea ua e le faia ai se mea e uiga i lena mea?. . .Aisea ua e le auai ai i le Ekalesia?” Sa tali mai le alii ma le mafaufau lelei: “Atonu o le mafuaaga atoa lava ona o Perofeta Samita e latalata tele ia te au. Ana faapea sa ia soifua i le lua afe tausaga talu ai, atonu o le a ou talitonu. Ae ona o lona latalata mai tele, ou te matea, o le mafuaaga lea ou te le taliaina ai.” Sa ta’ua e Peresitene Lee o le tali mai a lana uo, “Ua faapea mai lenei alii, “ou te talitonu i perofeta ua maliliu ma ua silia ma le afe tausaga talu ona soifua mai anamua, ae e matua faigata tele ona ou talitonu i se perofeta soifua.’ ”<sup>1</sup>

I se tasi foi mea na tupu, sa faapea mai se tina, “E te silafia, ou te mafai ona ou taliaina soo se mea i le Ekalesia vagana ai le mea e tasi. . . ou te le mafai ona ou taliaina se mea e faapea o Iosefa Samita o se Perofeta a le Atua.” Sa maitauina e Peresitene Lee, “Pe faapefea ona mafai ona taliaina e se tasi le talalelei e aunoa



Sa molimau mai Peresitene Harold B. Lee: “Ua ou. . . iloa o Iosefa Samita o se perofeta a le Atua soifua. Ou te iloa sa ia soifua ma maliu ina ia aumaia i lenei augatupulaga le ala e mafai ai ona maua le faaolataga.”

ma le taliaina o ia sa fai ma meafaigaluega i le toefuataiina mai, o le a ou le mafai ona iloa.”<sup>2</sup>

Sa saunoa mai Peresitene Lee: “E tatau ona tatou iloa ma le mautinoa i o tatou loto ma mafaufau o Iesu o le Keriso, o le Faaola o le lalolagi. E tatau ona tatou iloa o le Ekalesia moni lenei a Iesu Keriso, o le malo o le Atua i le lalolagi i nei aso e gata ai; ma le mea mulimuli e tatau ona i ai sa tatou molimau o Iosefa Samita o se perofeta a le Atua.”<sup>3</sup>

## **Aoaoga a Harold B. Lee**

---

### **Aisea e tatau ai ona i ai sa tatou molimau o Iosefa Samita o se perofeta a le Atua?**

O le a se mea e iloa gofie ai se Perofeta moni a le Atua? Muamua o ia o le fofoga o le Atua i lena taimi ma i lena faalapotopotoga. Lua, e na te toe taua upumoni anamua ma saili e faatumauina tagata i tulafono e lē fesuisuiaia o le talalelei. Tolu, e na te mauaina mai faaaliga faaopoopo mai le Alii e talafeagai ma faafitauli o le fuafuaga alulau i luma lea ua faaalua mai. O nei mea moni fou e mai le Atua, ma e na o le perofeta lava o lena vaitaimi e auala mai ai. O lea tagata o Iosefa Samita, i vaega uma o se Perofeta a le Atua. Ioe, e moni lava e faapei [o le] Perofeta o Amosa sa faapea mai, “E moni e le faia lava e le Atua se mea e tasi, ae muai faaali lona finagalo i ana auauna perofeta.” [Amosa 3:7]<sup>4</sup>

Mai le taele o lou agaga, ou te . . . iloa o Iosefa Samita o se perofeta a le Atua soifua. Ou te iloa sa ia soifua ma maliu ina ia aumaia i lenei augatupulaga le auala lea e mafai ai ona tatou maua le faaolataga. Ou te iloa o loo afio o ia i se mea maualuga ma o loo ia umia ki o lenei tisipenisione mulimuli. Ou te iloa o i latou o e mulimuli ia te ia ma faalogo i ana aoaoga ma talia o ia o se perofeta moni a le Atua ma ana faaaliga ma aoaoga o ni afioga a le Atua, o le a le mafai e faitotoa o seoli ona manumalo ia i latou . . . [tagai MFF 21:4–6.]<sup>5</sup>

E tatau ona tatou talia le misiona mamalu a le Perofeta o Iosefa Samita i le avea ma se mea faigaluega na faataunuua ina le toefuataiga o le talalelei ma le faatulagaga o le Ekalesia a Iesu Keriso. O tagata taitoatasi o le Ekalesia, ina ia saunia mo le nofo-

tupu i le meleniuma, e tatau ona maua se molimau, a le tagata lava ia mo ia lava, i le paia o le galuega sa faatuina e Iosefa Samita. O lea lava le talalelei sa aoaoina i se ala faigofie e le Au Paia ina ua mavae le galuega a le Faaola i lenei lalolagi, ma sa faapea foi ona toe taua e se tasi o o tatou taitai o tatou nei aso, ina ua ia tautino mai, ou te manatu e faatusatusa i le faataoto i taupou valelea e toalima ma taupou popoto e toalima i le faataoto a le Matai [Mataio 25:1–13], “O le oo mai le taimi o le a le mafai ai e se tane poo se fafine ona faalagolago i se malamalama nono. E tatau ona taitaiina tagata taitoatasi e le malamalama o loo i totonu.”[Orson F. Whitney, *Life of Heber C Kimball* (1945), 450.]<sup>6</sup>

O outou o e sa suesue loloto i tusitusiga paia, outou o e sa saili e maua se molimau e uiga i le molimau paia a le Agaga lea e i ai ia te outou uma taitoatasi se aia tatau e maua ai e ala i le molimau a le Agaga Paia, e mafai ona i ai i totonu ia te outou . . . se tasi o aafiaga aupito sili nai lo se isi lava pe a mafai ona e faapea ifo i lou loto, “Ua ou iloa nei ma lo’u loto atoa e pei ou te lei iloaina muamua, o Iesu o le Alii, o le Faaola o le lalolagi, ma o Iosefa Samita, le na maliu fasia, o le perofeta sa faaaogaina e le Alii e faatuina Lana Ekalesia e pei ona i ai i ona po nei.”<sup>7</sup>

---

### **Sa faapefea ona saunia Iosefa Samita mo lona valaauga o le Perofeta o le Toefuataiga?**

O Iosefa Samita o le sa faatulai e le Alii mai lona talavou ma faaee atu ia te ia le pule paia ma aoaoina o ia i mea e tatau ona ia iloa ma maua le perisitua ma faataatia le faavae mo le malo o le Atua i nei aso e gata ai.<sup>8</sup>

I talafaasolopito, o perofeta taitai sa filifilia mai i ni tulaga maualalo o le olaga, e le aoaoina faafaifeau i ni aoga faatusipaia. Mafaufau i le tele o perofeta. Sei ou toe foi i le talafaasolopito: o Elisaia o se faifaatoaga olaola; o Amosa o se leoleo mamoe i Iutaia; o le perofeta o Isaia o se tagatanuu o Ierusalem; o Mika o se tagatanuu o Iutaia; o Ieremia o se alii talavou mai se aiga faitaulaga anamua; o Esekielu sa avea ma faitaulaga i le malumalu; o Peteru, Anetelea, Iakopo, ma Ioane o ni faifaiva; o Iesu ma lona tama o Iosefa o ni kamuta. Atonu o lea ua faamatala ai le mafua-



aga sa filifilia ai [le Perofeta o Iosefa Samita e avea] ma perofeta taitai o lenei tisipenisione. . . .Sa ia filifilia se tasi e mafai ona faapotoina i mea a le Alii —o mea ia i lo latou foliga mai e valea i e sa aoaoina i na o mea o le lalolagi.<sup>9</sup>

I le olaga o le taulealea o le perofeta o Iosefa Samita, ae na te lei mauaina le tuuina aloaia mai o faaaliga silisili e lua ua tuuina mai i tagata, o nei faaaliga e lua sa taimua mai ai le faailoaina mai o le mana o le tiapolo —i le Togalaau Paia, ma luga o le Mauga o Kumora. E foliga mai sa tatau ona malamalama le Perofeta i le natura o le mana o lena malosiaga ina ia mafai ai ona ia saunia e tetee atu ma le manumalo i lena mana.<sup>10</sup>

E le avea se perofeta ma se taitai faaleagaga i le suesueina o tusi e uiga i lotu, pe avea foi ma taitai faaleagaga i le auai atu i se aoga faatusipaia. . . . E avea se tasi ma perofeta po o se taitai faalelotu e ala i fesootaiga moni faaleagaga. O le taitai moni faaleagaga e maua sao mai lona tusi faamaonia po o lona tipiloma mai le Atua.<sup>11</sup>

---

### **O a ni mea silisili sa faatuina e le Alii e ala i le Perofeta o Iosefa Samita?**

O le misiona a le Perofeta o Iosefa Samita sa faailoa mai . . . pe tusa o le 2,400 tausaga ae lei fanau mai o ia. O valoaga . . . e uiga ia Mose ma Iosefa sa faamaumauina i papatusi apamemea ma sa maua mai e atalii o Liae ia Lapana e pei ona outou manatua. O iina sa maua ai lenei valoaga e leai se isi o faasinotonu i ai ua na o Iosefa Samita lava:

“Ioe, e moni sa faapea mai Iosefa [e le taumateina e faatatau i a Iosefa sa faatau atu i Aikupito]: O loo faapea ona fetalai mai le Alii ia te au: Ou te faatuina le tagata vaai filifilia ai le fua o ou sulugatiti; . . . Ou te foai atu ia te ia le mana e aumai ai lau upu i le fanau a ou sulugatiti, e le na o le aumaia o lau upu, ao le faamautinoa ia te i latou o lau upu e muamua atu ia te i latou. . . .Faauta, e faamanuiaina e le Atua lena tagata vaai; e faafememeaiina i latou e saili e faaumatia o ia. . . .E igoa foi o ia i lou igoa o le igoa foi lea o lona tama. E tusa foi i maua ma ia; aua o le mea e faataunuaina e le Atua i lona lima e aumaia



O le tisipenisione o le atoaga o taimi sa tatalaina i le Uluai Faaaliga, “o se faaaliga o uiga patino o le Atua le Tama ma Lona Alo” i le perofeta filifilia a le Alii.

ai lou nuu i le olataga i le mana o le Atua.”[tagai 2 Nifae 3:7, 11, 14-15,]<sup>12</sup>

I lenei tisipenisione, e faapea lava le tulaga i isi foi tisipenisione uma ua mavae o le talalelei i luga o le fogaeleele, sa tuuina atu ai e ala i le perofeta o ona po nei, o Iosefa Samita le malamalama moni e uiga i le Atua ma lona Alo, lo tatou Faaola, ina ua la’ua talanoa atu ia te ia, o ni tagata mamalu e mafai ona talanoa ma vaaia e tagata, ma sa peiseai o loo faailoa atu ai lo la’ua tulaga faitino moni, a’o tatalaina mai le tisipenisione o le atoaga o taimi, e saunia ai mo le afio faalua mai o le Alii e nofotupu o le Alii o alii ma le Tupu o tupu i le amataga o le meleniuma.<sup>13</sup>

O soo se taimi lava tatou te teena ai i le faatuatua ma le malamalama o le Alii, i Lona alofa tunoa, e toe aumaia ai le malamalama atoatoa sili atu o le Atua ma Lona Alo, ma o soo se taimi lava

e sasaaina mai ai le malamalama faalelagi e uiga i le Tama ma le Alo tatou te faapea ifo ai, ua tatou maua se tisipenisione fou. Sa faapea foi i le taimi o Atamu; sa faapea foi i le taimi o Aperamo; i le taimi o Mose; ina ua Ia afio ifo i le nuu o Sa Nifae; i le nuu o Enoka; ma sa faapea lava foi le Faaola ona maliu mai i tagata e aoao i latou e uiga i le fesootaiga a le Atua ma le Alo o le Atua. . .

E matua taua tele, ina ia tatalaina le tisipenisione o le atoatoaga o taimi, sa tatalaina i le a? E se faaaliga mai o le uiga patino o le Atua le Tama ma le Alo i le perofeta talavou o Iosefa Samita.<sup>14</sup>

“O Iosefa Samita, le Perofeta ma le Tagata Vaai a le Alii, e sili atu ana mea ua faia, vagana o Iesu lava, mo le faaolataga o tagata i lenei lalolagi, i lo soo se isi lava tagata ola na ola ai.”(MFF 135:3). O lenei, e i ai nisi ua manatu o se faamatalaga soona fai lea, ae [e leai] pe a tatou mafaufau i mea sa Ia tuuina mai ia i tatou e ala i lenei alii talavou ofoofogia, i se vaitaimi puupuu o le lua tausaga, sa ia aumaia ni tusitusiga paia sili, o se molimau lona lua lea i le misiona a le Alii, le Tusi a Mamona . . . O lenei alii talavou, sa lē ia te ia ni meaalofo e pei ona maua e alii ua aoaoina, ae sa uunaia e le mana o le Atua Silisili Ese, ma sa ia faaliliu lena tusitusiga mai i se gagana e lei iloaina, i se gagana ua i ai ia i tatou i ona po nei, le tusi lea ua tatou maua ai le atoatoaga o le talalelei e faavavau.<sup>15</sup>

O Iosefa Samita, le alii talavou e lei aoaoina i se aoga faatusipaia o lea taimi, e lei aoaoina i se aoga maualuga o lona vaitaimi . . . [sa] ia mafai ona usiusitai i aoaoga ma musumusuga a le Agaga. Semanu e le mafai e Iosefa ona faatuina lenei ekalesia. Semanu e le mafai ona ia aumaia i luma le galuega a le Alii, le Tusi Mamona. E ono mafai ona latou faatauemu i le Perofeta o Iosefa Samita o se tagata. E ono o latou fesiligia pe na faapefea ona amataina lenei ekalesia, ae o lenei le mea e tu o se maa faamanatu —le Tusi a Mamona lava ia. O Iosefa, o le tagata, semanu e le mafai ona ia faia lenei mea, ae peitai o Iosefa, sa galueaiina e le mana o le Atua Silisiliese, sa mafai, ma sa ia faatinoina lenei auaunaga ofoofogia o le aumaia o le malo nai le mea lilo, i le talalelei toefuataiina a Iesu Keriso.<sup>16</sup>

Sa faamatala atu e Moronae i le Perofeta . . .ua oo i le taimi na atofaina mo le talalelei i lona atoatoa e talai atu ai i le mana i atunu'u uma. O lenei mea ua faataunu'uina ai le mea sa folafolaina atu i a Ioane ina o lele le agelu i le taulotoaiga o le lagi ma le lalolagi, “o loo i ai le [atoatoaga o le ] talalelei e faavavau e talai atu i a i latou o e o nonofo i le lalolagi” (Faaaliga 14:6). O le toefua-taiga o lona atoatoaga o le talalelei sa faataunu'uina ina ua toefuatai mai i le lalolagi le Tusi a Mamona e ala mai i le Perofeta o Iosefa Samita, lea sa tautino mai o le tusi o loo i ai le atoatoa o le talalelei.<sup>17</sup>

I le aso 21 o Setema 1823 [sa oo ane ai Moronae i a Iosefa Samita ma faaali atu, i se vaega,] “o le galuega sauniuni mo le afio faalua mai o le Mesia sa faateleai ona amataina; ma ua oo mai lava le taimi mo le Talalelei i lona atoatoa uma e talai atu i le mana, i nuu uma. . . .ina ia saunia tagata mo le nofoaiga i le Meleniuma,” o lona uiga e mo le afio mai o le Alii (*History of the Church*, 4:537). I se isi faaupuga, o le faamoemoega autu mo le toeuataina o le talalelei o le sauniaina lea o ni tagata o e o le a saunia e tutu i le afioaga o le Alii pe a afio mai o Ia; a leai, . . . o le a le mafai ona lavatia Lona afio mai.<sup>18</sup>

O aso nei, ua avea le galuega o le malo o le Atua i le lalolagi ma se maa faamanatu i le suafa o le Perofeta o Iosefa Samita. Ua miliona ma miliona ua latou talia le mamalu o lenei misi-ona, e pei ona ia folafola ma taitaiina i le lalolagi atoa. Ua faamanuiaina i tatou i lona penina tau tele e aunoa ma se totogi, o le talalelei lea a Iesu Keriso, lea sa toefuataina e ala mai ia te ia o se mea faigaluega a le Atua, e fesoasoani ia i tatou e ola, ma oti pe a tatau ai, ina ia tatou saunia i le taimi talafeagai mo lona nofotupu i le Meleniuma. O lenei mea e le tatau ona galo ia i tatou. O le taimi lenei mo i tatou, manu o i ai le taimi, e saunia ai e fetai ai ma le Atua.<sup>19</sup>

## Fautuaga mo Suesuega ma Talanoaga

---

- E faapefea e i tatou taitoatasi ona faamalolosia a tatou molimau e uiga i le misiona a le Perofeta o Iosefa Samita? O le a se mea ua faamalosia ai lau molimau e uiga i le Perofeta?
- E faapefea ona tatou mulimuli i faataitaiga a le Perofeta o Iosefa ina ia faateleina ai lo tatou lava potu ma le faaleagaga? O a ni uiga faa-Keriso o loo vaaia i le soifuaga o le Perofeta o Iosefa Samita?
- O a nisi o mea moni taua o le talalelei sa faaalua mai e ala mai i le Perofeta o Iosefa Samita?
- O le a se mea ua faia e Iosefa Samita mo le faaolataga o fanau uma a le Atua? O a ni tulaga o lou olaga ua suia ona o faaaliga sa maua e le Perofeta o Iosefa Samita?
- E faapefea ona fetufaai atu i isi lau molimau e uiga i le Perofeta o Iosefa Samita?

### *Faamatalaga*

1. "The Place of the Living Prophet, Seer, and Revelator." lauga i faiaoga seminare ma mataupu faale lotu, Brigham Young University, 8 Iulai 1964, Matagaluega Faamaumauga o Talafaasolopito, O le Ekalesia a Iesu Keriso o le Au Paia o Aso e Gata Ai, 2-3.
2. "He Lived Great, Died Great in Eyes of God and His People," *Church News*, 10 Tes. 1955, 4.
3. *The teachings of the Harold B. Lee*, ed. Clyde J. Williams (1996), 371.
4. "He Lived Great," 13.
5. *The teachings of Harold B. Lee*, 371.
6. In Conference Report, Oct. 1956, 62.
7. "Two Great Commandments," Savali o le Kerisimasi i tagata faigaluega o le Ofisa o le Ekalesia. 14 Tes. 1972, Matagaluega Faamaumauga o Talafaasolopito, O le Ekalesia a Iesu Keriso o le Au Paia o Aso e Gata Ai, 6.
8. In Conference Report, Oke. 1972, 18; po'o *Ensign*, Ian. 1973, 23.
9. "A Man among Men—A Man of Inspiration," lauga i le Aso Faamamaluina Lona fa Faale Tausaga o Tavita O. Makei, 29 Set. 1968, Matagaluega Faamaumauga Talafaasolopito, O le Ekalesia a Iesu Keriso o le Au Paia o Aso e Gata Ai, 12.
10. *The teachings of Harold B. Lee*, 372.
11. "He Lived Great," 5.
12. "He Lived Great," 5.
13. In Conference Report, Ape. 1969, 132-33; *Improvement Era*, Iuni 1969, 105.
14. *The Teachings of Harold B. Lee*, 373-374.
15. *The Teachings of Harold B. Lee*, 372.
16. *The Teachings of Harold B. Lee*, 372.
17. *The Teachings of Harold B. Lee*, 374.
18. *The Teachings of Harold B. Lee*, 375.
19. In Conference Report, Konofesi Faa Eria Munich Germany 1973, 7.



# Gauai Atu i le Avefeau Moni a Iesu Keriso

*E mafai faapefea ona tatou mulimuli ma le  
faamaoni i le perofeta soifua?*

## Faatomuaga

Sa avea Harold B. Lee ma Peresitene Iona sefulutasi o le Ekalesia ina ua maliu Peresitene Iosefa Filitia Samita ia Iulai 1972. I se taimi puupuu mulimuli ane, sa asiasi atu ai Peresitene Lee i se potu i totonu o le Malumalu i Sate Leki i le vaega o lo’o tautau ai ata o le au perofeta e toasefulu na muamua atu i a te ia. “O ina, i le agaga tatalo ma le mafaufau loloto,” sa ia toe manatua, “Sa ou vaai ai i ata o na tagata o le Atua—tagata tonu, mama atoatoa, o tagata paia o le Atua—o e sa muamua atu ia te au i lenei valaauga.” Sa ia mafaufau i uiga lelei ma mea sa ausia e nei perofeta taitoatasi o lenei tisipenisione mulimuli ma faaiu ai i le ata mulimuli. “O Peresitene Iosefa Filitia Samita sa i ai ona foliga fiafia, o lo’u perofeta-taitai pele o le na te le fesiligia le mea moni . . . Na Ia foliga mai i lenei taimi puupuu ua ia tuuina mai ia te au, e faapei, o se tootoo o le amiotonu ma faapea mai ia te au, ‘Ina alu ia ma ia e faapea ona fai,’ . . .

“Ou te iloa, faatasi ma se molimau e sili ona malosi nai lo o le vaai, e pei ona faaali mai e le Alii, ‘Ua tuuina atu ki o le malo o le Atua i le tagata i le lalolagi [mai le Perofeta o Iosefa Samita ma e na suitulaga ia te ia seia oo mai i le taimi nei], ma o le a alualu pea i luma le talalelei i tuluiga o le lalolagi.’” [MFF 65:2]<sup>1</sup>

O le Peresitene o le Ekalesia ona pau lea o le tagata i le lalolagi ua faataga e faaogaina ki uma o le perisitua. Sa aoao mai e se perofeta o aso e gata ai: “A gasegase le Peresitene o le Ekalesia pe ua le mafai ona ia faia o tiute uma o lona tofi, o ona fesoasoani e toalua, faatasi ma ia, o le Korama lea a le Au



O loo faali mai i lenei ata le Au Peresitene Sili o loo lagolagoina Peresitene Harold B. Lee o le Peresitene o le Ekalesia i se faapotopotoga paia i le aso 6 Oketopa 1972. O Peresitene N. Eldon Tanner o loo i le pulelaa, ma Peresitene Marion G. Romney o loo i le itu taumatau o Peresitene Lee.

Peresitene Sili, la te tauavea le galuega a le Au Peresitene Sili. A i ai ni fesili tetele, aiaiga, polokalama, po o mataupu e tulai mai, e talanoaina ma le agaga tatalo i le fono e fesoasoani i le Au Peresitene Sili ma le Korama a le Au Aposetolo e Toasefululua. E leai se tonu e sau mai le Au Peresitene Sili ma le Korama a le Toasefululua e faia e aunoa ma le autasi i ai o i latou uma. O le mulimuli i lenei ala musuia, o le a faapea ai lava ona agai pea i luma le Ekalesia e aunoa ma le faalavelavea.”<sup>2</sup>

I le avea ai ma tagata o le Ekalesia a le Alii, e mafai ona tatou maua le faatuatuga atoatoa i le taitaiga a le perofeta soifua, lea sa taua e Peresitene Lee o le “avefeau moni” a le Alii. Sa aoao mai Peresitene Lee “afai o le fanau a le Alii, lea e aofia ai tagata uma o i luga o le fogaeleele, tusa lava poo le a le ituaiga, lanu, poo le talitonuga faalelotu, o le a faalogo i le valaau a le avefeau moni o le talalelei a Iesu Keriso, . . . o le a i ai se taimi e vaai ai tagata taitoatasi i le Alii ma iloa ai o loo soifua o Ia.”<sup>3</sup>

O le mulimuli i le perofeta a le Alii, o le a mafai ai ona tatou taunuu saogalemu i lo tatou taunuuga sili - - -le afioaga o lo tatou Tama i le Lagi.

## **Aoaoga a Harold B. Lee**

---

### **E avea faapefea le Peresitene o le Ekalesia ma leoleo o le malo o le Alii?**

Ia manatua o le ao o lenei ekalesia e le o le Peresitene o le Ekalesia. O le ao o lenei ekalesia o le Alii ma le Matai, o Iesu Keriso, ia o loo pulea ma taitai . . . E mafai ona tatou mautinoa i nei toatuga uma, o loo taitai o Ia, nei galo ia te i tatou.<sup>4</sup>

“[O Iesu] o le ao o le tino, o le Ekalesia: o ia o le amataga, o le ulumatua mai e ua oti; ina ia fai o ia ma faasilisili i mea uma lava.” (Kolose 1:18.) E moni lava, ae peitai, o tispensione uma taitasi ao i ai lana talalelei i le lalolagi ma ao faatuina lana Ekalesia, e filifilia lava e le Alii ma tuuina atu le pule i lea tagata e toatasi i lea taimi i nei tispensionione taitasi, o ia lea ua umia le tofi o le peresitene o le Ekalesia, poo le perofeta, tagata vaai ma tali faaaliga i le Ekalesia. O nei tofi, poo le tuuina atu o lenei pule, e le avea ai lea tagata ma “Ulu o le Ekalesia,” o lona igoa e ā Iesu Keriso ia. Ae peitai e avea o ia ma fofoga o le Atua, ma o ia o le sui o le Atua,



ma e fetalai mai le Atua i Lona nuu e ala mai ia te ia, e tusa ma faatonuga e tuuina mai pe taofia foi mataupu faavae ma sauniga, pe lapataiina foi i latou e uiga i faamasinoga. . . .

. . . O le peresitene o le Ekalesia o le leoleo o le Maota po o le Malo o le Atua. Ua tuuina atu ki i vaega uma i ona lima. E tusa ai ma le taitaiga a le Alii na te tuuina atu ki o mana i isi tagata o le Ekalesia e papatiso ai, e talai le talalelei, e faaee atu lima i e ua mamai, e pule faamalumalu pe aoao atu ai i isi valaauga eseese. Ua ia tuuina atu i nai tagata toaitiiti le pule e pulea ai sauniga o le malumalu pe faatino ai foi le faiga o faaipoi-poga “ina ia fusifusia i le lalolagi ma le lagi.”<sup>5</sup>

O le perofeta o se tali faaaliga ma se faamatala upu musuia ma le paia o le mafaufau ma le finagalo o le Atua. O loo ia umia ki o le malo o le Atua i o tatou aso, e pei o ki na tuuina atu i a Peteru e avea ai o ia ma āo o le Ekalesia i le lalolagi i ona aso.<sup>6</sup>

Sei ou faitau atu se mea na tusia [e Peresitene J. Reuben Clark Jr.] mo se tasi faatasiga: “E tatau ona manatua . . . e na o le Peresitene o le Ekalesia, o le Faitaulaga Sili Pulefaamalumalu, . . . e i ai le aia tatau e maua ai faaaliga mo le Ekalesia, pe fou pe toe teuteu, pe tuuina mai se faauigaga faatagaina o tusitusiga paia lea e ao ona fusifusia i le Ekalesia. . . . Ua na o ia le fofoga o le Atua i le lalolagi mo le Ekalesia a Iesu Keriso o le Au Paia o Aso e Gata Ai, le Ekalesia moni e tasi. O ia e toatasi e mafai ona ia faaali le mafaufau ma le finagalo o le Alii i ona tagata. E leai se taitai o se isi lava Ekalesia i le lalolagi o i ai lenei aia tatau maualuga ma le tofi sili.” [Church News, 31 Iulai 1954, 10.]<sup>7</sup>

O le Peresitene o le Ekalesia ua na o ia lava ua faatagaina e na te tuuina mai se mataupu faavae fou, o ia lea, pe a ia tuuina mai, o le a tautino maia o se faaaliga mai le Atua, ma o le a taliaina e le Au Fono a le Toasefululua ma lagolagoina ai e tagata o le Ekalesia.<sup>8</sup>

---

### **E faapefea ona filifilia le Peresitene o le Ekalesia?**

Mo i latou e fesili: E faapefea ona filifili pe tofia le Peresitene o le Ekalesia? o le tali sao ma le faigofie o le ta’u atu lea i ai o le mataupu faavae o le faatuatua lona lima: “Matou te talitonu e

valaauina le tagata e le Atua, i le valoaga, ma le faaee atu o lima o e o i ai le pule, e talai atu ai le talalelei ma faia sauniga o i ai.”

O le amataga o le valaauina o se tasi e avea ma Peresitene o le Ekalesia e amata tonu lava i le taimi e valaau ai, faauu, ma faamanuia e avea ma uso o le Korama a Aposetolo e Toasefululua. O lenei valaauga i le valoaga, po o se foi isi faaupuga, e ala i musumusuga a le Alii i e o umia ki o le au peresitene, ma o le faauuga ma le faamanuiaga e sosoo mai ai e ala i le faaee atu o lima o lena lava pule e tasi, ua tuuina ai Aposetolo taitoatasi i se korama faaleperisitua o alii e toasefululua o loo umia le tofi faa-aposetolo.

O Aposetolo taitoatasi ua faauuina i lalo o aao o le Peresitene o le Ekalesia, o le o loo umia ki o le malo o le Atua e o gatasi ma isi Aposetolo faauuina, ua tuuina atu i a i latou le pule o le perisitua e tatau ai e umia ai tulaga uma i totonu o le Ekalesia, e oo lava i se tofiga o le au peresitene o le Ekalesia pe afai o le a valaauina ai o ia e le pulega pule faamalumalu ma lagolagoina e ala i se palota a le faalapotopotoga o tagata o le ekalesia.

. . . I le taimi lava e maliu ai se Peresitene o le Ekalesia, o le tulaga tino o lo’o sosoo ai, le Korama e Toasefululua a Aposetolo, ua avea ma pulega pule faamalumalu, faatasi ai ma le Peresitene a le Toasefululua e otomeki lava ona avea ma peresitene le tumau o le Ekalesia seia faauuina ma lagolagoina aloaia se Peresitene o le Ekalesia i lona tofiga . . .

O sui uma o le Au Peresitene Sili ma le Toasefulua e masani lava ona lagolagoina o ni “perofeta, tagata vaai, ma tali faaaliga.” . . . O le uiga o lenei mea o so’o se Aposetolo lava, ua filifilia ma faauuina, e mafai ona pule faamalumalu i le Ekalesia pe afai o le a “filifilia e le faalapotopotoga [lea e faauigaina o le vaega atoa a le Korama e Toasefululua], ma tofia ma faauuina i lea tofiga, ma talisapaia le talitonuga, faatuatua, ma le tatalo a le Ekalesia.” e sii sao mai i se faaaliga i lenei mataupu, i se tuutuuga e tasi, ma o lena tuutuuga pe a o ia o se uso sinia, poo se Peresitene, o lena faalapotopotoga (tagai MFF 107:22).<sup>9</sup>

Ao ou nofo ai o se uso fou o le Aufono a le Toasefululua, o le taimi muamua na ou auai i le toe faatulagaina o le Ekalesia, o le taimi lea ina ua maliu Peresitene [Heber J.] Grant. . . . Ao faalau

mai suafa o fesoasoani o le Peresitene [fou] ma ao nofoia o laua nofoa i le pito i luma o le potu, sa i ai ia te au se molimau o alii nei ua finagalo le Alii e avea ma Au Peresitene o le Ekalesia. Sa oo mai foi ia te au se talitonuga maumautu e peiseai o lena mea moni sa iliina e pei o se pu i ou taliga.

. . . . A lē i ai i tagata o lenei Ekalesia lena talitonuga o loo tai-taiina i latou i le ala sao, ma i ai se talitonuga o nei auauna a le Atua o alii ua musuia ma ua faauuina i le ala sao e ala i le aao o le Atua, e lei liua moni i latou.<sup>10</sup>

E faaali mai e le [Alii] le tulafono ma o Ia e fuafuaina, filifilia pe tofia au ofisa ma umia le aia tatau e aoai ai, faasao, e oo lava i le aveesea o i latou i Lana faitalia. Ma e manaomia ai se [fesootaiga] le motusia e ala i faaaliga tuusao i le va o le Alii ma Lana Ekalesia. Mo se faamaoniga o mea moni muamua atu, e tatou te taulai i faaitaiga o augatupulaga uma e pei ona tusia i totonu o tusitusiga paia. O lenei faatulagaga o le malo sa amata mai i totonu o Etena. Sa tofia e le Atua Atamu e pulea le lalolagi ma sa tuuina atu ia te ia tulafono. Sa fuafuaina se faasologa e masani ai mai ia Atamu ia Noa ma mai ia Noa ia Mekisateko, Aperaamo, Isaako, Iakopo, Iosefa, Mose, Samuelu le perofeta, Ioane, Iesu, ma Ana Aposetolo, o i latou uma taitoatasi sa filifilia e le Alii ae le o tagata.

E moni e i ai le leo o tagata i le puleaina o le malo o le Atua, ae o le mea muamua latou te lē faaeeina atu le pule, e lē mafai foi ona latou aveesea [lea pule]. Mo se faaitaiga: E le i filifilia e tagata Aposetolo e toasefululua a Iesu Keriso, ma e le mafai foi i se latou palota faitele ona aveesea mai i o latou tofi aposetolo. E faapei ona sa i ai i le puleaina o le malo anamua, ua faapea foi ona toefuataiina mai. E lei filifilia e tagata le Perofeta sili ma le Aposetolo o ona po nei o Iosefa Samita, ao le Atua sa filifilia o ia, i le auala masani sa Ia filifilia ai isi sa muamua atu ia te ia—e ala i faaaliga vaaia ma Lona lava siufofoga mai le lagi.<sup>11</sup>

Ua ia te au se malamalamaaga ao ou mafaufau e uiga i lenei matafaioi [o se perofeta] ma ua lava foi lo'u latalata i le Usoga i le tele o tausaga, o se tasi e i lenei tofiga e i lalo o le vaavaaiga tumau a Ia e ona lenei galuega o loo tatou faia. E le mafai ona Ia

faatagaina se tasi i lenei tofiga e taitai seseina lenei ekalesia. E mafai ona outou mautinoa lena mea. Pe a ou mafaufau i le auala e sau ai se tasi i se tulaga faataitai i le Ekalesia, ou te mafaufau i mea na tutupu i le tolusefulu tasi ma le afa tausaga, ma mea uma na tutupu i lou lava olaga—o se polokalama maoae faaleaoaoga lenei! Ina ua faia le suiga i le Au Peresitene Sili, sa ou faatusatusaina le eseese o le auala e sailia ai e vaega faaupufai se peresitene o le Iunaite Setete i le tofi, po o le faauuina foi o se tupu, ina ia iloa pe faapefea, e ala i le fuafuaga a le Alii, ona faia nei suiga e aunoa ma se vevesi, e aunoa foi ma le tauaimisa. Ua i ai le fuafuaga ma e le mafai ona sese le Alii, ma ua uma ona Ia ta'u mai ia te i tatou.<sup>12</sup>

---

### **Aisea e tatau ai ona tatou mulimuli i le perofeta?**

O lenei, ia avea lenei aso ma aso tatou te mafaufau loloto ai, ia manatua le mea na tau mai muamua e le Alii ia i tatou. O loo i ai Lana perofeta i le lalolagi i ona po nei, ma pe a e fia iloa le faaaliga mulimuli ua oo mai i tagata, ia maua sau kopi o le konafesi mulimuli ma faitau auiliili aemaise lava i mea o loo tauina mai e le Au Peresitene Sili . . . O le a e maua ai upu e aupito sili ma upu mulimuli ua tuuina mai e lo tatou Tama Faalelagi. E le tatau ona tatou faalagolago tasi i mea o i totonu o tusitusiga faavae o le Ekalesia. E faaopoopo i mea ua tau mai ia i tatou e tusitusiga paia, ua i ai ia i tatou mea o loo tau mai e perofeta iinei ma le taimi nei, ma e mo i tatou pe afai tatou te mananao e faasaoina i tatou i mauga o Siona, pe a oo mai nei tulaga matautia, ia faalogo ma usitai.<sup>13</sup>

E masani ona tupu i nei aso pe a saunoa atu le usoga i le pule e tatau ai, ae i ai nisi ua tulai mai e faasagatau ma faapea mai, “O lenei, o fea e mafai ona ou maua ai se pule e mafai ai ona e fai mai i lena mea. . . .” E faaosoosoina i tatou e faapea atu, “Toe alu ma toe faitau le tautalaga a le taitai o le Ekalesia e uiga i lenei mataupu, ma o le a e maua ai le pule uma o loo e sailia, aua o le auala lea a le Alii. O loo iinei Lana perofeta, ma e manaomia tele faaaliga i le avea ai ma faamaoniga e pei ona sa iai i soo se taimi i soo se tisipenisione o le talalelei i le lalolagi.”<sup>14</sup>

O lenei, na pau lava le saogalemu o loo iai ia i tatou i le avea ai ma tagata o le ekalesia o le faia o lea o mea sa fetalai ai le Alii i lena aso ina ua faatuina le Ekalesia. E ao ona tatou aoao e gauai i upu ma poloaiga o le a tuuina mai e le Alii e ala mai i Lana perofeta, “e pei ona ia maua, ma savavali i ou luma i le paia atoatoa; . . . e pei lava o loo alu atu mai ia te au, i le onosai uma ma le faatuatua.” (MFF 21:4-5). E i ai mea o le a manaomia ai le onosai ma le faatuatua. Atonu o le a e le fialia i le mea e sau mai le pulega o le Ekalesia. E ono feteenai ma ou taofi faapolokiki. E ono feteenai ma ou taofi faale-olaga nei. E ono faalavelave i le ituaiga olaga o loo e ola ai. Ae afai e te faalogo i nei mea, e pei o loo tuuina mai i le fofoga o le Alii Lava Ia, faatasi ma le onosai, ma le faatuatua, o le folafolaga e faapea “o le a le manumalo faitotoa o seoli i a te outou; ioe, a e tafieseina e le Alii le Atua le malosi o le pogisa mai o outou luma, ma luluina le lagi mo lo outou lelei, ato ma le mamalu o lona suafa” (MFF 21:6).<sup>15</sup>

Mo outou le Au Paia o Aso e Gata Ai i soo se mea, o lena folafolaga [i le MFF 21:4-6] o le a fai mo outou pe afai o le a outou mulimuli i taitaiga a le Alii ua faatulagaina i totonu o le Ekalesia, e ala i le usitai i a latou fautuaga i le onosai ma le faatuatua.<sup>16</sup>

Ia faalagolago i le Peresitene o le Ekalesia mo o outou faatonuga po o aoaoga. Afai e i ai se feteenaiga, ia vaai ma mulimuli i le Peresitene pe afai e te fia savali i le malamalama.<sup>17</sup>

Afai e mananao o tatou tagata ina ia taitaiina saogalemu i nei taimi [faigata] o le tafaasese ma tala fatu sese, e tatau ona mulimuli i o latou taitai ma saili mo taitaiga a le Agaga o le Alii ina ia aloese mai le pau atu i mailei poto faatogafiti a tagata, o e, faatasi ai ma le poto e tafaasese, ua latou saili e faagauai mai ma maua ai se faaiuga e auauna i o latou lava manatu ma o nisi taimi o manatu faatiapolo.<sup>18</sup>

O lenei e toatele nua i latou i le vaitaimi o le Matai sa latou le taliaina o Ia o le Alo o le Atua. Sa i ai nisi sa faapea mai, “Oi, o Ia ua nao se atalii o Iosefa, le kamuta.” Sa faapea mai nisi, “O Ia o le Aloalii o Pelesepulo,” o lona uiga o le atalii o le tiapolo. Ina ua ia faatinoina nisi o nei mea faavavega sa latou fai mai, “O Ia o se tagata inu uaina,” o lona uiga sa inu i le uaina malosi. E toaititi lava sa mafai ona latou faapea mai, “O oe o le Keriso, o le

Alo o le Atua soifua.” (Mataio 16:16) Aisea na le mafai ai ona iloa e tagata o Ia o le Alo o le Atua?

Tatou pepese, “Maimau pe ana mafai ona ou faatasi ma Ia i lene taimi, ina ua Ia siliina tamaiti i Ona aao.” [Tagai “I Think When I Read That Sweet Story,” *Children’s Songbook*, 56.] O le toatele o o tatou tagata o le a le mafai ona latou taliaina o Ia i lene taimi e sili atu nai le mafai ona latou taliaina mataupu faavae ia e tuuina mai e faiaoga o le amiotonu e pei ona musuia e lene lava Faaola e tasi. Pe a le mafai ona tatou taliaina i latou o loo fai ma Ona sui iinei, o le a le faigofie ona taliaina le Matai lava Ia, pe a faapea o le a faaali mai o Ia . . .

Ao ou i ai i le misiona, sa matou malaga ma nisi o faifeautalai ma le peresitene o le matou misiona i le Falepuipui o Karefasi. Ona o le lagona ootia i le nofoaga lea sa tagatavaleina ai le Perofeta ma lona uso o Ailama, o lea sa matou talosaga atu ia te ia e toe faamatala mai le mea na tupu seia oo atu lava i le tagatavaleina. Sa matua ootia lava au ina ua faapea mai le peresitene o le misiona: “Ina ua maliu le Perofeta o Iosefa Samita, e toatele i latou sa maliliu faaleagaga faatasi ma ia. Ma sa faapea lava i suiga uma o le taitaiga o le malo o le Atua. Ina ua maliu Polika Iaga, e toatele sa maliliu faatasi ma ia faaleagaga, ma sa faapea foi Ioane Teila, ma le maliu o Peresitene uma o le Ekalesia” . . .

O nisi taimi tatou te oti faaleagaga ai ma momotu ese mai ai lava i tatou mai le malamalama manino faaleagaga ma galo ai o le aso, iinei ma le taimi lava lenei, o loo i ai ia i tatou se perofeta.<sup>19</sup>

O le tulaga o nei avefeau sa tofia i le lagi o loo fai ma sui o le Alii i tisipenisione taitasi o le talalelei i luga o le fogaeleele e mafai ona faapupula mai i se mea sa tupu e pei ona faamatalaina e se tasi o tagata faimalaga i Europa i matu. Sa tuua e le tagata faimalaga lea i se vaa mai Stockholm, i Suetena, e malaga atu i le Sami Patika. Ina ia taunuu i lea nofoaga, e tataua ona pasia e le vaa le afe pe sili atu o motu. Ao tu o ia i le pito i luma o le vaa, sa lagona e le tagata faimalaga ua le lava onosai aua ua foliga mai ia te ia o se alavaa faatamala lea. Aisea ua ou le malaga ai i se ala e latalata i lenei motu pe o se tasi poo se isi ala sili ona manaia nai lo le ala ua filifilia e le pailate? I le osooso ae o lona ita tele sa ia faapea ifo ai ia te ia lava, “O le a le mea ua tupu i le toaina

pailate? Pe ua na le iloa ea le mea e agai i ai?’ Sa faafuasei ona ia iloa atu pine o loo maka faasolosolo i le ala sa foliga mai e pei o ni ‘au salu o loo lala ae i luga o le vai. Sa asaina ma le faaeteete e se tagata lenei alavaa ma faailogaina le ala sili ona saogalemu e folau ai nei vaa. E faapea le ala o le olaga agai i le tino ola pea ma le ola e faavavau: “O inisinia a le Atua,” na latou faataatia se alafua mo se malaga sili ona saogalemu ma fialia ma sa latou muai lapataia i tatou e uiga i vaega matautia, e ala lea i lo latou mulimuli i se ata ua uma ona fuafuaina.<sup>20</sup>

O le Alii o le a ia musuia Ana auauna e taitai Lana ekalesia i le ala sao. O Ana perofeta o le a maua musumusuga a le Alii e saunoa atu ai i tagata o le Ekalesia, “O le ala lava lenei, ia outou savavali ai” (Isaia 30:21). E oo lava i taimi o faigata lea e oo mai i aso o loo tatou ola ai, e pei ona valoia i faaaliga o ona po nei, o le ata e finagalo le Alii tatou te vaai i ai o le ata tumau ma le mautu. E te manatua sa Ia fetalai atu i Ona soo, “A e tutu pea ou soo i mea paia, ma e le faagaetia” (MFF 45:32).<sup>21</sup>

## **Manatu mo Suesuega ma Talanoaga**

---

- O ai lava le ao moni o le Ekalesia? O ai e tuuina mai i ai e le Alii faatonuga ma taitaiga i Lana Ekalesia?
- E faapefea ona tuuina mai se mataupu faavae fou i luma o le Ekalesia?
- E faapefea ona saunia le Peresitene o le Ekalesia mo ana matafaioi sili? E faapefea ona taitai e le Alii le filifiliina o le Peresitene o Lana Ekalesia?
- O le a se fautuaga ua tuuina mai e se perofeta soifua ua faamanuiaina ai faapitoa lou olaga?
- Aisea e te manatu ai o nisi tagata ua latou faamamaluina perofeta o anamua ae latou te le faamamaluina le perofeta soifua? O a ni taunuuga o le le gauai i upu a le perofeta soifua poo le luina foi o lana pule?
- O a folafolaga ua faia mo i latou o e gauai i upu ma poloaiga a le perofeta soifua?

## *Faamatalaga*

1. In Conference Report, Oke. 1972, 18–20; po o le *Liabona*, Me 1973, 25–26.
2. Howard W. Hunter, in Conference Report, Oke. 1994, 6–7; po o le *Liabona*, Ian. 1994, 7.
3. *The Teachings of Harold B. Lee*, ed. Clyde J. Williams (1996), 522.
4. *The Teachings of Harold B. Lee*, 527.
5. *Decisions for Successful Living* (1973), 103, 105.
6. *The Teachings of Harold B. Lee*, 531.
7. Lauga i le Konofesi ma le Inisitiuti a Cambridge, 10 Me 1970, Faila a le Faletusi o Talafaasolopito, O Le Ekalesia a Iesu Keriso o le Au Paia o Aso e Gata Ai,<sup>8</sup>
8. *The Teachings of Harold B. Lee*, 543–44.
9. *The Teachings of Harold B. Lee*, 534–35.
10. *The Teachings of Harold B. Lee*, 542–43.
11. *The Teachings of Harold B. Lee*, 547–48; paragraphing added.
12. *The Teachings of Harold B. Lee*, 535–36.
13. *The Teachings of Harold B. Lee*, 471.
14. *The Teachings of Harold B. Lee*, 428–29.
15. *The Teachings of Harold B. Lee*, 525–26.
16. *The Teachings of Harold B. Lee*, 529.
17. *The Teachings of Harold B. Lee*, 532.
18. *The Teachings of Harold B. Lee*, 437.
19. *Ye Are the Light of the World* (1974), 31, 34–35.
20. *The Teachings of Harold B. Lee*, 534.
21. *The Teachings of Harold B. Lee*, 545.





# Auaunaga Alofa ma le Faamaoni Faale-Perisitua

*E faapefea ona faamanuiaina tagata uma o le Ekalesia ona o auaunaga alofa ma le faamaoni faale perisitua?*

## Faatomuaga


Sa faamatala mai e Peresitene Harold B. Lee le tala lenei e uiga i le Malumalu i Sate Leki: “Ao fuafua le fausiaina o le malumalu tele i Sate Leki, sa talosagaina Truman O. Angell, le tusiata, e tusia se faamatalaga . . . e faailoa atu ai i tagata o le Ekalesia sina ata faalemafaufau o foliga o le malumalu o le a i ai pe a maea. . . O isi mea uma na ia taua, sa ia faamatala ai le mea o le a e maua i le pito i sisifo o le malumalu . . . O lalo ifo o le tumutumu ogatonu i le pito i sisifo o le malumalu, i tafatafa o le tapeneko, o le a e maua ai le fetu lea e ta’ua i le faatulagaina o fetu o le fetu o le Aniva. O le a e vaايا le vaega maamaai o le fetu o le Aniva o faasaga i luga i se fetu pupula lea e masani ona tatou faaigoaina o le Fetu i Matu. Ina ua faamatalaina e Truman O. Angell le mea o le a maua i lea vaega o le malumalu, sa ia faapea mai, ‘O le mea lenei e faailoga ai, o le a maua e i latou na sē lo latou auala, e ala lea i le perisitua.’”

Ona faamamafa mai lea e Peresitene Lee, “E ala i le perisitua ma ua na o le perisitua lava e mafai ai e i tatou, o atalii ma afafine o le Atua, ona toe maua lo tatou ala i lo tatou aiga moni.”<sup>1</sup>

## Aoaoga a Harold B. Lee

### O le a le perisitua?

E lua ni mataupu sa faamatala ai le uiga o le perisitua i le tele o tausaga. O le tasi o le perisitua o le pule lea ua tuuina mai e le



Sa fautuaina e Peresitene Harold B. Lee e o umia le perisitua, “Ia saunia outou ia pei o ipu e mama ma atoatoa ina ia faaalai ai le mana o le Atua Silisiliese e ala atu ia te outou a o outou taitai i sauniga paia o le perisitua.”

Tama Faalelagi i tagata e faatagaina ai i latou e galulue i soo se mea e faatatau i le faaolataga o tagata i le lalolagi. O le isi mataupu o loo faamatala i se tasi manatu faapea o le perisitua o le mana lea e galue ai le Atua e ala mai i tagata.<sup>2</sup>

O loo iai iinei le perisitua a le Atua ma sa tuu faasolo mai talu le toefuataiga o le Ekalesia e ala i avefeau sa auina mai e toefuatai mai lenei pule ina ia mafai ai ona faia sauniga o le faaolataga mo tagata faatuatua uma o le lalolagi. O le perisitua a le Atua o loo umia ki o le faaolataga.<sup>3</sup>

Sa tau atu e le Matai i a Peteru ma isi aposetolo se mana e sili atu nai lo le tagata e taua o “ki o le malo o le lagi,” ma e ala i lenei mana, sa ia faapea mai, “E soo se mea e faamauina i le lalolagi o le a faamauina i le lagi.” (Mataio 16:19). O lenei mana ma le pule, o loo pulea ai sauniga paia, ua taua o le perisitua paia ma e i ai lava i le Ekalesia a Iesu Keriso i tisipenisione uma o le talalelei i le lalolagi.<sup>4</sup>

[O le perisitua] o le pule e pulea ai sauniga e tusa ai ma le faatulagaga ua faaali mai e le [Alii]. O le mana . . . o le aia tatau lea ua tuuina mai i tagata e le Alii e galulue ai i Lona suafa mo le faaolataga o agaga o tagata. . . .

O le tasi o faamoemoega o [le] perisitua maualuga e pulea ai sauniga, e tuuina atu ai i tagata lenei malamalama o le Atua lea na faaali mai e le Matai e manaomia, ma sa taua e le Aposetolo o Paulo, a o talanoa e uiga i le faatulagaga o le Ekalesia, e tatau ona “iloa lelei o le Alo o le Atua, ina ia fai ma tagata matua,” [Efeso 4:13.] E i ai foi le pule o le perisitua maualalo e taitai ai isi sauniga, e faapei o nei alii talavou sa latou faamanuia ma tufaina le faamanutuga i se tulaga matagofie i lenei lava afiafi. O le Perisitua Arona, sa faapea mai le Alii, o le perisitua “o loo i ai ki o asiasiga a agelu, ma le talalelei o le salamo, ma le papatisoga i le faatofuina mo le faamagaloina o agasala,” [MFF 13:1] ma le tulafono o poloaiga faaletino. Ma o lea la . . . o le perisitua [e] tatau mo le faamoemoega o le tuuina atu o le mana i e ua valaauina e pulea sauniga e tatau ai mo le mauaina o le faaolataga sa fuafuaina e le Alii mo Lona faamoemoe.<sup>5</sup>

O loo afio le Alii i le lotolotoi o lana Au Paia e ala i lana perisitua, lea ua ia faamatuu mai i le tagata.<sup>6</sup>

## E faapefea ona faaaogaina le perisitua?

I se tasi o faaaliga taua tele e pei ona tusia i le vaega 121 o le Mataupu Faavae ma Feagaiga, e ala mai i musumusuga mai le Alii ia Iosefa Samita, sa tau mai ai e le Alii ni mea taua tele. Sa ia fetalai mai o le perisitua e na o luga lava o mataupu faavae o le amio-tonu e mafai ona faatonutonu ma pulea ai, ma pe afai e faaaoga ma le amioletonu lo tatou tofi o le perisitua “e tau ufiufi ai a tatou agasala, pe faamalie ai lo tatou loto maualuga, lo tatou fia sili le aoga, pe faatonuina pe pulea pe faamalosia i agaga o le fanau a tagata . . . e tiga le agaga o le Atua.” (tagai MFF 121:37). . .

O le faasalaga pe afai o le a tatou faaaogaina ma le amioletonu o tatou perisitua, o le a punitia le lagi ma o le a tiga le Agaga o le Alii. Pe a aveesea le Agaga mai ia i tatou, ua aveesea le mana o le perisitua ma ua tuua ai i tatou ia i tatou lava e “a’a i tui,” pe afai o faasoesa mai ia i tatou aoaiga ma faatonuga a o tatou taitai. Ona amata lea ona tatou faasaua i tagata o le au paia, o lona uiga o le a muimui, ma oo ai ina faasaga tau i le Atua, ma o le a manumalo le mana o le tiapolo ia i tatou pe afai tatou te le salamo ma liliu ese mai i le ala o le tiapolo. [tagai MFF121:37–38.]

O uiga lelei manaomia o le taitaiga faaleperisitua o loo faamatalaina foi i lenei faaaliga. O se tasi e ao ona pulefaamalumu i le Ekalesia ma le onosai ma le faapalepale, i le agalelei ma le agamalu, ma le alofa faamaoni. Afai e tataua ona faia e se tasi se aoaiga pe faatonu ma le malosia se isi, e tataua ona ia faia pe a musuia e le Agaga Paia ma faaali atu mulimuli le alofa faateleina, ina nei fai oe mona fili. [tagai MFF 121:41–43.] I o tatou valaauga faaleperisitua uma, ia aua nei galo ia i tatou o le faamoemoe o le galuega a le ekalesia ma le malo o le Atua o le laveaiina lea o agaga, ma o i latou uma o loo avea ai i tatou ma taitai o fanau a lo tatou Tama, ma o le a Ia faaaupegaina foi i tatou i soo se mea tatou te faia mo le laveaiina o agaga taitasi.

E i ai se faataitaiga lelei lava o le ala e finagalo lo tatou Alii tatou te auauna atu ai i e o loo manaomia la tatou fesoasoaniga. E pei ona tusia i le tusi o Galuega a Aposetolo, ina ua tau atu Peteru ma Ioane i se tagata e lei savali muamua lava ma sa nofo i le faitotoa o le malumalu ma aisi mo ni meaalofo, la te le’i tuu-

ina i ai se tupe, ae tou te manatua sa faapea atu i ai le aposetolo o Peteru, “E leai sa’u ario po o sa’u auro, a o le mea o ia te au, ou te avatu lea ia te oe, o le suafa o Iesu Keriso le Nasareta, ina tu ai ia i luga, ina savali.” (Galuega 3:6.)

Ona mulimuli ane ai lea, o loo i ai se faamatalaga taua o loo i totonu o lona lava mea na tupu. Sa tago atu Peteru i lona lima taumatau ma faatu ia te ia i luga. [tagai Galuega 3:7] Manatua e lei lava ia Peteru le na ona faatonu ia te ia e savali, ae sa ia tago i lona lima ma faatu ia te ia i luga.

O lea e tatau foi ona faapena i tatou, i a tatou fegalegaleaiga ma o tatou uso ua tau vaivai, ia lē o ni uso o le perisitua e faamasino atu, otegia, ma faasala. Ia faapei o le aposetolo o Peteru, e tatau ona tatou taitai i latou, faamalosiau ia te i latou, ma tuuina atu ia i latou se lagona o le saogalemu ma le faaaloalo ia i latou lava seia oo ina mafai ona latou manumalo i o latou faafitauli ma mafai ona tutu i o latou lava vae.

O le ala lona e mafai ai e le perisitua a le Atua ona aumaia le faaolataga ma faaumea mai i latou ua vaivai, ina ia latou toe malolosi.<sup>7</sup>

O lo tatou manumalo. . . o le a fuaina i se vaega o lo tatou tulaga o le alofa ia i latou o loo tatou saili e taitai ma auauna i ai. Pe a tatou alolofa moni i isi o le a mafai ona tineia lagona leaga e masani ona manumalo i fesootaiga faaletagata. Pe a tatou alolofa moni i isi o le a tatou galulue i mea e maua ai lo latou ola e faavavau ae le na o le faia o mea tatou te manaomia ma maua ai so tatou lava viiga.<sup>8</sup>

---

**Pe faapefea e i latou o umia le perisitua ona  
“i ai i le galuega a [lo latou] Tama?”**

I le sefululua o tausaga, o Iesu, ina ua mavae ona maua o ia i totonu o le malumalu e Iosefa ma Maria, sa ia tali atu ai i lo laua fia iloa o le mea sa i ai e ala i se fesili taua tele: “Lua te le iloa ea e tatau ona ou i ai i le fale o lou tama?” (Luka 2:49.) O le a le uiga o le i ai i le fale o Lona Tama?

I se tasi faaaliga sa tuuina mai e le Alii le uiga o le fesili a lona alii talavou. I toeaina o le Ekalesia sa faapotopoto i Katelani, Ohio, sa Ia faamamafa atu ai ia te i latou le matafaioi tele o le avea



E ao ia i latou taitoatasi o umia le perisitua ona “mafaufau i lona valaauga e pei o loo i ai o ia i le feau a le Alii. O le uiga lena o le faalautele o le perisitua.”

ai ma nisi e umia le perisitua paia i le tofi o le toeaina. “O le mea lea,” sa fetalai mai ai o ia, “ona o oulua o sui,ua oulua i ai i le feau a le Alii, ma soo se mea lua te fai e tusa ma le loto o le Alii o le galuega lava lea a le Alii.” (MFF 64:29.)

Pe a umia e se tasi le perisitua, ua avea o ia ma sui o le Alii. E ao ona ia mafaufau i lona valaauga o lo’o iai o ia i le feau a le Alii. O le uiga lena o le faalautele o le perisitua. Mafaufau o lo’o fesili mai le Matai ia te oe, e pei ona fesili ai lenei alii talavou ia Iosefa ma Maria, lua te le iloa ea e tatau ona ou iai i le fale [galuega] a lou Tama? Soo se mea e te faia i le finagalo o le Alii o le galuega lena a le Alii.<sup>9</sup>

Pe a tatou galulue i le suafa o le Alii, o e ua umia le perisitua, o loo tatou faia lea mea i le suafa ma avea ma sui o lo tatou Tama Faalelagi. O le Perisitua o le mana lea e galue ai lo tatou Tama Faalelagi e ala mai i tagata.

. . . .Ou te popole aua o nisi o o tatou toeaina e le o malamalama i lenei mea, pe afai latou te taitai o ni toeaina o le Ekalesia. . . . pe o faitaulaga sili, ia faia e faapei lava ona latou faatinoina sauniga, o le Alii e ala mai ia i latou o loo galue i luga o

ulu o i latou o loo tatou auauna i ai. E masani ona ou manatu o le tasi o mafuaaga e le o mafai ai ona faalateleina o tatou perisitua ona tatou te le o malamalama e tusa o tagata o umia le perisitua, o loo Ia galue e ala atu ia i tatou i le mana o le perisitua paia, ma ou te moomoo e mafai ona maua uma e i tatou lona lagona, ma faapena ona tatou aoao o tatou talavou i le uiga o le umia ma le faalateleina o le perisitua.<sup>10</sup>

O le a le uiga o le faaee atu o lima i luga o lou ulu? Sei ou aveina oe i le vaega e tolusefulu-ono o le Mataupu Faavae ma Feagaiga ma faitau atu ia te oe le fuaiupu lea atonu na ona e faitau ai lava ae le iloa le taua o loo i ai. O se faaaliga leni na ala mai ia Iosefa Samita le Perofeta mo Edward Partridge, le uluai Epikopo Pulefaamalumu. O le saunoaga leni a le Alii: “O le a ou faaee atu lo’u lima i ou luga ai le lima o la’u auauna o Sidney Rigdon, o le a e maua foi lo’u Agaga, o le Agaga Paia, o le Fesoasoani lea o le a aoaoina oe i mataupu tau le filemu o le malo” (MFF 36:2).

Po o e iloa ea le me o loo Ia fetalai mai ai—soo se taimi lava e te faatino ai se auaunaga i le pule o lou perisitua ua tusa lava o le Alii o loo faaee ona aao i luga o lona tagata e ala i lou lima ina ia e tuuina atu faamanuiga o le ola, o le soifua maloloina, o le perisitua, poo le a lava. Ma soo se taimi lava e tatou te faagaioi ai o tatou perisitua, o loo tatou faia e pei lava o loo i ai faatasi le Alii ma i tatou, ma e ala ia i tatou, na te fesoasoani mai ia i tatou e faatino lona sauniga.<sup>11</sup>

O leni, mo outou tama tane o le Ekalesia: O loo i ai ia te outou le aia tatau e umia ai le perisitua a le Atua. . . .O nisi ua uma ona faaee lima i luga o latou ulu e maua le mana ma leni pule, ae peitai e lei mauaina lava. Ma aisea ua latou le maua ai? Ua tau mai e le Alii ia i tatou ni mea se lua: aua ua faapea ona manumanu o latou loto i mea o le lalolagi, ma lona lua, ua manao tele i viiga mai tagata (MFF 121:35). Sei e mafaufau lava i tua i nisi sa outou faifai mea faatasi ma iloilo pe aisea na toe faavaivai ai nisi o i latou i mea faaleagaga, ma o le a outou maua le tali i se tasi o na mea e lua. Ona o o latou loto ua pupu tele i mea o leni lalolagi- -pe o tupe? pe o o latou tulaga faaletagata? pe o ni mea i o latou lalolagi faaleaoaga? - -pe ua latou manao tele i viiga mai tagata ua le mafai ai ona faalavelaveina i latou i mea o

le Ekalesia. Ioe, pe afai o le a outou avea ma taitai i totonu o le Ekalesia ma umia nei tofi. . . . e tatau ona outou totogiina le tau.<sup>12</sup>

Uso e, ua tuuina atu i o outou lima se faatuatuga paia e le gata i le umia o le pule e galue ai i le suafa o le Alii, ae ia saunia outou ia mama outou e tauave ipu a le Alii ina ia faailoaina mai ia te outou le mana o le Atua Silisili Ese e ala i sauniga paia o le perisitua o loo outou taitaiina. Aua lava nei avea lou perisitua i nofoaga o le a e maasiasi ai pe a vaaia ai oe e le Peresitene o le Ekalesia.<sup>13</sup>

E ao ona tatou faapea, “Ona o loo ou umia le perisitua a le Atua soifua, o au o se sui vaaia o lo tatou Tama Faalelagi ma ou te umia le perisitua lea e galue ai o Ia e ala ia te au; e le mafai ona ou faamaasiasiina au i le faia lea o ni mea e le tatau ona ou faia, ona o la’u mafutaga ma le perisitua a le Atua.”. . . .

Uso e, o loo matou faamoemoe ia te outou e tauavea le fu’a o le perisitua paia a le Atua. . . .Ia tumau i o tatou mata le taua e faavavau o mea, ma le manatu tasi i le mamalu o le Atua, ma faapea ifo le tagata ia te ia lava, “amata atu nei, ma le fesoasoani mai o le Atua, o le a ou le auai i soo se gaoioiga vagana o lea gaoioiga e fesoasoani e uunaia au agai i luma i le sini o le olaga e faavavau, seia oo mai le taimi ou te toe foi atu ai i le maota o lo’u Tama Faalelagi.”<sup>14</sup>

Uso e, o le perisitua, pe a valaauina outou i se tofiga, outou tama i totonu o aiga, o loo ia te outou le aia tatau e maua ai faamanuiaga o le perisitua, ma o loo i ai ia te outou le aia tatau e maua ai faaaliga o le Agaga e taitai ma faasino ai oe pe afai o loo e ola ina ia mafai ona tatalaina mai e le Alii pupuni o le lagi mo outou ma tuuina atu ia te outou taitaiga e tusa ai ma le valaauga patino ua tofia i ai outou. Uso e, ina ia maua e outou na mea, e ao ona outou ola e tusa ai mo ia mea. E tatau ona outou agavaa.<sup>15</sup>

Ia manatua na folafolaga ofoofogia a le Alii mo outou pe afai o le a faatumuina outou i le alofa i tagata uma ma “teuteuina ou manatu i le mama e le aunoa; ona malosi ai lea o lou faatuatua fai ifo i luma o le Atua; ma toto ifo i lou agaga le mataupu faavae o le perisitua e pei o le sau mai le lagi.

“E avea le Agaga Paia ma au aumea tumau, ao lou tootoo ma tootoo le feliiuiuai o le amiotonu ma le upumoni; o lou malo foi



o le a faia ma malo e faavavau, e aunoa foi ma faiga faamalosi o le a tafe ia te oe e faavavau faavavau lava.” (MFF 121:45–46.)

O na upu musuia e mai le Alii, ma ua ou toe tautalagia e fai ma faamanatu ia te outou taitoatasi i a outou matafaioi o e ua umia le perisitua ma faamanuiga sili o le a outou maua pe afai e faalautele o outou valaauga o auauna a le Atua Silisili Ese.<sup>16</sup>

---

**E faapefea ona faamanuiaina tagata uma o le Ekalesia pe a auauna i le amiotonu i latou o e umia le perisitua?**

O i latou o umia le perisitua o leoleo moni i luga o olo o Siona. O outou o i latou ia ua faatulaga e pulefaamalumu i soo se paranesi o le Ekalesia ma ia mataalia mo mea matautia o loo osofaia ai le lalolagi, o fili vaaia ma fili le vaaia. O outou o se vaega itiiti o i latou o umia le perisitua ua fai ma leoleo mamoe o le lafu, o lafu mamoe o tagata o le Ekalesia i soo se mea. O a outou matafaioi e tele. E tatau ona outou faaumea mai tagata fou faatoa o mai i le Ekalesia; saili i latou o loo saili ma le faamaoni i le mea moni ma faailoa atu i latou i faifeautalai; ia mafau-fau e le aunoa i manaoga o e ua matua oti ma fafine ua oti a latou tane. Aemaise lava, ia faia lea mea ma ia le pisia mai outou i le lalolagi, e pei ona fai mai ai le aposetolo o Iakopo, o le “amio-atua ma le faamaoni i luma o le Atua.” (Iakopo 1:27.) E ao ona outou vaai ua le faateteleina le amioleaga ma ia vaai o i ai se nautaitaiga i tagata uma e malolosi i le Ekalesia. E tatau ona outou aoao atu mataupu faavae moni ina ia iloa e tagata o le ekalesia, taitai, ma faiaoga ona pulea i latou lava. . . .

O outou o e o loo pulefaamalumu ua tuuina atu ia te outou le matafaioi i le lafu, poo le paranesi, itu, uarota, poo siteki o loo outou pulefaamalumu ai. E ao ona avea outou e pei o tamā, e aoaoina e lē aunoa ma le faaeteete tamā e uiga i le tiutetauave o le tausia lelei ma aoao o latou lava aiga ma faalautele atu i latou lava e pei ona valaauina ai i tiutetauave eseese i le Ekalesia, e fai ma puipuiga o le faatuatua.<sup>17</sup>

O le malosiaga moni lava o lenei ekalesia o loo taoto i totonu o le mana ma le pule o le perisitua paia ua tuuina mai e lo tatou Tama Faalelagi ia i tatou i lenei aso. Afai tatou te faaogaina tonu lea mana ma faalautele o tatou valaauga i le perisitua, o le a tatou

vaaia le alualu i luma o le galuega a faifeautalai, o le a totogi le sefuluai, o le a olaola le fuafuaga o le uelefea, o le a malu pui-puia o tatou aiga, ma o le a malu pui-puia le ola mama o tupu-laga talavou a Isaraelu.<sup>18</sup>

I nai tausaga ua mavae sa ou alu ai i le konafesi a se siteki i le mea o loo tu ai le Malumalu o Manti i le itu i Saute o Iuta. O se po pogisa, ma matagi ma sa to'a le kiona. Ina ua tuua a matou fonotaga ma malaga atu i le fale o le peresitene o le siteki, sa tu le matou taavale ma matou tilotilo atu i luga o le malumalu o loo tu mai i luga o se mauga. Ao matou nonofo ma le ofo i le vaaiga matagofie o le malamalama o lena malumalu i le to'a o le kiona ma le pogisa o le po, sa fai mai le tala a le peresitene sa ou manatu e taua tele. Sa ia faapea mai, "O lena malumalu, susulu pei ona i ai, e le sili atu lona matagofie nai lo le taimi o se afa poo le mafiafia foi o le puao." Ia malamalama i le taua o lena manatu, e mafai ona ou faapea atu e leai se taimi e taua tele ai le talalelei a Iesu Keriso ia te oe nai lo le taimi o afa poo le taimi ua e feagai ai ma ni faafitauli faigata. E leai se mea e sili ona taua ai le mana o le perisitua o loo outou umia, nai lo le taimi e i ai se toatuga i lou aiga, se mai tigaina, poo ni faaiuga ogaoga e tatau ona faia, pe afai e oo mai ni lologa, poo se afi, poo se ituaiga oge. O loo i ai i le mana o le perisitua, le mana lea o le Atua Silisili Ese, le mana e faatino ai vavega pe a finagalo i ai le Alii, ae peitai ina ia mafai ona tatou faaoga lena perisitua, e tatau ona tatou agavaa e faaogaina. O le lē malamalama i lenei mataupu faavae, o le lē mauaina foi lea o faamanuiaga o le umiaina o lena perisitua sili.

## **Fautuaga mo Suesuega ma Talanoaga**

---

- E faapefea ona fesoasoani le perisitua ia i tatou e "toe maua lo tatou ala i lo tatou aiga" i lo tatou Tama Faalelagi?
- Aisea e taua ai i e o umia le perisitua ona manatua o le perisitua e ao ona faaoga e laveai ai agaga ma auauna ai ia i latou o loo manaomia le fesoasoani? I le tala o loo faamauina i le Galuega 3:1–9, sa faapefea ona faatulaga e Peteru ma Ioane se faataitaiga o le faaogaina i le amiotonu o le mana o le perisitua?

- O le a se mea tatou te aoaoina mai i le Mataupu Faavae ma Feagaiga 121:41–44 e uiga i le ala e faaaogaina ai le perisitua e i latou o umia le perisitua?
- Aisea e tatau ai i e o umia le perisitua ona amiotonu pe afai latou te tuuina atu auunaga faamaoni faaleperisitua? E tusa ai ma le saunoaga a Peresitene Lee, o le a le faasalaga o le faaao-gaina ma le amioletonu o le perisitua?
- E tusa ai o se tasi o umia le perisitua, e faapefea ona fesoasoani le iloa o loo e iai i le feau a le Alii i le faalauteleina o lou vala-auga faaleperisitua?
- E faapefea ona fesoasoani tuafafine i le perisitua mo le faalau-teleina o o latou valaauga faaleperisitua?
- O a ni ala patino sa faamanuiaina ai lou olaga e ala i le mana o le perisitua?

### *Faamatalaga*

1. *Be Loyal to the Royal within You*, Brigham Young University Speeches of the Year (20 Oke. 1957), 1–2.
2. *Stand Ye in Holy Places* (1974), 251–52.
3. I le Conference Report, Konafesi Faaeria i Munich Siamani 1973, 8.
4. *Decisions for Successful Living* (1973), 123.
5. Laugaina i le Mutuale (MIA), 1948, Matagaluega o Faamaumauga o Talafaasolopito, O le Ekalesia a Iesu Keriso o le Au Paia o Aso e Gata Ai, 2.
6. I le Conference Report, Oke. 1972, 64; po o le *Liabona*, Aok. 1973, 63.
7. *Stand Ye in Holy Places*, 253–55.
8. *The Teachings of Harold B. Lee*, ed. Clyde J. Williams (1996), 481.
9. *Stand Ye in Holy Places*, 255.
10. I le Conference Report, Ape. 1973, 129; po o le *Liabona*, Iulai 1973, 98.
11. *The Teachings of Harold B. Lee*, 487–88.
12. *The Teachings of Harold B. Lee*, 487.
13. *The Teachings of Harold B. Lee*, 501.
14. In Conference Report, Oke. 1973, 115, 120; poo le *Ensign*, Ian. 1974, 97, 100–101.
15. *The Teachings of Harold B. Lee*, 488.
16. *Stand Ye in Holy Places*, 256–57.
17. I le Conference Report, Konafesi Faaeria Munich Siamani 1973, 68.
18. *The Teachings of Harold B. Lee*, 486–87.
19. *The Teachings of Harold B. Lee*, 488.



# O Oa e Lē Mafaatauina o le Malumalu Paia

*E faapefea ona saunia lelei i tatou lava mo le mauaina  
o faamanuiaga o le malumalu ma tuuina atu  
ia faamanuiaga i isi?*

## Faatomuaga

Ia Mati 1956, i le faapaiaga o le Malumalu o Los Angeles i Kalefonia, sa toe faamatalaina ai e Peresitene Harold B. Lee se tala a se tama e uiga i lona atalii ina ua tofia o ia e lele i se misi-ona matautia i le taimi o se taua.

“Sa faapea atu le tama ia te ia, ‘Atalii, sa faapefea ona mafai ona e toe foi saogalemu i le nofoaga e taunuu i ai lou vaalele. . . ?’ Sa tali mai le taulealea, ‘Oi, e faigofie tele, Tama, ou te mulimuli lava i le faailoilo.’ Ae sa toe tuliloa e le tama le fesili i le toe fesili atu, ‘Faapea la ua leiloa le faailoilo ma ua i ai se mea ua faaletonu o lau ualesi lea e faaoga e le avevaalele e lele ai i lona alavaa.’ ‘Oi,’ sa ia faapea mai, ‘O le a faaoga loa lo’u tapasa.’ ‘Ia, faapea la ua faaleagaina le tapasa i se pulufana; ona faapefea lea?’

“Sa [mafaufau loloto] le taulealea ona faapea mai lea, ‘Tama, o le a amata ona lele lau vaalele maualuga ma maualuga e sili atu i ao ma puao ma pefu o le lalolagi seia ou oo atu i se vaega ou te iloa atu ai fetu, ma pe a ou lele i lena maualuga, o le a faatonutonu lo’u alavaa e fetu. O lena faiga e le mafai ona faaletonu ma e mafai lava ona toe maua lo’u ala e toe foi mai ai i lo’u aiga.’”

Sa faaaau le saunoaga a Peresitene Lee: “I lalo nei i le lalolagi i fafo o Lona afioaga paia e i ai mea e mafai ona faatauina i tupe, e i ai foi mea e ta’ua o viiga o tagata ma mea e tatou te finafinau i ai ma tatou mafaufau ifo ua sili ona taua. Ae peitai, [o le malumalu] o le mea lea tatou te feaei ai maualuga e sili atu i ao ma puao o mea o lena lalolagi ma tatou aoao ai e faitau e ala i fetu

faavavau a le Atua se ala o le a taitaiina saogalemu ai i tatou i lo tatou aiga moni.”<sup>1</sup>

## **Aoaoga a Harold B. Lee**

---

### **O a faamanuiaga e mafai ona tatou maua i totonu o le maota o le Alii?**

Tatou te o mai [i le malumalu], pe a ou mafaufau i ai, ina ia maua le atoatoa o faamanuiaga o le perisitua. . .

Ua tatou o mai iinei i lenei Maota Paia e aoao, ia iloa le Atua e pei ona i ai moni o Ia, ma le ala foi e mafai ona tatou mauaina ai e i tatou lava se faaeaga i lona afioaga . . .

O iinei e amata ai ona tatou faataatia maa o le faavae o se aiga faalelagi e faavavau, aua o iinei i lenei Ekalesia o i ai le mana e fusifusia ai mea o le a fusifusia foi i le Lagi.<sup>2</sup>

Ae e tatau ona tatou faailoa atu le mea moni i o tatou tagata uma, o e laiti ma e matutua, o totonu o o tatou malumalu paia o faaeega paia i le malumalu, o le taiala mautinoa lea o le fiafia iinei ma le olaga e faavavau i le lalolagi a sau.<sup>3</sup>

Pe a e ulu atu i se malumalu paia, o le ala lena e te mauaina ai le faaumea faatasi ma le Au Paia i totonu o le malo e faavavau o le Atua, i le mea e le o toe i ai se taimi. I totonu o malumalu o lou Atua e le faaeeina atu ai ia te oe ni measina o oa faalelalolagi, ae o le tamaoaiga o oa o le faavavau e sili atu ona taugata.

O sauniga o le malumalu ua fuafuaina e se Tama Faalelagi potu sa faaali maia nei mea ia i tatou i nei aso mulimuli e fai ma taiala ma se puipuiga i o tatou olaga, ina ia mafai ai e oe ma au ona maua le faaeaga i le malo selesitila, o le mea e afifio ai le Atua ma Keriso.

Talosia ia ia outou finafinau ma le maelega ma ia taitaiina outou e saunia outou lava ia maua nei oa e le mafaataulia i le maota o le Alii.<sup>4</sup>

E lua vasega o faaaliga: E i ai faaaliga e ono taua o faaaliga vaaia, e pei o faaaliga o loo tusia i totonu o le Mataupu Faavae ma Feagaiga ma isi tusi, sa tuuina mai i le lalolagi. Ma e i ai foi faaaliga e tatou te taua o faaaliga le vaaia. O nei faaaliga e faaali mai ma



A o tatou saunia e o atu i le malumalu, e ao ona tatou manatua fautuaga a Peresitene Harold B. Lee: “Tau ia outou o mai iinei ma loto ua faapaiaina, o mata foi ma mafaufau ma loto ua tasi i le Atua ina ia outou lagonaina Lona faatasi mai.”

tuuina mai i na o nofoaga paia lava ua saunia mo le faailoaina mai o sauniga silisili e faasino i le Perisitua Arona ma le Mekisateko, ma o na sauniga o loo i ai i totonu o le maota o le Alii.<sup>5</sup>

I le 1841, sa faaali atu ai e le Alii ia Iosefa Samita “aua ua leai se mea e tasi i le lalolagi e mafai ona sau i ai o Ia ma toefuatai mai ai mea na le iloa ia te outou, po o mea na aveesea e ia, o le atoatoaga lava lea o le perisitua . . .

“Aua ou te loto ina ia faaali atu i lau ekalesia mea ua natia pea a o lei faavaeina le lalolagi, o mea tau le augatupulaga o le atoatoaga o aso.” (MFF 124:28, 41)

O nei faaaliga, ua faagaga ma aoaoina ai na o tagata faamaoni o le Ekalesia i totonu o malumalu paia, ua faamatalaina nei mea ua taua o “mea lilo faale-Atua.” Sa fetalai mai le Alii ua Ia tuuina atu ia Iosefa “ki o mea lilo, atoa ma faaaliga ua faamau-faailogaina. . .” (MFF 28:7.) E fai ma tau i e faamaoni, ua folafola mai e le Alii: “Ou te faaaliga foi ia te i latou mea lilo uma, ioe, o mea lilo uma sa natia o lou malo talu mai aso anamua. . . .” (MFF 76:7). . .

I tusitusiga a le Perofeta o Iosefa Samita o loo maua ai se faamalamalama o nei mea ua taua o mea lilo e aofia ai mea sa saunoa i ai le Perofeta faapea o faaeega paia. Sa ia faapea mai i se vaega:

“Sa ou faaluina le aso i le vaega i luga o le faleoloa, o lo’u ofisa patino lene . . . i se fono ma [ona ia ta’ua lea o igoa o le tele o uluai taitai], ma aoaoina i latou i mataupu faavae ma faatula-gaga o le Perisitua, ma faamamafa i o latou mafaufau mulumu-luga, faauuga, faaeega paia ma le fesootaiga o ki e faatatau i le Perisitua Arona, ma faasolo ai lava seia oo i le faatulagaga maua-luga o le Perisitua Mekisateko, ma tuu atu ai le faatulagaga e faatatau i Aso mai Anamua, ma fuafuaga uma ma mataupu faavae e mafai ai e soo se tasi ona faamautuina le atoatoa o na faamanu-iaga sa saunia mo le Ekalesia a le Ulumatua, ma oo ai ina alu atu ma mafuta i le afioaga o le Elohima i le lalolagi e faavavau.” (*Teachings of the Prophet Joseph Smith*, p. 237.)

O Peresitene Polika Iaga, i le faataatiaina o le maatulimanu mo le Malumalu i Sate Leki, sa ia faaopoopo mai ai le isi nei mala-

malamaaga i le uiga o le faaeega paia ma le faamoemoega o le fausia o malumalu e faatatau i ai:

“. . . O lou faaeega paia, o le mauaina lea o na sauniga uma i totonu o le maota o le Alii, ia e tatau mo oe, pe a e tea atu ma lenei olaga, ina ia mafai ai ona e toe savali atu i le afioaga o le Tama, e pasi atu i agelu o tutu o ni leoleo, . . . ma maua ou faaeega e faavavau ae lē o le lalolagi ma seoli.” [*Discourses of Brigham Young*, sel. John A. Widtsoe (1954), 416.]<sup>6</sup>

---

**E mafai faapefea ona tatou auauna atu e pei o ni  
“faaola i le Mauga o Siona” mo i latou ua maliliu?**

Afai o le taliaina o le talalelei e matua taua tele mo le sologa lelei o le agaga e faavavau o le tagata, ua alagatatau foi la ona fesili ifo poo le a le mea e tupu i le miliona ma miliona o i latou ua maliliu e aunoa ma le malamalama i le talalelei po o le fuafuaga a le Alii, lea e ono faaalua ai aafiaga atoa o le togiola. Afai o le galuega a faifeautalai e gata lava i le olaga faaletino, o le a toatele agaga o le a faasalaina e aunoa ma le faalogo. O tagata uma, pe lelei pe leaga, o le a toe tutu, ona o le togiola. “Aua faapei ona oti uma ia Atamu, ua faapea foi ona faaolaina uma ia Keriso.” (1 Kori 15:22.) Ae ua na o i latou lava e salamo ma ua papatiso mo le faamagaloina o a latou agasala o le a atoatoa lo latou aia i le toto faaola o lana togiola. . . . O le Papatisoga i le faatofuina mo le faamagaloina o agasala, ua na o le pau lea o le ala e mafai ai e le tagata ona talia le talalelei, o se sauniga e faia i le lalolagi nei, ma o le Ata o le Faaolataga, ua saunia ai e lo tatou Tama i lona finagalo e laugatasia ai ana fanau uma, se ala mo tagata uma o lana Ekalesia ma lona Malo i le lalolagi e fai ma “faaola i luga o Mauga o Siona,” e ala lea i le faatinoina o galuega e fai ma sui mo i latou i le lalolagi o agaga, “le falepuipui,” ua le mafai ona latou faatinoina nei galuega mo i latou lava

O lenei galuega mo e ua maliliu lea e faatinoina i totonu o malumalu paia e tagata o le Ekalesia, e avea moni ai i latou e faia nei galuega ma “faaola” ia i latou ua maliliu ae le i maua se malamalama i le talalelei, ina ia mafai ai e latou ona maua le meaalofa atoatoa a le Faaola sa folafola atu i tagata uma e ala i



lana togiola. E faasino i lena auaunaga e mafai ona tuuina atu ia i latou i le lalolagi o agaga, e pei foi ona le fesiligia sa faatinoina e le au paia i aso o le Aposetolo o Paulo ma o lea e mafai ai foi ona tatou faatinoina mo o tatou tagata maliliu, sa tuuina mai e ia e talu atu ai e avea ma faamaoniga o le toetu. Sa ia faapea mai: “A faapea, pe faapefea e ua papatisoina ma sui o e ua oti? Afai e moni, e le toe tutu e ua oti, ona o le a ea ua papatisoina ai i latou ma sui o e ua oti?” (1 Korinito 15:29.) Ua fausia malumalu i nei aso ina ia mafai ai ona toe faatino nei galuega sili ona taua mo le galuega o le faaolataga.<sup>7</sup>

[O le Alii] sa fetalai mai o faitotoa o seoli o le a le mafai ona manumalo i le ekalesia a Keriso (Mataio 16:18). O lenei, o faitotoa o seoli e ono mafai ona manumalo i le galuega a le Alii pe ana le tuuina mai sauniga e faatatau i le faaolataga o i latou ua maliliu. I na vaitaimi ao lei i ai le perisitua e faatino ai sauniga faaola o le talalelei i le lalolagi, e faitau miliona i latou sa soifua, o le toatele o i latou o ni agaga faamaoni. A na faapea e leai se ala e faatinoina ai sauniga faaola o le talalelei mo i latou ua maliliu e aunoa ma le malamalama o le talalelei, semanu e manumalo faitotoa o seoli i le fuafuaga a le Tama mo le faaolataga.<sup>8</sup>

[I a tatou galuega o le sailia o gafa] o le a le tatalaina e le Alii se faitotoa seiloga tatou te faia mea uma tatou te mafaia. E tatau ona tatou agai atu i lena papupuni avanoa ona tatau lea ona lava lo tatou faatuatua e fesili atu ai i le Alii e fesoasoani e faamatala mai se avanoa ina ia tatou laasia le isi laasaga. Ma e mafai ona i ai faamatalaga e tuuina atu ia te oe mai sosia e faaalua ai le mea moni, e lē o mamao lava le lagi ma le lalolagi.

O le toatele o outou ua ola i se taimi o lenei olaga sa i ai nisi o e pele ia te outou ua maliliu. Sa i ai ia te outou le mautinoa o le latalata mai, i nisi taimi, o i latou o taumafai e faalatalata mai ia te outou. Ma o nisi taimi latou te aumaia ia te outou ni faamatalaga e le mafai ona outou maua mai i se isi lava ala.<sup>9</sup>

O i ai ia te au se molimau maumaututu sa afua mai i se mea itiiti na tupu lea ou te molimau atu ai e i ai malosiaga i tua atu o lenei olaga o loo galulue faatasi ma i tatou. . . .

E i ai ia te au le faatuatua faatauvaa afai e te faia mea uma e te mafaia, sailia e oo i lou avanoa mulimuli, o le a fesoasoani le

Alii ia te oe e tatala faitotoa ma e saga agai ai pea i luma i le faiga o ou gafa, ma o le a fesoasoani mai le lagi, ma ou te maunoina lena mea.<sup>10</sup>

Afai o le a tatou tutu faatasi i a tatou galuega o le malumalu ma a tatou galuega o le sailia o gafa, o le a le faamalieina i tatou i malumalu ua i ai nei, ae o le a lava galuega mo malumalu o le a fausia, e oo i le tatalaina o faitotoa o avanoa mo i tagata o o tatou aiga i le lalolagi o agaga, ma faapea ai ona avea i tatou ma faaola i luga o Mauga o Siona. O lo tatou toilalo e tutu faatasi o le tatou toilalo foi lea e faaauau o tatou aiga i le faavavau.<sup>11</sup>

---

**E mafai faapefea ona saunia lelei i tatou lava  
e auai i faamanuiaga o le malumalu?**

I le faia o galuega e fai ma sui o e ua oti e i latou o faaola i luga o Mauga o Siona, e finagalo le Alii i nei galuega ia faia i le latalata e mafai ai e i latou e leai se pona. E faapei ona ia finagalo i tau-laga manu ia sa osia i manu e lē pona, e finagalo foi o ia ia tatou o mai iinei ma le mama ma ia agavaa e faia le galuega, le galuega e fai ma sui, i le avea ai lea ma faaola i luga o Mauga o Siona.

Ma ua matou fautuaina o tatou epikopo ma o tatou peresitene o siteki ina ia matua faaeteete i le sauniaina o o latou tagata ina ia sauniuni mo le mauaina o se pepa faataga o le malumalu ma aua nei faatagaina i latou e le i salamo i a latou agasala e o mai iinei, o i latou ua faia mea sese, [ia lē] o mai foi iinei a o le'i salamo, aua o le faia o lenei mea o le a faaleagaina ai le maota paia. Ou te manatu o le a leai se seoli e sili atu le leaga i le lalolagi nai lo se tasi e sau iinei i le afioaga o lo tatou Tama ma se lagona o le nofosala ma o i ai pea i luga o lena tagata le le mama. O se aafiaga faatamaia ma le faataumaoui lena.<sup>12</sup>

Atonu o le nofoaga paia sili o loo i ai i le fogaeleele e aupito latalata i le lagi o lo tatou malumalu lea, i le tulaga o le tatou ulu-fale atu i ai ma le le eleelea ma le tulaga o le faia e o tatou epikopo ma peresitene o siteki o se suesuega lelei o i latou uma e talosaga mo se pepa faataga, ina ia iloa ai i le mamao e mafai ai, o loo latou ola i tulaga patino faatonuina [ina ia latou le o mai] i ai ma ni tulaga lē mama e ono faaleagaina ai le agaga lea tatou te mananao ia i ai iina.

Ia manatua nei lena mea. Manatua o o tatou matafaioi paia ma lo tatou faamoemoe ia mafai e i tatou lava ona amata mauintinoa o taimi uma tatou te o ai [i le malumalu], tatou te o ma lima mama ma loto mama ma ia tatou aoao atu ia mea i isi. [Tagai Salamo 24:3- -4.]<sup>13</sup>

O loo i ai ia i tatou nisi ua mananao e o i le malumalu ina ua faatoa maea ona papatiso. Ua leva ona i ai lenei tulafono tumau. . . e faapea e tatau ona *le itiiti ifo* i se tausaga . . . .O le mafuaaga o le matou fai atu ia le itiiti ifo ma se tausaga o le faamoemoe lea ia faatalanoaina lelei e epikopo ma peresitene o siteki ia mauintinoa ua lava se taimi ua latou i ai i le Ekalesia e malamalama lelei ai i muai mataupu faavae o le Ekalesia, ma ua latou iloa aoaoga faavae o le Ekalesia ae tatou te lei faamoemoe ia latou malamalama i sauniga mauualuluga, o sauniga ia o le malumalu. O fesili la mo i latou o loo o atu i le malumalu ia le gata mo le agavaa ae faapea foi le saunia e maua sauniga o le malumalu.<sup>14</sup>

O le mauaina o faaeega paia e manaomia ai le taliaina o matafaioi e ala i feagaiga,, i se tulaga moni lava o le faatinoina lea po o le tatalaina o feagaiga ia e tatau i tagata taitoatasi ona tauaveina i le taimi o le papatisoga, e pei ona faamalamalama mai e le perofeta o Alema “ua outou fia o mai i le lafu mamoe a le Atua, ma ia ta’ua o lona nuu, ma ua loto ina fesui i a outou avega e ave ina ia mama ai; Ioe, ma ua loto ina faanoanoa faatasi ma e faanoanoa; ioe, ma faamafanafana i e ua tatau i ai le faamafanafanaga, ma laulaututu e fai ma molimau a le Atua i aso uma, ma mea uma, atoa ma nuu uma tou te i ai e oo lava i le oti” (Mosaea 18:8- -9). Soo se [tagata] ua saunia e maua na tautinoga e pei ona faailoa mai e Alema ma “faamaualalo i latou lava i luma o le Atua. . . .ma o mai ma le loto momomo ma le agaga salamo,. . . ma ua loto malilie e ave i o latou luga le suafa o Iesu Keriso, ma naunautai e auauna atu ia te ia e oo i le iuga” (MFF 20:37), e le manaomia lo latou faatua i e o atu i se malumalu paia ma mauaina ai, e tusa ai ma feagaiga ua latou osia, folafolaga o faamanu-iaga silisili ia e faalagolago i le tausaiaina o na feagaiga.<sup>15</sup>

E tatau faapefea ona saunia i tatou [e o mai i le malumalu]? Sa tusia e se vane faatagata i luga o faitotoa o le Malumalu i

Cardston Alberta, se tautinoga ma se manatu na tusia e Elder Orson F. Whitney e ao ona tatou manatua pea. Sa ia tusia:

“E tatau ona mama loto e o mai i totonu o nei puipui,  
 Ua saunia ai se taumafataga e le’i vaaia i mea e fai ai faigā taumafa.  
 Taumafa saoloto, auā ua tuuina fua mai e le Atua o tausami,  
 Ma tofo ai i olioliga paia ua tala mai e le lagi.  
 Aoao iinei e uiga ia te Ia o lē ua manumalo i le tuugamau,  
 Ma ua tuuina mai i tagata ki o le Malo e faavavau;  
 E maua e ē o ola ma ē ua maliliu le atoatoa iinei,  
 Ma tuu faatasia ai e mana, e fusia ai ananafi ma le taimi nei.

Sa maua e Peresitene Iosefa F. Samita le uiga o lena atoatoa ina ua ia saunoa mai: “E le faigofie i tagata ona tuu ese o latou moomooga soona fai, ina ia faatoilalo ai o latou lagona faivavale, ma tuuina atu i latou lava ma o latou loto ma agaga atoatoa i le finagalo o le Atua lea e maua atu nai lo i latou e lē aunoa. . . Pe afai e iloa e alii ma tamaitai o loo latou agai atu i le loloto o le vai ma iu ai ina le saogalemu le mea e tutu ai, e ao ona latou toe foi, aua e mautinoa o le ala o loo latou ui ai o le a taitai ese ai i latou ma aveese mamao mai ai mai le ala sao ma o le a le faigofie ona toe maua. O le talitonuga o le agaga, o le fesootaiga masani e ao ona tatou faia ma le Atua, o le tulaga maua atu o le puipuiga saogalemu o le Au Paia o Aso e Gata Ai.” (*Gospel Doctrine*, p. 9.) . . .

O lenei, faatasi ai ma lena mafaufauga loloto . . . ua ou lagona ai ou te fia tuuina atu lau molimau ia te outou e ala i se mea sa tupu. Na o le fa vaiaso talu ai i itula sesegi o le taeao sa ou faia ai se miti matagofie tele. I lena miti sa foliga mai ai sa ou i ai i le faapotopotoga a le usoga ma sa aoaoina ai e le Peresitene o le Ekalesia, ma a o i ai ma isi i lena potopotoga, sa foliga mai o mea uma lava sa ia saunoa i ai e faatatau lava mo au, . . . Sa toe oo mai lena miti ia te au i le asō—sa toe foi mai ia te au ma le manino ma sa lofituina ai au, ma o le savali lenei: “Afai e te manao e te aoao e alofa i le Atua, e tatau ona e aoao e alofa i Lana fanau ma fiafia e auauna atu i Lana fanau. E leai se tasi e alofa i le Atua sei vagana ua fiafia e tautua pe auauna atu, ma sei iloga e alofa i le fanau a lo tatou Tama Faalelagi.”

Ma sa foliga mai ina ua uma ona aoaoina mai lena lesona e le Peresitene, sa matua mamafa i lou mafaufau, sa ia faapea mai, “Uso e, tatou tootutuli i le tatalo.” Ma sa ou ala ina ua uma ona ia tatalo, ma le lagona sili faalelagi faatoa oo ia te au, ma mafaufau pe mafai ona ou faaaauu seia mafai ona ou taunuu i le tulaga maualuga o le fiafia e tautua ma auauna atu ma le alofa mo le fanau a le Alii lea sa faamamafaina [i ou luga] i lena lava miti.<sup>16</sup>

Faafetai i le Atua mo le faaaliga e ala mai i le mana o le Agaga Paia, lea na te molimauina i lo’u agaga ua ou iloa ma lo’u loto atoatoa o loo soifua [le Alii], ma o Ia o le Faaola o le lalolagi. Ou te iloa o le [malumalu] o se nofoaga paia ua faapaiaina, e mafai ai ona ia tuuina i ai Lona ao ona o le paia. Talosia ia outou e o mai iinei, ia o mai ma loto ua faapaiaina, ma mata ma mafaufau ma loto ua tasi i le Atua ina ia outou lagona ai Lona faatasi mai.<sup>17</sup>

## Fautuaga mo Suesuega ma Talanoaga

---

- O a ni auala e avea ai le malumalu ma “se taiala ma se puipuiga” ia te oe?
- Pe faapefea ona e faatusatusaina oa o le lalolagi ma oa o le faavavau e maua i totonu o le malumalu?
- Aisea e taua ai ona tatou auai e le aunoa i tapuaiga i totonu o le malumalu?
- O a ni faamanuiaga ua e maua ona o le faia o galuega o le malumalu ma talafaasolopito o aiga?
- Aisea e tatau ai ona tatou o mai i le maota o le Alii ma lima mama ma loto mama? E ese mai i le agavaa, o a nisi o auala e mafai ai ona tatou saunia e o atu i le malumalu?
- Aisea e avea ai le aoao ia fiafia e tautua ma auauna atu i isi o se sauniuniga taua mo le auai i faamanuiaga o le malumalu?

### *Faamatalaga*

- |  |  |
|--|--|
| <ol style="list-style-type: none"> <li>1. <i>The Teachings of Harold B. Lee</i>, ed. Clyde J. Williams (1996), 573.</li> <li>2. auniga o le faapaiaiga o le Malumalu i Los Angeles Kalefonia, Mati. 1956, Matagaluega o Faamaumauga o</li> </ol> | <p>Talafaasolopito, O le Ekalesia a Iesu Keriso o le Au Paia o Aso e Gata Ai, 159–61.</p> <ol style="list-style-type: none"> <li>3. <i>The Teachings of Harold B. Lee</i>, 578.</li> <li>4. <i>The Teachings of Harold B. Lee</i>, 582.</li> </ol> |
|--|--|

5. *The Teachings of Harold B. Lee*, 577–78.
6. *Ye Are the Lights of the World* (1974), 210–11.
7. *Decisions for Successful Living* (1973), 118–19; palakalafa faaopopo.
8. *The Teachings of Harold B. Lee*, 570.
9. *The Teachings of Harold B. Lee*, 584.
10. *The Teachings of Harold B. Lee*, 585.
11. *The Teachings of Harold B. Lee*, 584.
12. *The Teachings of Harold B. Lee*, 581.
13. *The Teachings of Harold B. Lee*, 581.
14. *The Teachings of Harold B. Lee*, 578–79.
15. *The Teachings of Harold B. Lee*, 574.
16. auniga o le faapaiaga o le Malumalu i Los Angeles Kalefonia, 161–63.
17. *The Teachings of Harold B. Lee*, 580.



# O le Faamoemoega Paia o le Faaipoipoga

*O le a se mea e mafai ona tatou faia e faamalololia  
ai faaipoipoga e faavavau ma saunia ai tupulaga  
talavou e faaipoipo i totonu o le malumalu?*

## Faatomuaga

Sa aoao mai e Peresitene Harold B. Lee le taua tele o le faaipoipo i totonu o le malumalu ma le galulue faatasi o tane ma ava i le olaga atoa e faamalololia a latou faaipoipoga:

“O le faaipoipoga o se paaga. Sa maitauina e se tasi le tala i totonu o le Tusi Paia e uiga i le foafoaga o le fafine sa le fausia mai i se vaega o le ulu o le tane, o se manatu ina nei pule le fafine i le tane, sa le fausia foi o ia i lona vae ina nei solia le fafine i vae o le tane. O le fafine sa aumaia i le itu o le tane e peiseai e faamamafa mai ai le mea moni e tatau ona i ai o ia i lona itu o se paga ma se soa. I le fata faitaulaga e fai ai faaipoipoga e tautino atu ai e le tasi i le isi, e amata atu i lena aso o le a galulue faatasi oulua i le foiaina o faafitauli o le olaga. Sa apoapoi mai le Aposetolo o Paulo e faatatau i le faaipoipoga: ‘Aua tou te amo faalegatasi ma e le talitonu.’ (II Kor. 6:14.) E ui o lana apoapoaiga e faatatau tonu i tulaga e aofia ai le tutusa o manaoga faalelotu ma faanaunauga faaleagaga, ae o le faatusatusaga o loo tau mai e lana faamatalaga ia aua nei faagaloina. E faapei o le amo a asini e tosoina se avega i le ala, afai e tagito’ia se tasi, ua faavai-vai ma ua faapaie ma faifaiaga pe sau ma loto ma’a’a, o le a malepe le avega ma o le a mulimuli mai ai le faafanoga. O pogai lava nei e tasi, e lepetia ai isi faaipoipoga pe afai o se tasi o i laua po o i laua uma foi o vaega o lena faaipoipoga ua toilalo i le faa-taunuina o o laua tiutetauave o le tasi i le isi. . . .

“Ae o le mea aupito sili atu ona taua nai le faapea ia “amo faagatasi” i tulaga faaletino, ia lua amo faagatasi i tulaga faaleagaga. . . . O le mea mautinoa o soo se aiga e faavae ma le faamoemoe e galueaiina i latou e oo atu i le faavavau ma avea ma nofoaga e faafeiloaia tamaiti e pei o ‘tofi mai ia Ieova [Alii]’ [Salamo 127:3] e i ai ni avanoa sili atu e faasaoina ai ona o le paia lea e i ai i le aiga.”<sup>1</sup>

## **Aoaoga a Harold B. Lee**

---

### **Aisea e taua ai le faaipoipoga e faavavau mo lo tatou faaeaga?**

Sei o tatou mafaufau i le uluai faaipoipoga sa faatino ina ua uma ona fausia le lalolagi, o Atamu, le uluai tagata, sa fausia e pei lava o manu vaefa ma manu felelei ma meaola uma i le lalolagi. Ona tatou maua lea o le famaumauga lenesi: “E le lelei ona mau toatasi o le tagata; ou te faia sona fesoasoani e tatau ma ia.” Ina ua maea ona fausia e le Alii Eva, sa ia “aumaia o ia i a Atamu. Ona faapea ai lea o Atamu, O le ivi lava o ou ivi ma le aano o ou aano; e taua o ia o le fafine, aua na toina atu o ia ai le tane. O le mea lea e tuua ai e le tane lona tama ma lona tina, ae faatasi ma lana ava; ona avea ai lea o i laua ma tino e tasi.” (Kenese 2:18, 22-24) . . . . I le faataunuaina o lena faaipoipoga sa poloai atu le Alii ia i laua ia “fanafanau, ma uluola, ma ia tumu ai le lalolagi, ia faatoilalo i ai. “ (Kenese 1:28)

O lea faaipoipoga na faia e le Alii i le va o ni tagata e tino ola pea, ma e le oo le oti i o la’ua tino sei vagana ua oo mai le agasala i le lalolagi. Sa ia faia i laua ia tasi, ua le gata i le mo le taimi nei, e le faatapulaaina foi se taimi patino; ae ina ia tasi e oo i tausaga o le faavavau. . . . O le oti ia te i laua e le o se teteaga; ua na o se tuueseeseina lē tumau. O le toetu i le tino ola pea o lona uiga ia te i laua o se faatasiga ma se fusi e faavavau e le mafai ona toe vavaeina, “Aua faapei ona oti uma ia Atamu, e faapea foi ona faaolaina uma ia Keriso.” (I Korinito 15:22.)

Afai e te mulimuli ma le faaeteete i le faamalamalamaina o le uluai faaipoipoga, ua e saunia foi e malamalama i le faaaliga sa tuuina atu i le Ekalesia i lo tatou augatupulaga i upu nei:



“Afai e faaiipoipo le tane i lana ava i la’u upu, o la’u tulafono lea, ma i le faaaliga fou ma le faavavau, ma ua faamaufaailogaina ai ia i laua e le Agaga Paia o le folafolaga, e le ua faauuina, ua ou tofia i lenei mana ma ki o lenei perisitua . . . , o le a faia ia te i laua mea uma ua tuuina atu e la’u auauana i o laua luga, i lenei olaga, e oo lava i le faavavau; o le a faataunuina atoatoa foi pe a o ese atu i laua mai le lalolagi; e ui atu foi i laua i tala ane o agelu, ma atua, ua faatuina i lea mea e oo i lo laua faaeaga ma le mamalu i mea uma, e pei ona faamaufaailogaina i luga o o laua ulu.” (Mataupu Faavae ma Feagaiga 132. 19.) . . .

O le faaiipoipoga mo le olaga nei ma le faavavau o le faitotoa vaapiapi ma le ala lauitiiti (e pei ona taua i tusitusiga paia) “e tau atu i le faaeaina ma le uluola pea lava pea o olaga, e toaitiiti foi e maua ai, “ae” e va tele le faitotoa, ma lautele le ala e tau atu i oti; e toatele foi e ui atu i ai.” (Mataupu Faavae ma Feagaiga 132:22, 25.) Afai e tauanau oe e Satani ma ana au e ui i le ala vatele o le faaiipoipoga faalelalolagi lea e faamuta i le oti, ua ia faafaianaina oe i lou avanoa mo le tikeri pito i maualuga o le fiafia e faavavau e ala i le faaiipoipoga ma uluola ai i le faavavau atoa . Ua tatau nei ona manino ia te outou le mafuaaga na folafola mai ai e le Alii ina ia maua le tikeri pito i luga i le mamalu Selesitila, o se tasi e ao ona ulu atu i le feagaiga fou ma le faavavau. Afai foi na te le fai faapea na te le mafai ona maua (Mataupu Faavae ma Feagaiga 131:1–3.)<sup>2</sup>

O i latou e faia i latou ia agavaa ma ulu i totonu o le feagaiga fou ma le faavavau o le faaiipoipoga i totonu o le malumalu mo le olaga nei ma le faavavau atoa o le a latou faataiaina le maa tulimanu muamua mo se aiga e faavavau i le malo selesitila lea e tumau e faavavau. O lo latou tau i le maua lea o le “mamalu e faaopopo atu i luga o o latou ulu e faavavau faavavau lava” (tagai Aperaamo: 3:26).<sup>3</sup>

**O a ni mea e mafai ona faia e tane ma ava e faamalolosia  
ai a latou faaipoipoga faalemalumalu  
i taimi uma o o latou olaga?**

Afai o le a tonu i [tagata talavou] mai le taimi o a latou faaipoipoga, e amata mai i lena taimi ma agai atu ai i luma o le a latou lotomau ma faia mea uma i lo latou mana e faafiafia ai i le tasi i mea e tonu, e oo lava i le ositaulagaina o mea latou te fiafia i ai, o o latou lava tuinanauga, o latou lava manaoga, o le faafitauli o le fetuutuunai i le olaga faaipoipo o le a faaleleia ia lava ma o latou aiga ma o le a mautinoa le fiafia. O le alofa sili e fausia i luga o le tele o osigataulaga, ma o le aiga o le nofoaga lea e faaali atu ai i aso taitasi le mataupu faavae o le ositaulaga mo le lelei o tagata taitoatasi o le aiga lea o loo i ai le alofa sili.<sup>4</sup>

O loo i le lumanai pea le fiafia sili ma, ioe, o i ai foi popolega sili e te lei iloaina, aua ia manatua o le alofa sili e fausia i luga o taulaga sili ma o naunautaiga i aso taitasi mo le isi e fiafia i mea e tonu o le a fausia ai se faavae mautu mo se aiga fiafia. O lena naunautaiga mo le lelei o isi e tataua ona feusia ma aua nei pito tasi pe manatu faapito. O tane ma ava e tataua ona lagona o o la'ua tiutetauave ma matafaioi fai faatasi le aoao e le tasi o le isi. O mea e lua o loo taia ai le malupuipua o aiga fou o tane fou e lē lagonaina le matafaioi atoa o le lagolagoina o se aiga, ma ava fou ua laa ese mai matafaioi taua o le tausiga o se auai ma le atinaeina o se aiga.<sup>5</sup>

O le faaipoipoga ua faatumuina i le fiafia aupito silisili ae o loo aumai ai foi ma ni matafaioi sili ona mamafa lea e mafai ona pau atu i tane ma fafine i le olaga nei. O lagona paia o loo i totonu o tane ma fafine faamaoni taitoatasi, e faaosofia ai mo se mafutaga ma le isi itupa ua fuafuaina e lo tatou Foafua o se lagona paia mo se faamoemoega paia —ae lē ia faamalieina ai na o se manaoga faaletino po o tuinanau o le tino i ni faatasiga e faia ai feusuaiga faatautala, ae e ao ona faaleoleo e avea o se faaaliga o le alofa moni i totonu o tautinoga paia o le faaipoipoga.<sup>6</sup>

Ua tele taimi ou te tautala atu ai i ulugalii laiti i le fata faitaulaga e fai ai faaipoipoga: Aua lava nei lē puleaina o oulua lagona mafana o lo oulua olaga faaulugalii. Ia avea o oulua manatu e pupula e pei o le la susulu. Ia moni a oulu upu ma ia musuia ma faagaetia a oulu fegalegaleaiga faatasi, pe afai o le a oulua faaolaolaina lagona o le alofa o le isi i le tasi i lo oulua olaga faaipoipo faatasi.<sup>7</sup>

O nisi taimi, pe a matou malaga atu i vaega eseese o le Ekalesia, e o mai se tane ma se ava ia i matou ma faapea mai, talu ai ona ua le ogatusa o la lagona i le la faaipoipoga—ae sa faaipoipo i le malumalu—pe lē sili ea pe a faasaoloto mai le tasi i le isi ona toe sailia lea o ni paaga e sili atu ona fetau mo i laua. O i latou uma faapena, matou te faapea atu, o soo se taimi lava e faapea mai ai se ulugalii ua uma ona faaipoipo i le malumalu ua fiu le tasi i le isi, o se faailoga lena e ta’u mai ai e le o faamaoni se tasi po o i la’ua uma foi i a laua feagaiga. Soo se ulugalii ua faaipoipo i le malumalu ma faamaoni i a laua feagaiga o le a atili ona pele le tasi i le isi, ma o le sili atu ona loloto le uiga o le alofa i le taimi e faamanatu ai le limasefulu tausaga o la laua faaipoipoga nai lo le aso sa faaipoipo ai i le maota o le Alii. Ia aua lava nei oulua sese i lena mea.<sup>8</sup>

O i latou e o atu i le fata faitaulaga e fai ai faaipoipoga ma le alofa i o latou loto, e mafai ona matou faapea atu ia te i latou ma le faamaoni, afai latou te faamaoni i feagaiga ua latou osia i le malumalu, e oo atu i le limasefulu tausaga o le laua faaipoipoga o le a mafai ona faapea atu le tasi i le isi: “Atonu ta te lei iloa le uiga o le alofa moni ina ua ta faaipoipo, aua ua sili atu ona faamemelo le tasi i le isi i le aso!” Ma o le a faapea lava pe afai o le a laua mulimuli i fautuaga a o laua taitai ma usitai i faatonuga paia ma le mamalu e tuuina atu i totonu o sauniga o le malumalu; o le a faaatoatoaina lo laua tuputupu ae i le alofa e oo i le atoatoa o le alofa i le afioaga o le Alii lava Ia.<sup>9</sup>

O pona ma toilalo ma le matalasi o nai faatosinaga faaletino ua o se mea noa pe a faatusatusa i le moni aiai o uiga lelei e tumau ma tuputupu ae ma le matagofie faatasi ma tausaga O oe foi, e mafai ona e ola i le tusaafia o lou aiga fiafia tusa lava pe



Sa aoao mai e Peresitene Harold B. Lee o le “alofa sili e fausia i luga o le osigataulaga sili, ma o le aiga o le nofoaga lea o loo faaali atu ai i aso taitasi le mataupu faavae o le ositaulaga mo le lelei o tagata taitoatasi, o le aiga lea o loo i ai se alofa sili.”

ua leva ona mavae atu le olaga talavou pe afai e tau lava ina e saili e maua uiga taua atoatoa e pei o ni taimane i totonu o le isi lea e manaomia ai na o le faaiilaina o le manumalo ma le toilalo, taimi faigata ma le fiafia ina ia aumaia le itu pupula ma le iila lea o le a susulu ma le matagofie naua e oo lava i le po sili ona pogisa.<sup>10</sup>

---

**O le a se fautuaga e tuuina atu ia i latou e le o i ai nei ni a latou faaipoipoga e faavavau?**

O nisi o outou e le o i ai nei ni a outou soa i o outou aiga. O nisi o outou ua oti a outou ava po o tane pe e lei mauaina lava sau soa. I o outou tulaga o loo i ai ni tagata o le Ekalesia sili ona tamalii—faamaoni, loto toa, finafinau e ola i tulafono a le Alii, e fesoasoani e atiae le malo i le lalolagi, ma auauna atu i o outou uso a tagata.

E anoanoai ni mea o loo umia e le olaga mo outou. E manaomia le malosi e manumalo ai i ou luitau. E matua tele ala e maua ai le faamalieleina, i le auauna atu ia i latou o e pele ia te outou, i le faia ia lelei o le galuega o i luma i a outou galuega po o totonu o lou aiga. Ua ofoina atu e le Ekalesia le tele o avanoa mo outou e fesoasoani ai i tagata, e amata atu ia te oe, ia maua le fiafia o le olaga e faavavau.

Aua e te faatagaina lou manatu alofa ia te oe lava po o le faanoanoa e taitaieseina ai oe mai le mea ua e iloa e sa’o. Ia liliu atu lou mafaufau e fesoasoani i isi. E i ai se uiga faapitoa o afioga a le Matai mo oe: “O le maua lona ola, e maumau ai ia te ia; a o le faamaumau i lona ola ona o au, e maua e ia.” (Mataio 10:39.)<sup>11</sup>

E le na o a tatou amioga e faamasino ai i tatou e le Alii ae faapea foi i manatunatuga o o tatou loto. . . . O lea, [o tamaitai] ua faafitia ai faamanuiaga o le avea ma tina i lenei olaga—o i latou ia ua faapea ifo i o latou loto, pe ana mafai ona ou faia, semanu ou te faia, pe faapea mai foi o le a ou tuuina atu pe a na i ai ia te au, ae peitai ou te le mafai aua e le o i ai ia te au—o le a faamaunia oe e le Alii e peiseai sa e faia, ma o le lalolagi a sau o le a toe tauia ai mo i latou o e na moomoo i o latou lava loto mo faa-

manuiaga amiotonu sa le mafai ona latou maua ona e le faapea o latou ua mafua ai.<sup>12</sup>

O outou na fafine [ava] o loo moomoo ia malolosi a outou tane i le Ekalesia, ma talotalo maimau pe ana faapea o loo outou faatasi ai iinei i lenei aso nai lo le lagona ita lea o i ai pea i o latou loto, ma o loo mafaufau pea po o le a se mea e mafai ona e faia ina ia i ai se aso. . . tou te auai faatasi ma i latou i totonu o le malumalu o lo tatou Atua. Ma outou tane o talotalo maimau pe ana o outou i ai faatasi ma a outou ava. Matou te faapea atu ia te outou afai o le a outou faamaoni i o outou faatuatuaga, o le a outou alolofa ia outou tane ma alolofa i a outou ava, ma o le a outou tatalo e le aunoa i le taeao ma le afiafi, o le ao ma le po, o le a oo mai ia te outou o tagata o le Ekalesia e ala i le mana o le Agaga Paia, lea na papatisoina ai outou ma ua faamaoni, se aia tatau e olioli ai. O lena mana ua umia e mafai ai ona e maua le tulaga e gafatia ai ona tineia mea faafatiamai o loo ia outou soa ma taitaiina atu ai i latou i le faatuatuaga.<sup>13</sup>

O nisi o outou atonu e filifili e faaipoipo i fafo atu o le Ekalesia ma le faamoemoega lilo e faaliliu mai a outou soa i o outou taofi faalelotu. O o outou avanoa mo le fiafia i le olaga faaipoipo, e sili atu pe a outou faia lena faaliliuga ae lei faaipoipo.<sup>14</sup>

---

**O le a se mea e mafai ona tatou faia e fesoasoani atu ai  
i le autalavou ia malamalama i faamanuiaga o le  
faaipoipoga faalemalumalu ma sauniuni i ai?**

Ioe, o le manuia o aiga o le Au Paia o Aso e Gata Ai e faalagolago, i le ituaiga faaipoipoga ua faamauina mo lena aiga. O se faaipoipoga mo na o le taimi nei o le a, popole lava tau o mea o lenei olaga. O se faaipoipoga mo le faavavau o le a ese atoa se vaai faalemafaufau ma le faavae. . . .

. . . Ioe, ua tatou iloa o le na o le alu lava i le malumalu e aunoa ma sauniuniga e tatau ai i soo se auala e le maua ai faamanuiaga o loo tatou sailia. O le faaipoipoga faavavau e faalagolago i luga o le faatagata matua ma tautinoga ia e—faatasi ma faaeega paia ma sauniga—e mafai ona tatalaina faitotoa o le lagi mo faamanuiaga e tele e tafe mai ia i tatou.

. . . O le faaipoipoga faalemalumalu e sili atu i le na o se nofoaga e faatino ai; o se aoaoga atoa mo le olaga ma le faaipoipoga ma le aiga. O se taunuuga maualuga o le fausia o uiga faaalua i le Ekalesia, legavia, ma lo tatou va feagai ai ma le Atua—ma isi mea e tele. O lea, o le tau ina lauga atu o le faaipoipoga faalemalumalu e le lava. O a tatou afiafi faaleaiga, seminare, mataupu faalelotu ma ausilali e tatau ona galueaiina agai i lenei sini—e le gata i na o apoapoaiga—ae faapea foi i le faaali atu o talitonuga ma uiga e aofia i le faaipoipoga faalemalumalu e mafai ona aumaia le ituaiga olaga iinei ma le faavavau e sili ona manaomia e tagata mo i latou lava. A faia i le ala tonu, e mafai ona tatou faaalua le eseeseaga i le va o “mea paia ma mea e le paia” [tagai Esekielu 44:23] ina ia maoti lelei lagona malolosi faanatura o le faatina i totonu o le tamaitai talavou o loo faavaeluātai i le va o lagona paia ma le ala e faamalie ai le fiafia. I faamasinoga moni ma taumafaiga soo faatasi e ala i aoaoga e mafai ona tatou faailoa atu ai i alii talavou o le ala o le lalolagi—e ui i le tele o le lalelei faatosina ma le foliga potu mai o tama avi—ae o le ala o le faanoanoa; o le ala mulimuli lenei lea o le a faaleaogaina ai faanau-nauga loloto o i ai ia te ia mo se aiga mo ia lava ma le olioli o le tulaga faatamā.<sup>15</sup>

E ui o faafitauli uma o le olaga e le foia i le faaipoipoga faalemalumalu, ae, o le mea moni, mo i latou uma e ulufale atu ma le agavaa, o le a avea ma sulufaiga o le saogalemu ma se taula i lena agaga pe a pesi tetele mai afa o le olaga. . . .

O au o se aafiaga tamaoaiga, mo le tusa ma le luasefulu tausaga, i le faafiafiaina i faaiuga o vaiaso taitasi i totonu o le tele o aiga faamanuiaina o le Ekalesia, ma, i se eseeseaga, pe tusa o vaiaso taitasi e faatagaina au ou te vaai i nisi o le tele o aiga e le o i ai le fiafia. O nei aafiaga ou te lagona ai i lou lava mafaufau ni faaiuga mautinoa: Muamua, o o tatou aiga sili ona fiafia o aiga ia o i ai matua ua faaipoipo i totonu o le malumalu. Lona lua, o se faaipoipoga faalemalumlau e sili ona faamanuiaina pe afai sa faataunuaina e le tane ma le ava sauniga paia o le malumalu ma le mama o le tino, mafaufau ma le lotu. Lona tolu, o se faaipoipoga faalemalumalu e sili ona paia pe afai sa aoaoina lelei paaga taitasi i le faamoemoega o faaega paia ma tautinoga e mulimuli ai le

tane ma le ava e o gatasi ma faatonuga sa maua i le malumalu. Lona fa, o matua latou te manatu faatauvaa i feagaiga o le malumalu, e mafai ona faamoemoe mo sina lelei sili atu itiiti mai i a latou fanau ona o a latou faaitaiga lē lelei.

I lenei vaitau, o tifica, o le taufaasese, o mea faafoliga, ma le matagofie o le lalolagi ua faaleagaina ai le paia o mataupu o le aiga ma le faaipoipoga, e oo lava i le sauniga o le faaipoipoga lava ia. Amuia se tina poto o loo valiina se ata ola i lana tama teine o se vaaiga paia i le tulaga maoae o le matagofie, o le potu o faamauga faalelagi lea, e tapunia mai i mea faalelalolagi uma, ma i le siosiomaga o matua ma uo pele a le aiga, o se faatoafaiava ma le faatoanofotane lalelei talavou ua faatalofa o la lima i luga o le fata faitaulaga paia. Faafetai i le Atua mo lena tina ua faasino i lana tama teine o iinei, i le nofoaga i le lalolagi e latalata i le lagi, e fesootai ai loto i le loto, i se feusia'iga o le alofa e amata ai se lotogatasi e puipuia ai mai faatamaiga o faigata, loto tiga, po o faanoanoaga e faaleaga ai, ma maua ai faalaeiauga silisili mo tau-nuuga silisili o le olaga!<sup>16</sup>

Ia taliaina e le Atua ina ia faamanuia i aiga o le Au Paia o Aso e Gata Ai ma o le a oo mai ia te i latou le fiafia iinei ma le faavae mo le faaeaga i totonu o le malo selesitila i le lalolagi a sau.<sup>17</sup>

## **Fautuaga mo Suesuega ma Talanoaga**

---

- O a ni mea e mafai ona faia e ulugalii faaipoipo e faatumau ai le aveva o a latou feagaiga o le faaipoipoga faavavau ma faamuamua sili i o laua olaga i aso taitasi? E aafia faapefea le faiga e taitoalua o le tasi i le isi ma a la'ua fanau pe a faaipoipo mo le faavavau?
- E faapefea ona tatou aoao atu le taua o le faaipoipoga e faavavau i a tatou fanau?
- Aisea o le “alofa sili . . . e fausia i luga o osigataulaga sili”? E faapefea e le le manatu faapito ona faamalosi se faaipoipoga?
- O a ni mea e mafai ona faia e i latou e le o malolosi a latou soa i le Ekalesia e faamalolosi ai a latou faaipoipoga? E mafai faa-



pefea e i latou e le i faaiipoipo i le taimi nei ona faatumuina o latou olaga i faaaliga o le alofa ma le faataulagaina faaleatua?

- O le a se uiga o lenei mea i a te oe ina ia “amo faagatasi” i le faaiipoipoga?
- E mafai faapefea e paaga faaiipoipo ona “tuputupu ae atoatoa i le alofa e oo lava i le atoatoa o le alofa i le afioaga o le Alii”?

### *Faamatalaga*

1. *Decisions for Successful Living* (1973), 174–75.
2. *Decisions for Successful Living*, 125–27; palakalafa faaopoopo.
3. *The Teachings of Harold B. Lee*, ed. Clyde J. Williams (1996), 169.
4. *The Teachings of Harold B. Lee*, 239–40.
5. *Ye Are the Light of the World* (1974), 339.
6. *The Teachings of Harold B. Lee*, 236.
7. *The Teachings of Harold B. Lee*, 254.
8. *The Teachings of Harold B. Lee*, 249.
9. *The Teachings of Harold B. Lee*, 243.
10. *Decisions for Successful Living*, 177–78.
11. *Decisions for Successful Living*, 249.
12. *Ye Are the Light of the World*, 291–92.
13. Laugaina i le konafesi a le Siteki o Virginia, 30 Iuni 1957, Matagaluega o Faamaumauga o Talafaasolopito, O le Ekalesia a Iesu Keriso o le Au Paia o Aso e Gata Ai.
14. *Decisions for Successful Living*, 129.
15. “Special Challenges Facing the Church in Our Time,” semina a sui risone, 3 Oke. 1968, 13– 14.
16. “My Daughter Prepares for Marriage,” *Relief Society Magazine*, Iuni 1955, 349–51.
17. I le Conference Report, Oke. 1948, 56.



# Aoaoina Atua o le Talalelei i Totonu o le Aiga

*E mafai faapefea e matua ona fausia o latou aiga  
e avea ma sulufaiga ma nofoaga e saunia  
ai mo le olaga e faavavau?*

## Faatomuaga

**S**a saunoa mai Peresitene Harold B. Lee i le taua o le aoaoina o le talalelei i totonu o le aiga.

“Pe a tatou faitau mai tusitusiga a perofeta anamua, tatou te maua ai le mea e foliga mai sa avea pea ma leaga faavae sa au-maia i luma le amioleaga sa mafua ai ona tutulu le Atua, o le na faia le tagata. I se faaaliga i lana perofeta faatuatua o Enoka, sa tautino mai ai e le Atua o toe tagata o lana fanau sa aunoa ma se alofa, e oo lava i o latou lava toto o inoino i ai, o lona uiga i faa-tatauga uma o a latou lava fanau.

“I lana tali i le fesili a Enoka pe aisea ua tagi ai, sa tali mai le Atua ‘. . . i le galuega atoa ua faia e ou lava lima e leai se amioleaga ua sili atu ona tele nai lo le amioleaga o i ai i ou uso.’

“Ona ia faaopoopo mai lea . . . ‘faauta, o le a i luga o ulu o o latou tama a latou agasala; . . .’ (Mose 7:36–37.) O le mea moni o matua o lena augatupulaga sa solia le agasala sili ona leaga o le toilalo e usitai i le poloaiga sa tuuina atu i matua uma mai i aso o Atamu e oo mai lava i o tatou nei aso. Sa latou toilalo e aoao mataupu faavae o le faaolataga i a latou fanau.

“Sa lapataia i latou e le Alii, e faapei ona sa i ai i aso o Noa, e faapea lava i le aso o le toe afio mai o le Atalii o le Tagata. E finagalo le Atua ia faalogo nei tagata ma usitai i le valaau a lo tatou perofeta-taitai ma aoao a latou fanau e pei ona poloai mai ai le Alii ma lē oo atu ai le aao faatonutonu o le Atua Silisili Ese ia i latou.”<sup>1</sup>

O lenei mataupu o le a talanoaina ai le matafaioi sili ua tuuina atu i matua e aoao le talalelei i a latou fanau ma saunia i latou e ola i ni olaga amiotonu.

## **Aoaoga a Harold B. Lee**

---

### **E avea i se a le aiga ma nofoaga sili ona taua e aoaoina ai le talalelei?**

O o tatou aiga e le gata ina avea ma sulufaiga ae o ni nofoaga o sauniuniga ia mafai e o tatou tupulaga talavou ona o atu i luma ma le lototetele e taitai ma faafeagai ma se lalolagi fesouaina. Ua tatou iloa o le mea tatou te aoaoina i le aiga e i ai se tulaga ofoofogia e tausisia pea; o mea e vaaia ma tutupu i le aiga a lē fesoasoani i tupulaga talavou i tausaga a sau po o le faatamaia ai foi. E mafai ona avea o tatou aiga ma faataitaiga mo tagata uma, ae peitai e tatau ona tatou matua faatauaina fautuaga a taitai o le Ekalesia e uiga i lenei autu nai lo le mea sa tatou faia muamua e oo mai i le taimi nei. E masani ona avea lenei mea ma luitau faapitoa, ae ua sili atu i le taimi lenei ona o le tulaga lautele o le faaleagaina o aiga ua i ai i o tatou taimi. O fanau e mafai ona latou “lagona ma vaai” i le faatinoina o le talalelei i le aiga. E mafai ona latou vaai i lona sa’o lele ma lona mana mo le taimi muamua; e mafai ona latou iloa pe faapefea ona faamalieina e le talalelei manao o tagata taitoatasi.<sup>2</sup>

E tautalagia pea lava pea le faamatalaga o le aiga o le faavae o se olaga amiotonu. . . .Ua tau mai ia te i tatou e faaaliga a le Atua ma aoaoga a tagata le taua tele o le aiga i le faafaileleina o le potomanasani faaleolaga o le tagata.

Ua faasolo ina manino mai lava o le aiga o le ki i le lumanai o le Ekalesia. O se tamaitiiti e le alofagia, o se tamaitiiti e le iloa le amio pulea, e le iloa galue, e le iloa foi ana matafaioi, e masani ona gauai atu i amioga faasatani ia e suitulaga mo le fiafia—fua-laau faasaina, faataitai ona fai uiga feusuai, ma le fouvale, pe ala i le mafaufau i ai po o amioga foi. . . .

E leai se isi nofoaga sili atu nai lo le aiga e aoao ma aoaoina ai e uiga i le faaiipoipoga, alofa, ma feusuaiga aua o nei mea e mafai ona tuufaatasia i le tulaga sao i se faaiipoipoga faalemalumalu faa-

paiaina. E leai se isi nofoaga sili e foia ai masalosologa o o tatou talavou nai lo le nofoaga o i ai le alofa—le aiga. O le alofa e mafai ona faasaolotoina o tatou talavou e faalogo ia i latou ua latou iloa e latou te faatuatuaina . . . .

Pe mafai ea e se tamaititi ona alofa i lona tuaoi pe afai na te le iloa alofa ia te ia lava? Pe mafai e se tagata talavou e le i mafai ona faatuatuaina ona aoao e faatuatuaina? Pe mafai e se alii talavou e le iloa le galue po o matafaioi ona vaai i le mafuaaga e manaomia ai nei uiga taua e tuufaatasia ai lo tatou siosiomaga atoa? Pe mafai e se tamaitai talavou e le i avea ma se vaega o talanoaga faamani faasamasmanoa o mataupu faavae o le talalelei i totonu o lona aiga ona tali atu i faitioga a le lalolagi ma tala e faamaina ai lona tulaga malamalama i lana lotu?. . . A aunoa ma se potomanasani e ala i le ola ai i le mataupu faavae o le talalelei, o le a sili atu ona faigata ona talitonu i lona mataupu faavae . . . .

I se vaitaimiti sa tau mai ai ia te i tatou o le a pei lava o taimi o Noa, e tataua ona tatou fesoasoani i o tatou tupulaga talavou e aoao i le faia o filifiliga tonu, e tuputupu ae i se olaga faaletagata aloaia, aemaise lava pe a mafai ona latou i lalo o aafiaga tuusao o le aiga, lea e mafai ai e le alofa faaleaiga ona faatino ma faataua le salamo. O le siosiomaga o o tatou talavou i fafo atu o le aiga ma le Ekalesia e masani ona gaogao e tusa ai o uiga taua, pe o le a i ai foi ni manatu e feteenai ma mataupu faavae o le talalelei.<sup>4</sup>

I luga o matua i le aiga ma luga o le Ekalesia ua tuuina atu i ai se matafaioi sili e aoao le upu moni o le talalelei lea o le a avea ma taula i agaga taitasi. A aunoa ma lenei taula, o le a avea le tagata e pei o “peau o loo felafoaiina,” ma feaveaiina e matagi uma lava o mataupu le faavae o le a fenumiai i lona mafaufau ma mea sese i le silafaga a le Atua [tagai Efeso 4:14; Iakopo 1:6]. E tataua ona pito sili atu ona aoaoina i tatou i luga o le fogaeleele pe afai tatou te ususitai i faatonuaga a le Alii.

Afai e faamalolosa faapea o tatou tupulaga talavou, o le a le mafai ona faalavelaveina o latou faatuatuaga faalelotu pe a latou fetai ai ma manatu sese faaleaoaoga e feteenai ma upu moni o le talalelei. Ua faaauupegaina i latou e tetee atu i u fanafana oona o le tafaaleaga ma le pepelo.



Sa apoapoi mai Peresitene Harold B. Lee, “Aoa o outou aiga i a outou afaifi faaleaiga; aoa i latou e tausi i poloaiga a le Atua, aua ua na o iina o i ai lo tatou saogalemu i aso nei.”

Alii talavou. . . , afai e taitaia o latou mafaufauga e le upu moni “faavae,” o le a le gauai atu i se taimi o le vaivai pe a aunoa ma se puipuiga, i se faaosoosoga e faatamaia ai uiga lelei i o latou olaga atoa. . .

Le au talavou pele o ē ua oo i le taimi e faaiipoipo ai, afai e taitaiina outou e manatu e pei ona tuuina mai e le talalelei moni, o le a faamamaina outou e ala i le tausia o le tulafono o le faaiipoipoga faaselesitila e maua ai le fiafia e faavavau.<sup>5</sup>

Sa tau mai e le Alii e lei tuuina atu ia Satani le mana e faaosooso ai tamaiti, “vagana ona ua tatau ia te au ona sueina a latou amio i ou luma” (MFF 29:47). Ona mulimuli mai ai lea o lenei faamatalaga taua: “Ina ia sueina mea sili mai o latou tama” (MFF 29:48). O lenei, o lona uiga o matua. Aisea lava le mafuaaga ua le faatagaina ai e le Alii Satani e faaosooso i tamaiti vagana ua oo i tausaga e tatau ai? O le mafuaga ina ia tuu atu i matua le avanoa faaauuro e toto ai i loto o fanau laiti ia mea taua ae lei oo i tausaga e tatau ai, a leai, o le a tuai i matua ona toto ia mea i loto o a latou fanau.<sup>6</sup>

O i tatou, o tama, o faiaoga, o tina, ua i ai ia i tatou [se galuega] sili i le fausiaina o agaga o tagata. E moni, e le mafai

e Satani ona faaosooso tamaiti ae lei oo i tausaga e tatau ai; ae peitai o loo faia e Satani mea uma na te mafaia e ala i le taumafai e faaosooso i latou ua tuuina atu i ai le vaaiga ma le aoaoina o i latou ina ia faatalale ma faatamala ma faatagaina i latou e atinae uiga faatauvaavaa o le a taitai ese mai ai i latou, ma o le a [faia i latou] ia le agavaa mo le matafaioi sili i le tauvaga ma Satani, ma le mafai ai ona ofu i le ofutau i le taimi e taunuu ai i tausaga e tatau ai.<sup>7</sup>

E tatau ona tatou faamamafa i luga o tama uma o le a fesiligia o ia e tusa ai ma le tulaga solo lelei e faavavau o lona aiga: o lona uiga o le o mai i le Ekalesia ma lona aiga; o lona uiga o le auai i le sauniga faamanatuga ma lona aiga; o lona uiga o le faia o afi-afi faaleaiga e tuufaatasia ai ma faamaopoopo lona aiga; o lona uiga o le saunia lea o ia lava e ave lona aiga i le malumalu, ina ia mafai ona saunia ai i latou mo laasaga ia o le a fausia ai se aiga e faavavau.<sup>8</sup>

Oi, outou tina, outou tama, ou te aioi atu ia toe foi i se lagona o ia te outou se matafaioi atoatoa mo ia agaga faapelepele. Afai tou te le saunia i latou mo lenei aso o le a oo mai, o ai la e faia? I lena aso pe a afio mai [le Alii] e pei o se gaioi i le po, o e saunia ea i latou e tutu atu i lona afioaga? Ao i ai i latou i luga o le malae o le taua, ao faafeagai i latou ma tulaga matautia, ma feagai ma faaosoosoga, pe mafai ea e lou alofa faatina ona aapa atu i le afe o maila o loo valavala ai ma taofi lena atalii ma lena afafine ina ia tumau?<sup>9</sup>

---

### **O a mataupu faavae o le talalelei e ao ona tatou aoao atu i fanau?**

Sa tusia e le perofeta o Enosa e uiga i aoaoga a lona tama. Sa ia faapea mai, “Faauta, ua oo ina iloa e au o Enosa o lo’u tama o le tagata amiotonu ia, aua na ia aoaoina mai ia te au. . . i le ma le aoaiga ma le apoapoaiga a le Atua. . . Ia faamanuiaina lava le suafa o lo’u Atua ona o lena mea” (Enosa 1:1). Sa ou mafaufau loloto i lena lava faamatalaga, “Sa aoaoina au e lou tama i le aoaiga.” O le a le uiga o lena mea? O le aoaiga o lona uiga o se ala faagaioioiga o aoaoga ma pulega lelei. “Sa aoaoina ma pulega lelei au e lou tama i aoaoga e tatau ai.” O le a le uiga o apoapoaiga?

O lona uiga o ni aoaiga, lapataiga po o le faamanatu malie mai i se uiga faale-uo. Ia faamanu i le suafa o le Atua mo le tama ma le tina o loo aoao atu i le aoaiga ma apoapoaiga a le Alii!<sup>10</sup>

O le Alii lava ia na fetalai manino e uiga i lenei sauniuniga mo le puipuia o tupulaga talavou mai mailei matautia e ono faaumatia ai i latou. Ua ia tuuina mai se tiute tauave i luga o aiga o lenei laueleele. O ana upu nei:

“O lenei foi, afai e maua fanau e matua i Siona, po o se siteki ua faatulagaina, e le aoaoina atu ia te i latou ia malamalama le mataupu o le salamo, ma le faatuatua ia Keriso, le Atalii o le Atua Soifua, ma le papatisoga, ma le meaalofa o le Agaga Paia i le faaeina o lima, pe a valu tausaga o lona matua, o le a pau lea agasala i matua. . . .

“O le a latou aoao atu foi i a latou fanau ia tatalo, ma savavali tonu i luma o le Alii.” [MFF 68:25, 28.]<sup>11</sup>

O le auupega sili ona malosi o i ai ia i tatou e tetee atu ai i le fili i le lalolagi, po o a lava ia fili, o se molimau maumaututu lea o le Alii ma le Faaola, o Iesu Keriso. Ia aoao lau fanau laiti ao iai i latou i ou tulivae ma o le a latou tuputupu ae ma avea ma ni tagata malolosi ma le lototetele. Atonu o le a sē i latou, ae o lou alofa ma lou faatuatua o le a toe aumaia ai i latou.<sup>12</sup>

E tatau i matua ona manatua a latou galuega i le faamaoni atoatoa, ia vaai ia leai se tasi e faatalanoa, ia aua nei tuputupu ae fanau i le amioleaga, ae ia aoao i latou e saili ma le filifiliga oa o le faavavau, ma ia aua nei tumu o latou mata i le manumanu (tagai MFF 68:30- 31). O lenei o le matafaioi lena a le tama ma le tina. Ua tuuina mai e le Alii le matafaioi muamua i matua o le aoaoina lea o le aiga.<sup>13</sup>

O fanau taitasi e tatau ona aoao o ia o se atalii poo se afafine a ni matua faalelagi ma o loo i ai ia te ia le aia e aoao ai ma amio ai e pei o se atalii po o se afafine o le Atua ina ia oo i le taimi e manaomia ai se fesoasoaniga e tatalo atu ma mafai ona talia mai e tusa o se fanau faamaoni.

E tatau ona aoao fanau taitasi o lona tino o le malumalu o le Atua ma o se faaleaga i le malumalu o le Atua, o le a faaleagaina lena tagata e le Atua [tagai 1 Korinito 3:16–17].

E tatau ona aoao fanau taitasi o le faatuatua e lava mo le faa-atoatoaina, e na o le ositaulaga e mafai ona atinae ai ma seiloga e aoao e ositaulaga ona tuinanau ma manaoga faaletino e ala i le usiusitai i tulafono o le Talaleleli o le a le mafai ona faapaiaina o ia ma faia ia atoatoa i luma o le Alii.

E tatau ona aoao fanau taitasi e faaaloalo i faailoga o mea paia ma faaaloalo i e pule i aiga, i totonu o le Ekalesia, ma totonu o nuu.

E tatau ona aoao faalelei fanau taitasi i le faaaogaina o o latou lima ma mafaufau ma ia faia ia malamalama na tuuina mai e le Atua ni lagona faananau mo se faamoemoega faaleatua pe a pulea lelei.

E tatau ona aoao fanau taitasi e faaaoga tatau ona taimi samamanoa ma a taalo, ia lē na ona taalo. Ua na o se faataitaiga o se vaega o le a ia faia i lona olaga faatagata matua.

E tatau ona lava le potu masani e maua e fanau e iloa ai o le auauna atu ma le lē manatu faapito e aumaia ai le fiafia ma o le galuega e faia e se tasi e aunoa ma se totogi o le galuega lena e maua ai le fiafia silisili.<sup>14</sup>

E tatau ona faalogo a tatou fanau, i totonu o puipui o fale, i molimau a o latou matua. E maeu le potu o se tama po o se tamamatua e avea ma ana masani le tuuina atu o lana molimau patino i lana fanau, taitoatasi!<sup>15</sup>

---

**E faapefea ona fesoasoani afiafi faaleaiga i matua i le faa-  
taunuuina o a latou matafaioi o le aoaoina  
atu lea o le talaleleli?**

Sa toe faamamafa atili mai le aoaoina o fanau i totonu o le aiga e matua e ala i le polokalama ua tatou taua o le afiafi faaleaiga. E le o se polokalama fou lenei mea. . . . I le tusi talu ai sa tusia i le Ekalesia e Peresitene Polika Iaga ma ona fesoasoani, sa aioi atu ai i matua e faapotopoto faatasi a latou fanau ma aoao i latou i le talaleleli i totonu o le aiga i se tulaga faifai pea. Ma o le afiafi faaleaiga sa uunaia mai talu ona faatuina le Ekalesia i lenei tisipenisione.<sup>16</sup>



Afai tatou te faatalale i o tatou aiga iinei i le faia o afiafi faaleaiga, ma tatou le faia lo tatou tiutetauave iinei, faamata o le a se vaaiga e i ai pe afai tatou te le maua i latou ona o lo tatou faatalale? O le a le avea le lagi ma se lagi seiloga ua faia mea uma tatou te mafai e faaolaina ai i latou sa auina mai e le Alii i lo tatou gafa. O lea e tatau ai ona faaliliuina loto o outou tama ma tina i a outou fanau i le taimi nei, pe afai o ia te outou le agaga moni o Elia, ma lē manatu ua faataau lena tulaga mo na o i latou o i tua atu o le veli. Ia tuuina atu o outou loto ia faaliliuina i a outou fanau, ma ia aoao a outou fanau; ae tatau ona outou faia a o lava lo latou laiti e aoao lelei ai i latou. Ma afai o outou faatalale i a outou afiafi faaleaiga, o lona uiga ua outou faatalale i le amataga o le misiona a Elia e pei lava foi ua outou faatalale i a outou galuega o le sailia lea o gafa.<sup>17</sup>

Pe o tatou faaauau pea ona galulue i totonu o lio faaleaiga ma a tatou fanau faapea foi ma a latou fanau? Pe o tatou sailia ea i a tatou mamoe o loo i le tulaga matautia o le sē ese atu mai le leo-leo mamoe poo le lafu? Pe o tatou aoaoina o tatou aiga [i] afiafi faaleaiga? Pe o faia ea a tatou afiafi faaleaiga na o i tatou lava pe o tatou faapea ifo, “Se, o nei lesona e le aoga ia i taua, ua na o A’u foi ma Tina, ma o le afiafi faaleaiga e mo na o i latou e i ai fanau iti?”<sup>18</sup>

Sei ou fesili atu ia te outou i se fesili. Afai e te iloa o loo e faataotolia i se mai ua le aoga i ai se togafiti ma ua puupuu ou taimi i le lalolagi ma o loo i ai ia te oe se aiga ma ni fanau laiti o loo faalagolago ia te oe mo fautuaga, mo faatonuga, mo le taitaiga, o le a se mea o le a e faia ina ia saunia ai i latou mo lou oti? Pe ua e tu ea ma fesiligia oe lava i lena ituaiga fesili ogaoga?

Sei ou faitau atu ia te outou. . . mai se tusi a [se tina]: “Ina ua ou faatoa auai i le Ekalesia, sa masani ona ou mafaufau i se ituaiga aiga ou te faamoemoe e maua i se aso. Sa ou faaoso i ou mafaufauga e faaataata mai ia te au se mea sili ona matagofie ma faamalie loto e mafai ona ou vaaia. Sa ma faatinoina lena ata faalemafaufau ma lou toalua ina ua faapotopoto faatasi le ma fanau ma aoao atu ia te i latou le talalelei. . . .E tasi le mea sa faateia ai i ma’ua ma ua ma fiafia tele ai o le mea moni o le ma fanau, e le fuatasi, ua aoaoina e fiafia i a matou afiafi faaleaiga. . . .Sa amata

ona faateleina lou iloa i le vave ona matutua o la maua fanau ma le pupuu o taimi sa ma'ua maua o ni matua e aoao ai i latou. . .

“Sa maua au i se mai faigata i le tautoulu ua tea atu. Ou te faamoemoe e lē atagia ai se lotovii i lenei mea, ae o le taimi muamua lea faatoa ou iloa ai lo'u taua i la'u lava fanau. . . .Ao ou taoto ua le mafai ona ou tali atu i o latou manao, sa ou iloa a lē faasalavei mai lou Tama Faalelagi, semanu ua muta o'u aafiaga mo i latou i lenei olaga, e foliga mai e maeu le manaomia ma le pele o itula o vaiaso ma masina ma tausaga o le lumanai.

“Sa tele mea sa ou naunau i ai i lenei taimi e tusa o le faaogaina o na taimi pe afai e tuuina mai ia te au. O se tasi o le faia lea o sina vaega itiiti i luga o le fogaeleele, e faaluina ai le taimi i po taitasi e faitau ma talatalanoa ai i le fanau. . . .E le gata i isi mea latou te fiafia i ai, ae ou te faitau atu foi se vaega tele o le Tusi a Mamona mai le tusitusiga mo tamaiti. . . .E le taumatea le taua ia te i latou ina ua ou faalogo i lau tama e valu tausaga le matua o faafetai atu i lana tatalo mo perofeta sa teuina nei tusitusiga, pe a o faafetaia e lau tama e lima tausaga le matua le sola ese ma le saogalemu o Nifae ma le au faatuatua ao saili Lamana ma Lemuelu e fasioti ia te ia. O se mea ua ma'ua aoaoina o le taimi lava e ma te maua ai le avanoa e fesoasoani ai i la ma'ua fanau e faateleina lo latou fiafia ma lo latou malamalama i le talalelei ma le Tama sa foafoaina i latou, ua faateleina foi lo matou alofa o le tasi i le isi ma ua faa-aafiaina le tulaga o le mausali faaleaiga i se auala sili ona taua. Ona o lenei pogai, o afiafi faaleaiga i vaiaso taitasi ua matua faatumutumu lona taua ia te i matou.”<sup>19</sup>

I o outou aiga, ou te tatalo ia outou, fai atu e faapei o Iosua o anamua: “A o au ma lo'u aiga, matou te auauna ia Ieova” (Iosua 24:15). Aoao o outou aiga i a outou afiafi faaleaiga; aoao i latou e tausi i poloaiga a le Atua, aua ua na o iina o i ai lo tatou saogalemu i aso nei. Afai latou te faia ia mea, o le a afio ifo i o latou luga le mana o le Silisiliese e pei o se uatoa mai le lagi, ma o le a i ai le Agaga Paia ia te i latou.<sup>20</sup>

## Fautuaga mo Suesuega ma Talanoaga

---

- Aisea e taua ai le aiga i le faafaileleina o le “poto masani atoa faaleolaga” o a tatou fanau? Aisea e tatau ai i matua ona avea le aoaoina o le talalelei i a latou fanau o se tulaga e ave i ai le faamuamua maualuga mai i le taimi o laiti a latou fanau?
- E faapefea ona avea o tatou aiga ma sulufaiga mai le amioletonu ma faigata o le lalolagi?
- E mafai faapefea e matua ona aoao mataupu faavae o loo i totonu o le Mataupu Faavae ma Feagaiga 68:25–28 i a latou fanau? E mafai faapefea e matua ona fesoasoani i a latou fanau “e iloa o le auuuna atu ma le le manatu faapito e au-maia ai le olioli?
- Aisea e taua ai i fanau le faalogo i molimau a o latou matua e uiga i mataupu faavae o le talalelei?
- O a ni ala e fesootei ai le misiona a Elia ma matua i le tausiga o a latou fanau?
- Aisea e taua ai le faia pea lava pea o afiafi faaleaiga? E mafai faapefea ona faataunuaina ma le atoatoa a outou afiafi faaleaiga?

### Faamatalaga

1. I le Conference Report, Ape. 1965, 13; po o le *Improvement Era*, Iuni 1965, 496.
2. *The Teachings of Harold B. Lee*, ed. Clyde J. Williams (1996), 297–98.
3. *The Teachings of Harold B. Lee*, 267.
4. *Ye Are the Light of the World*, (1974), 64–66.
5. *Stand Ye in Holy Places* (1974), 370–71.
6. *The Teachings of Harold B. Lee*, 269.
7. *The Teachings of Harold B. Lee*, 268.
8. *The Teachings of Harold B. Lee*, 293.
9. *The Teachings of Harold B. Lee*, 276.
10. Lauga i le konafesi lona tolu faaletausaga a le Peraimeri, 3 Ape. 1959, Matagaluega o Faamaumauga o Talafaasolopito, O le Ekalesia a Iesu Keriso o le Au Paia o Aso e Gata Ai, 1–2.
11. *Decisions for Successful Living* (1973), 24–25.
12. *The Teachings of Harold B. Lee*, 273.
13. *The Teachings of Harold B. Lee*, 277.
14. “For Every Child, His Spiritual and Cultural Heritage,” *Children’s Friend*, Aug. 1943, 373.
15. *The Teachings of Harold B. Lee*, 279.
16. *The Teachings of Harold B. Lee*, 266–67.
17. *The Teachings of Harold B. Lee*, 280–81.
18. *The Teachings of Harold B. Lee*, 268.
19. Tautalaga i le konafesi aoao o le fonotaga a faiaoga asiati, 8 Aper. 1966, Matagaluega o Faamaumauga o Talafaasolopito, O le Ekalesia a Iesu Keriso o le Au Paia o Aso e Gata Ai, 4.
20. *The Teachings of Harold B. Lee*, 273.



## Alofa i le Aiga

*E mafai faapefea e matua ona faamalolosia noataga o le alofa i le va o i latou lava ma a latou fanau?*

### Faatomuaga

“**E** aupito taua le aiga i le tatou malaga mo le faaeaga i le malo o lo tatou Tama Faalelagi,” Sa aoao mai ai Peresitene Harold B. Lee. 1 Faatasi ai ma lenei faamoemoega maua luga i le mafaufau, sa masani ona ia saunoa mai e uiga i le taua o le alofa mo le faamalolosia o sootaga faaleaiga. Sa ia uunaia matua ma fanau e faa-aoga le agaga o le misiona a Elia i e o soifua o o latou aiga ma liliu atu o latou loto o le tasi i le isi i le alofa. Sa ia saunoa mai:

“Ua toe faamanatu atu ia te outou se mea e na o galuega faalemalumalu tou te faatatauina i ai - - o le misiona a le perofeta o Elia sa faapea mai ai Malaki, ma ua toe faamanatu mai e se faaaliga o ona po nei: ‘Faauta, ou te faaali atu ia te outou le Perisitua, e Elia le perofeta, a o lei oo mai le aso tele ma le matautia o le Alii. Ma o le a totoina e ia i loto o fanau o folafolaga na faia i tama, ma o loto foi o fanau o le a liliu i o latou tama. Ana le faapea, e matua faatafunaina lava le lalolagi atoa i lona afio mai’ (MFF 2:1–3.)

“O le taimi nei, ua lē fesiligia lava le taua naua o le uiga o lona mau. A lē liliu atu loto o fanau i matua ma liliu atu loto o matua i a latou fanau i le taimi nei, i le olaga faitino, o le a matua faatafunaina le lalolagi i lona afio mai. E lei i ai muamua se taimi ua manaomia ai le tele o mea i totonu o aiga o le Au Paia o Aso e Gata Ai ma le lalolagi lautele. O le tele o puapuuga o loo aafia ai le autalavou i aso nei e mafua mai i le malepelepe o aiga. E tatau ona liliu atu loto o tama i a latou fanau, ma fanau i o latou tama, pe a fia faasaoina lenei lalolagi ma saunia tagata mo le afio mai o le Alii.”



Ua lauiloa Peresitene Harold B. Lee i lana fautuaga mo matua: “O le galuega e sili ona taua a le Alii e te faia o le galuega lea e te faia i totonu o puipui o lou lava fale.”

## Aoaoga a Harold B. Lee

---

### E mafai faapefea ona tatou uunaia le alofa sili atu ma le fiafia i totonu o o tatou aiga?

O se avanoa taua tele ia te au le asiasi atu faatasi ma isi o le Au Pulega Aoao, i aiga sili ona lelei o o tatou tagata, ma e mai i na asiasiga sa ou maitauina ai le tele . . . o elemene o loo fausia ai le malosi ma le fiafia i totonu o aiga. . . .

Ou te vaai i nei aiga o fefaaaliai atu le faaaloalo i isi; tama i le tina, ma le alofa mo le tina, ma tina i le tama, e leai ni misa, leai ni finauga i luma o le fanau, e talatalanoa ma faaleleia fesootaiga—Sa ou vaai i se aiga faapea o i ai se fanau aulelei e toaiva ma sa molimauina e le fanau le mea moni latou te lei faalogo lava o tauaimisa lo latou tama ma lo latou tina. O le taunuuga i le taimi nei, i totonu o aiga e iva o nei fanau, ina ua mavae lenei piriota o faatonuga, ma faataitaiga lelei a matua, e iva i si aiga sili ona matagofie ma malupuipua o loo nonofo fiafia faatasi. . . .

O le faatumauina o fesootaiga faaleagaga, o le faia o tatalo faaleiga, o le auai pea lava pea i tiute faale-Ekalesia o nisi na o mea sa fesoasoani i nei aiga ina ia faamanuiaiaina.<sup>3</sup>

Sa i ai se tamā sa sau ia te au i ni nai tausaga ua mavae ma le matua tiga o le loto ona o le mea moni, o tagata uma o lona aiga—o lana fanau uma—o loo fetaiiai ma tulaga faaletonu i o latou lava aiga, i le taimi nei ua faaipoipo uma i latou. Sa ia faapea mai ia te au ma le faanoanoa tele, “O le a ea le mea ua tupu i lou aiga ua mafua ai ona feagai i latou uma ma faigata? E leai ma se isi o i latou o i ai se aiga fiafia ma lelei.” Ia, ou te le i fai atu i ai se tala, ae sa ou vaai i totonu o le aiga o lena tamā a o lei faaipoipo na fanau, o nonofo faataamilo i le laulau. Sa ou vaai i le manatu faapito, ma le le manao e ositaulaga mo le olaga sololelei o le tasi ma le isi. Sa ou vaai i le fetaufaoai, leoleoā, otegia, tauaimisa, ma le faasoesa. Sa ou iloa mea sa fafagaina ai i latou a o laiti. E le o se mea na faateia ai a’u ina ua latou le mauaina ni aiga fiafia.<sup>4</sup>

O le fiafia e sau mai le tautua po o le auauna atu ma le le manatu faapito. Ma o aiga fiafia ua na o aiga lava o loo i ai se tau-

mafaiga i aso taitasi e faia se osigataulaga mo le fiasia o tagata tai-toatasi o le aiga.<sup>5</sup>

O le alofa o le Atua e le o se mea e te maua i le na o le tagi atu. O Ioane sa faapea mai, “Pe afai e faapea mai se tasi, Ou te alofa i le Atua, ae ita i lona uso, o le pepelo lava ia; o le le alofa i lona uso ua ia vaai atu i ai, pe mafai faapefea ona alofa o ia i le Atua ua ia le vaai atu i ai? (1 Ioane 4:20.) E le mafai ona e alofa i le Atua ae e te inoino i lou uso o loo oulua faifai mea faatasi. O soo se alii e mafaufau ifo o ia o se tagata e matua malosi i le faaleagaga ae e le o tulaga lelei lona aiga ona o le faatamala ma lona toilalo e tausia lona toalua ma lana fanau, e lē o aga atu lena alii i se ala e faatupu ai se alofa i le Atua.<sup>6</sup>

Aua nei galo ia te i tatou le uunaiga poto a Paulo ina ua ia faapea mai ia, “faamauiina” lo outou alofa ia te i latou o siomia ai outou, aemaise lava i latou o tumu i faanoanoaga (tagai 2 Korinito 2:7-8). Sa tau mai foi e Peteru lenei lava mea e tasi i le 1 Peteru, mataupu muamua, i le uunaiga o tagata o le ekalesia ia aua nei tau o le faaali atu o le “alofa faamaoni” ae “ia matua fealofani ai outou ai le loto naunau” (1 Peteru 1:22). I totonu o le malo o lo tatou malosi e alofa e taua tele aua ua tatou ola i le taimi “o le a tauau ina malili ai foi le alofa o tagata” (MFF 45:27).<sup>7</sup>

Faamalollosia a outou sootaga faaleaiga ma manatua a outou fanau. . . Ia mautinoa e malosi le aiga e fai ma nofoaga e o mai i ai le fanau mo se taula latou te manaomia i nei aso o faafitauli ma puapuaga. Ona maua lea o le alofa ma o le a faateleina lo outou olioli.<sup>8</sup>

---

**E mafai faapefea ona faaali atu e tama ma tina le alofa sili atu i a laua fanau?**

Sa i ai se mea na tupu sa ou aoao mai ai se mea i le ave ma se tama matua. O le po o le faaaliga siva a le [Ekalesia] i le malae taalo, ma o le fanau tama matutua e toalua a lo’u afafine . . . sa fai mai o ia [lo’u afafine] ua matua faatiga ulu tele ia te ia. Ona ou faapea atu lea i ai, “Mata e te manao ou te aveina lau fanau na e toalua i le malae taalo i le faaaliga siva?”

Sa ia tali mai, “Oi, Tama, afai e te faia lena mea, o le a ou matua fiasia lava.”

Sa ou le iloa le mea lea o le a ou oo i ai. . . .Ao amata lena faaaliga, sa ou le iloa e i ai se eseese tele i le va o le fitu-tausaga ma le lima-tausaga le matua. O le fitu-tausaga sa fiafia tele i le faaaliga o loo faia i lalo o le malae lakapi. A o le lima-tausaga, sa puupuu lava le taimi na filemu ai. Sa migomigoi solo, ona manao lea e alu e aumai se mea e 'ai, a uma ua manao e alu e aumai se faguinu, ona sosoo lea ma le fia alu i le fale lē ta'ua, ma sa na o le fealualuai i taimi uma. A o lenei matou te nonofo faatasi i luma ma le Au Pulega Aoa, ma sa toē mai i le faaaliga lenei o loo fai, a o ou taumafai e toso mai ma toso atu le tama a lo'u afafine, e tau faafilemu. Mulimuli ane, sa liliu mai lena lima-tausaga laitiiti ia te au ma lana tama'i moto ma tu'i lo'u alafau ma faapea mai, "Tama matua, aua le tuleia au!" Tou te iloa, na tiga lena mea. I lena afiafi po sa ou manatu sa mafai ona ou vaai atu i le soiso'i o le au uso a o latou vaaia le mea o tupu, ma o le manatu muamua lava sa oo mai ia te au o le ave lea o ia ma sasa ma'ini; o le mea lena ua tatau mo ia. Ae peitai, sa ou vaai i lona tina o faia se isi mea. Sa ou vaaia o ia pe a oso le faalii o lenei alii ma e i ai lana mau, "E tatau ona e alofa i lau fanau pe a tau-tau ina leai se isi e alofa i ai." Ma sa ou manatu o le a ou faataitaia lena mea. Sa ou toilalo i isi laasaga.

O lea sa ou siiina ai o ia ma ou fai atu i ai, "Atalii, e alofa tama ia te oe. Ou te manao tele ia e tuputupu ae e ave ma tama matua lelei. Ou te manao ia e iloa ou te alofa ia te oe, alii." Sa amata ona faavaivai lona tamai tino ita, ma ia tuu mai ona lima ma fusi lo'u ua ma kisi mai i lo'u alafau, ma sa ia alofa ia te au. Sa ou faatoilaloina o ia e ala i le alofa. Ma na faapena foi ona ia faatoilaloina au e ala i le alofa.<sup>9</sup>

O atalii ma afafine o se tina manumalo o le a latou ta'u atu ia te outou e manaomia e le tupulaga talavou le alofagia aemaise lava pe a toetoe ina leai se tasi e alofa ia i latou. Ia mafaufau i lena mea, outou tama ma tina.<sup>10</sup>

Ou te manatua se mea sa tupu i lo'u lava aiga ina ua faitinoina se tasi o fanau teine a lau fanau e lona tama mo le le teuina faalelei o lona potu, o lona moega, ma isi mea. Ma i ni lagona loloto sa ia faapea mai ai, "Ia, Tama, aisea e te vaavaai ai na o mea e faitio ai ae e te le vaai i mea lelei ou te faia?" O lenei faamatalaga sa faaosofia ai le tama e toe mafaufau faalelei, ma i lena po, sa ia



tuuina ai se tusi o le alofa ma le loto malamalama i lalo o le aluga a lona afafine e ta'u atu ai ia te ia mea mataina e uiga ia te ia, ma na avea lona ma alalaupapa e faaleleia ai tiga sa atagia mai i lona faitio ma le le amanaiaina o galuega lelei.<sup>11</sup>

Ou te manatua se mea sa tupu ao ou laitiiti. Sa i ai a matou meaituaolo ma sa latou faaleagaina le togalaau, sa faamatagaina ai le faatoaga. Sa auina atu au e lou tama pe tusa ma le lua maila i le faleoloa e faatau mai ai se meafaigaluega e tui ai isu o puaa. Sa faigata tele ona tulituli puaa agai i totonu o le saouli, ma ao ou faifai mea i lona meafaigaluega sa faatau mai, sa malosi la'u oomi i lalo ma gau ai. E le sese tama pe ana fai na te ia otegiaina au i lona lava taimi, pe a fuafua atu i taumafaiga sa faia ma tupe ua faamaimauina, ae sa na ona ia tilotilo mai ia te au ma ataata, ma faapea mai, "Ia, atalii, ou te matea o le a le tuiina isu o puaa i le aso. Toe faasosola puaa ona ta toe o lea i le aso a taeao e toe taumafai." E maeu lo'u alofa i lo'u tama, sa ia le otegiaina au ona o lona sese itiiti e le'i fuafuaina, ae ono mafai ona i ai se eseesega i lo ma'ua va.<sup>12</sup>

Atonu e tatau i se tama ona aoai sona alo, ae e le tatau lava ona faia a o ita. E tatau lava ona ia faaali atu mulimuli le alofa faateleina ina nei fai oe ma fili o lē sa e aoaiina (tagai MFF 121:43). Talosia ia le faatagaina e le Alii ona maua ese tamaitiiti se lagona faapea o lona tama poo lona tina o se fili.<sup>13</sup>

Matua, ia manatua o lou avanoa lenei; e mafai ona e lagona lou gapatia a o e tauivi i le tele o aso ma se tamaitiiti le usitai, ae o loo e soifua i taimi sili ona fiafia ma tausaga faaauuro o lou soifua. Ao e tuu i latou i o latou moega i le po, faamolemole alofa ia te i latou. Ia latou lagona se leo o le alofa i le lotolotoi o le ita, ma leo leaga uma, ma ia latou faalogoina i o latou olaga atoa. Ia i ai se taula e sulu mai i ai nei fanau laiti pe a toilalo isi taumafaiga uma. O le a fesoasoani le Alii ia te outou e faia lea mea.

Sa sau ia te au se tasi o fomai. O ia o se fomai tipitipi o le faiai. . . .[O lona] atalii laitiiti sa i ai ia te ia se taavale faasee i le kiona sa tuuina atu i ai mo le Kerisimasi ae sa leai se kiona. Sa faatoa toulu le uluai kiona i le tolusefulu aso talu ona tuanai le Kerisimasi i lona tausaga. Sa faapea mai le [fomai], ao ia faanatinati ese atu agai i le falemai, "Pe a ou foi mai i le fale o le a ta o e faasee i le kiona," ae sa tali atu lona atalii, "Oi leai e te le

alu, Tama, e leai sou taimi mo au.” I lena taeao atoa sa pona’ia lona mafaufau i lenei tala faatamaitiiti aua, e moni lava, sa ia faaaluina le tele o lona taimi i lana galuega ma ua le maua ai sona taimi e faatasi ai ma lana fanau laiti e pei ona tatau ai. O lana fesili e faapea, “Pe e te mafai ona talanoaina mo sina taimi itiiti pe faapefea ona ou faapaleniina lo’u olaga? Talu ai le telea’i i luma o le atamai faale-togafitiga o faiai i nei aso, e mafai ai lava ona tanumia au i le tele o mea e ao ona fai ma le toe mafaufau ai i se isi lava mea ina ia mafai ona ou faitauina mea fou uma e faasalalau mai e uiga i la’u galuega. Ao ma talanoa, sa ma ioe o se tamā e i ai lana matafaioi mo ia lava, e i ai lana matafaioi mo lona aiga, e i ai lana matafaioi i le Ekalesia, ma e i ai foi lana matafaioi i lana galuega; ma ina ia mafai e ia ona ola i se olaga paleni e tatau ona taumafai e saili auala uma e tuuina atu ai ni auaunaga i nei vaega eseese uma taitasi.<sup>15</sup>

Afai e malosi le alofa o se tama i ona atalii, ma mai i lo latou laiti sa ia sii ia i latou i ona lima ma opoopo mai ma le alofa ma ia faailoa atu ia i latou le mafanafana o lona alofa mo i latou, ou te talitonu o se mafutaga faapea o le a oo ina matua ma o le a taofia ai i latou pe afai o le a tupu mai se faafitauli i le olaga o se alii e manaomia ai lima maopoopo o se tama e malamalama. O le tina o loo faatali ma le naunautai i le toe foi mai o lana tama teine mai se siva i le leva o le po mo lana kisi faatofa o le po, faatasi ma le faaali atu o talitonuga teufatu e tusa ai ma le fiafia faateineiti, ma e a matua tauia i le alofa lē uma o le afafine lea o le a avea ma se puipuiga e faavavau mai le agasala ona o le faatua-tuaina o ia e lona tina.

O matua ua tele le pisi pe ua augatata e toe faalavelavea i latou i nai faasoesa lē ‘alu’alua a le fanau ma tulei i latou i autafa po o fafo o le aiga ona o le fefe nei toe faaleagaina le teuga faalelei ua i ia le fale, ma ono mafai ai ona latou o atu, ona o le faaesea, i nofoaga e faatupulaia ai le solitulafono ma le le faamaoni. O le a le aoga i se tamā, i se isi itu, e agavaa ai i le Malo Selesitila, pe a leiloa sona atalii po o se afafine i le agasala ona o lona faatamala? O sosaiete faafiafia uma e tuuina atu fesoasoaniga i e o manaomia le fesoasoani i le lalolagi, pe faaletagata lautele pe faalelotu, o le a le mafai lava ona faamalieina ai le tina ona o agaga ua lei-

loloa mai lona lava aiga, a o ia taumafai e laveai le lalolagi po o se isi mafuaaga, tusa lava poo le a le taua, i tua atu o lona aiga.<sup>16</sup>

Ua ou fautua soo atu, ma ou te toe fai atu foi ia te outou, outou uma o i ai iinei: “*O le galuega sili ona taua a le Alii o le a e faia o le galuega lea i totonu o puipui o lou lava fale.*” Ia aua nei galo ia i tatou lena mea.<sup>17</sup>

---

**O a aafiaga e mafai e le alofa faamatua ma aoaoga  
o le talalelei ona oo atu i fanau ua se?**

Sa o mai ia te au se ulugalii pagatia i le isi aso. Na i ai so laua afafine e sefuluono tausaga ma o le ulumatua foi lea i le aiga ma o ia lava e faatupuina le tele o faafitauli. Ua toetoe lava a faavaivai i laua. Sa ou sii i ai upu a Uso Marvin J. Ashton e faapea, o le aiga e le o se toilalo pau lava le mea ia aua nei faavaivai (tagai Conferernce Report, April 1971, p. 15). Ia, o le mea moni lena. O le aiga e tatau lava ona tumau pea lava le alofa ma galulue ma [tagata talavou], seia pasia e talavou lena vaitausaga matautia. E leai se aiga e toilalo vagana ua taofia taumafaiga e fesoasoani ai.

O le faataitaiga sili lava o le mana o le Silisiliese ua tatou vaaia i aso nei o le faaolaina lea o agaga o tagata mai le pogisa faaleagaga i le malamalama faaleagaga. Sa ou vaai ma faalogo i lenei lava vavega talu ai nei ina ua lauga se alii e ala i lana lava talosaga i le sauniga o le maliu o lona tina; o lenei alii e le fautuaina i le tele o lona olaga ma ua oo nei i le taulotoaiga o lona olaga. O lona tama ma lona tina, sa usiusitai i le faatonuga a le Alii, sa faamaoni i le aoaoina o la laua fanau e aofia ai ma lenei atalii, o le sa tetee ma le malosi ma le faalemigao i a laua taumafaiga uma. E ui i lenei feteenaiga, sa faaaauu pea e le tamā lana matafaioi o se tamā faamaoni e pei ona tatau ai; e le gata i le aoao atu, ae i aso sa uma e anapogi ma tatalo, e faapitoa lava mo lenei atalii faalogogata. Sa faaalua i le tamā i se miti, e foliga mai o loo faamautinoa atu ai ia te ia, o lona atalii lē taupulea o loo savali i se puao mafafafia. I lena miti sa ia vaaia ai lena atalii o savali ese mai le puao agai atu i totonu o le susulu o le malamalama o le la, ua faamamaina e ala i le salamo a’ia’i. Sa matou vaaia lena atalii ua avea ma se alii ua sui ma faamanuiaina i nisi

o faamanuiaga silisili a le Alii i totonu o le Ekalesia ona o ona matua faamaoni e le i mafai ona toilalo ia te ia.<sup>19</sup>

O lenei, ou te fia tau atu ia te outou tina le mea lenei: Aua lava nei outou faavaivai i lona tama po o le teine [faalogogata]; e i ai se aso o le a pei o ia o le atalii faamaumauoa, e toe foi mai i le fale sa ia ola ai, e pei o se vaa i se afa ua toe foi i le uafu saogalemu.<sup>20</sup>

I le avea ai ma se talavou e ono mafai ona faatetea se tasi mai i aafiaga lelei o se aiga ma avea ai ma se tasi faatamala ma le faalogogata; ae afai sa faamautuina i lona loto aoaoga lelei a lona tina ao avea o ia ma se tamaitiiti, o le a ia toe foi mai ia i laua mo le saogalemu, e faapei o se vaa ua toe foi mo se taula malupui-puia i le taimi o se afa.<sup>21</sup>

Aua lava nei fiu i le tama po o le teine i lona tulaga matautia o le [manatu faapito] o loo ui ai nisi e toatele o le tupulaga. Ou te aioi atu ia te outou mo na tama ma na teine. Aua lava nei outou fiu i lona tama po o lona teine i lona tulaga e le tatau ai o le tutoatasi ma le le amanaiaina o aoaoga lelei faaleaiga. Aua nei outou fiu i lona tama po o le teine pe a faali mai se tulaga faateia o le le magafagafa. O le tagata e manatu na te iloa mea uma, ma faalagolago ia te ia lava, e le manao lava i se fautuaga, e manatu o ia ua na o se lauga a se toeaina e leai sona malamalama i le tupulaga. . . .

Sa i ai se atalii o le ma tama sa faamisiona i le Misiona i Peretania i Matu. E lei leva ona i ai o ia iina ae tusi mai se tusi malie lea sa ia faapea mai ai, ua toe foi uma mai lava fautuaga a ona matua ma se uunaiga malosi. E faapei o se tusi sa taatia i luga o se fata tusi mo le sefuluiva tausaga ae o lea faatoa ia toe aumaia i lalo ma amata ona faitauina mo le taimi muamua. E faapena lou atalii ma lou afafine. E faapea outou e le o faalogo mai i latou. Atonu latou te manatu ifo e le o faalogo i latou, ae e i ai se taimi e avea ai a outou fautuaga ma tusi latou te tuu ifo i lalo ma toe faitau pe a oo i le taimi e manaomia tele ai.

E i ai ni malosiaga e oo mai ina ua mavae ona faia e matua mea uma latou te mafaia e aoao ai a latou fanau. O lenei malosiaga sa aafia ai Alema le itiiti, o le, sa i ai faatasi ma atalii o Mosaea, ao sauni atu e faaleaga le galuega a o latou tamā maoae. O se agelu,

pei ona outou manatua, sa auina mai, ma ia taia Alema ma pau ai i lalo. Sa taoto Alema e peiseai ua oti mo aso e tolu ma po, ma sa faapea mai le agelu:

“Faauta, ua faafogogaina e le Atua talosaga o lona nuu, atoa foi ma talotaloga a lana auauna o Alema, o lou tama lea. Aua ua tatalo o ia ma le faatuatua tele ona o oe, ina ia aumaia oe i le malamalama o le upu moni; o le mea lea na ou sau ai e faamautinoa ia te oe le mana ma le pule a le Atua, ina ia talia talosaga a na auauna, e tusa ma lo latou faatuatua.” (Mosaea 27:14)<sup>22</sup>

Atonu e le o i ai se tina po o se tama e le i faapea, “Ia fesoasoani mai le Alii ia te au ia ou ola i le ‘luasefulu lima’ itula i aso taitasi e ofo atu atoa lo’u ola i le tulaga faatina ma le tulaga faatama ina ia leai se tasi o la’u fanau e faapea ifo ma le sao ou te lei faia mea uma i lo’u malosi e faatauanau ai o ia e aloese mai i le leaga.” O nisi o a tatou fanau o loo tumau ma faamaoni, ma e i ai foi nisi ua amata ona sese ese, ma o nisi taimi tatou te le malamalama pe aisea. Ae peitai talosia ia tonu ia i tatou o matua i lenei aso o le a tatou ola latalata i a tatou fanau, o le a tatou tala-talanoa faatasi ma i latou, o le a tatou tuuina atu ia i latou le faavae papa o mataupu faavae o upu moni faalelagi.<sup>23</sup>

## **Fautuaga mo Suesuega ma Talanoaga**

---

- I le avea ai ma matua, o le a se mea sa fesoasoani ia te oe e faamalosi ai le alofa i le va o oe ma lau fanau? E mafai faapefea e matua ona uai atu i manaoga faapitoa o fanau taitoatasi?
- Pe aisea e tatau ai i matua ona faailoa atu e le aunoa le faaaloalo mo tagata taitoatasi i nofoaga faitele ma totonu o le aiga?
- E mafai faapefea e matua ona faamalosi le le manatu faapitoa ma le ositaulaga mo le lelei o isi i totonu o o latou aiga?
- Aisea e taua ai i matua le alofa i a latou fanau e tusa lava pe o i latou o ni tagata e toetoe a lē alofaina? O a ni ala e mafai ai e matua ona faaali atu lo latou faamaonia o mea lelei o faia e a latou fanau?
- E mafai faapefea e matua ona faapaleni manaoga o le aiga, ekalesia, ma galuega?

- O le a sou manatu o le a le uiga o le saunoaga lenei a Peresitene Lee, “O le galuega sili ona taua a le Alii e te faia o le galuega lea e te faia i totonu o puipui o lou lava fale?”
- E faapefea ona fesoasoani le talalelei i matua e taofia a latou fanau mai le sese ese? Aisea e taua ai le iloa tusa lava pe tatou te faia mea uma tatou te mafaia, ae e ono mafai lava ona faia e a tatou fanau ni faaiuga sese? O a ni faamautinoaga ua tuuina mai e le talalelei mo matua faamaoni o faaauau pea le alofa ma galulue faatasi ma a latou fanau?

### *Faamatalaga*

1. Faamatalaga a niusipepa mo Konafesi Faa-Eria a Mekisiko ma Amerika Ogototonu 1972, 2.
2. *The Teachings of Harold B. Lee*, ed. Clyde J. Williams (1996), 281.
3. I le Conference Report, Oct. 1948, 52, 55.
4. *The Teachings of Harold B. Lee*, 271.
5. *The Teachings of Harold B. Lee*, 296.
6. *The Teachings of Harold B. Lee*, 296.
7. *The Teachings of Harold B. Lee*, 606.
8. I le Conference Report, Konafesi FaaEria Munich Siamani 1973, 112.
9. Laugaina i le konofesi aoao a le Aoga Sa, 5 Oke. 1973, Matagaluega o Faamaumauga o Talafaasolopito, O le Ekalesia a Iesu Keriso o le Au Paia o Aso e Gata Ai, 7–8.
10. *The Teachings of Harold B. Lee*, 296.
11. *The Teachings of Harold B. Lee*, 199.
12. *The Teachings of Harold B. Lee*, 279–80.
13. *The Teachings of Harold B. Lee*, 279.
14. *The Teachings of Harold B. Lee*, 279.
15. *The Teachings of Harold B. Lee*, 613–14.
16. *Decisions for Successful Living* (1973), 24.
17. *The Teachings of Harold B. Lee*, 280.
18. *The Teachings of Harold B. Lee*, 278.
19. *The Teachings of Harold B. Lee*, 278.
20. *The Teachings of Harold B. Lee*, 279.
21. *The Teachings of Harold B. Lee*, 287.
22. *Ye Are the Light of the World* (1974), 275–76.
23. *The Teachings of Harold B. Lee*, 276.



# O Aafiaga Amiotonu o Tina

*E mafai faapefea ona faataunuuina e tina o latou tiutetau-ave paia o le aoaoina ma le faafaileleina o a latou fanau?*

## Faatomuaga

Sa faamatalaina e Peresitene Harold B. Lee se tina ao ia faaiilaina ni ipu siliva i sauniuniga mo se taliga malo i lena afiafi. “I le totonugalemu o ana sauniuniga, sa sau ai ia te ia lana tama tama laitiiti e valu tausaga le matua ma lana pusa e teu ai sene ma faapea atu i lona tina, ‘Tina, e faapefea ona totogi lau sefuluai?’

“Ma mai i taimi uma sa le manao ai e faalavelaveina, o le taimi lava lea, ae sa solo ona lima ma ia nofo ifo i lalo; sa la’ua luluina i lalo sene, ma tai lima sene, ma tai sefulusene mai le pusa sene ona ia faamatala atu lea o le ala e totogi ai lana sefuluai. Ina ua maea, sa fusi e le tamaitiiti le ua o lona tina ma faapea atu, ‘Oi, faafetai lava, Tina i lou fesoasoani mai ia te au; o lea ua ou iloa nei le totogiina o lau sefuluai.’”

O se manatu e uiga i le mea na tupu, sa faia e le tina se tala e “matua taua tele mo tina uma . . . e manatua, ‘Ioe, i lou olaga atoa o le a maua taimi e polesi ai siliva, ae atonu na o le pau lenei o le taimi o le a ou maua e aoao ai lou atalii i le mataupu faavae o le sefuluai.’”<sup>1</sup>

Sa aoao mai Peresitene Lee e faapea “o le tulaga faamanuiaina faatina i aso nei e au tausagā ma e faavavau.” Sa ia faamamafa mai o se faamoemoega mamalu o se tina “o le fausiaina lea o se aiga iinei ma faataatia se faavae mo se aiga i le faavavau.”<sup>3</sup>

## Aoaoga a Harold B. Lee

---

### E mafai faapefea e tina ona maua se aafiaga amiotonu mo a latou fanau?

E i ai i totonu o le fafine le mana o le foafoaga e tuufaatasi ma lana tane faatagaina faaletulafono iinei, ma afai e faamauina i se faaiipoipoga faa-selesitila, o le a mafai ona ia maua ni fanau i le lalolagi a sau. O le fafine o le fatuaiga i lona lava aiga ma o se faaa'oa'o i lana fanau i augatupulaga o le a suitulaga ia te ia. O le fafine o se fesoasoani i lana tane ma e mafai ona tuuina atu ia te ia le atoatoa sili nai lo o le tane. O aafiaga o le fafine e mafai ona faamanuiaina ai se afioaga po o se atunuu e oo i le tulaga ua ia atinaeina ai lona mana faaleagaga e o gatasi ma meaalofo faalelagi ua faapaiaina ai o ia i le natura. . . . I tausaga uma o lona olaga, e mafai ona faalauteleina ona aafiaga lēgaoia ma le mama ina ia e mautinoa o le a fafia lana fanau i avanoa e atinae ai i le atoatoa o o latou malosiaga faaleagaga ma natura faaletino.<sup>4</sup>

O tina o ni foafoa o le siosiomaga i totonu o le aiga ma faia mea e tele e faatu ai le faavae malosi mo o latou atalii ma afafine, e tuuina atu ia te i latou le malosi pe a tuua aafiaga o o latou aiga.<sup>5</sup>

Tina, ia e nofo i le fetaulaiga ala o le aiga. I se taimi ua tuuina atu, sa ou auai i se konafesi faalekuata a le siteki. . . . Sa ou faapea atu i le peresitene o le Siteki, . . . “O i ai ni tina iinei, o se tina ua matua, o se tasi o i ai ia te ia se aiga toatele ma e i ai le olioli e vaaia i latou taitoatasi o faaiipoipo i totonu o le malumalu?”

Sa ia tilotilo atu i le aofia ma ia faapea mai, “Lelei, o tuafafine (o le a ou faaigoaina ia Tuafafine Sione), na i ai ia te ia se aiga e toasefulutasi, ma ua faaiipoipo i latou uma lava i le malumalu”. . . .

Ma ao tu lenei tina lalelei laulu sinasina i ou tafatafa, sa ou fai atu, “E mafai ona e faamatala mai ou aafiaga, ma pe o le a le mea na e faia ina ia ausia ai lenei tulaga matagofie ua faataunuaina?”

Ma sa ia tali mai, . . . “E mafai ona ou tuuina atu ni manatu se lua. O le mea muamua lava, ao tuputupu ae lo matou aiga, sa





O tina faamaoni i le lalolagi atoa o loo faia mea uma latou te mafaia, e ala i a latou taumafaiga alofa ma le le faavaivai, ina ia mautinoa o a latou fanau “o le a fiafia i avanoa uma e atinae ai o latou malosiaga i le mea e gata mai ai”

masani lava ona ou i ai i le fetaulaiga ala o lou aiga ao o mai ma o ese atu lau fanau mai le aiga. Ma lona lua: soo se mea matou te faia e fai faatasi o se aiga. Matou te taaalo faatasi, matou te tatalo faatasi, matou te galulue faatasi, matou te faia faatasi mea uma. Ou te matea ua na o le pau na o mea e mafai ona ou mafau-fau i ai.”

Sa ou faapea atu ia te ia, “O lea ua e aoao mai ni lauga sili se lua.”<sup>6</sup>

Ia tuu le tina o lou aiga i le “fetaulaiga ala” o le aiga. O loo i ai se tulaga faigata tele i aso nei i aiga ua malepelepe ona o faato-sinaga ua tosina ai tina ia lē i ai i le fale ao omai pe o ese atu tagata o le aiga mai le fale. O lea, ua ou iloa e tatau i nisi tina ona saili ni mea taumafa mo o latou aiga. Ae ui lava i lea, o Peresitene o Aualofa ma Epikopo e tatau ona faaeteete ina nei tei ua latou faatamala i le ofoina atu o fesoasoani uma e tatau ai mo le tina o fanau laiti ma fesoasoani ia te ia, pe a tatau ai, i le fuafuaina o

natura o galuega poo le faatulagaina o taimi. O lenei mea atoa o loo taoto i totonu o le eria a le Aualofa o loo galulue ma le aiga.<sup>7</sup>

O le taimi nei, ou te lagona, ua aafia fua tina i le televave naua o le olaga faaona po nei. O le atiinaae o o latou tulaga lelei faatina, ma le mafutaga vavalalata ma a latou fanau, e mafai ai ona latou vave iloa faailoga o faafitauli, o faigata ma mala, ma foia ai loa lava ina ia le oo ai i ni tulaga pagatia.<sup>8</sup>

Sa ou toe faitau i le isi aso i upu a le tina paia o le Perofeta o Iosefa i le po a o agai atu e aumai papatusi. Sei ou faitauina atu ana tusitusiga:

“O le po o le [aso 2 o Setema ] sa umi ona ou ala. . . . ou te lei moe seia tea le sefululua i le po. Pe o le ta o le sefululua sa sau ai Iosefa ma fesili mai ia te au pe e i ai sau pusa lavalava e i ai se loka ma se ki. Sa ou iloa vave lava le mea sa ia manao e faaoga iai, ma ona o le leai o se mea sa ou popole tele ai, ao ou mafau-fau o se mea e ono taua tele. Ae peitai, sa iloa e Iosefa lou atu-atuvale, ma faapea mai, ‘Aua le popole, e mafai lava ona lelei mea uma mo le taimi nei e aunoa ma lea mea—ia filemu—o lo’o lelei mea uma.’

“Mulimuli ane, sa pasi ifo le toalua o Iosefa i le potu ma lona pulou ma ona lavalava tietie solofanua, ma i nai minute sa la’ua o ese atu loa faatasi, i le solofanua ma le taavaletoso a le Susuga a Knight. *Sa alu le po o o’u tatalo ma ole atu i le Atua, aua ua le mafai ona ou moe ona o lo’u popole. . . .*” [Lucy Mack Smith, *History of Joseph Smith*, ed. Preston Nibley (1958), 102.]

Ou te fai atu ia te outou tina, afai e i ai ni o outou atalii ma afafine pe a tuufaatasi i le tulaga e tatau ona latou i ai i le lalolagi, o le a lē o se galuega itiiti, aua ua i ai i lau fanau se tina na te faaaluina le tele o po i ona tulivae i le tatalo, e tatalo i le Atua ina ia lē toilalo lona atalii, po o lona afafine. Ou te manatua i taimi o le valea o lou olaga talavou, e sau ia te au lou tina ma se lagona mai le loto ma se lapataiga ae ou te lē ano i ai e pei lava ona faia e talavou vaivai. “Oi, tina, e valea lena manatu,” Ou te fai atu, e le i atoa se masina, ae feagai loa ma le tofotofoga e uiga i le mea sa lapatai mai ai tina. Ou te le i mauaina lava se lototoa e toe foi atu ai ia tina e ta’u i ai lona sa’olele, ae peitai sa puipuia au aua sa lapataia au e se tagata—o lo’u lava tina.<sup>9</sup>

O lo matou aiga sa aofia ai lo'u tinamatua, o lo'u tina, ma le toalua pe toatolu o le fanau laiti sa nonofo i luma o se faitotoa sa matala, ma matamata i le faaaliga o galuega matautia faanatura a o matamataita mai le agi o le afa ma faititili i tafatafa o mauga sa tu ai lo matou fale. O le emo faalausosoo o le uila ma le pa leotele faafuasei o le faititili na iloa ai e matua latalata mai lava le emo o le uila.

Sa ou tu i le faitotoa ae faafuasei loa ona tulei malosi au e lo'u tina ma ou pau taliaga ese atu ai mai le faitotoa. I le taimi lava lena, sa oo mai ai ma se pulu uila mai le alaasu o le ogaumu o le umukuka, ma alu atu ai i fafo i le faitotoa sa matala, ma tosilua-ina ai se vete mai luga e tau mai i lalo o se laau tele i luma o le fale. Ana ou tu i le faitotoa na matala, semanu ou te le o tusiaina lenei tala i le aso.

E le mafai e lo'u tina ona ia faamatalaina lana faaiuga faafuasei. Pau le mea ou te iloa na faasoina lo'u ola ona o lana gaioiga mata'alia ma le musuia.

I tausaga mulimuli ane ai, pe a ou vaai i le ma'ila tele i luga o lena laau tele i le matou fale tuai, e na o le loto faafetai lava e mafai ai ona ou faapea atu: Faafetai i le Alii mo lena meaalofa taua o loo umia i se tulaga faateleina e lo'u lava tina ma le toatele o isi tina faamaoni, o i latou ia e mafai ai ona latalata mai le lagi i taimi e manaomia ai le fesoasoani.<sup>10</sup>

---

**E mafai faapefea e tina ona faataunuuna lo latou tiutetauave mo le aoaoina o le talalelei i a latou fanau?**

O le fatu o se tina o se faleaoga a se tamaitiiti. O faatonuga e maua e fanau mai i o latou tina, ma lesona faamatua faatasi ma le matau i le Atua ma manatunatuga suamalie o faeasaite, e le mafai ona tineia mai le agaga.

Sa faapea mai se tasi o le faleaoga e aupito sili ona lelei mo le amio pulea lelei, o le aiga, aua o le olaga faaleaiga o le ala lava lea a le Atua e aoaoina ai fanau laiti, ma o aiga e faalagolago tele i mea e faia e tina.<sup>11</sup>

O le a la le tiutetauave o le tina, i le galuega tele o le malo? O lona tiutetauave muamua ma le sili ona taua o le manatua lea o aoaoga a le talalelei i totonu o le aiga.<sup>12</sup>

[Ou te fia agai i le] tulaga o se tina i le aoaoina o lona aiga . . . .  
Sa fetalai le Alii:

“A e peitai faauta, ou te fai atu ia te outou, na togiolaina tamaiti mai le faavaeina o le lalolagi i lou Atalii e Toatasi na ou fanaua;

“O le mea lea, e le mafai ai ona agasala i latou, aua e lei tuuina atu le mana ia Satani e faaosooso i tamaiti, vagana ona ua amata ona tatau ia te au ona sueina a latou amio i ou luma;

Aua ua tuuina atu ia te i latou e tusa i lou loto, e tusa i lau lava filifiliga, ina ia sueina mea sili mai i o latou tama.” (MFF 29:46–48.)

. . . O a na mea sili o loo sueina mai e le Atua i tama o fanau (o lona uiga, e aofia ai ma tina) i lenei vaitaimi a o le i amata ona sueina amio a fanau laiti i luma o le Alii? . . . Na faatonuina matua ina ia papatisoina a latou fanau pe a valu tausaga le matutua ma ia aoao i latou i mataupu faavae o le talalelei. O a latou fanau o le a papatisoina mo le faamagaloina o a latou agasala ma maua ai lea o le faaeega o lima. E ao ona aoaoina i latou e tatalo ma savavali tonu i luma o le Alii.

E maoae ni faatinoga o loo manaomia mai tama ma tina ao lei i ai ia Satani le mana e faaosooso ai tamaiti laiti. O le matafaioi lava a matua o le faataatia o se faavae mautu e ala i le aoaoina atu i ai o tulaga faatonuina faaleEkalesia e ala i faaaoaoga ma mataupu.

Mo tuafafine, o le uiga o lenei mea, e tatau ona latou faia o se galuega le tulaga faatina. E le tatau ona latou faatagaina soo se mea ia sili atu i lenei galuega.<sup>13</sup>

Talu ai nei sa ou tau ai i se tautalaga sa tuuina atu e se tasi o ou afafine i se faapotopotoga o tina ma fanau teine. Sa ia faamatalaina se mea na oo i ai i lana tama ulumatua, o le sa amata ona aoaoina o ia i tiutetauave e tatau ona ia faia o se tina. Sa ia faapea, “I ni tausaga se tele talu ai, ina o laitiiti la’u tama tama matua, sa ou pisi lava i se tasi po o le taumafanafana ina ua uma aiga o le afiafi, e faauma ona utu fagu ni fualaaui aina suamalie.” Ou te mautinoa e mafai ona vaai faalemafaufau outou na tina talavou i lona vaaiga. O mea uma lava e tutupu i lona aso ina ia taofia mai ai oe mai le faamaeaina o lona galuega ae e te manao e faauma. O lenei la ua filemu le pepe mo le po ma ua malaga lou toalua i lana fono i le taimi atofaina, o lau fanau e tolu ma le fa tausaga le matutua ua toeitiiti uma le faiga o la ofu moe ma ua

sauni e momoe. Ona e mafaufau ifo lea ia te oe lava, “Ia, o lea la o le a ou oo atu loa i na fualaaui aina.”

[Sa faaauau le tala a lo’u afafine:] “O le tulaga lea sa maua ai au i lena po ao amata ona fofoe fualaaui aina, ae tutu mai la’u fanau tama laiti e toalua ma faailoa mai ua sauni e faia a laua tatalo.” Ae peitai, ona o le lē manao e faalavelave atu, sa ia faapea vave atu ai i lana fanau tama, “Ia, ae a pe a oulua tamomoe i totonu e fai a oulua tatalo na o oulua ae galue atu Tina i le faiga o fualaaui aina nei?” Sa tatu vae laiti o Tavita, le ulumatua i ou luma ma fesili mai, ae le o ita, ‘Ae, Tina, o le fea le mea e sili ona taua, o le tatalo po o le fualaaui aina?” Ou te le i iloa i lena taimi, i le avea ai ma se tina talavou ma se ava e pisi, o le a tele ni tulaga faigata i lo’u olaga i le lumanai a o ou tauaveina lenei matafaioi o se ava ma se tina i lo’u aiga.”

O le luitau lena o loo ia te outou o tina pe a faatauanau outou e fanau laiti e tutu atu ma fesoasoani i lo latou tuputupu ae. . . .

Tina, pe a amata ona fesiligia outou e a outou fanau i ni fesili, tusa lava pe faatatau i mea tuga o le olaga, aua nei tutuli esea pe faatuatuanai ia i latou. Faaalu se taimi e faamalamalama ai i o latou mafaufau faatamaiti, a o latou tuputupu ae, ma le taimi ua matutua o latou mafaufau. O se tina manumalo o se tasi lea e le mafai ona fiu i ona atalii ma afafine pe a o mai ma fetufaa’i mai ia te ia lo latou olioli ma o latou faanoanoaga.<sup>14</sup>

Ou te tatalo ina ia i ai faamanuiaga a le Alii i luga o outou [ou tuafafine pele]. O loo ia te outou se mana sili atu mo le tulaga sologa lelei o lenei Ekalesia nai lo se manatu o ia te outou. Pe faapefea ona faataunuuina a outou matafaioi o le avea ai ma tina, o le a fuafua tele i ai le agai i luma o le Ekalesia. Ia fesoasoani le Alii ia te outou ia faia ma fausia i luga o se faavae mautu o le aiga, o lau tatalo faamaualalo lea, ma e tuuina atu lau molimau faamaualalo o totonu o le Ekalesia a Iesu Keriso e maua ai aoaoga ma fuafuaga e mafai ai ona malu puipuia ma saogalemu le aiga, ma ou te tuuina atu ai lena molimau i le suafa o Iesu Keriso.

## Fautuaga mo Suesuega ma Talanoaga

---

- O a ni taulaga e faia e tina mo lana fanau? O a ni faamanuiaga e maua mai i nei taulaga?
- O a ni ala e faamanuia ai e se “tulaga faatina faamanuiaina o aso nei” tupulaga o le lumanai mo le faavavau?
- O le a le uiga o le i ai i fetaulaiga ala o le aiga? Aisea e taua ai i tina ona i ai i fetaulaiga ala o olaga o a latou fanau?
- E faapefea ona o ese mai tamaitai mai o latou faamoemoega paia e ala i faatosinaga ma le tele vave o le olaga i ona po nei? E faapefea ona faaitiitia nei faatosinaga?
- O le a se mea o aoao mai i tala e uiga i le tina o Iosefa Samita ma le tina o Peresitene Lee i le ala e mafai ai e tina ona avea ma aafiaga amiotonu i le fanau?
- E faapefea ona faamanuiaina lou olaga i tatalo a lou tina? E faapefea e au tatalo i le avea ai ma se tina ona faamanuiaina lau fanau?
- O a ni ala e mafai ai e tane ma tama ona fesoasoani i tina i le faataunuaina o a latou matafaioi i totonu o le aiga?
- Aisea e ao ai i tina ona ave le faamuamua maualuga i a latou matafaioi e aoao le talalelei i totonu o le aiga? E faapefea ona faia e tina ia mea?
- O a ni ala e mafai ai e matua ona saunia a latou fanau teine e avea ma ni tina lelei?

### Faamatalaga

1. I le Conference Report, Konafesi FaaEria o Mekisiko ma Amerika Tutotonu 1972, 91.
2. *The Teachings of Harold B. Lee*, ed. Clyde J. Williams (1996), 288.
3. *Ye Are the Light of the World* (1974), 317–18.
4. *Ye Are the Light of the World*, 318–19.
5. *The Teachings of Harold B. Lee*, 289.
6. “Obligations of Membership in Relief Society,” *Relief Society Magazine*, Ian. 1969, 10.
7. *Ye Are the Light of the World*, 279.
8. *The Teachings of Harold B. Lee*, 288.
9. “The Influence and Responsibility of Women,” *Relief Society Magazine*, Fep. 1964, 85.
10. *The Teachings of Harold B. Lee*, 290–91.
11. *The Teachings of Harold B. Lee*, 289.
12. *The Teachings of Harold B. Lee*, 287.
13. *Ye Are the Light of the World*, 314–15.
14. I le Conference Report, Konafesi FaaEria a Mekisiko ma Amerika Tutotonu 1972, 90–91; palakalafa faaopoopo.
15. I le Conference Report, Konafesi FaaEria a Mekisiko ma Amerika Tutotonu 1972, 91.



# Tutu faatasi e Laveai Agaga

*E faapefea ona fesoasoani aoaoga faavae o le talalelei ma le aiga ona galulue faatasi e faaolaina agaga?*

## Faatomuaga

**A**o auaua Harold B. Lee o se tasi o le Korama a le Toasefululua, sa tofia o ia e le au Peresitene Sili e vaaia atoa se taumafaiga ina ia taulai uma polokalama a le Ekalesia i le faamoemoega laualuga o le talalelei a Iesu Keriso—ia “faataunuu le faaofuina o le tagata i le tino ola pea ma le ola faavavau” (Mose 1:39). O lenei taumafaiga sa taua o le faamaopoopoga. O le faamaopoopo e aofia ai le faamamafaina o le taua o le aiga ma le auaga e ala lea i le faamautinoaina o faamalolosia ma lagolago le aiga e ausilali, polokalama, ma gaoioiga. E aofia ai foi le faatulagaina o faalapotopotoga uma ma galuega a le Ekalesia i lalo o le taitaiga a le perisitua. I le 1960, e tele ni laasaga sa faia e faataunuu ai nei faamoemoega, e aofia ai le toe faamamafaina o afiafi faaleaiga ma le toe iloiloaina o faasologa o polokalama o le Ekalesia ina ia mautinoa o malosi le aiga. E faauau lava i aso nei le galulue faatasi i le Ekalesia i lalo o le taitaiga a le Au Peresitene Sili, i le mulimulitai lea i aoaoga faavae sa faaalua mai e le Alii.

Sa aoao mai Peresitene Lee: “O mea uma tatou te faia e tatau ona faia ‘ma le manatu tasi i le mamalu o le Atua.’ [MFF 82:19.] Ma o le a le mamalu o le Atua? E pei ona faamalamalama e le Alii ia Mose, o le faataunuuina lea o le faaofuina o le tagata i le tino ola pea ma le ola faavavau. . . . I a tatou taumafaiga uma i le . . . polokalama faamaopoopo tatou te teuina pea nei mea tatou te maitauina i o tatou mafaufau. I se faaupuga faigofie, o o tatou faamoemoega tupito i le faamaopoopoga, o le faagaioioia lea o le perisitua e pei ona faamanino mai e le Alii, faatasi ai ma faatulagaga a ausilali e fesootai lelei i ai, ma lona lua ia

faalautetele e matua ma aiga o latou valaauga e pei ona poloai-ina ai e le Alii. Ma ua tatou vaai o mea uma tatou te faia e ao ona faia ma le fesili e tasi i o tatou mafaufau: pe o lenei gaioiga o faatuputeleina ai le mea o faananau i ai le malo, pe o tasi ea o tatou manatu i lena faamoemoe faavae o le faalapotopotoga a le Alii—ia faaolaina agaga ma aumaia le tino ola pea ma le ola e faavavau i tagata?”<sup>1</sup>

## Aoaoga a Harold B. Lee

---

### E faapefea ona fesoasoani le Ekalesia ia “faataunuu le faaofuina o le tagata i le tino ola pea ma le ola faavavau”?

Ina ia saunia i tatou mo le taliaina i le afioaga o le Alii, o loo i ai ia te i tatou se Ekalesia. O le a le mea sa ta’ua e le Aposetolo o Paulo—Sa latou tuuina mai foi nisi e fai ma aposetolo, o perofeta, epikopo, aoao, evagalia—i se isi faaupuga, e faatuina le Ekalesia—mo le a? “Ina ia faaatoatoaina ai le au paia, latou te fai ai le galuega a auauna, ia atiina ae ai le tino o Keriso; seia tatou oo atu o i tatou uma lava ma le loto gatasi i le faatuatua ma le iloa lelei o le Alo o le Atua, ina ia fai ma tagata matua.” [Tagai Efeso 4:11–13.] Sa silafia e le Alii tatou te le atoatoa, ma o lea na ia tuuina mai ai le Ekalesia e fesoasoani ia i tatou ia avea ma tagata atoatoa.<sup>2</sup>

O le faamoemoega o le Ekalesia e le na ona faatuina o se faalapotopotoga lautele pe avea ma ona faamoemoega se isi lava mea e ese mai i le faaolaina o agaga.<sup>3</sup>

O le faamoemoega [o le Ekalesia o le] faaatoatoaina lea o olaga o i latou ua avea ma tagata o le Ekalesia. . . . O le faamoemoe ia aoao tagata ua auai, o le tino po o tagata o le Ekalesia i mataupu faavae ma aoaoga o i ai, e mafai ona o mai tagata i se lotogatasi o le faatuatua ma se malamalama e uiga i le Alo o le Atua seia oo ina atoatoa, o le malamalama lea, e tusa ai ma le finagalo o le Matai Lava Ia, a o Ia tautino mai i lena tatalo [lauiloa] i totonu o le Feagaiga Fou, “O le ola e faavavau foi lenei, ia latou iloa oe le Atua moni e toatasi, atoa ma le ua e auina mai, o Iesu Keriso lava lea.” (Ioane 17:3).<sup>4</sup>

Aisea e tatau ai ona manatu e uiga i faatulagaga?. . . Tatou te faatulaga ina ia sili atu ona lelei ma faigofie le faiga o le galuega a le Alii e ala i le faamatuu atu o tiutetauave i isi. Tatou te faatu-



laga ma faia le galuega a le Alii ia faigofie ma sili atu e ala i le talia ma le faataunuaina o tiutetauave, ia e maua mai ai taitai i tagata o le ekalesia. E faapei lava ona fetalai mai le Matai a o Ia tuuina atu i Ona au soo le poloaiga lenei e tasi- -“Ina mulimuli maia ia te au, ou te faia ouluga ma faifaiva i tagata” - -e mafai ona faapea a o tatou faia i aso nei- -“Afai tou te tausia au poloaiga, o le a ou faia outou ma taitai o tagata ma taitai i lo’u nuu.”<sup>5</sup>

O le ekalesia ma le malo o le Atua o se ekalesia mo le lalolagi atoa ma e le faapitoa i se atunuu po o ni ituaiga tagata e tasi. O a tatou taumafaiga o le tuuina atu i le Au Paia uma a Le Silisili i soo se mea o nonofo ai, avanoa uma e ola ai ma atinae i le atoatoa e mafai ai, e atinae i le malosi ma i le mana mo le lelei i le laueleele ma maua le tau i o le faamaoni.<sup>6</sup>

---

**Aisea e taua ai ona faamalosia le aiga i soo se mea  
tatou te faia i totonu o le Ekalesia?**

O fea o i ai le laina muamua o le puipuiga i totonu o lenei ekalesia? Pe o le Peraimeri? Pe o le Aoga Sa? E leo le ala lena na faali mai e lo tatou Tama Faalelagi. Toe faitau le vaega e onosefulu valu o le Mataupu Faavae ma Feagaiga. O le a outou maua e tuuina e le Alii le laina muamua o le puipuiga, o le aiga, i luma o le tafa o le taua faasaga i mana ia o le a ono faatoilaloina nei puipuiga le aiga. (tagai MFF 68:25–32).<sup>7</sup>

O polokalama a le au perisitua e faagaioia e lagolagoina ai le aiga; o polokalama a ausilali e ofoina atu ai fesoasoaniga taua. E mafai e taitai o le perisitua atamamai ona fesoasoani ia i tatou e faia la tatou vaega i le faataunuaina o le faamoemoega tupito o le Atua, “ia faaofuina le tagata i le tino ola pea ma le ola e faava-vau” (Mose 1:39). Ua tauina mai ia i tatou e faaaliga a le Atua ma le aoaoina o tagata le taua o le aiga i le foafoaina o le potomasani o le olaga atoa faaletagata. . . . o le tele o mea o loo tatou faia faale-faalapotopotoga, e fausia ai se faatulagaga lagolago ao tatou saili e galueaiina le tagata, ma e tatau ona aua nei faagaloina le faatulagaga lagolago mo le agaga.<sup>8</sup>

O le aiga [o le] faatulagaga aupito muamua lava lea ma le taua a le Atua. Na tuuina mai le ki o a tatou polokalama faamaopoopo uma e le Au Peresitene Sili ina ua latou tautino maia mataupu

faavae aupito taua e tatau ona tatou galulue i ai: “O le aiga o le faavae o le olaga amiotonu, ma e leai lava se isi mea faigaluega e mafai ona suia lona tulaga pe faatinoina lana matafaioi taua. O le mea sili e mafai ona faia e ausilali o le fesoasoani lea i le aiga i ona faafitauli, ma tuuina atu fesoasoaniga faapitoa ma fesoasoani i le mea o manaomia ai.”

O lona uiga, faatasi ai ma lona manatu, o gaoioiga taitasi i totonu o le Ekalesia e ao ona fuafua ina ia faamalolosia—ae ia le toese mai ai—le galueaiina o se aiga faatulagaina lelei. Afai e vai-vai le taitaiga faamatua, e tatau i faiaoga o aiga o le perisitua ma ausilali ona tuuina atu taitaiga e tatau ai. O lona uiga i se tulaga taua o gaoioiga uma e faatulaga e le Ekalesia e tatau ona fuafua ma lenei manatu i le mafaufau, faatasi ma le faamamafa patino i le taua o le uunaiga o aiga taitasi e faia ma le faamaoni afiafi faaleaiga i vaiaso taitasi, ma uunaia ma faaaupegaina tama o umia le perisitua paia i le faataunuaina o o latou tiute e tatau ai a o avea ma ulu o o latou aiga.<sup>9</sup>

E le mafai e le Atua ona fesili atu i soo se tagata e faataulagaina lona aiga ina ia faataunu ai isi ona tiute i totonu o le malo. Ua fia taimi o matou taumafai e faamamafa atu o le galuega pito sili ona taua i le galuega a le Alii o le a tatou faia o ni tama ma ni tane o galuega ia tatou te faia i totonu o puipui o o tatou fale? O tama o loo i luga o le tofiga e tasi lea e le mafai ona faamalolo mai ai.<sup>10</sup>

Ao ou manatunatu i la tatou mea o loo fai nei ma lona aafiaga talafeagai, sa oo mai upu a le Perofeta o Mika, “A o aso e gata ai e oo ina faatumauina ai le mauga o i ai le fale o Ieova i tumutumu o mauga, e faamaufaailogaina foi ia sili i mauga iti, ona gasolo ane lea o nuu i ai.

“E o mai lava nuu ese e tele, ma latou faapea ane, O mai ia, tatou o ae ia i le mauga o Ieova, o le fale foi o le Atua o Iakopo; e aoao mai ai o ia ia te i tatou i ona ala, ona tatou savavali ai lea i ona ala; aua e alu atu le tulafono mai Siona, o le afioga foi a Ieova mai Ierusalema.” (Mika 4:1–2.)

Ou te fai atu ia te outou tina ma tama o le Au Paia o Aso e Gata Ai, afai tou te tutu atu i le matafaioi o le aoaoina o a outou fanau i le aiga—o korama a perisitua o loo sauniaina tama, o le Aualofa

o tina—o le a le pine ona oo mai lea o le aso e o mai le lalolagi atoa i o tatou faitotoa ma o le a faapea mai, “Faailoa mai ia i matou ou ala ina ia mafai ona matou savavali ai.”<sup>11</sup>

---

**E mafai faapefea e faatulagaga a ausilali ona galulue faatasi i lalo o le taitaiga a le perisitua e faamalosi ai le aiga?**

I se tulaga lautele lava, o le faamaopoopo o lona uiga. . . o le tuu lea o le perisitua a le Atua i le mea sa fetalai mai ai le Alii e tuu i ai. . . o le ogatotonu ma le autu o le Ekalesia ma le malo o le Atua—ma vaai i aiga o le Au Paia o Aso e Gata Ai o i ai foi o latou tulaga i le fuafuaga paia o le faaolaina o agaga.<sup>12</sup>

O lenei o i ai pea faatulagaga i totonu o le Ekalesia e ese mai faatulagaga faaleperisitua o faatulagaga faaleausilali, e pei ona taua i totonu o le Feagaiga Fou, “o e fesoasoani, o taitai” e pei ona faaopoopo i le perisitua [tagai 1 Korinito 12:28]. Sa saunoa Peresitene F. Samita e faatatau i nei faatulagaga: “O loo i ai i lou mafaufau a tatou faalapotopotoga; o a ia faalapotopotoga? O fesoasoani i le faalapotopotoga faatulagaina a le Ekalesia. E le tutoatasi i latou. Ou te manao e fai atu i Alii Talavou ma Tamaitai Talavou a le Mutuale (MIA), ma le Aualofa, ma le Peraimeri, ma le Aoga Sa, ma vasega Faalelotu ma isi faalapotopotoga uma i totonu o le Ekalesia, e leai se tasi o i latou e tutoatasi mai le Perisitua a le Alo o le Atua, e leai se tasi o i latou e mafai ona tu i se taimi puu-puu i le taliaina o le Alii pe a latou liliu ese mai le leo ma mai le fautuaga a i latou o umia le Perisitua ma pulefaamalumalu ia i latou. Latou te i lalo o mana ma le pule a le Ekalesia, ma latou te le tutoatasi na o i latou; pe mafai foi ona latou faaogaina soo se aia i totonu o a latou faalapotopotoga i se tulaga tutoatasi mai le Perisitua ma le Ekalesia.” [*Gospel Doctrine*, 5th ed. (1939), 383.]<sup>13</sup>

I le faaaliga sili o ona po nei e uiga i le faatulagaga o le Ekalesia, na faaiuina e le alii i lenei faamatalaga:

“Faauta, o le ala lenei na atiina ae ai e au aposetolo, i ona po anamua, lau ekalesia ia te au.

“O lea, ia taitoatasi le tagata ma tu ai i lona tofiga, ma galue i lona lava valaaulia, a ia le fai atu le ulu i vae e leai se aoga o vae; aua a leai ni vae o le a faapefea ea ona mafai e le tino ona tu?”

“E aoga foi i le tino itutino taitasi, ina ia atiina ae faatasi itu uma, ma tausia le tino ia atoatoa.” (MFF 84:108–110.)

Ua manino, ao e mafaufau e uiga i na tusitusiga paia, sa tuuina mai e faamautu ai le manaomia o talatalaga le masuia ma le faaaauu pea ma faamaopopoga o vaega eseese, le korama a perisitua ma ausilali ma isi iunite uma i totonu o le malo o le Atua mo ni mafuaaga se fa:

Muamua, e tofu faalapotopotoga taitasi ma ni galuega patino, ae ua le ina ia faoa ai le galuega a le isi, e faapei o le fai atu o le mata i lima, “e leai sou aoga.”

Lona lua, o vaega eseese taitasi e tutusa uma o latou taua i le galuega o le faaolataga, e pei lava o itutino taitasi o le tino faaletino e taua e faaatoa ai le tagata.

Lona tolu, ina ia malamalama mea uma ma aoaoina faatasi; ma le

Lona fa, ia mafai ona teuina ia atoatoa le faiga, po o se isi faaupuga, ina ia o gatasi ma le auivi o le fuafuaga a le Alii o faalapotopotoga mo le faaolataga o lana fanau, o le a faatino ai e le Ekalesia e faapei lava o le tino tagata ua faatulagaina atoatoa, faatasi ai ma itutino taitasi o loo galulue e tusa ma faamoemoega na faia ai i latou.<sup>14</sup>

O nisi taimi, i aso ua mavae, ua tatou liliu le faiga o mea, ma foliga mai ai ua tatou matele i polokalama ae le o le lafu [tagata o le Ekalesia]. Matou te uunaia tagata uma e aofia ai. . .ina ia mulimulita’i. . . i lena poloaiga aua o le faamoemoega atoa lena: “ia faaofuina le tagata i le tino ola pea ma le ola e faavavau” (Mose 1:39). Ia faifai pea, afai tatou te mananao i se fua e iloa ai po o aoga lea polokalama po o lena polokalama: pe o fesoasoani lenei polokalama i le alualu i luma o le tagata agai i lena sini o le ola e faavavau i le afioaga o le Tama? Afai e leai, ma e leai sona sootaga i ai, o lona uiga e leai se avanoa e uunaia ai lena polokalama i totonu o le Ekalesia.<sup>15</sup>

## Fautuaga mo Suesuega ma Talanoaga

---

- Aisea e taua ai i mea uma tatou te faia i le talalelei, ona tatou manatua le pogai tupito o le Ekalesia—“ia faataunuu le faaofuina o le tagata i le tino ola pea ma le ola faavavau”? (Mose 1:39).

- E faapefea ona fesoasoani le Ekalesia ia i tatou e faaatoatoa o tatou olaga? E faapefea ona fesoasoani ia i tatou e “tuputupu ae ma atinae i le atoatoa e mafai ai”?
- Aisea ua avea ai le aiga ma muai faalapopotoga taua ma le sili i faatulagaga uma a le Atua? O a ni mea e mafai ona tatou faia i o tatou valaauga faalelotu e faamalosi i le aiga?
- O le a sou manatu o le a le uiga o le saunoaga a Peresitene Lee ina ua ia saunoa mai o le perisitua o le “totonugalemu ma le autu o le Ekalesia”? E faapefea ona fesoasoani ia i tatou le fautuaga o tuuina mai i totonu o le MFF 84:108–10 e malamalama ai i le pogai e tatau ai ona galulue faatasi faalapopotoga a le perisitua ma ausilali?
- E faapefea e polokalama a le au perisitua ma ausilali ona “gaoioi i lelagolagoina o le aiga”? E faapefea e nei polokalama ona lagolagoina o outou aiga?
- I a tatou taumafaiga e auauna i le Ekalesia, aisea e tatau ai ona tatou faaeteete ina ia le avea polokalama ma mea sili atu ona taua nai lo tagata? E mafai faapefea ona tatou ausia lenei mea?

### *Faamatalaga*

1. Lauga tuuina atu i le konofesi aoao a le Aoga Sa, 2 Oke. 1970, Matagaluega o Faamaumuaga o Talafaasolopito, O le Ekalesia a Iesu Keriso o le Au Paia o Aso e Gata Ai, 7.
2. Lauga tuuina tu i le Iunivesite a Brigham Young, 3 Oke. 1950, Faamaumuga Faletusi, Iunivesite a Brigham Young, 9–10.
3. Lauga tuuina atu i le toe faatulagaina o le Siteki a Virginia, 30 Iuni 1957, Matagaluega Faamaumuaga o Talafaasolopito, O le Ekalesia a Iesu Keriso o le Au Paia o Aso e Gata Ai.
4. *The Teachings of Harold B. Lee*, ed. Clyde J. Williams (1996), 587.
5. *The Teachings of Harold B. Lee*, 565.
6. *The Teachings of Harold B. Lee*, 385.
7. *The Teachings of Harold B. Lee*, 262.
8. *The Teachings of Harold B. Lee*, 267.
9. *The Teachings of Harold B. Lee*, 559.
10. *The Teachings of Harold B. Lee*, 292–93.
11. I le Conference Report, Oke. 1964, 87; po o le *Improvement Era*, Tes. 1964, 1081.
12. *The Teachings of Harold B. Lee*, 563.
13. Laugaina i le Mutuale (MIA), 1948, Matagaluega o Faamaumuaga o Talafaasolopito, O le Ekalesia a Iesu Keriso o le Au Paia o Aso e Gata Ai, 3.
14. I le Conference Report, Oct. 1961, 77–78.
15. Laugaina i le semina a sui risone, 4–5 Aper. 1973, Matagaluega o Faamaumuaga o Talafaasolopito, O le Ekalesia a Iesu Keriso o le Au Paia o Aso e Gata Ai, 10.



## Fetufaaiina o le Talalelei

*E mafai faapefea ona tatou faataunuuina o tatou tiutetau-ave mai le Atua e fetufaai atu ai i isi le talalelei?*

### Faatomuaga

**M**ai lea taimi i lea taimi sa malaga ai le Susuga a Elder Gordon B. Hinckley, o le Korama a le Toasefululua, ma lona faletua, o Marjori, faatasi ma Peresitene Harold B. Lee ma lona Faletua. “Sa matou malaga i ni taimi eseese se lua ma Peresitene Lee ma lona Faletua i Egelani, Siamani, Oseteria, Italia, Eleni, ma le Nuu Paia, ma sa matou feiloai ai ma faifeautalai, o tagata o le au paia, tupulaga talavou, ma fitafita,” le saunoaga a Sister Hinckley. “E leai se tasi ua i ai ni soa faimalaga e sili atu ona tauagafau, sili atu ona faaloalo, ma sili atu ona agalelei.”

“Sa matou i ai i Egelani i se tasi Aso Sa. O se aso e leai se malolo: e lua sauniga o se konafesi ma se faeasaite i le po. Ina ua matou toe taunuu i le faletalimalo i le tusa o le 9:30, sa matou matua vaivai lava ma fiaaai. Sa matou o i le faleaiga o le faletalimalo mo sina meaai itiiti. Ua mae’a le aso—ua mafai nei ona matou malolo. O lo’u manatu lena. O le isi mea na sosoo ai, o le sauni lea o le peni a le teine e tusi le oka o a matou meaai. Sa ea a’e i luga Peresitene Lee ma faapea atu ia te ia, ‘O le a le lotu e te lotu ai?’ E le’i faapea ua uma le aso mo ia. Ua toe amata foi se talaiga. A’o le’i mae’a le taumafataga, ae ua na ia iloina mea uma e uiga i lenei tamaitai talavou. Ua maluu lona toalua ma ua tuua toatasi ma le atuatuvaale. Ua ia folafola mai foi o le a feiloai ma faifeautalai ma saga aoao atili ai. O se tulaga matagofie le vaaia o le peresitene o le Ekalesia o faia mea sa ia aoaoina atu i lena aso atoa. Ina ua iloa e le teine (o se tamaitai pe tusa ma le tolusefululima tausaga le matua) o le alii lea sa talanoa i ai o le peresitene, o le perofeta, tagata vaai, ma le tali faaaliga o le Ekalesia a Iesu Keriso, sa le mafai ona talitonu o ia o le a faamaualalo e se

tagata faapea o ia lava ina ia talanoa ma se tagata e faapei o ia. Sa matuā ootia lava o ia.”<sup>1</sup>

I le ta’ua o le fetufaai o le talalelei, na saunoa ai Peresitene Lee e faapea, “Ia [tatou] iloa o lenei tiutetauave na tuuina mai e le Alii i lana Ekalesia i tisipenisione uma, . . . e tala’i atu ai le talalelei i tagata uma lava ina ia leai se ‘alofaga o tagata taitoatasi i le aso o le faamasinoga, ma mafai ai ona laveaiina tagata uma mai le Pa’ū ma toe aumaia ai i le afioaga o le Atua.”<sup>2</sup>

## **Aoaga a Harold B. Lee**

---

### **Aisea e taua ai mo i tatou le fetufaai atu i isi o le talalelei?**


Tatou te tausisia a tatou molimau i le ola ai, tatalo ma toaaga i le lotu atoa ma le tausiiaina o poloaiga a le Atua. O iina o le a mafuta ai le Agaga taiala mo i tatou, o se tasi lea o oa aupito tau-gata e mafai ona i ai i se tagata o le ekalesia.

Faatasi ai ma lenei molimau, o le tiutetauave a i tatou uma lava, o lo tatou iloina lea o la tatou matafaioi le tuuina atu o a tatou molimau i le misiona paia a le Alii i soo se mea lava e maua ai lo tatou avanoa. Afai tatou te faaaogaina i tatou lava, e tele avanoa e aoao atu ai le talalelei, i le aso ma lea aso, o lea itula ma lea itula, i soo se mea lava tatou te i ai. Afai sa tatou ola mo lea faamoemoe, afai ua tatou saunia i ai, o le a tuu mai e le Agaga taitai le tomai tatou te aoao atu ai. Ia manatua, o upu ua na o ni upu lava, i le aoaoina atu o le talalelei, sei vagana ua o faatasi ma le Agaga o le Alii. . . .

O lo tatou tiutetauave o le aumaia lea i le lalolagi o le savali o le upumoni, e ta’u atu ai i le lalolagi o totonu o aoaga o le talalelei a Iesu Keriso, e tatau ona maua ai vaifofo mo faafitauli uma e mafatia ai le tagata.<sup>3</sup>

E tatau ona tatou taliaina avanoa uma e avatu ai le malamalama o le talalelei i isi—i tagata o loo tatou mafuta ae ua le toaaga i le lotu, o a tatou uo le lolotu i kolisi, o galuega faamiliteli, ma pisinisi, atoa ai ma o tatou tuaoi ma uo.

Na tuuina mai e le Alii lenei faaaliga i le Perofeta: “Auā o i ai nei lava nisi e toatele i le laolagi i ituaiga lotu uma, vaega, ma ekalesia, ua faatauasoina i togafiti faa’ole’ole a tagata, o lea latou



O le Susuga a Elder Harold B. Lee a o faifeautalai i le Misiona a Setete o Sisifo.  
Na faamisiona o ia mai le masina o Novema ia Tesema 1922.



te lamalama e faa'ole'oleina ai, ae taofia mai le upumoni ona ua latou lē iloa lemea e maua mai ai." (MFF 123:12.)<sup>4</sup>

E le o toe se isi leo e talia e i faamaoni o latou loto nai lo le leo o le avefeau moni o loo folafola le talalelei a Iesu Keriso.<sup>5</sup>

Tou te manatuaina [Elder Charles A. Callis] na faamatalaina mai se taimi na alu ai i Montana e asiasi i se tagata sa faia se misi-ona i Aialani. Ina ua maea ona sailia o lenei tagata, o lē ua toea-ina i le taimi lea, sa ia faailoa atu ia lava ma faapea atu, "O oe o le faifeautalai lea sa galue i Aialani i tausaga ua mavae?" Ma sa faapea mai le tagata lea, ioe. "Ia," o lana tala lea, "pe o oe ea o le tagata lea na faapea i lau lauga faamavae i le misiona, na e ta'utino atu ai masalo e le'i manuia lou tolu tausaga na e i ai iina ona e na o le toatasi se tamaitiiti palapalā Aialani na mafai ona e papatisoina? Na e faia lena tala?" "Ioe, ou te manatua la'u tala lena." Na fai atu Uso Callis, "Ia, ou te fia faailoa atu a'u. O a'u o Charles A. Callis o le Aufono a Aposetolo e Toasefululua O Le Ekalesia a Iesu Keriso o le Au Paia o Aso e Gata Ai. O a'u o le tamaitiiti palapalā lena o Aialani na e papatisoina a o e faamisiona i Aialani." O le agaga e toatasi na avea ma aposetolo o le Ekalesia ma le Malo o le Atua.<sup>6</sup>

E leai lava se tagata e tuu atu lona lima e fesoasoani ai i se tasi e aunoa ma lona mauaina mo ia lava o le aia tatau mo le faaolataga e tatau ai ona o lona naunau e fesoasoani atu i isi. Ia tau-tuana, o i tatou uma lva o fanau a lo tatou Tama, pe o avea nei i tatou ma nisi o le Ekalesia pe leai. O isi ia fanau a lo tatou Tama e tatau ona tatou popole tele i ai. E pele foi i latou ia te Ia e faapei ona pele i latou o i ai nei i le Ekalesia. Afai o i ai se tasi o i tatou o galue i le aumaia o isi i le lafu, ua fetalai mai le Alii ua ia aumaia foi le faaolataga i lona lava agaga [tagai MFF 4:4].<sup>7</sup>

---

**Aisea ua avea ai le naunautai i le taulaga ma vaega taua o le fetufaa'iina atu o le talalelei?**

O le autu moni lava o le mea ua tatou ta'ua o le Kerisiano ua maua lea i le tusi a le tusitala o le talalelei o Ioane lea na ia ta'ua ai le molimau a le Matai i lana lava misiona paia o le Faaola o le lalolagi. O ana faaupuga nei:

“Auā ua faapea lava ona alofa mai o le Atua i le lalolagi, ua ia au mai ai lona Atalii e toatasi, ina ia le fano se tasi e faatuatua ia te ia, a ia maua e ia le ola e faavavau” (Ioane 3:16.)

O lea ua ta’ua ai le auaunaga aupito maua e mafai ona tatou tuuina atu i lenei olaga, o le naunautai e taulagaina o tatou lava tagata mo le lelei o isi. O le nofoaga mo le taulaga ma le auaunaga i lenei tulaga faapaiaina o le olaga, sa faamatalaina mai e le Perofeta o Iosefa Samita:

“O se lotu e le manaomia le ositaulagaina o mea uma, e le taitai onalava le malosi e maua ai le faatuatua e tatau ai mo le ola ma le faaolataga. . . .

“O lenei taulaga, ma na o le pau lava foi lenei, ua faauuina e le Atua o le a olioli ai le tagata i le ola e faavavau.” [*Lectures on Faith* (1985), 69.]

Afai e mafai ona tatou faaaogaina ia i tatou lava ma o tatou olaga lena mataupu faavae ina ia mafai ai ona tatou maua lena mea foaifua taua, o le mea moni ua tatou atamamai. O le Tupu o

“. . . pe a i ai outou i le galuega a o outou uso ua na ona i ai outou i le galuega a le Atua.” (Mosaea 2:17.). . . .

O lona uiga, o le foai atu po o le tuuina atu, o se faailoga o le alofa o se tagata, ma afai e tuuina atu moni e tagata ia lava, o se faamaoniga lea o le alofa moni o lena tagata ua naunautai e foai atu. . . .

O le alofa tele o le Perofeta o Iosefa Samita i le upumoni sa faailoa atu ia te ia o lea sa nauanu ai o ia e ositaulaga mea uma na ia umia i lenei lalolagi, na te le’i taofia foi lona ola, na ia faia mea uma e oo i le iuga ina ia mafai ai ona ia tuuina atu lena molimau ma ina ia mafai ai ona lagona e atunuu uma o le lalolagi. . . .

Sa ou asiasi i se siteki i ni nai masina talu ai ma sa talosagaina a’u e faatalanoa ni alii talavou ua faamoemoe e avea ma faifeautalai. Sa ta’u mai ia te au e le peresitene o le siteki, o se tasi o alii talavou, ina ua mavae se taimi umi sa taofia ai i le falemai, ua toe malosi mai se ma’i tugā sa maua ai a’o i ai i le fitafita. A’o ou tilo-tilo atu i lenei alii talavou i le faatalanoaga, sa ou fesili atu ia te ia, “Ua e manao i se a e te alu i lenei misiona?”



I vaega eseese o le lalolagi atoa, o loo i ai alii talavou ma tamaitai talavou,  
o loo “tutu o ni molimau i taimi uma ma nofoaga uma i o latou  
tiutetauave paia i le Ekalesia e aoao atu le talalelei.”

Sa umi se taimi o nofo ma mafaufau, ona ia tali mai lea, “Ina ua ou alu i le fitafita, o se taimi muamua lea ua ou alu ese ai mai lo’u aiga. Sa ese lava tulaga sa i ai. Sa ou fetaiai ma faaososoga i soo se itu faapea foi ma le agasala. Sa ou manaomia le malosi e taofia ai mai le agasala, ma sa ou alu atu i lo’u Tama Faalelagi ma tatalo atu ia te ia i le faatuatua ina ia aumai ia te au lena malosi e tetee atu ai i le leaga. Sa faafogaina e le Atua a’u talosaga ma sa aumaia ia te au lena malosi. Ina ua maea le taimi faaleaoaoga [i le militeli] ma ua oo atu i le vaega o taua, sa matou faalogoina le papa o fana na muai aumai ai le savali ua oo mai le oti. Sa ou fefe, ma sa ou gatete. Sa ou tatalo i le Atua mo le lototele, ma sa ia aumai ia te au le lototele, ona oo mai ai lea ia te au o le filemu ou te le’i iloaina muamua. . . .Sa tofia au e tiute ta’imua, o lona uiga sa ou ta’imua i vaegaau tau ma o nisi taimi e toetoe lava ua sio-mia uma e le fili. Sa ou iloaina e na o le tasi lava le mana i le lalolagi e mafai ona laveaiina a’u, ma sa ou tatalo i lena mana e puipuia a’u, ma laveaiina lo’u ola, ma sa faafogaina e le Atua a’u tatalo ma toe faafai mai a’u i la’u vaega.”

Ona ia fai mai lea ia te au: “Usa Lee, o mea uma na e tumu ai a’u i le loto faafetai. Ua na o sina mea itiiti ou te mafaia lo’u alu

atu e avea o se amepasa a Iesu Keriso, e aoao atu i tagata mea matagofie sa ou mauaina a o itiiti i lo'u aiga.”

A o ou faalogo atu i se faamatalaga o le faatuatua mai lena alii talavou, sa ou faatusatusaina ia i latou sa ou faalogo atu o faapea mai ua latou manatu afai e o i le misiona, o le a latou maua ai ni aoaoga, o le a latou vaai i le lalolagi, o le a latou maua ai tomai aoga e faamanuina ai i latou. . . .

O le manatu faapito e puepue mai avanoa mo le tagata lava ia, e lē mai aoaoga o le upumoni ae mai aoaoga a lē ua fai ma fili o le upumoni. . . .

O le tagata e naunau mo lona lava lelei ma ona lava avanoa e lē avea lava ia o se tagata fiafia, auā e tu mai pea i ona luma i'u o tafa'ilagi o le olaga e tauemuina ai ana taumafaiga i mea e faa-taunuaina ma manumalo ai. O le tagata e tautua pe auauna atu ma le lē manatu faapito, o ia lea o le tagata fiafia.<sup>8</sup>

Ua tatou molimauina i la tatou galuega faafaifeautalai se vaa-iga ofoofogia o alii talavou ma tamaitai talavou [ua malaga atu]. . . i tulu'iga uma o le lalolagi, ina ia avea a latou auaunaga ma le lē manatu faapito latou te tutu atu ai e avea ma molimau i taimi uma ma nofoaga uma, mo le tiutetauave paia a le Ekalesia e aoao atu le talalelei.<sup>9</sup>

---

### **E mafai faapefea ona tatou aoao atu le talalelei i le mana ma le pule?**

O Alema. . . ma atalii o Mosaea na malaga atu i misiona ma sa latou faataunuaina se auaunaga faafeautalai tele. . . Sa vaايا e Alema ona uso, o atalii o Mosaea, o malaga atu i le nuu o Saraemila.

“O nei atalii o Mosaea sa faatasi ma Alema i le asona muai faa-alia mai ai le agelu ia te ia; ole mea lea na olioli tele ai Alema ina ua vaai atu o ia i ona uso; o le mea sili foi na faateteleina ai lona fiafia, o ona uso pea i latou i la le Atua; ioe, ma ua tutupu malolosi i latou i le malamalama o le upumoni; aua o i latou o tagata mafaufau lelei, ma ua latou suesueina tusipaia ma le filifiligā, ina ia latou iloa ai le afioga a le Atua.

“Ae peitai ua le gata i lea, a ua latou tatalo faatauana ma ua anapogi, o le mea lea ua i ai ia te i latou le agaga oleperofetaga ma le agaga o le faaaliga. A latou aoao atu foi, ua aoao atu i le mana ma le pule mai le Atua.” (Alema 17:2–3.)

O lea la, pe ua outou [malamalama] ea i le fuafaatatau e mafai ona outou aoao atu ai i le mana ma le pule a le Atua? Ia tutupu malolosi i le malamalama o le upumoni, ia avea ma tagata mafau-fau lelei, suesue ma le filifiligā i tusitusiga paia ina ia tatou iloa le afioga a le Atua. Peitai, e le na o le pau lena. E tatau ona tatou tatalo, ma e tatau foi ona tatou anapopogi, e tatau foi ona tatou maua le agaga o perofetaga; ma a uma ona faia o na mea uma, ona tatou aoao atu ai lea i le mana ma le pule a le Atua.<sup>10</sup>

Ua fetalai mai le Alii: “Ou te tuuina atu foi ia te outou le polo-aiga ia outou aoao le tasi i le tasi i mataupu o le malo,” ona ia toe faapoopo mai lea, “Ia outou aoao atu ma le filifiligā ma o lo’u alofa tunoa o le a mafuta ma outou” (MFF 88:77–78). E tatau ona ou faapupulaina atu na upu “filifiligā” ma le “alofa tunoa.” O le filifiligā, o loo faapea mai le lomi fefiloi o le “ua”i atu ma le lē gaoiā, faia ma le matuā faeteete,” o lona faafeagai o le paiē, o le faatamala, po o le faalēano i ai. . . .

. . . Ou te talitonu o le faauigaina o le “alofa tunoa” o loo faamanino mai i le vaega e fa o le Mataupu Faavae ma Feagaiga i le mea lea na folafola atu e le Alii ia i latou e galulue punouai i le galuega faafaifeautalai: “. . . o lē na te tago i lana selesaito ma lona malosia, ua na faaputu ai fua ma teu ina ia lē matelaina, ae aumaia le olataga i lona agaga.” (MFF 4:4.) O le “alofa tunoa” e laveaiina ai i le mana togiola o le Alii, o le amaua e lē na te tuuina atu faapea foi i latou e mauaina pe taliaina sauniga laveai o le talalelei.<sup>11</sup>

Ma le mea mulimuli, o le mea lenei e tasi e foliga mai ia te au e pei foi lona taua o isi mea uma, pe o le sili atu foi:

“O lea tuuina atu foi le Agaga ia te outou i le tatalo i le faatuatua; ae afai tou te lē maua le Agaga aua tou te aoao atu.” (MFF 42:14.)

O lea la e mafai ona matou tuuina atu ia te oe meafaigaluega i lenei fuafuaga faafaifeautalai mo le tuuina atu ma le suesueina o le talalelei; o loo i ai uma lava iina. Ae sei vagana lava ua tatalo

ma le filifiligā le faifeautalai, o le a na le maua lava le Agaga, lea e mafai ai ona ia folafola atu le talalelei. O le uiga lena o le tala a Nifae [ina ua ia] faapea mai:

“O lenei foi, o a’u o Nifae, ou te le mafai ona tusia mea uma na aoaoina ai lo’u nuu; ou te le malosi a’u i le tusitusi e tusa ma lo’u malosi i le tautala atu, aua pe a tautala atu le tagata ile mana o le Agaga Paia, e moliooina ai i le mana ole Agaga Paia i loto o le fanauga a tagata.” (2 Nifae 33:1.)

. . . Pe afai e ia te oe le Agaga ma e faalogo i ai ma taiialaina ai ma maua le agaga e malamalama ma iloaitino ai, lea e tofu maua e tagata taitoatasi ua valaauina i Lana galuega le aia tatau e faa-aoga ai, ona mafai lea ona e iloa ma taitaiina ai ma o le a o faa-tasi foi au upu ma le mana o le Agaga Paia. A aunoa ma le agaga e leai lava se tasi o le a mafai ona avea ma faiaoga lelei o le talalelei a Iesu Keriso.<sup>12</sup>

---

**E avea i se a le ola i le talalelei ma se vaega taua  
o le fetufaaaina o le talalelei?**

O le ala sili i le lalolagi e faatosina mai ai tagata i le talalelei o le ola ai lea i faamoemoega ma tulaga o loo tatou faamoemoina mai ē ua faapea mai e auai i le Ekalesia. O le mea muamua lena e ta’u atu ai i se tagata ese. E faapefea ia i tatou, o ē faapea mai o tagata auai, ona faaali atu o tatou uiga o ni tagata o le Ekalesia? . . .

. . . E leai se alii po o se tamaitai e mafai ona aoao atu le talalelei pe a lē ola ai. O le amioga muamua lava e faaagavaaina ai oe lava e avea ma faifeautalai o le ola ai lea i mataupu faavae e te aoao atu. Pe ua e manatu ea o se tagata agasala o se faiaoga lelei tele lea o le salamo? E te manatu e lelei i se tagata ona aoaoina atu isi e tausia ma faapaia le aso Sapati pe afai na te lē tausia e ia lava le paia o le aso Sapati? E te manatu e mafai ona e aoaoina atu soo se mataupu faavae o le talalelei pe afai e lē lava lou tali-tonu e totoina ai i o lou olaga?<sup>13</sup>

Na [fetalai mai] Iesu: “O le mea lea ia outou sisii ai i luga lo outou malamalama, ina ia pupula atuai i le lalolagi. Faauta, o a’u o le malamalama tou te sisii i luga—o mea ua ou fai ua outou

vaai i ai. Faauta, ua outo vaai mai, uaou tatalo ile Tama, ma ua molimau ai outou uma.” (3 Nifae 18:24.) O la tatou galuega o le “sisii i luga” i le lalolagi mea na faia e Iesu mo le tagata: o le togiola, o le faataitaiga na Ia faatuina, ma aoaoga na tuuina mai e Ia lava ma Ana perofeta o anamua ma aso nei. Sa aoaoina foi i tatou e le Matai: “Ia faapea ona pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tama o i le lagi.” (Mataio 5:16.) . . .

I tulaga uma lava faaleautaitai ia tatou te saili ai e faaleleia amioga a tagata, e faigata lava ona soona faia se fuafaatatau o le malosi o faataitaiga—pe o aofia ai matua uma [le tamā ma le tina] i le faaalua lea ma ta’u atu i a la’ua fanau le taua o le faaipoipoga i le malumalu po o se faifeautalai ua mae’a le misiona ma o loo susulu atu o se taunuuga o suiga ma lona tulaga matua i le talalelei ua i ai o ia.<sup>14</sup>

“O outou o le malamalama o le lalolagi outou; o se aai ua tu i luga o le mauga.” [Tagai Mataio 5:14.] O le a le uiga o lona mea? . . .

. . . Soo se tagata lava o le Au Paia o Aso e Gata Ai i le i gaoioiga faale-Ekalesia, auanaga faamiliteli, o fegalegaleaiga o le olaga, po o le faalapotopotoga faapisinisi, e vaavaai atu i ai e lē gata o se tagata e toatasi, ae o le Ekalesia vaaia foi i aso nei. Fai mai se tasi tagata: “Ia faaeteete i au amioga, aua e le iloa pe latou te lē faitauina lava Tusitusiga Faavae o le Ekalesia ae ua na o oe le faataitaiga latou te faitauina.” O iina ua lapata’ia ai i tatou e le Alii e tataua ona maualuga atu le tulaga o le ola ai i le Ekalesia nai lo le ola ai i le lalolagi.<sup>15</sup>

Sa ou i ai i Seoul i Korea talu ai nei [1954], ma o se tasi o alii aupito lelei sa i ai i lona atunuu o se tagata lea e igoa ia Dr. Ho Jik Kim. O ia. . . o se faufautua i le malo o Korea. O ia o se taitai o se tasi o aoga iina, ma o le taimi lona ua tolusefulu fa tagata liliu mai ua ia faapotopotoina, o le toatele lava o i latou o ni tagata e maualuluga aoaoga. Sa ma talanoa mo se lua itula, ma sa ma taumafai e faataatia se faavae e mafai ai ona amatalia gaoioiga faafaifeautalai i le nuu o Korea. Na ia faamatalaina mai lona liua. “O le mea lava na tosina ai a’u i le ekalesia,” na ia faamatala mai ai, “o le taimi na valaaulia ai au i aiga o ni alii o le Au Paia o Aso

e Gata Ai o le aigā faiaoga a le Iunivesite o Cornell. . . .O le mea lava na sili ona faagaetiaina ai a’u o le ituaiga olaga na latou ola ai. Ou te le’i alu muamua i ni aiga e ese le manaia o fegalegaleaiga i le va o le tane ma le ava, o le tamā ma le tina ma le fanau. Sa ou vaaia i latou o fai a latou lotu faaleaiga. O lo’u fiafia tele na amata ai ona ou fesilisili e uiga i la latou lotu. Ma i se tasi po ina ua maea a’u suesuega mo se taimi umi ma ua tosina lo’u manao e fia auai i sea ituaiga, sa ou muai iloa e tatau ona i ai sa’u molimau. Sa ou tootuli ifo i o’u tulivae ma tatalo toetoe o le po atoa, ma sa ou mauaina se molimau i le paia o lenei galuega.” Ae manatua sa amata lava i se faataitaiga lelei tele a se aiga na ola i se ituaiga olaga faaleaiga ua faamoemoeina e le talalelei i tagata moni o le Au Paia o Aso e Gata Ai.<sup>16</sup>

### **Fautuaga mo Suesuega ma Talanoaga**

---

- O a ni avanoa tatou te maua e aoao atu ai le talalelei “i lea aso ma lea aso. . .po o fea lava tatou te i ai”? O a ni uiga taua o i latou e fetufaaiina atu lelei i isi le talalelei?
- O a lesona e mafai ona tatou aoaoina mai aafiaga o Peresitene Lee i le fetufaaiina atu o le talalelei i le fale’aiga o le faletalimalo?
- O a faamanuiaga ua e maua ona o lou saili e fetufaai atu le talalelei i isi?
- O a taulaga ua ta’uina mai ia i tatou e fai ina ia mafai ai ona fetufaai atu pe talai atu le talalelei? O a o tatou uiga faaalua e tatau ona i ai mo le faia o ia ituaiga taulaga? O le a le mea na faagaetia ai oe e uiga i uiga faaalua o le alii talavou na fo’i mai i le taua ma alu i se misiona?
- O le a se mea e mafai ona tatou aoaoina mai i le Alema 17:2–3 i le ala e tatau ona fetufaai atu ai le talalelei i le mana ma le pule?
- Aisea e taua ai le mafutaga ma le Agaga Paia pe afai e tatau ona aveia i tatou ma faifeautalai lelei? O a mea e mafai ona tatou faia ina ia atoatoa ona i ai le taitaiga a le Agaga a’o tatou fetufaai atu le talalelei?
- E mafai faapefea ona tatou faatoilaloina le faifaiaga ma le fefe e fetufaai atu le talalelei?



- Aisea e avea ai a tatou faataitaiga o le ola amiotonu ma mea-faigaluega mamana e aoao atu ai le talalelei?

### *Faamatalaga*

1. *Glimpses into the Life and Heart of Marjorie Pay Hinckley*, ed. Virginia H. Pearce (1999), 21- -22.
2. Lipoti o le Konafesi, Ape. 1961, 35.
3. "Directs Church; Led by the Spirit," *Church News*, 15 Iulai 1972, 4.
4. *Ye Are the Light of the World* (1974), 24-25.
5. Lipoti o le Konafesi, Ape. 1961, 34.
6. " 'Wherefore, Now Let Every Man Learn His Duty, and to Act in the Office in Which He Is Appointed in All Diligence,' " lauga i le fonotaga a le Au Faatonu Aoao o le Perisitua, 6 Nov. 1968, Matagaluega e Teuina Talafaasolopito, O Le Ekalesia a Iesu Keriso o le Au Paia o Aso e Gata Ai,<sup>10</sup>
7. Lauga i le sauniga mo faifeautalai i le konafesi faalesiteki a le Iunivesite o Polika Iaga, 19 Oke. 1957, Matagaluega e Teuina Talafaasolopito, O Le Ekalesia a Iesu Keriso o le Au Paia o Aso e Gata Ai.<sup>3</sup>
8. Lipoti o le Konafesi, Ape. 1947, 47-50.
9. Lipoti o le Konafesi, Ape. 1951, 33.
10. Lauga i le vasega o faiaoga o mataupu faalelotu, 3 Feb. 1962, Matagaluega e Teuina Talafaasolopito, O Le Ekalesia a Iesu Keriso o le Au Paia o Aso e Gata Ai, 7-8.
11. Lipoti o le Konafesi, Ape. 1961, 34-35.
12. Lauga i le sauniga mo faifeautalai i le konafesi faalesiteki a le Iunivesite o Polika Iaga, 19 Oke. 1957, 5-6.
13. Lauga i le sauniga mo faifeautalai i le konafesi faalesiteki a le Iunivesite o Polika Iaga, 2, 5.
14. " 'Therefore Hold Up Your Light That It May Shine unto the World,' " Lauga i le semina a sui risione, 1 Oke. 1969, Matagaluega e Teuina Talafaasolopito, O Le Ekalesia a Iesu Keriso o le Au Paia o Aso e Gata Ai, 3.
15. *Ye Are the Light of the World*, 12-13.
16. *By Their Fruits Shall Ye Know Them*, Brigham Young University Speeches of the Year (12 Oct. 1954), 5.



## Saunia i le Ala a le Alii

*E mafai faapefea ona taitaiina i tatou ma faamanuiaina  
i mataupu faavae na faaali mai e le Alii  
mo le soifua lelei o Lana Au Paia?*

### Faatomuaga

**A**o galue Harold B. Lee o se peresitene o le siteki i le vaitaimi o le Pau Tele o le Tamaoaiga i le 1930, sa ia faatulagaina tau-mafaiga i lana siteki e aveese mai ai tulaga matitiva o le toatele o tagata o le au paia. Sa ia toe ta’ua i se taimi mulimuli ane: “Sa matou tauivi ma lenei fesili o le soifua lelei. Sa itiiti ni polokalama tau i galuega a le malo; sa maualalo tulaga tau tupe a le Ekalesia. . . .Ma e 4,800 tagata mai le 7,300 [i le siteki] sa faalagolago atoatoa pe o se vaega foi i isi. Sa na o le tasi lava le nofoaga e o i ai, ma o le faaaogaina lea o le polokalama a le Alii e pei ona faatulagaina mai i faaaliga.”

I le 1935, sa tofia ai Peresitene Lee i le tofi o le Au Peresitene Sili ma sa talosagaina na te ta’ita’ia se taumafaiga e fesoasoani ai ia i latou sa manaomia le fesoasoani i le Ekalesia atoa, e faaaoga ai lona poto masani na ia maua mai i lana siteki. Sa faamatalaina e Peresitene Lee lenei aafiaga e faapea:

“O nai a matou taumafaiga vaivai, na silafia ai e le Au Peresitene Sili, ua i ai ia te i matou sina poto masani, ma sa latou t̄alo mai ai ou te alu atu i se tasi taeao, pe mafai ona ou alu atu i lo latou ofisa. . . .Sa latou finagalo ou te taiulu i le polokalama o le uelefea ina ia suia ai mai fesoasoani a le malo, fesoasoani tuusa’o, ae fesoasoani ina ia tuu ai le Ekalesia i se tulaga e mafai ai ona taulimaina e ia lava ona tagata o loo manaomia le fesoasoani.

“Ina ua mavae lena taeao, sa ou alu i la’u taavale (o le taimi lea ua faatoa amata le tautotogo) ma ou agai atu i le Aai o Creek



O le faleteuoloo a epikopo mo le Siteki a Paionia ma Siteki a Sate Leki, Aai o Sate Leki, Iuta, 1933. O Harold B. Lee o le peresitene o le Siteki a Paionia i le taimi lea.

Canyon i le nofoaga sa ta'ua i lena taimi o le Rotary Park; ma o iina, ina ua na o a'u lava, sa ou tuuina atu ai se tasi o tatalo ma le agaga aupito mauualalo i lo'u olaga atoa.

“Sa ou i ai iina, ua na o se alii talavou ua tolusefulu ma ona tupu tausaga. Sa itiiti so'u poto masani. Sa ou fanau i se nuu itiiti i tua i Idaho. E lē tele ni vaega i tua atu o Utah ma Idaho ua ou vaai i ai. Ae o lenei ua tuu a'u i se tulaga e tatau ai ona ou aapa atu i le faitau aofai o le Ekalesia, i le lalolagi atoa, o se tasi o tulaga e faigata ona tau fuafua. E mafai faapefea ona ou faia i sina malamalama itiiti ua ia te a'u?”

“A o ou tootuli i lalo, o la'u olega lenei, ‘O le a se ituaiga faalapotopotoga e tatau ona faatuina ina ia mafai ai ona faataunuu le mea ua tofia ai a'u e le Au Peresitene?’ Ona oo mai ai lea ia te au i lena taeao matagofie, se tasi o faaaliga aupito paia o le mana o le perisitua a le Atua. Sa pei o faapea mai se leo ia te au, ‘E leai se faalapotopotoga fou e tatau ona taulimaina ai manaoga o nei tagata. Na o le pau le mea e tatau ai, o le tuu atu lea i le perisitua a le Atua ina ia galue. E leai lava se isi mea e te manaomia e fai ma sui.’

“O lea, faatasi ai ma lena malamalama, ma i le na o le faaogaina sa'o lava o le mana o le perisitua, na aga'iga'i atu ai le polokalama o le uelefea ma ua matuā televave lava, ua foia ai mea sa foliga mai e le mafai, seia oo ina ua tulai mai i le taimi nei e pei o se maa faamanatu i le mana o le perisitua, lea sa na ona ou tepa i ai i na aso sa ou ta'ua.”<sup>1</sup>

## **Aoaoga a Harold B. Lee**

---

### **O a mataupu autu faavae mo le galuega faaelefea a le Ekalesia?**

I le Vaega e 10<sup>4</sup> o le Mataupu Faavae ma Feagaiga, . . . o loo i ai se faamaninoga o le Polokalama o le Uelefea i ni nai upu itiiti. Se'i faafofoga mai i le fetalaiga a le Alii:

“O a'u, le Alii, na faamafolafolaina le lagi, ma atiina a'e le lalolagi, o la'u lava galuega taua; o mea uma foi o i ai e ā a'u ia. O la'u galuega foi o le tausiga o la'u au paia.”

. . . Ua outou faafofoga i mea na fetalai mai ai le Alii?

“O la’u galuega foi o le tausiga o la’u au paia, auā o mea umalava e ā a’u ia. Ae ao ina faia i la’u lava ala.” . . .

“Faauta foi o le ala lava leci o a’u, le Alii, ua ou faatonuina e tausia ai la’u au paia.”

Ia, tagai la i le taua o lenei fetalaiga e tasi:

“Ia faaeaina ē matitiva, ina ua loto mauualalo ē mauoa.”

O lea la, o le fuafuaga lena. . .Na faaauau le fetalaiga a le Alii e faapea:

“Auā o loo tumu le lalolagi, ua lava foi ma totoe mea o i ai; ioe, na ou saunia ma uma, ma ua tuuina atu i le fanau a tagata latou te fai ma ō latou lava ta’ita’i. O lea, afai e tago soo se tagata i mea e tele ua ou faia ae lē tuuina atu lona vaega, i ē matitiva ma ē le tagolima, e tusa ma le tulafono o la’u talalelei, o le a sii a’e ona mata faatasi ma ē amioleaga i seoli, o loo puapuagatia.” (MFF 104:14–18.)

. . . O lenei, o le a le uiga o le fasi fuaitau o lana fetalaiga lenei? O Lana ala o le, “faaeaina ē matitiva, ina ua loto mauualalo ē mauoa.” . . .

“Faeaina,” i le gagana a le lomifefiloi, ma le uiga ou te talitonu o loo taumafai le Alii e ta’u mai: “Ia sii a’e faatasi ma le mitamita ma le olioli i le faamanuiaina po o le manumalo.” O le ala lena e tatau ona tatou sii a’e ai ē matitiva, “faatasi ma le mitamita ma le olioli i le faamanuiaina po o le manumalo,” ma e faapefea la ona tatou faia? E ala i le faalotomauualaloina o le mauoa.

O lenei, aua ne’i faaseseina i le upu “mauoa.” E le faapea o le uiga i taimi uma o le tagata e tele ana tupe. O lena tagata atonu e mativa i tupe, ae mauoa i tomai. Atonu e mauoa ana faamasinoga. E mafai ona mauoa i faataitaiga lelei. Atonu e mamao lana tofa, ma isi tulaga taua moomia. Ma pe a tuufaatasia tagata tai-toatasi o korama a le Perisitua, e masani lava ona tatou maua ai uiga taua tulaga ese na e tatau ona sii a’e ai ma le mitamita ma le olioli ē matitiva ma loto faavauvau i le faamanuiaina po o le manumalo ina ua faataunuina. E le mafai ona i ai se isi faagaoi-oiga o le fuafuaga a le Alii e sili atu ona atoatoa nai lo lena.

Ia, teuloto le isi nei manatu, ua faafia ona ta’u mai e le Alii o le faamoemoega o ana galuega uma e faaleagaga. Pe o outou

manatuaina na ia fetalai mai i le vaega e 29 o le Mataupu Faavae ma Feagaiga?

“O le mea lea, e moni ou te fai atu ia te outou o mea uma lava e faaleagaga ia ia te a’u, ma ou te le’i tuuina atu ia te outou i soo se aso se tulafono e faaletino; po o soo se tagata; po o le fanau a tagata; po o Atamu, lo outou tama, o lē na ou faia” (MFF 29:34).

. . . Pe o outou faia ea mea uma tou te faia ma le manatu tasi i le viiga o lena mea e tasi, le manumalo a’ia’i o le tulaga faaleagaga i le faaletino? O le faamoemoega atoa lava o le Alii mo le olaga, o le fesoasoani lea ma taitaiina i tatou, ina ia oo atu i le iuga o o tatou olaga ua tatou saunia mo le tofi faaselesitila. Pe lē sa’o ea lena? Pe mafai ea ona e tuuina atu ato meaa i uma e te tuuina atu, pe mafai ea ona e tuuina atu lau tautua po o auunaga uma e te tuuina atu faatasi ma lena faamoemoega sili i le mafau-fau? Pe o le auala ea lena e fai ai ina ia ou fesoasoani i lo’u uso po o lo’u tuafafine ia maua lona tofi faaselesitila? O le faamoemoega lena ua faatuina e le Alii.<sup>2</sup>

E taua tele le polokalama faauelefea i le galuega a le Alii. E tatau ona tatou taulimaina manaoga faaletino [o tagata] ma tuu atu i ai sina tofo o le ituaiga faaolataga latou te lē tau tuli ia oti ona maua lea, a’o le’i mafai ona tatou siitia o latou mafau-fauga i se mea maua luga. O le faamoemoega lena o le polokalama faauelefea a le Alii o loo i ai i Lana Ekalesia i tisipenisione uma mai lava i le amataga. E le’i faatoa amataina i le 1936. Na amatalia ina ua faatoa amata tausia e le Alii Lona nuu i lena fogaelele.<sup>3</sup>

Pe a fememea’i se aiga ona o le manaomia o meaa i ma se mea e nonofo ai ma lavalava ma suauu, . . . o le mea muamua e tatau ona tatou faia o le fausia lea o se lagona malupuipua, o se lagona o loo lelei mea e faaogaina, a’o le’i mafai ona tatou amata siitia le aiga i le laugatasi i se mea e mafai ai ona tatou totoina ai i o latou loto le faatuatua. O le amataga lena, ae sei vagana ua ia te i tatou le faamoemoega o mea tatou te faia e tusa ai ma le galueaiina o le faatuatua, o le na ona tuuina atu o fesoasoani faaletino e lē aoga ia. O lena, e tatau ona tatou malalama, afai e na ona tatou taumafai e galueaiina le faatuatua e aunoa ma le faatutumuina o o latou laualo ma vaai ua faalava-

lava lelei ma fai lelei mea e nonofo ai ma faamafanafana lelei, atonu o le a lē faamanuiaina i tatou i le fausiaina po o le galueaiina o le faatuatua.<sup>4</sup>

E masani ona tatou faia pea lava pea le faamatalaga lenei na fofogaina mai e Peresitene [Heber J.] Grant ina ua faalauiloaina mai lenei polokalama o le [uelefea]. O ana upu nei. . . :

“O lo tatou uluai faamoemoega lava o le faatuina lea, i le mea e mafai ai, o se faiga e lē toe i ai le fetuu ona o le paie, lē toe i ai le amioleaga o le maua fua o se mea, ae ua toe faatuina le tutoatasi, o le galulue, o le ola faasoaso lelei ma le faaaloalo i o tatou tagata. O le faamoemoega o le Ekalesia, o le fesoasoani lea i tagata ia fesoasoani ia i latou lava. E ao ona avea le galue ma mataupu faavae laualuga e taitaiina ai olaga o tagata o le Ekalesia.” [Lipoti o le Konaesi, Oke. 1936, 3.]

Sa ma malaga ma Elder Melvin J. Ballard i vaeaga eseese o le Ekalesia ona o se talosaga mai le Au Peresitene Sili i taimi o le popofou o le polokalama faauelefea, e talanoaina ma taitai o le Ekalesia i lotofale, ia faamatalaga auiliili e taua mo lona amataga. E tolu ia ni fuaitau e fialia i ai sa ia faamatalaina soo i tagata. O se tasi o faaupuga sa masani ona ia ta’ua o lenei: “E tatau ona tatou tausia o tatou lava tagata, aua ua fetalai mai le Alii e ao ona faia nei mea uma: ‘. . . ia mafai ai e le ekalesia ona tu sa’oloto i isi faiga uma i lalo ifo o le lalolagi selesitila.’ (MFF 78:14.)”

. . . [Na ia ta’ua foi] mai le vaega e selau sefululima o le Mataupu Faavae ma Feagaiga: “E moni ou te fai atuia te outou uma: Inā tutula’i ia ma susulu atu, ina ia faia lo outou malamalama ma tagavai mo atunuu,” [ma sa ia aoao mai foi] o le taimi lenei o le faaalua o le mana o le Alii mo lona nuu. [MFF 115:5.] Ma sa ia toe ta’ua foi le vaega e selau ma le fa:

“O lea, afai e tago soo se tagata i mea e tele uaou faia ae lē tuuina atu lona vaega, i ē matitiva ma ē le tagolima, e tusa ma le tulafono o la’u talalelei, o le a ia sii a’e ona mata faatasi ma ē amioleaga i seoli, o loo puapuagatia.” [MFF 104:18.]

Ua ou faitauina atu nei upusii ia te outou i le aso e toe faamanatu atu ai maa faavae na faavaeina ai le galuega faauelefea a le Ekalesia.<sup>5</sup>

---

**O a risosi e tatau ona faaoga e foia ai faafitauli  
tau uelefea taitasi?**

O a resosi o loo i ai a le Ekalesia, pe mafai foi ona e ta'ua o aseta, ina ia mafai ai ona foia se faafitauli tau uelefea? E amata faapefea ona e foiaina? Faapea la o lea ua ou fai atu i le taimi nei le fesili lea. Faapea la o nanei e sau ai se telefoni i le tamā o se aiga a'o galue, ma ua ta'u mai ia te ia se tala faanoanoa ua lavea lona atalii laitiiti i se taavale ma o loo faatopetope atu i le falemai, ua matuā manu'a tigaina. O lenei aiga e itiiti se latou tupe maua, e na o le tausiga lava o le aiga e lava ai. O le taimi lea ua feagai nei le aiga ma le pili a le fomai, o se pili o le falemai—e faapefea la ona e taulimaina?

Ou te popole afai ou te fai atu nei lena fesili ma fai atu e te tali mai nei, o le toatele o outou o le a faapea mai: “Ia, o le a tapa atu i tupe o le taulaga anapogi.” Ma e lē o le auala lena e amata ai le Polokalama Faauelēfea, ma o iina foi lea tatou te sese ai. O le mea muamua, tatou te amata i le tagata lava ia. Tatou te lē o ese mai lena tulaga seia vagana ua tatou fesoasoani i le tagata na te faia mea uma na te mafaia e fesoasoani ai i lana lava faafitauli. Atonu, o tatou lagona alolofa ma le faamomoiloto e uuna'ia ai i tatou i nisi faaiuga, peitai o le mea muamua lena, ona tatou aapa atu ai lea i tagata patino o lena aiga. Tatou te le maua le maopopo o le aiga, tatou te le maua le malosiaga e maua mai i le lotogatasi o le aiga, pe afai tatou te lē tuu atu le avanoa ma fesoasoani e taitai pe faatonutonu se ala e mafai ai e tagata patino o lena aiga, ona fesoasoani mo i latou lava, e ui ina mafatia naua.

Ona, sosoo ai lea ma lo tatou valaau atu i le faleteuoloa mo mea e manaomia vave. I se aiga faapena e pei ona ou faamatalaina atu, ou te manao ia outou tagatagai i le aoga o le tuuina atu i lena aiga o lavalava, meaai, o mea e momoe ai, ma suauu latou te manaomia mo ni nai masina ina ia fesoasoani atu ai i le tinoitupe lea semanu latou te faaaluina e totogi ai lena pili na faafua-sei ona tulai mai mo le falemai, nai lo le na ona tago atu loa lava i le taulaga anapogi ma avatu i ai le tinoitupe. . . .

O le taimi nei, i luga atu lea o mea e mafai ona e faia mai le faleteuoloa, o le isi mea e sosoo ai, o le fautuaina atu lea i le epi-



kopo o le faaaogaina o tupe o le taulaga anapogi, lea na aoaoina ai o ia, e faaaoga muamua mea na te saunia mai ana lava taumafaiga faapea taumafaiga a ona taitai. O lea la tulaga, e ao ai ona tatou tuu le aoina o le taulaga anapogi ma le faateleina o taulaga anapogi, ma le aoaoina atu o le tulafono o le anapogi, e fai ma vaega aupito taua o le Fuafuaga o le Uelefea. . . .

O le taimi nei, ua tatou oo mai i le vaega o le toe faaleleia o o tatou faafitauli. O iina e faatino ai e le Aualofa, ma korama o le Perisitua a latou matafaioi aupito taua. Ia o le a la le vaega po o le matafaioi a le Aualofa i le polokalama o le toe faaleleia? Ia, o le mea muamua e te faia, pe a e asiasi atu i le fale o se aiga faanoanoa, o le faia lea o mea e pei ona manaomia e le epikopo, ia faia se auiliiliga o tulaga o i ai le aiga. . . .

E te alu i ai ma faia se auiliiliga, saili tulaga o i ai, ma fai se oka mai le faleteuoloa, pe afai e tatau ai, ma toe lipoti atu i le epikopo mea o loo manaomia e le aiga mo lana faamaoniga ma le aumaia o mea mai le faleteuoloa, po o tupe foi o loo ia teuina, pe afai e tatau ai. O le lona lua o mea e te faia, o le mautinoa lea ua e sailiili i faafitauli tau i le puleaina o le aiga, ma ia faaalua se tulaga vaaia o le a fesoasoani e foia ai faafitauli o loo i ai. E tatau ona e sauniuni e faafetaia'ia faalavelave tutupu faafuasei i le aiga, o ma'i, maliu, ma isi tulaga faapena, e manaomia ai le alofa faauso e mafai ona taulimaina e le Aualofa. Ma e tatau foi ona i ai pea lava pea ia te oe le agaga galulue faatasi i lenei vaega o le polokalama. E tatau ona aveia ou lima ma lima e siitia ai, ia aveia ou lima e faasagatonu ai le tulaga o le aiga i taimi o faalavelave faafuasei.<sup>6</sup>

O le taimi la lenei e tatau ai i uso o le perisitua ona iloa la latou vaega o le korama. E tatau i korama taitasi ona iloa tagata o le latou korama ma mea latou te manaomia ma saili i latou e tetele aitalafu, ma fautua atu i ai le ala e o ese mai ai i le nofo aitalafu. E le'i i ai lava se taimi e sili atu ona manaomia ai e se tagata se uo nai lo se taimi e lofituina ai i ni tulaga faapea. O le taimi lenei e tuu atu ai ia te i latou le malosia o le silasila mamao ma le mana e fetuleni atu ai i luma. E le gata ina tatau ona tatou aoaoina tagata e o ese mai le nofo aitalafu, ae ao foi ona tatou aoao i latou e aua le aitalafu.<sup>7</sup>

Tatou te faamoemoe ia faia e le tagata mea uma na te mafaia e fesoasoani ai mo ia lava, pe o se faalavelave faafuasei mo se aiga e tasi pe o le alaafaga atoa foi, o le a faia e tagata e tau mai i le aiga mea uma latou te mafaia e fesoasoani ai, ona se'e atu lea o le Ekalesia ma oloa mai le faleteuoloo, ma le taulaga anapogi e taulimaina ai tulaga manaomia e lē o maua i le faleteuoloo, ma le mea mulimuli, o le a fesoasoani atu le Aualofa ma korama o le perisitua i le toe faaleleia.<sup>8</sup>

---

**E mafai faapefea ona tatou faia ia faalagolago tagata o o tatou aiga ia i latou lava?**

Ina ia mafai e se tagata po o se alaafaga ona ola faalagolago ia te ia lava, o laasaga nei e lima e tataua ona faia:

Muamua: E le tataua ona i ai se paie po o le faapalapala i le Ekalesia.

Lona lua: E tataua ona tatou aoina le lesona o le ositaulaga.

Lona tolu: E tataua ona tatou tomai i le faiga o le ola ma galulue faatasi.

Lona fa: E tataua ona tatou ola i le olaga faauso i a tatou korama o le perisitua.

Lona lima: E tataua ona tatou mauaina le lototetele e faafetaia-ia ai luitau o faafitauli i aso taitasi i lo tatou faaogaina muamua i le mea e gata mai ai o mea tatou te maua po o mea foi i le lotofale a'o le'i talosaga atu i isi e fesoasoani mai.<sup>9</sup>

Ia manatua o le polokalama o le uelefea a le Ekalesia, e tataua lava ona amata ia te oe lava ia. E tataua ona amata i tagata taitasi o le Ekalesia. E tataua ona tatou faautauta ma faasoasoalelei. . . E tataua ona e gaiioe lava ma faatino e oe lava ia a'o le'i gaiioe mai le polokalama uelefea i lou lava auaga. . . .

Ia tulimata'i le aoaoga . . . ia mautinoa ua i ai meaai i totonu o outou fale; ma fautuaina o outou tuaoi ma uo ina ia faapea foi ona faia, auā sa i ai se tasi sa i ai [le] tofamamao na silafia ai le tataua ona i ai o lenei tulaga, ma o le a tataua foi mo le lumanai, ma ua avea ma laveai o o tatou tagata i aso ua mavae.

O lea la, aua nei o tatou valelea ma manatu faapea talu ai o loo susulu le la i le asō, o le a laofie foi taeao. Na ta'uina mai e le Alii ia i tatou i se faaaliga nisi o mea o loo fotua'i mai, ma o loo tatou soifua ma ola i se vaitau o le faataunuaina o na valoaga. Tatou te maofa, ae e leai lava se mea o tupu i le taimi nei e le'i mua'i silafia e perofeta. . . .

Ia fesoasoani mai le Atua ina ia tatou faatulagaina lelei o tatou lava fale ma ia tulimata'i atu o tatou mata i ē o pulefaamalumalu i lenei Ekalesia ma mulimuli i a latou faatonuga, ma o le a lē taitai seseina lava i tatou.<sup>10</sup>

Ia e faaali mai ia te au ni tagata “o le a galulue malosi,” e aloese mai noataga o le nofo aitalafu, ma galulue faatasi i se auau-naga lē manatu faapito ina ia ausia se faamoemoega sili, ona ou faaali atu lea o ni tagata ua ausia le tulaga saogalemu aupito sili i le lalolagi o tagata soifua ma mea faaletino.<sup>11</sup>

E tula'i mai puapuaga i soo se atunuu. O se tasi o puapuaga aupito mata'utia na tatou feagai o [se mafui'e] lea i le Vanu o San Fernando i [Kalefonia]. Sa tatou popole ina ua gasolo atu aso ae lē o mafai ona matou maua mai se fesoootaiga ona ua motusia telefoni, ma sa leai se auala e mafai ona maua mai ai se tala pe o faapefea o tatou tagata; o lea sa matou faafesoota'ia ai lo tatou [taitai perisitua] i se mea e latalata ane i le eria na lulu ai le mafui'e ma talosagaina o ia mo se tala. Ma sa oo mai le tala, “O loo lelei mea uma. O lea na matou faaaogaina meaai na teuina faagaga. Sa i ai foi a matou vai na teuina.” Sa faaleagaina le vai masani, ma sa matuā lamatia tagata ona o le faaleagaina o le vai; peitai o tagata lava na ua'i mai i faatonuga ma teuina ia vai faapea foi meaai ma isi mea e tagolima i ai i le taimi o faigata; ma e ui lava ina e le'i tofu tagata uma ma meaai ma vai, o i latou lava na usi-usitai ma saunia e le'i atuatuvaile i latou, ma sa latou sagai ane faatasi i se auala ofoofogia e fesoasoani ai le tasi i le tasi.<sup>12</sup>

## **Fautuaga mo Suesuega ma Talanoaga**

---

- E pei ona faamatalaina mai e Peresitene Lee, o le a le auala a le Alii e tausia ai ē matitiva ma ē lē tagolima? (Tagai MFF 104:14–18.)

- O a ni a tatou risosi o i ai e mafai ona tatou fetufaa'i atu i ē matitiva?
- Aisea e tatau ai ona tulimatai atu a tatou taumafaiga e fesoasoani ai i ē matitiva ma ē lē tagolima, mo le ola e faavavau? E mafai faapefea ona tatou faia lenei mea?
- E tatau i se a ona faia e tagata taitoatasi ma aiga mea uma latou te mafaia e fesoasoani ai ia i latou lava? O a faamanuiaga e oo mai i aiga e fesoasoani mo i latou lava i taimi e manaomia ai? O le a le matafaioi a korama o le perisitua ma le Aualofa e fesoasoani ai ia i latou e manaomia le fesoasoani?
- O le a le uiga o le faalagolago o le tagata ia te ia lava? O a laasaga e tatau ona tatou faia ina ia tatou saga faalagolago ai ia i tatou lava?
- Aisea ua avea ai le tomai ma le naunau e galue ma vaega faavae taua o le faalagolago o le tagata ia te ia lava? E mafai faapefea ona tatou aoao a tatou fanau ia galulue?
- O a faamanuiaga tatou te maua pe a tatou faalogo ma usiustai i fautuaga a o tatou taitai e totogi a tatou aitalafu ma ola faautauta ma faasoasoalelei le puleaina o a tatou tupe?

### *Faamatalaga*

1. Lipoti o le Konafesi, Oke. 1972, 123–24; po o le *Liabona*, Setema 1973, 104.
2. “The Place of Relief Society in the Welfare Plan,” *Relief Society Magazine*, Dec. 1946, 814–15.
3. “Let Others Assist You,” lauga i se fonotaga faaualefea, 4 Ape. 1959, Historical Library files, O Le Ekalesia a Iesu Keriso o le Au Paia o Aso e Gata Ai, 22.
4. “Place of Mothers in the Plan of Teaching the Gospel in the Home,” *Relief Society Magazine*, Jan. 1965, 12.
5. Lipoti o le Konafesi, Ape. 1946, 69–70.
6. “The Place of Relief Society in the Welfare Plan,” 812–13.
7. *O Aoaoga a Harold B. Lee*, ed. Clyde J. Williams (1996), 315.
8. *O Aoaoga a Harold B. Lee*, 306.
9. “What Is the Church Welfare Plan?” *Instructor*, July 1946, 316.
10. “Follow the Light,” lauga i le fonotaga faaualefea tau faatoaga, Ape. 1969, Matagaluega e Teuina Talafaasolopito, O Le Ekalesia a Iesu Keriso o le Au Paia o Aso e Gata, 4–5.
11. *Decisions for Successful Living* (1974), 202.
12. “Listen and Obey,” lauga i le fonotaga faaualefea tau faatoaga, 3 Ape. 1971, Matagaluega e Teuina Talafaasolopito, O Le Ekalesia a Iesu Keriso o le Au Paia o Aso e Gata, 4–5.



## Faaavanoa se Taimi e Faapaia Ai

*E mafai faapefea ona tatou galulue i aso taitasi  
e fafagaina i tatou faaleagaga?*

### Faatomuaga

**E** masani ona aoao mai e Peresitene Harold B. Lee le taua o le fafagaina o i tatou lava faaleagaga. Fai mai a ia o o tatou tino e mafai ona faatusa i papuipui e tataua ona vaaia i taimi uma ina ia mafai ona tumau lona malosi i taimi e osofa'ia ai e se fili.

“O fili lava o outou ‘papuipui’ faaletagata e le gata ina faaletino ae faaleagaga foi,” na ia faamatala ai. E mafai ona aofia ai “se faanoanoaga e lē i fuafuaina, o se faalumaluma aiga, o se tulaga faate'ia i mea tautupe, o le [le faamaoni] o se uo, po o se agasala faalilolilo i poloaiga a le Atua.” A tutupu mai ia ituaiga mea i o tatou olaga, tatou te manaomia “se faaopoopoga mai sosia faaleagaga. . . . Afai ua motusia a outou fesootaiga ma le Ekalesia ona o le faatamala ma ua leai so outou faatuatua i le Atua, afai tou te le'i malamalama e ala i le suesue ma le aoao i le ala o le faamagaloga o a outou solitulafono, pe afai foi tou te le'i mauaina e ala i le agaga tatalo le malamalama i se tau'i mautinoa o taulaga ma tiga, o lona uiga ua e motusia au laina e sapalai mai ai lou faaleagaga ma le malosi ma o le mea lena ua matuā vaivai ai lou agaga. . . . Ua lamatia ai lou papuipui i mailei a 'au a Satani. Ona ave'a ai lea o oe e faapei o le tagata valea na fau lona fale i luga o le oneone, ma ina ua agi malosi mai le matagi ona pa'ū ai lea (Tagai Mataio 7:24–27.)

“Ma o lea ou te aioi atu ai. . . ia outou ola i aso taitasi ina ia mafai ona outou maua mai le punavai o le malamalama [o] meaai e fafagaina ai ina ia lava le malosi mo mea e manaomia i aso taitasi. Ia faaavanoa se taimi e faapaiaina ai outou i aso taitasi o outou olaga.”<sup>1</sup>

## O Aoaoga a Harold B. Lee

### E mafai faapefea ona tatou fafagaina faaleagaga i tatou lava?

O loo i ai i totonu o tagata uma se agaga ma o se faatusa moni lava o lou tino atoa faitino. Ina ia tausiona la le malosi ma le maloloina o lou tino faitino, o lea e tatau ai ona fafagaina pea lava pea i meaai ma vaiinu. O sela faavae taitasi o o outou tino e tatau ona i ai se sootaga ma neura ina ia mafai ai ona faatumauina le faagasologa taua o le olaga. O le lē mafai ona tausiona ma faatumauina nei sootaga faaneura po o le lē maua foi o nei mea e manaomia e fafaga ai, o le a oo mai ai le pala, lē aoga, ma'i ma i'u ai lava ina oti le tino faitino.

E manaomia pea lava pea e lou tino faaleagaga le fafagaina ina ia mautinoa ai lona maloloina ma le malosi. E lē faamalieina i meaai faalelalogagi lena tulaga manaomia. O meaai e faamalieina ai ou manaoga faaleagaga e tatau ona aumaia i sosia faaleagaga. O mataupu faavae o le upumoni e faavavau, e pei ona i ai i le talalelei, ma le faaogaina lelei e ala i le auai pea lava i gaoioiga faaleagaga, e taua mo le faamalieina o o tatou lava ola faaleagaga. O le taulimaina taua o le agaga e faapena foi ona faatumauina i le na o le sootaga poto faatasi ai ma punavai faaleagaga o le upumoni. O le ma'i ma le oti faaleagaga, o lona uiga o le vavaeeseina mai lea i le punavai o le malamalama faaleagaga, o le a oo mai pe a motusia lau sootaga ma le nofoaga tutotonu faaleagaga o neura, o le Ekalesia lea a Iesu Keriso.<sup>2</sup>

Tatou te atina'eina o tatou lava tagata i la le agaga i le ola ai. . .E tatau ona tatou aoaoina i tatou lava i la le agaga, i le tulaga lava lea e tasi, pe afai tatou te mananao ina ia atoatoa, e faapei foi ona tatou aoaoina o tatou tino faitino. E tatau ona faia a tatou faamalositino i aso taitasi i o tatou agaga e ala i le talalo, o le faia o galuega lelei i aso taitasi, ma le fetufaai atu i isi. E ao ona tatou fafagaina o tatou agaga i aso taitasi e ala i le suesue i tusitusiga paia i aso uma, o le [faia o afiafi faaleaiga], o le auai i sauniga, ma le aai ma feinu i le faamanatuga. E tatau ona tatou aloese mai aafiaga faatama'i e oo mai pe a tatou solia se poloaiga a le Atua. E tutusa lava ma le faa'onaina o o tatou tino faaleagaga. . . .



Ua aoao mai e Peresitene Harold B. Lee: “Ia outou ola i aso taitasi ina ia mafai ona outou maua mai le punavai o le malamalama [o] meaai e fafagaina ai ina ia lava le malosi mo mea e manaomia i aso taitasi. Ia faaavanoa se taimi e faapaiaina ai outou i aso taitasi o outou olaga.”

O taimi e suesueina ai i tatou faaleagaga, o taimi ia tatou te faafesaga'i ai ma foma'i faalagaga a le Atua—o o tatou epikopo ia, o o tatou peresitene o siteki, ma o nisi foi taimi o le Au Pulega Aoa o faatalanoaga ia e faia e lē aunoa ona o le faamoemoe e fesoasoani ai mo le sauniaina o i tatou mo le siitia faaleagaga. O nisi taimi, ona o mea e tulai mai i nei faatalanoaga, e tele se galuega e tataua ona faia mo o tatou tagata faaleagaga.<sup>3</sup>

O mea uma lava e ese mai le finagalo o le Atua, o se mea oona lea i lou olaga faaleagaga ma e tataua ona lafoa'ia e faapei ona e lē tago lava i vaioona oi lau kapoti o vailaau i le fale.<sup>4</sup>

O le tagata amiotonu e taumafai mo le faaleleia atili o ia lava ma na te iloaina lava na te manaomia le salamo i aso taiasi ona o ona masei po o mea foi na te le o faia. E lē popole tele i mea e mafai ona ia maua ae pe o le a le tele o mea e mafai ona ia tuuina atu i isi, ma lona iloa foi o lea tulaga e na o le fiafia moni na te maua mai ai. Na te taumafai foi e fai le mea aupito silisili, ina ia oo mai le po ua mafai ona ia molimau i lona agaga ma lona Atua, pe o le a lava le mea na ia faia i lona aso, na ia faia lava i le mea sili na te mafaia.<sup>5</sup>

---

### **E fafagaina faapefea le agaga pe a tausia ma faapaia le aso Sapati?**

O le Aso Sa e sili atu i le na o se aso e malolo ai mai galuega masani o le vaiaso. E le tataua ona manatu i ai faapea ua na o se aso e ivavā ai ma tafafaovale ai, pe faamalie ai foi tuinanau ma fiafiaga faaletino. O se aso o taumafa mo o outou tino agaga. O le nofoaga mo taumafa faaleagaga o le fale lea mo taupuaiga. O iina tou te faaumea ai ma i latou e faapei foi o outou o ē o saili atu i meaai faaleagaga. Tou te faatasitasi ai e vivii ma tatalo ma tapuai atu ai i le Silisili Ese, ma aai ma feinu i le faamanatuga e fai ma faamantuga o a outou matafaioi o ni atalii ma ni afafine o le Atua i lenei olaga, ma manatua ai le togiola a le Faaola ma toe folafola atu ai lou faamaoni i lona suafa. . . .

Pe o e i ai i le fale po o le lotu, e tataua ona ogatasi ou mafau-fauga ma lau amio ma le agaga ma le faamoemoega o le Sapati. O nofoaga e talie ma faafiafia ai, e ui lava ina i ai taimi talafeagai e manaomia ai, e lē aoga mo le tuputupu a'e faaleagaga ma o ia



nofoaga o le a lē “mama [ai] nai le lalolagi” ae o le a e lē mauaina ai le “atoatoa o le lalolagi” ua folafola atu ia i latou e tausia le tulafono o le Sapati. [Tagai MFF 59:9, 16.] O outou na ua fai ma masani le soli o le Sapati, e ala i le lē “tausia ma faapaia,” ua outou lafoai se agaga e tumu i le olioli ona o si matāua itiiti o le fiafia. Ua tele naua lo outou gaua’i atu i faaunauga faaletino ae afaina ai lo outou soifua maloloina faaleagaga. O le tagata soli Sapati o se faailoga vave lea o le vaivai o lona faatuatua ona o le lē faia o tatalo faaleaiga i aso taitasi, o le vaavaai masei, o le lē totogiina o ana sefuluai ma taulaga anapogi, ma o lea tagata ua amata ona faapogisaina le mafaufau ona o le matelaina faaleagaga ma lē pine ae i ai le faaletonu ma le atuatuvaale e lē agavaa ai mo le aoaoina faaleagaga po o le siitia i le amiotonu. O faailoga ia o le palagia faaleagaga ma ma’i faaleagaga ia e na o le fafagina lelei faaleagaga e mafai ona foia ai.

Talasia aua nei o tatou faamoemoe faapea e le gata i a tatou gaoioiga e tapuai ai i le Aso o le Alii, ae mafai foi ona tatou faaititia ai galuega masani i le fale, ma faia foi feau talafeagai i fafo o le fale. Ia avea lenei aso ma aso tatalo, o suesuega loloto o tusitusiga paia ma isi tusi lelei. A’o faatumuina i le olioli ona o le Sapati, ia tusi se tusi i lau pele po o se tasi e pele e lē o i ai po o se uo atonu o manaomia lou malosia faaleagaga. Ia avea lou fale ma nofoaga e lagiina ai ma tata musika matagofie e ogatasi ma le agaga o le aso. Pe a malu ifo le afiafi ma outou faapotopoto ma lo outou aiga po o uo, ia talatalanoa i upumoni taua o le talalelei ma faai’u i se faamanuiaga o le tatalo faaleaiga. Sa aoaoina a’u i mea na ou oo i ai, o uuna’iga a le mafaufau i se tagata faamaoni o le Ekalesia, o se faailoga aupito saogalemu lea mo mea e ese mai le agaga o le tapuai i le Aso Sapati.

. . . Ae aua nei faapea o le tausisia a’ia’i o le tulafono o le Sapati ua lava lena e maloloina ai o outou tino faaleagaga. O aso taitasi o le vaiaso e tataua ona fafagina ai o outou ola faaleagaga. O lotu faaleaiga, o le faitauina o tusitusiga paia, alofa i totonu o outou aiga ma le tautua po o le auaunaga ma le le manatu faapito i aso taitasi, o manai ia mai le lagi e fafaga ai o outou agaga. O le faia Afiafi Faaleaiga i vaiaso taitasi o se tasi lea malosia tele mo le amiotonu i totonu o le aiga. . . .

Ma o le mea la lea ou te aioi atu ai ia aua nei outou faoa mai o outou tino faaleagaga le malosi e tatau ai e ala i le solia o le Aso Sapati, ae ole atu ma le loto faamaoni ina ia outou ola i aso taitasi ina ia mafai ona outou mauaina mai le punavai o le malamalama, meaai ma le malosi e tatau ai mo aso taitasi.<sup>6</sup>

---

**E faapefea ona faamanuiaina faaleagaga i tatou i le anapogi ma le totogiina o taulaga anapogi?**

Sa ou fesili ifo ia te a'u lava ia, "O le a le tulafono o le anapogi?" ma sa ou mauaina ai le faauigaina e Peresitene Iosefa Samita i upu nei sa ou manatu o se faaliliuga maoae:

"O le mea lea, e tatau ai i tagata uma o le Au Paia o Aso e Gata Ai ona tuuina atu i lona epikopo, i le aso anapogi, o meaai semanu e faaaogaina e lona aiga i lena aso, ina ia mafai ai ona tuuina atu i e tausia ai ma faamanuiaina e matitiva; a lē o lena foi, po o meaai, ia tutusa ma lena aofaiga, pe, afai foi e tele le tamaoaiga o le tagata, ia faapena foi ona foa'i atu ma le matamau i se tino i tupe, ma faaputupu ma faapaiaina mo e matitiva." [*Gospel Doctrine*, 5th ed. (1939), 243.]

Ona ou fesili ifo ai foi lea, "O a faamanuiaga ua folafola mai e le Alii tatou te maua mai le anapogi ma le totogiina o taulaga anapogi?" O se saunoaga a Peresitene [Heber J.] Grant o loo tusia, na ou maua ai tali nei: muamua, o faamanuiaga tau tupe ma le isi, o le faaleagaga. O lana saunoaga lena, efaatatau i faamanuiaga tau tupe:

"Ou te fia folafola atu ia te outou o i ai iinei i le asō, afai o le a tausia ma le faamaoni ma le maelega e le Au Paia o Aso e Gata Ai e amata atu i lena aso, o se nuu, le anapogi i masina taitasi ma totogi i aao o o latou epikopo le aofaiga sa'o semanu latou te faaluina mo meaai mo 'aiga e lua ia ua latou lē aai ai. . . o le a lava tupe e manaomia e tausia ai ē le tagolima ma ē matitiva." [*Gospel Standards*, comp. G. Homer Durham (1941), 123.]

Na ia saunoa foi e uiga i faamanuiaga faaleagaga e faapea:

"O tagata soifua uma lava o le Au Paia o Aso e Gata Ai e anapogi mo 'aiga e lua i masina taitasi, o le a faamanuiaina faaleagaga ma faateleina le faatuatua i le talalelei a le Alii o Iesu

Keriso—e faamanuiaina faaleagaga i se ala matagofie.” [*Gospel Standards*, 123.]

Ina ua ou faitauina lena saunoaga, sa ou toe manatunatu i le mea na tautino mai e le Perofeta o Isaia e faatatau i faamanuiaga o le a oo mai i le tagata e anapogi ma tofitofi ana mea e ‘ai mo e ua fiaaai. . . .O folafolaga faaleagaga maoae ma matagofie nei na tuuina mai e le Alii mo i latou e anapopogi ma tofitofi pe faasa-fua atu a latou mea e ‘ai i ē o fiaaai; e pei ona tusia i le Isaia, ma o le folafolaga muamua:

“Ona gafoa mai ai lea o lou malamalama e pei o le tafa o ata, e taalise ona tupu mai foi o lou malolo: e alu atu foi lau amio-tonu i ou luma, e muli’au mai le pupula o Ieova ia te oe.”

Ona folafola mai foi lea o le Alii:

“Ona e valaau lea, ae tali mai ai Ieova; e te alaga atu ae fetalai mai o ia, O a’u lenei:”

Ma sa toe folafola mai foi le Alii:

“Afai foi e te alofa atu i le ua fia’ai, ma e fafaga ia ma’ona le ua tiga; ona alu ae lea o lou malamalama i le pouliuli, ma lou pogisa e pei o le aoauli ia.”

Ma, le toe folafolaga lenei:

“E taiitaiina foi oe e le aunoa e Ieova; e faamalie foi o ia ia te oe pe a oge vai, ma faamalosia ou ivi; e avefa foi oe e pei o se fanua ua faasusuina, e pei o le punavai foi e le mate ona suavai.” [Isaia 58:8–11.]

O faamanuiaga pe a faaliliu mai i mea tutupu ma faafitauli o le olaga, e manino lelei lava i se mea na tupu na faamatalaina e se tasi o peresitene o se misiona i le Au Pulega Aoao i ni nai tausaga ua mavae. A’o matou ola i na aso o le lē mautonu i vaitaimi o taua, sa faamatalaina e lenei tamā lenei mea na tupu:

O le aso anapogi. Sa alapo lava o ia i le taeao, ma sa faia ana galuega i le faatoaga, ma sa ia faaaluina ni nai minute i le faatoaga a’o le i usu i le sauniga faale-Perisitua sa ala faia i le taeao. . . .

O le taeao lea, a’o savali atu i lana faatoaga, e le’i matuai gauai atu lona mafaufau i ona atalii e toalua sa i ai i le taua, ae, na faafuasei ona taofi o ia e se lagona mata’utia na oo ane ia te ia, a’o

ia kolosia le faatoaga, ma e faapea ua i ai se mea ua tupu i se tasi o ona atalii. Na ia liliu e toe foi i le fale. Na fai mai a ia, “E le i faapea sa na ona ou savali, ae sa ou tamoe, ma sa ou tauvalaau i le matou aiga e o mai i le potu i luma, ma sa ou fai atu i ai, ‘Ia, ou te le manao e ‘ai sina meaai e se tasi o lo’u aiga i le aso. Ou te manao ia outou anapopogi, ma ou te manao ia outou tatalo, ma ou te manao tou te tootutuli faatasi ma a’u e fai le tatou tatalo faaleaiga, aua ua ou lagona o loo i ai se mea ua tupu i le tatou tama o loo i le taua.”

Ma sa latou potopoto ma faia le latou tatalo i le taeao. Sa latou anapogi, ma e le’i faaumaina le latou anapogi, ae na faaaauu pea ona latou anapopogi ina ua mavae lena aso. Na mavae aso e sefulu o le fā’atu ma le popolevale, ona oo mai ai lea e ala mai i le Koluse Mumu, o se tala i lena taeao (ma ina ua latou fua faatatauina le eseese o taimi, o le taimi tonu lava lea na maua ai e le tamā lea lena lagona), sa lavevea lona atalii ma lana uo i se “fanafanua” ma sa matuā masofa ai lana uo, ae sa tugā le manu’a o lona atalii na toetoe a oti.

Anapogi ma tatalo—“Ona e valaau lea, ae tali mai ai leova; e te alaga atu, ae fetalai mai oia, O a’u lenei.”

---

### **Tatou te latalata atili faapefea i le Alii ona o le manatunatu loloto?**

Na saunoa Peresitene [Tavita O.] Makei, “E le o lava le taimi tatou te manatunatu loloto ai.” Ou te alapo i le taeao. . . , i le lima i le taeao, a’o manino ma to’alelei lo’u mafaufau ma lo’u agaga. Ona ou manatunatu loloto ai lea. E mafai ona outou latalata atili i le Alii nai lo le mea ua outou mafaufau i ai pe a outou aoao e manatunatu loloto. Tuu atu i o outou agaga e aoao e le Agaga.<sup>8</sup>

E le vave galo i le Toasefululua le apoapoaiga a Peresitene Tavita O. Makei i la matou fonotaga faaaufono i se tasi taeao ina ua ia faailoa mai le matua taua o le faaaluina o se taimi e manatunatu loloto ai ina ia maua le agaga. . . .” O se tulaga maoae le tali atu i musumusuga a le Agaga, ma ua tatou iloa a oo mai nei musumusuga, o se meaalofa ma faamanuiaga lo tatou mauaina. E oo mai pe a tatou toafimalie lelei ma lē gaogaosā mea tatou te pisi ai.”

Sa faamatalaina foi e le Peresitene se aafiaga i le soifua o Epikopo John Wells, o se tasi na i ai i le Au Epikopo Pulefaamalumalu i lona taimi. Sa maluu se atalii o Epikopo Wells i le Emigration Canyon i se ala o nofoaafi. . . .Sa solia lona atalii i se nofoaafi la'u uta. Sa lē mafai ona faanā le Faletua o Wells. Sa tagiauē o ia i aso e tolu a'o lumanai le falelauasiga, sa lē maua se toafilemu i le taimi o le falelauasiga, ma sa mata'utia se tulaga na oo i ai lona mafaufau. I se tasi aso ina ua faatoa mae'a sauniga o le falelauasiga, a o taotooto i luga o lona moega e malolo, ae o la lava foi e faanoanoa, na fai mai a ia, sa oo mai lana tama ia te ia ma faapea mai, "Tina, aua e te faanoanoa. Aua e te tagi. O lea ou te manuia." Na ia faamatala atu i ia te ia e lē iloa e lona tina pe na faapefea ona tupu le faalavelave. Na ia faamatala ane lea, na ia faailoilo atu i le enisinia e alu le nofoaafi, ma sa ia taumafai e pu'e 'au o le pa faalagolago o nofoaafi la'u uta, ae peitai a'o ia taumafai e oso i luga, sa lāvea lona vae i se a'a laau ma sa le mafai ai ona maua le 'au o le pa faalagolago ma pau atu ai lona tino i lalo o le nofoaafi. O se faalavelave faafuasei moni lava. Na fai mai lana tama, o le taimi lava na ia iloa ai ua i ai o ia i se isi siosiomaga, na ia taumafai e tilotilo atu i lona tamā ae sa le mafai ona oo atu i ai. Sa pisi tele lona tamā i ona tiute i le ofisa ma sa le mafai ai ona tali mai i lana valaau [a le atalii]; o le mea la lea ua sau ai i lona tina ma fai atu i ai, "Ta'u atu i lo'u Tamā o loo ou manuia. Ou te manao ia aua nei e toe faanoanoa."

Ona saunoa mai lea o Peresitene Makei, o le mea sa mafaufau i ai, pe a tatou mapu i se potu patino e sili atu le tulaga tatou te 'apoina ai mea faapena, ma e pei ona ia saunoa i ai, o ona mafau-fauga sili e oo mai pe a ala a'e i le taeao ma o loo toafimalie lelei ma manatunatu i tiute o le aso, ma e manino le oo mai o manatu e faapei o loo faalogo i se leo ma e sa'o lava na manatu po o faallogona. Afai tatou te popole ma lē fiafia o tatou lagona, e lē oo mai musumusuga. Afai tatou te ola ina ia sa'oloto o tatou mafau-fau mai le popole ma manino ma o sa'o foi o tatou lagona o le tasi i le isi, o le galuega a le agaga o le Alii i o tatou agaga e moni lava faapei ona tatou sii i luga le telefoni; peitai pe a oo mai, ia outou manatua lenei mea, e tatau ona lava lo tatou lotototoa e talia le mea ua fautuaina mai e fai. . . .

Ia avea lena ma mea e manatua—ia faapena foi ona fai. Ia faaalu se taimi e manatunatu loloto ai. O le tele o taimi o le a e tauivi ai ma faafitauli, o ala e foia ai e mafai ona iloatino i la le agaga.<sup>9</sup>

Aua ne'i e soona pisi na'uā ma faapea ai ua leai sou taimi e te manatunatu loloto ai. Ia faaavanoa se taimi. O le molimau aupito taua e lē sau faaaliali, ae o le molimau i totonu. E mafai ona latalata tele mai Keriso nai lo se mea ua tatou malamalama i ai. “O loo ou i totonu ia te outou ae lē mafai ona outou vaaia a'u. O le Agaga Paia e tuuina atu le molimau faamaoni. O loo vaai o'u mata ia te outou. E oo mai le aso o le a outou vaai mai ai ia te au.” [tagai MFF 38:7–8.]<sup>10</sup>

## **Fautuaga mo Suesuega ma Talanoaga**

---

- Aisea e tatau ai ona tatou faaalu le taimi e fafagaina ai pe faafileleina i tatou lava i la le agaga? O a mea e mafai ona tatou faia i aso taitasi e atinaeina ai lo tatou ola faaleagaga?
- O a ni mea e mafai ona faalavelave i a tatou taumafaiga e fafaga i tatou lava i la le agaga?
- E mafai faapefea ona fai o tatou aiga ma nofoaga e fafagaina ai pe faafileleina tagata taitoatasi o le aiga i la le agaga?
- Ua fesoasoani faapefea lou faamamaluina o le aso Sapati e te tuputupu a'e ai faaleagaga? O a gaoioiga i le Sapati e fesoasoani ia te oe ma lou aiga e tausisia ai se agaga tapuai i le aso atoa? Pe a tatou solia le Sapati, aisea ua tatou “lafoaia ai se agaga e tumu i le olioli ona o si matāua itiiti o le fiafia”?
- O a faamanuiaga e maua e i latou e anapopogi? (Tagai Isaia 58:8–11.) O faapefea ona e vaaia nei faamanuiaga ua faatau-nuina?
- O le a se mea ua tatou aoaoina mai le tala ia Epikopo John Wells e uiga i le taua o le faaavanoaina o se taimi e manatunatu loloto ai i mea faaleagaga? O a ni auala ua mafai ona e faa-aogaina le manatunatu loloto i mea faaleagaga i lou olaga?

## *Faamatalaga*

1. *Decisions for Successful Living* (1973), 149–50.
2. *Decisions for Successful Living*, 145.
3. “Learning the Gospel by Living It,” lauga i le konafesi lona 52 faaletausaga a le Peraimeri, 3 Ape. 1958, Historical Department Archives, O Le Ekalesia a Iesu Keriso o le Au Paia o Aso e Gata Ai, 5–7.
4. *The Teachings of Harold B. Lee*, ed. Clyde J. Williams (1996), 264.
5. *Stand Ye in Holy Places* (1974), 333.
6. *Decisions for Successful Living*, 146–50.
7. “Fast Offerings and the Welfare Plan,” *Relief Society Magazine*, Dec. 1952, 799–801.
8. *The Teachings of Harold B. Lee*, 130.
9. “With Love Unfeigned,” lauga i le semini a sui risone, 3 Ape. 1969, Historical Department Archives, O Le Ekalesia a Iesu Keriso o le Au Paia o Aso e Gata Ai, 5–6.
10. Lauga i le aufaigaluega o le Malumalu i Provo, 9 Iulai 1972, Historical Department Archives, O Le Ekalesia a Iesu Keriso o le Au Paia o Aso e Gata Ai, 10.



# Ola i le Tulafono o le Lēgaviā

*O le a se mea e mafai ona tatou faia e puipuia ai lo  
tatou lava lēgaviā po o le tatou ola mama  
faapea foi i o tatou aiga?*

## Faatomuaga

“**A**fai e te manao ia i ai faamanuiaga a le Agaga o le Alii ia te oe, e ao ona e tausia lou tino, o le malumalu o le Atua, ia mama ma lē ponā,” o le saunoaga le a Peresitene Harold B. Lee.<sup>1</sup>

Na ia faaaogaina se tusi faanoanoa mai se tagata na solia le tulafono o le lēgavia e faamanino ai le taua o lenei apoapoaiga: “Ina o o’u fiasia ma olioli i le Agaga o le Alii ma ola ai i le talalelei, e matalatala mai itulau o tusitusiga paia ma se malamalama fou ia te a’u ma vave ona oso mai i lo’u agaga uiga o itulau o mau. O le taimi nei, talu ai lo’u faasalaga ua tapē lo’u igoa mai le ekalesia, ua ou lē toe faitau ma le malamalama; ua ou faitauina ma le masalosalo palakalafa sa ou manatu muamua sa ou malamalama lelei ai. Sa ou fiasia i le taimi ua fano e faia sauniga o le talalelei mo la’u fanau, faamanuia a’u pepe, papatiso i latou, faauu i latou pe a mama’i. O le taimi nei ua na o lo’u tutu i tafatafa ma molimauina se isi tagata o faia na sauniaga. Sa masani ona ou fiasia e alu i le malumalu, ae o le taimi nei ua tapunia faitotoa o le malumalu ia te a’u. Sa masani ona ou fai sina o’u tomumu e uiga i saofaga o loo talosagaina e le Ekalesia, totogi sefuluai, totogi taulaga anapogi, fai atu le sao i lea mea ma le sao i lena mea, ma i le avea ai ne ma tagata ua tapē le igoa, ua lē faatagaina a’u ona toe totogi se sefuluai; a o lea ua tapunia nei le lagi mo a’u aua ua le mafai ona ou totogiina se sefuluai. Ou te lē toe tomumu lava pe faitio i talosaga a le Ekalesia ina ia taulagaina a’u mea e maua. E ese le agalelei o la’u fanau ia te au, ae ou te iloa, o le ta’ele o o latou loto, o loo mamā ma maasiasi i latou i lo latou tamā lea o loo latou tauaveina lona igoa.”<sup>2</sup>



Na saunoa mai Peresitene Lee, “O lena alii po o lena tamaitai ua tulimata’i atu lana vaai i lena sini faavavau o le ola e faavavau, ua mauoa lava o ia, auā ua si’oina lona loto atoa i se afi lea e oo mai i lē na te tausisia le agavaa o lona olaga.”<sup>3</sup>

## **Aoaoga a Harold B. Lee**

---

### **Aisea e tatau ai ona usitai i le tulafono o le lēgaviā?**

O le i’uga ina ia mafai ona tuufaatasia le tane ma le fafine i lenei sootaga paia o le faaipoipoga, ina ia saunia ai tino faale-olaga nei e fai ma mea mau ai agaga faalelagi, o lea ua tuuina ai e le Alii i fatafata o alii talavou uma faapea foi tamaitai talavou se faaunauga e fegalegalea’i ai o le tasi ma le isi. O ni uunaiga sã ma paia ae matua uiga ese le mamana. Ina ia lē manatu māmā i le ola pe faaaogaina sese nei āga o le olaga e tau ina faamalie ai lagona malolosi faaletagata, o lea ua tuuina ai e le Atua i se tulaga faamuamua i le vaega o solitulafono matuiā ia ua lapata’ia ai i tatou i Tulafono e Sefulu, muamua, fasioti tagata, ma le lona lua, feusua’iga lē mama. “Aua e te fasioti tagata! Aua e te mulilua!” (Tagai Esoto 20:13–14.). . .Ua apoapoi mai le Ekalesia ia te outou ina ia fai faalelei lavalava ma ou uiga ina ia lē faatagaina ai e mafaufauga leaga ona uuna’ia lou gutu e tautala i mea leaga ma leaga ai ma lē tusa ai lau amio. Ina ia maua le fiafiaga aupito sili i le faaipoipoga paia, o lea e tatau ai ona tausisia le mama atoa-toa o punavai o le ola.<sup>4</sup>

Ia amioatua. O se tasi lenei o tulafono aupito sili.

“Ia tumu foi lou loto i le alofa atu i tagata uma, ma le aiga o le faatuatua, ia teuteuina ou manatu i le mama e le aunoa; ona malosi ai lea o lou faatuatua fai ifo i luma o le Atua; ma toto ifo i lou agaga le mataupu faavae o le perisitua e pei o le sau mai le lagi.

“E avea le Agaga Paia ma au aumea tumau, a o lou tootoo ma too lē feliuliua’i o le amiotonu ma le upu moni; o lou malo foi o le a faia ma malo faavavau, e aunoa foi ma faiga faamalosi o le a tafe ia te oe e faavavau faavavau lava.” (MFF 121:45–46.)

Ae e le mafai i lenei lalolagi ona tatou maua lena pule, lena mana, lena mafutaga ma le Agaga Paia sei vagana ua tatou aoao e mama i mafaufauga, i uiga masani, ma isi a tatou tāga.<sup>5</sup>

Ia faaofuina oe lava i le ofutau o le amiotonu. Aua lava ne'i e faamatuu atu i se taimi e vaivai ai. Ia malupuipuia lena 'olo o le mama. O lou tino o le malumalu lea o le Agaga Paia, pe afai e te tausia mama ma atoatoa.<sup>6</sup>

Ia ola i le tulafono o le lēgaviā i se tulaga e sili atu ona atoatoa nai lo se isi lava taimi na i ai muamua, e ala lea i le mafaufau mama. Ia manatua le fetalaiga a le Matai, “Ua outou faalogo, na faimai i e anamua, Aua e te mulilua. A ou te fai atu a'u ia te outou, ai se vaai atu i le fafine ina ia mana'o i ai, ua uma ona mulilua ma ia i lona loto” (Mataio 5:27–28). O lea, e tatau ai ona mama o tatou mafaufauga. Ia faatoilalo ni uiga masani atonu o ia te oe e tau atu ai i āga lē mama, ma ia faasaina ni amioga lē mama e ono faatama'ia ai o tatou olaga.<sup>7</sup>

---

### **O a taunuuga o le solia o le tulafono o le lēgaviā?**

E le i i ai se taimi muamua na i ai sea luitau i le aoaoga faavae o le amiotonu ma le mama atoatoa ma le lēgaviā. Ua tafieseā tulaga faatonuina o le ola mama e mana'o o le amioleaga. E leai se mea e sili ona taua tatou te faia nai lo le aoao atu ma le malosi i le mea tatou te mafaia, a'o tataitaiina e le Agaga o le Alii, ina ia mafai ona tatou faatauānuina o tatou tagata i le lalolagi e ola latalata i le Alii i lenei taimi o le tele naua o faaosoosoga.<sup>8</sup>

O le taufaamata'u aupito sili a Satani i aso nei, o le faatamaiaina lea o le aiga, ma faa'amu'amu i le tulafono o le lēgaviā ma le paia o feagaiga o le faaipoipoga.<sup>9</sup>

Sa tapunia se tasi o a matou konafesi faalesiteki i se taimi e le'i mamao atu i se savali matagofie. . . . A'o tula'i le peresitene o le siteki e tapunia le konafesi, sa ia tagatagai atu i le faapaologa sa faatumulia i fanau ma faapea mai, “O loo i ai se mea ou te fia fai atu ai ia te outou na le tupulaga talavou o loo i luga o le faapaologa. Atonu a'o ave'a ai a'u ma o outou peresitene faalesiteki, o le o mai ai outou uma ia te au mo se faatalanoaga—ia siitia le perisitua, po o se tofiga e tofia ai oe, po o ni pepa faataga o le malumalu—ma e aofia ai ma isi mea, o le a ou fesili atu ai ia te outou se fesili e tasi e matuā vāilili. Pe o e ola mama ea? Afai e mafai ona e tali mai ma le faamaoni, 'Ioe, Peresitene, o loo ou ola mama,' o le a e fiasia. Afai e tatau ona e tali mai, 'Leai, ou te

lē o ola mama,’ o le a e faanoanoa; ma afai e te pepelo mai ia te au; o le a faatumulia lou loto i le oona matuitui i aso uma e te ola ai.” . . .

E i ai se aso o le a [tatou] feiloai ai ma Lē na Faia i tatou ma e faapei ona ta’ua e Moronae—ma e fai lava si malosi o lenei faaupuga, “Tou te manatu ea e mafai outou ona fiafia e nonofo faatasi ma Lē Paia o Isaraelu ma se lagona o le ta’usalaina i lo outou lava palapalā?” Ua Ia fetalai mai, “O le a sili atu lo outou fiafia e nonofo faatasi ma agaga ua faasalaina i seoli faatasi ai ma lo outou lē mama ma le palapalā o loo i o outou luga pea, nai lo le i ai i le afioaga o Lē Paia o Isaraelu.” [Tagai Mamona 9:3–4.]<sup>10</sup>

Pe a tatou solia tulafono, ona tatou faatiga ai lea ia i tatou lava atoa ma isi. O le sese e masani ona tula’i mai ai le faanoanoa, mamafa i le mafaufau, fai ma fili, po o le momotu ese mai foi, pe afai tatou te le salamo. O le mea e alia’i mai ai, tatou te faaitiitia ai lo tatou lava manatu maualuga mo i tatou lava; tatou te ta’u faatauvaaina a tatou matafaioi o ni atalii ma ni afafine o le Atua; atonu foi o le a tatou tauafai e sosola ese mai le mea tonu a’ia’i pe o ai moni lava i tatou!

Pe a tatou agasala ona faaitiitia ai lea o lo tatou aafiaga lelei i le avea ai ma nisi o le fanauga a tagata. . . . Atonu tatou te faaleaga i isi; atonu foi tatou te toe sasa atu i le fanauga a tagata i se isi ala, ma o lea o le a faateleina ai le pagatia o le tagata. O le lē mama o matua e mafai ona auina atu ai se tali e lē motusia e mafai ona soo ai augatupulaga, e ui lava atonu e ese le tulaga e faaalua ai le faaliliii ma le faatautee o fanau lē fiafia. O le leai o se alofa i le aiga e āfua ai uiga faaalua e aafia ai i tatou uma, e mata’utia le tau e tologiina e le tagata mo lenei ituaiga toilalo. O le a se mea e sili atu ona talafeagai ma tulaga manaomia o le fanauga a tagata nai lo avea o i tatou ma tagata e mama, ma atinae le alofa i le aiga—ae o le mea moni lava, ia tausia poloaiga uma?<sup>11</sup>

E leai lava se alii po o se tamaitai e i se tulaga maualuga i lenei ekalesia e pa’ū i lalo ifo o le tulaga ua faamoemoe e ola ai, e aunoa ma lona tosoina i lalo o le toatele sa faatuatuaina o ia. Ua ia faamanu’aina o latou mafaufau; ua ia tosoina i lalo i latou e tau leai se faatuatua, ma e toatele foi i latou e mafaufau i le aso latou te le fiafia ai i lenei ekalesia pe afai e pa’ū se tasi sa

latou faatuatuaina, i lalo ifo o le tulaga sa latou faamoemoeina o ia e tausisia.<sup>12</sup>

Ua ou ta'ua le mata'utia o le agasala; ma o le tau'i o le agasala o le oti ma o le togiaola a le Alii o Iesu Keriso, e mafai ai e oe lena ua agasala ona maua le faamagaloga e ala i le salamo faamaoni, ma maua le ala i le olioli i lenei olaga ma le atoaga o le olaga a sau.<sup>13</sup>

---

**O le a le matafaioi a i latou o umia le perisitua  
e faatatau i le tulafono o le lēgaviā?**

Uso e, ua tatou ia i tatou lava ona toe faia se faaiuga o le a tatou tausia le tulafono o le lēgaviā: ma afai ua tatou faia ni mea sese, ia tatou amata nei ona faasa'o na mea sese. Ia tatou savavali agai atu i le malamalama, ma ou te aioi atu ia te outou uso e, aua le faaaogaina sese le avanoa matagofie ua ia te outou o ni alii, o ni ē e mafai ona soosoo lima ma le Lē Fofoa i le fofoaina o tagata, e ala lea i le au faatasi i se ituaiga o sootaga lē faatagaina lea e na o le ta'uvalea e oo i ai ma tiga ai loto o o outou taitoalua ma fanau. Uso e, matou te aioi atu ia te outou ina ia tausia lo outou ola mama, ma savavali i le ala o le upumoni ma le amiotonu, ona pati fiafia ai lea o se Tama Faalelagi [auā] o ona atalii outou.<sup>14</sup>

Ou te fia lapata'ia lenei faalapotopotoga tele o le perisitua mai lena agasala tele a Sotoma ma Komoro, lea sa faaigoaina o se agasala e lona lua i le agasala o le fasioti tagata i lona tulaga matuiā. Ou te tautala e faatatau i le agasala o le mulilua, o lea, e pei ona outou silafia, o le igoa lea na faaoga e le Matai ina ua Ia fetalai e faatatau i agasala faalefeusua'i e lē faatagaina o le faitaga faapea foi ma le mulilua; ma e le gata i lena, a o le agasala e tutusa foi le matuiā o le faatautane lea [faaulugalii o tane po o tamaitai foi], lea ua foliga mai ua maua ai lagona faaosofia i le taliaina e tagata lautele i faiga faa-Papelonia a le lalolagi, ma e lē tataua ona auai tagata o le Ekalesia.

A o tatou i ai i le lalolagi, e le tataua ona avea i tatou ma ni ō le lalolagi. Soo se taumafaiga e faia e aoga po o fale faafiafia e faaalia ai ni faiga sese tau i feusuaiga, lea e leai se mea e faia ae faaosofia ai lagona e faata'ita'i, e tataua i le au perisitua o lenei ekalesia ona matua malosi ma lē faamaluelueina e [tetee] e ala atu i faiga faatulafonoina uma lava e mafai ona faaoga.<sup>15</sup>

O se atalii o le Atua, aemaise lava se tasi e tauaveina le perisitua ma toaga i le Ekalesia, e mafaufau i ana meaalofa o mana e foafoa ai mai le Atua, faapea ua na o se mea taalo, pe faapea foi o a la fegalegaleaiga ma lana manamea ua na ona faamalie ai o ona lagona tuinanau, ua ia taalo i le taaloga a Satani, o lē ua iloina lelei o lea amioga o le ala moni lea e faatama'ia ai le tulaga aupito sili e mafai ona maua ai le mafutaga ma le Agaga o le Alii.<sup>16</sup>

---

**E mafai faapefea e matua ona aoao a latou fanau ia malamalama ma ola ai i le tulafono o le lēgaviā?**

O le aoaoga aupito sili ona lelei i le ekalesia e faia lea i totonu o le aiga, o iina ua i ai le matafaioi i le tama ma le tina i le aiga e aoao ai a la'ua fanau a'o iti lava e uiga i mataupu faavae o le faatuatua, salamo, talitonu i le Faaola, o uluai mataupu faavae o le ola mama, amioatua, mamalu, ma isi. O le malosiaga aupito sili e mafai ona maua e fanau i le aloese mai nei mea o le lalolagi o le popole lea ina ne'i leai ni o latou nofoaga i le li'o faaleaiga e faavavau. Afai na aoaoina a'o iti ma lo latou tulaga talavou e alolofa i le aiga ma ava ma migao i le aiga, o le a latou mafaufau ma saga mafaufau ae latou te le'i mananao e faia se mea e taofia mai ai i latou mai le ave ma nisi o lona aiga e faavavau. Mo i tatou, o le faaipoipoga, o le fanauina o fanau, lēgaviā, ma le amioatua o nisi ia o upumoni aupito taua ua tatou maua—o mea e aupito sili ona taua.<sup>17</sup>

Pe ua tatou faamautinoaina ea o le atinaeina o lona tamaitiiti ua tuuina mai i la tatou tausiga, tatou te lē i tuua lava o ia e au-noa ma le aoaoina atu i ai, o le “faapefea” ona ia faia e faavae mai o tatou aafiaga? I ona tausaga na tuputupu a'e ai, pe sa tatou faataatiaina ea le faavae ma le faavaa mo se olaga malosi, faamanu-iaina, ma le fiafia, pe sa tatou tuua uma lava e aoao ma le lē mautonu e foia faafitauli i soo se auala seia i'u ina maua se ala e talafeagai, ma faamoemoe o le a puipuia e le Atua la tatou tama pele a'o feagai o ia ma aafiaga?

Atonu o le a faamanino atu i se tala moni le manatu lea ou te taumafai e ta'u atu. . . .Sa i ai se pailate talavou sa lele na o ia i luga a'e o le malae vaalele i se taimi faaa'oa'oga. . . .sa faafuasei

ona 'e'ē mai le leitio o fesootaiga i le alii ofisa e faafoeina le 'olo: "Ua lē mafai ona ou vaai! Ua ou tauaso." Pe a na faapea e gatete foi lē na faafoeina le 'olo faatonutonu, semanu e mautinoa lava le pagatia o le taulealea pailate faapea foi le vaalele tauagata; peitai, o le mea e laki ai, o le alii na faafoeina le 'olo faatonutonu, o se tagata ua i ai le poto masani, ma o lē ua silafia mai lona poto masani, e i ai tulaga e mafai ai ona po le vaai a se tagata fou mo na o sina taimi ona o le popole tele. Sa talanoa filemu atu le alii ofisa lea i le taulealea sa i luga i le ea, ma faatonutonu atu i ai le faiga e faataamilomilo lemu ai i luga a'o le taimi foi lea sa faatonuina ai masini mo faalavelave faafuasei e ave ane loa lava, ne'i tupu se faalavelave. Ina ua mavae ni nai minute o le atuatuvaletu ma sa foliga mai i tagata uma na maimoaina e faaumiumi, sa tuu ifo e le pailate uili o lona vaalele i le malae ma sese atu ai loa ma tu. Sa faavave atu e avetaavale o le taavale a le falemai le taulealea i le falemai o le fitafita mo togafitiga.

O le a se mea semanu e tupu pe ana popolevale le alii ofisa o le 'olo faatonutonu pe lē faia foi lona tiute, pe lē iloa foi ona tau-limaina nei ituaiga faalavelave faafuasei? O le tali, o le mea foi lava lena semanu e tupu, lea foi e mafai ona tupu [i se talavou] pe a aunoa o ia ma fautuaga poto o le poto masani pe a feagai ma faalavelave matautia e lē masani ai. O ia mea uma, o le a matua faamanu'alia ai le ola, po o le faatama'iaina foi, ma o le avanoa foi e faataunuina ai le mea silisili o le a pagatia. . . .

Ma'imau e pe ana lagona e tina uma le tagi faamomoiloto ma fesili a si teineitiiti pele, o lē sa moemiti mo se faaiipoipoga i le malumalu a'o talavou ma sa toetoe lava a oo i ai, a ua solia le tulafono o le lēgaviā ma o le taimi nei. . . .ua matua mafatia lava lona mafaufau i taimi uma. O ana fesili lava nei: "E faapefea ona ou iloa ua ou i ai i se tulaga mata'utia? Na lē ia te a'u i se ā le malosi ou te teena ai?" E faapei lava o le pailate na tauaso, sa faapena foi ona lele tauaso lea tamaitai, ae, o le mea e leaga ai, sa leai se tagata i le 'olo faatonutonu e taiialaina o ia ina ia tulau-leele saogalemu mai ona tulaga faigata. Ma'imau e pe ana mafai ona ia talanoaina ona faafitauli i se tina poto!

Pe ua pisi tele ea le tina i ana galuega faale-Ekalesia po o ana feau i le fale po o fegalegaleaiga ma isi tagata po o kalapu ua le

mafai ai ona atina'e se mafutaga vavalalata e mafai ai ona talitounuina e lana tama teine o ia i nei mataupu paia faapea? Atonu foi o lea tina sa lava ia te ia le aoaoina o lana tama teine i mataupu tau i le atamai e faatatau i nei mataupu ma'ale'ale, ae e masani, ona uuna'ia ai tamaiti aoga e faata'ita'i. Atonu na te le'i iloaina, o totonu lava o lona potu malolo, i aso taitasi, e ala mai i le leitio, o mekasini, ma le televise ona oo mai manatu taufaasese o le alofa ma le olaga, ma faaipoipoga, ae ua sui foliga, ma e tele taimi e sese ai le autalavou faapea o le ala lea i le fiafia.<sup>18</sup>

Outou na tina, ia mafuta vavalalata ma a outou tama teine. I le taimi o laiti, aua nei e faatagaina se isi tagata e ta'u atu ia te i latou mea e uiga i le foafoaina o le tagata. O le taimi lava e amata ai ona tuufesili lau fanau laiti, o le fanau iti e fesili e uiga i nai mea iti, ia nofo i lalo ma talanoa i ai e uiga i mea e tusa ai ma lo latou malamalama. Ona latou faapea mai lea, "Ia Tina, ua lelei." Ma e le umi foi pe a oo ina talavou, o le a toe o mai foi i le taimi lona lua, o le taimi lea ua fai si malamalama i mea o le lalolagi. Ona amata ai lea ona eva faamasani ma uo, ma o fea o le a o i ai mo se fautuaga? Afai na e faia lou tiute, o le a o mai ia Tina e fesili mo se fautuaga e uiga i lea mea ma lea mea, ma a oo i le po o lana faaipoipoga, o le a ia sailia foi se fautuaga mai lona tina ae lē o fafine o le aualatele.

O outou foi tamā, ia faauo ma o outou atalii. Ia aua lava ne'i e tulieseia lou atalii pe a manao o ia i sau fautuaga i mea e manao e te talanoa atu ai. O iina o i ai le saogalemu i le aiga. O iina e i ai le saogalemu o a outou tupulaga talavou. Aua nei e aveeseina mai ia i latou lena tulaga saogalemu, o outou na tamā ma tina.<sup>19</sup>

O se tasi o mea e ao ona tatou fia i le aoaoina lea o tupulaga talavou, o le faamasani lea o i latou i le ala e faafetaia'ia ai se faaosoosoga e oo mai i se taimi e le o i ai se puipuiga. . . .

O le tagata e i ai le matafaioi autu, o le tamā lea o le taulealea. E le faapea e tataua ona ala a'e le tamā i se taeao ona valaau lea i lona atalii e sau i tafatafa o lona moega, ona ia faamatala atu lea i ai mea uma o le olaga, i se sefululima minute. E le o le mea lena e manaomia e le taulealea. Na te manaomia se tamā e tali atu pe a manao o ia e fesili atu i ni mea e 'anagata le uiga. O loo atugalua o ia i le fia iloa, o loo fia iloa foi e ia.

Afai e tautala sa’o ma faamaoni lona tamā, ma faamatala atu i lona atalii i le mea e gata mai ai lona atamai a’o tuputupu a’e, o lona tamā o le tagata lea o le a toe foi mai i ai le atalii mo se fautuaga i tausaga o mulimuli mai. O le a avea lona tamā ma taula o le agaga o lona taulealea, a’o aumaia e le tamā mai lana api o le poto masani ia lesona e mafai ona ia tuuina atu i lona atalii e fesoasoani ai, e pulea lelei mai avanoa e ono mafai ona pa’u atu ai i lona mailei mata’utia i se taimi e le o i ai se puipuga.<sup>20</sup>

Ma’imau e pe ana mafai ona ou uuna’ia outou i le asō, e tatau ona outou savavali ese i aso taitasi mai le alalaupapa maluelue [i luga a’e o] mea faalelalolagi ma le agasala o loo tafe e pei o tafega mamafa o i lalo ifo, ma’imau e pe ana faapea a outou fetiaia’i ma le tiga o le masalosalo ma le atuatuvaale ma ua mafua ai ona outou lē tatalo ma faatuatua ma alofa, ona mafai lea ona outou faalogo mai i lo’u leo o se tasi o loo tauvalaau atu ia te outou mai mea se mea mamao, “Ia faatuatua—o le ala lenei—auā o loo mafai ona mamao atu la’u vaai nai lo outou.” Ou te tatalo i le Atua ia mafai ona outou faalogoina i le aso le alofa o loo tafe atu i lo’u agaga i o outou [agaga], ma iloa lo’u alofa tele mo outou taitoatasi a’o outou fetiaia’i ma faafitauli o le aso. Ua oo mai le taimi ua tatau ai ona tu le tagata i ona lava vae. Ua oo mai le taimi e lē i ai se alii po o se tamaitai e toe ola i se malamalama e nono mai se tasi. E tatau ona taialaina tagata taitoatasi i le sulu po o le malamalama o i totonu ia te ia lava. Afai e lē o ia te oe, o le a e lē tu.<sup>21</sup>

## **Fautuaga mo Suesuega ma Talanoaga**

---

- Aisea e tatau ai ona mama o tatou mafaufauga pe afai e tatau ona tatou tausia le tulafono o le lēgaviā?
- O a faamanuiaga e maua e i latou e ola mama ma amioatua?
- Aisea ua avea ai le ola lē mama ma ala i le faatafunaga e le gata i la le tino ae faapea foi i la le agaga? E faapefea ona avea le ola lē mama e faapei o le sola ese “mai le tulaga moni pe o ai moni lava i tatou”?



- O le a le matafaioi a i latou e umia le perisitua i le puipuiga o i latou lava ma ē pele ia i latou mai tulaga matautia o le ole lē mama?
- O a mea e tatau ona aoao e tama ma tina i a latou fanau e faa-tatau i le mama faalefeusua'i? O a mea e mafai ona fai e matua ina ia mautinoa ai ua lava le talitonuga o a latou fanau e fetu-faai atu ai mea ma i latou?
- O a ni aafiaga o i le lalolagi i aso nei e mafai ona faaitiitia ai lo tatou tulaga e gafatia ai ona teena faaososoga ina ia ola lē mama? Aisea e patino ai le fautuaga faapea “e leai se alii ma se tamaitai e toe ola i se sulu po o se malamalama e nono mai se isi” i le tausia o le tulafono o le lēgaviā i le lalolagi i ona po nei?

### *Faamatalaga*

1. In Conference Report, Mexico and Central America Area Conference 1972, 103.
2. *The Teachings of Harold B. Lee*, ed. Clyde J. Williams (1996), 105.
3. *By Their Fruits Shall Ye Know Them*, Brigham Young University Speeches of the Year (12 Oct. 1954), 8.
4. *The Teachings of Harold B. Lee*, 213–14.
5. *Stand Ye in Holy Places* (1974), 215.
6. *The Teachings of Harold B. Lee*, 215.
7. *The Teachings of Harold B. Lee*, 608.
8. *The Teachings of Harold B. Lee*, 85.
9. *The Teachings of Harold B. Lee*, 227.
10. Lauga i taitai o le Kolisi o Ricks ma faiaoga, 3 Mati. 1962, Historical Department Archives, O Le Ekalesia a Iesu Keriso o le Au Paia o Aso e Gata Ai, 19–20.
11. *The Teachings of Harold B. Lee*, 226–27.
12. *The Teachings of Harold B. Lee*, 504.
13. *Decisions for Successful Living* (1973), 219.
14. *The Teachings of Harold B. Lee*, 218.
15. *The Teachings of Harold B. Lee*, 232.
16. *The Teachings of Harold B. Lee*, 224.
17. Faatalanoaga ma Tom Pettit mo le NBC, 4 Me 1973, Historical Department Archives, O Le Ekalesia a Iesu Keriso o le Au Paia o Aso e Gata Ai, 22–23.
18. “My Daughter Prepares for Marriage,” *Relief Society Magazine*, Iuni 1955, 348–49.
19. *The Teachings of Harold B. Lee*, 227–28.
20. *The Teachings of Harold B. Lee*, 228.
21. “Fortifying Oneself against the Vices of the World,” lauga i se faauuga a le Kolisi o Ricks, 6 Me 1970, Historical Department Archives, O Le Ekalesia a Iesu Keriso o le Au Paia o Aso e Gata Ai, 18–19.



# Taumafai ina ia Faaatoatoaina

*E mafai faapefea ona tatou taumafai e faataunuaina  
le poloaiga “O lenei, ia atoatoa ona lelei  
o la outou amio”?*

## Faatomuaga

**U**a aoao mai e Peresitene Harold B. Lee le taua o le mulimuli i le faaa’oa’oga a leFaaola a’o tatou taumafai ina ia faaatoatoa:

“Ua faatalitonuina a’u sa le’i na ona mafaufau faatusatusa le Matai ina ua ia fetalai, ‘O lenei, ia atoatoa ona lelei o la outou amio, e pei o lo outou Tama o i le lagi e atoatoa ona lelei o ia.’ [Mataio 5:48.] . . .Pe tou te manatu ea sa fautuaina mai e le Faaola se sini e le mafai ona ausia ma ‘amu’amu mai ia tatou taumafaiga e ola ina ia maua lena tulaga faaatoatoaina? E le mafai e i tatou i lenei olaga ona oo i lena tulaga o le faaatoatoaina na fetalai i ai le Matai, ae o le olaga lenei tatou te faataatia ai le faavae tatou te fausiaina ai le faavavau; o le mea lea, e tatau ona tatou mautinoa ua faataatia lo tatou faavae i le upumoni, amiotonu, ma le faatuatua. Ina ia mafai la ona tatou ausia lena sini, e tatau ona tatou tausia poloaiga a le Atua ma ia faamaoni e oo i le iuga o o tatou olaga iinei, ona faaaauai ai lea i luga atu o le tuugamau i le amiotonu ma le malamalama seia oo ina tatou avea e faapei o lo tatou Tama oi le Lagi. . . .

“. . . [O le Aposetolo o Paulo] na faasino i le ala e maua ai le atoatoa. Na saunoa o ia e uiga ia Iesu, ma faapea mai, ‘E ui lava o ia o le Alo, a o mea s atiga ai o ia na aoaoina ai o ia ia usiusitai, ua faaatoatoaina foi o ia, ona avea ai lea o ia ma tupuga o le ola e faavavau ia ilaotu uma o e usiusitai ia te ia.’ (Eperu 5:8–9). . .

“. . . O lea aua ne’i i ai se aso e alu e aunoa ma le aoaoina mai le tusi lesona sili o le soifuuga lea o [Keriso], o ona ala i se olaga faaatoatoaina ma ia tatou savavali ai i la tatou sini e faavavau.”<sup>1</sup>

## Aoaoga a Harold B. Lee

---

### E faapefea ona fesoasoani lo tatou malamalama i mea ua tatou vaivai ai i le faatoatoaina o i tatou?

[O loo i ai] ni mea taua se tolu e tatau ona musuia ai se tagata ina ia ola i se olaga faa-Keriso—pe, i le gagana faatusipaia, ia ola faatoatoaina atili e faapei ona soifua ai le Matai. O le mea taua muamua ou te faaigoaina ina ia agavaa ai: E tatau ona fāgua tagata taitoatasi ia mananao e aoaina pe ola faatoatoaina, se malamalama i mea na te manaomia.

E le'i manaomia e le alii mauoa ona aoao atu i ai le salamo mai le fasioti tagata po o ni mafauauga fasioti tagata. E le'i manaomia foi le aoaina o ia i le ala e salamo ai mai le mulilua, po o le gaoui, pepelo, taufaasese, po o le lē ava i lona tina. Na fai mai a ia, na ia tausia nei mea uma a'o laitiiti; ae o le fesili, "O le a le mea ou te le i faia?" [Tagai Mataio 19:16–22.]

Na silafia lelei e le Matai, i Lona malamalama manino ma le mana o se Faiaoga Sili, le tulaga o lea taulealea. O le ma sa ia manaomia ma na te le o faia, o le faatoilaloina lea o lona tuinau i mea o le lalolagi, o lona faamoemoe e faatutua i oa. Ona tuuina atu lea e Iesu o le vaifofo lelei: "Afai e te manao ina ia atoatoa ona lelei o lau amio, ia e alu ma e faatau atu au mea, i le e avatu ai i e matitiva; ona ia te oe lea o le faulaigāoloa i le lagi: i le e sau ai ma mulimuli mai ia te au." (Mataio 19:21.)

I le liua maoae o le Aposetolo o Paulo, ina ua faatauasoina o ia i le malamalama a'o agai atu i le ala i Tamaseko. . . , sa ia faalogoina se leo o fetalai atu ia te ia: "Saulo, Saulo e, se a le mea ua e sau mai ai ia te au?" [Galuega 9:4.] Ma mai le ta'ele o le loto ua faamaualaloina o Saulo na oo mai ai se fesili e masani ona fesili ai se tasi ua na lagona e i ai se mea e tatau ona ia faia: "Le Alii e, se a le mea e te finagalo i ai ou te faia?" [Galuega 9:6.] . . .

Na faamatala e Enosa, le atalii o le atalii o Liae, ana tauiviga i luma o le Atua, a o le'i mauaina e ia le faamagaloga o ana agasala. E le o ta'ua mai pe o a ana agasala, ae na ia matua faailoa atu ma le loto. Ona ia faapea mai lea, "Sa matelaina lo'u agaga. . . ." [Enosa 1:4.] Ua outou iloa la, o le malamalama lena ma le lagona i mea e matua manaomia, ma o lena sailiiliga o'o-

o'o i le loto, na faafesagai lelei ai ma mea e vaivai ai ma mea foi o loo ia manaomia.

O lenei tulaga maualuga o lagonaina o mea e manaomia e se tasi, sa faaalua lea i le Lauga maoae i luga o le Mauga ina ua fetalai le Matai, "Amuia e lotomauualalo: aua e o latou le malo o le lagi." (Mataio 5:3.) O e lotomauualalo, e moni, o lona uiga o i latou e manaomia le faaleagaga, o ē lagona le matitiva i la le agaga ma o le ala lea e aapa atu ai ma le faanaunau mo se fesoasoani. . . .

E tatau ia i tatou uma lava, pe afai tatou te mananao e taunuu i le tulaga faaatoatoaina, ona fesili i se taimi i lenei fesili, "O le a ea le mea ou te le'i faia?" pe afai tatou te fia fe'a'ei i luga i le faaatoatoaina. . . .

---

### **E fesoasoani faapefea le toe fanauina e faaatoatoaina ai?**

O le mea taua lona lua mo le faaatoatoaina ou te fia ta'ua o loo maua lea i le talanoaga a le Matai ma Nikotemo. Na Ia silafia lelei ina ua sau Nikotemo ia te Ia, o loo saili o ia [Nikotemo] i le tali na fesili ai foi le toatele ia te Ia: "O le a se mea e tatau ona ou faia ina ia faaolaina ai?" Ma sa tali atu le Matai, "E moni, e moni, ou te fai atu ia te oe, a le toe fanau le tagata, e le mafai ona iloa e ia o le malo o le Atua." Ona fai atu ai lea o Nikotemo, "E mafai ea faapefea ona fanau o le tagata ua toaina? . . ." Sa tali atu Iesu, "E moni, e moni, ou te fai atu ia te oe, afai e le fanau se tasi i le vai ma le Agaga, e le mafai ona sao o ia i le malo o le Atua." (Ioane 3:3-5.)

E tatau ona "toe fanau" le tagata pe afai e manao e faaatoatoaina, ina ia mafai ai ona vaai pe ulufale atu foi i le malo o le Atua. Ma e faapefea ona toe fanau le tagata? O le fesili lava lenei e tasi na fesili ai Enosa. Ma tou te manatua le tali na aumai: "Ona o lou faatuatua ia Keriso, o Lē ua e faatoa faalogoina ma iloa. E mavae tausaga e tele a o lei faailoa mai o ia i le tino, o lenei, alu ia, ua e ola i lou faatuatua." [Enosa 1:8.]

Sa ma nofonofo ma Uso Marion G. Romney i le ofisa i se tasi aso, ae sau se taulealea i totonu. O loo sauniuni o ia e alu i se misiona, ma sa faatalanoaina o ia i le faiga masani ma sa ia faaalua ma ta'uta'u mai ni ana solitulafono patino a'o laitiiti. Ae na ia fai mai ia te i ma'ua, "E le faamalieina lava a'u i le na o le ta'uta'u

atu. E mafai faapefea ona ou iloa ua faamagaloina a'u?" I se isi faaupuga, "Ou te iloa faapefea ua toe fanauina a'u?" Na ia lagona e le mafai ona alu i se misiona i le tulaga o loo i ai nei o ia.

A o matou talanoa, sa saunoa atu Uso Romney: "Atalii, o e manatua le saunoaga a le Tupu o Peniamina? Sa ia aoao atu i nisi 'sa tuia o latou loto ona o o latou lava tuinanau, ua le tusa i latou ma le efuefu o le eleele. Ua alalaga i latou uma ma le leo e tasi, ua faapea atu: Auē, ia alofa ma faaaoga le toto o Keriso ina ia matou maua le faamagaloina o a matou agasala, ma ia faamamaina o matou loto; auā ua matou faatuatua ia Iesu Keriso, le Alo o le Atua, o Lē na faia le lagi ma le lalolagi, atoa mamea uma, o Lē foi e afio mai i le fanauga a tagata. Ma ua oo ina ua uma ona latou fai atu nei upu, ua oo mai le Agaga o leAtua ia te i latou, ma ua faatumuina i latou i le olioli, ona ua maua le faamagaloina o a latou agasala, ma ua filemu i o latou loto fuatiaifo ona o lo latou faatuatua tele ia Iesu Keriso. . . ." (Mosaea 4:2–3.)

Sa saunoa atu Uso Romney ia te ia, "Lo'u atalii e, ia e faatalitali ma tatalo seia iu ina e maua le filemu o lou mafaufau ona o lou faatuatua i le togiola a Iesu Keriso, ona e iloa lea ua faamagaloina au agasala." Se'i vagana lena tulaga, e faapei ona faamatala mai e Elder Romney, e soo se tasi lava o i tatou e manaomia lea tulaga, ma o loo tatou feofea'i i se puaoa sei vagana ua tatou maua lena toe fanaufouina. . . .

E le mafai ona e maua se olaga faa-Keriso. . . e aunoa ma le toe fanaufouina. O le a le fiafia lava se tasi i le afioaga o Lē Paia o Isaraelu e aunoa pe a lē faamamaina ma faaatoatoa. . . .

---

### **E faapefea ona fesoasoani lo tatou ola ai i poloaiga i le faaatoatoaina o i tatou?**

Ma le mea taua lona tolu: ia fesoasoani i le tagata suesue ia iloa le talalelei e ala i le ola ai i le talalelei. O le mautinoa faaleagaga e tatau ai mo le faaolataga, e tatau ona anoanoai ni taumafaiga a le tagata e mua'i faia. O le alofa tunoa, po o le mea foaifua mai o le mana o le togiola a le Alii, e tatau foi ona mua'i galue i ai le tagata. E toe faamanatu atu le saunoaga a Nifae, "O le alofa tunoa. . . .ua faaolaina ai i tatou, pe a uma ona faia mea uma tatou te mafaia." [2 Nifae 25:23.]. . .

. . . O lea, o se tasi [lenei] o mea taua pe afai e te manao e ola i se olaga e faaatoatoaina. E tataui i le tagata ona “tonu i lona mafaufau” e ola ai i poloaiga.

Sa taliina e le Matai se fesili a tagata Iutaia pe faapefea ona latou talitonu o Lana misiona e mai le Atua pe ua na o Ia foi o se isi tagata soifua. Na Ia fetalai: “Ai se tasi e fia fai lona finagalo, e iloa ai e ia le mataupu, pe mai le Atua, pe ou te tautala fua lava a’u.” (Ioane 7:17.)

E lē mafai ona oo mai le molimau o le upumoni i le tagata e lē mama lona loto. E lē mafai ona afio faatasi le Agaga o le Alii ma mea eleelea i se tagata. “Ua noatia a’u le Alii, pe a outou faia mea ou te fai atu ai; ae pe a outou le faia mea ou te fai atu ai, e leai sa outou folafolaga.” (MFF 82:10.) “. . . E le mafai ona e maua lenei mamalu, sei iloga e te usitai i la’u tulafono.” (MFF 132:21.) O loo saga ta’u mai pea lava pea lona mea moni i tusitusiga paia.

O mataupu faavae ma sauniga uma o le talalelei ua na o ni valaaulia i le aoaoina o le talalelei e ala i le faataunuaina o ona aoaoga. E leai se tagata na te iloa le mataupu faavae o le sefuluai sei vagana ua na totogiina le sefuluai. E leai se tagata na te iloa le mataupu faavae o le Upu o le Poto sei vagana ua ia tausia le Upu o le Poto. O lona mataupu, e le mafai e fanau iti, po o tagata matutua foi ona talitonu i le sefuluai, o le Upu o le Poto, tausia o le paia o le aso Sapati, po o le tatalo e ala lea i le faalogo atu i se tasi o talanoa e uiga i nei mataupu faavae. Tatou te aoa ma iloa le talalelei i le ola ai. . . .

Sei ou fai atu i le aotelega: Tatou te lē iloa moni lava se mea e uiga i aoaoga o le talalelei sei vagana ua tatou oo i faamanuiaga e maua mai le ola ai i mataupu faavae taitasi. Na fai mai se tasi tagata, “O aoaoga lava latou o le ola mama, ua na o se mea noa i le agaga sei vagana ua lagolagoina i faatinoga.” O le aupito taua o tulafono uma i le talalelei ia te oe ma au, o le poloaiga faapitoa lea ua manaomia ai e i tatou taitoatasi se iloiloga faamaoni ina ia usita’ia. E tataui ona tofua sutesue ifo e le tagata lava ia le tulaga o loo ia manaomia ma amata nei loa ona faatoilalo, aua seiloga ua tatou manumalo ona tatou maua lea o se nofoaga i le malo o le Tama.<sup>2</sup>

## E avea faapefea Faaamuia “ma faavae mo se olaga faaatoatoaina”?

E te fia manao e iloa “laasaga” e mafai ai e se tagata ona faatula lona olaga i lona tulaga faaatoatoaina e avea ai ma tagatanuu agavaa po o se “tagata paia” i le malo o le Atua. E mafai ona maua le tali aupito sili i se suesuega o le soifuaga o Iesu i tusitusiga paia. . . .E le’i na ona afio mai Keriso i le lalolagi ina ia faia se togiola mo agasala a tagata, ae ia tuuina mai i le lalolagi se faaitaiga o le tulaga o le faaatoatoaina o tulafono a le Atua ma le usiustai i le Tama. I lana Lauga i luga o le Mauga, sa tuuina mai ai e le Matai se faaaliga o ona lava uiga, o se tulaga atoatoa lelei, . . .ma o lea na tatou maua mai ai se ata faataatia mo o tatou lava olaga. . . .

I lona Lauga e lē mafaatusalia i luga o le Mauga, sa tuuina mai ai e Iesu ia i tatou ni auala eseese se valu e mafai ai ona tatou maua le . . .olioli. O ana tautinoga taitasi o loo amata i le upu “Amuia.”. . . O nei tautinoga a le Matai ua lauiloa i tusitusiga a le lalolagi Kerisiano o Faaamuia. . . .Ua faatino mai ai le faavae o se olaga lelei atoatoa.

Se’i o tatou mafaufau lava i ai mo sina taimi. O le fa [o ia Faaamuia] e faasino i o tatou tagata taitoatasi, o le ola ai o tatou tagata i totonu, o o tatou lava olaga taitoatasi, pe afai tatou te atoatoa ma maua faamanuiaga o lona olioli i totonu.

Amuia e loto maulalo.

Amuia i latou o e faanoanoa.

Amuia i latou o e fia aai ma fia inu i le amiotonu.

Amuia e loto mama. [Tagai Mataio 5:3–4, 6, 8.]

### *O le loto maulalo*

O le loto maulalo o le lagoaina lea e outou lava e manaomia le faaleagaga, e faalagolago i le Alii mo o outou lavalava, o au meaai ma le ea o loo e manavaina, o lou soifua maloloina, o lou ola; e te iloa lelei e le tatau ona alu se aso e aunoa ma se tatalo faamaoni o le faafetai, mo le taitaiga ma le faamagaloina ma mo le malosi e manaomia mo le aso. Afai e iloa e se talavou lona tulaga manaomia faaleagaga, ma afai e oo i se nofoaga mata’utia



O le Lauga i luga o le Mauga, na tuuina mai ai e le Faaola  
ia te i tatou le “faavae mo se olaga faaatoatoaina.”

e lamatia ai lona ola, e mafai ona tosina atu o ia i le punavai o le upumoni ma uunaia o ia e le Agaga o le Alii i le taimi o lona puapuga tele. O se tulaga e faanoanoa ai se tasi, ona o le tamaoaigna po o tulaga faaleaoaoga po o le lalolagi foi, pe a mafaufau faapea na te le manaomia lenei tulaga faaleagaga. [O le loto maulalo] o le faafeagai lea o le faamauualuga po o le manatu faasausili ia te oe lava. . . Afai e te lagonaina i lou lotomauualalo le tulaga e te manaomia faaleagaga, o lona uiga ua saunia oe mo le taliaina i le “Ekalesia a le Ulumatua, ma avea ai ma le au filifili a le Atua.” [Tagai MFF 76:54; 84:34.]

### *O le faanoanoa*

O le faanoanoa, e pei ona aoaoina i le lesona lea a le Matai, e tatau i le tagata ona faaalina lena “tiga e tusa i le Atua e tupu ai le salamo” ma maua ai e le tagata ua salamoas se faamagaloga o agasala lē toe faatagaina ona toe foi i amioga ua ia faanoanoa ai. [Tagai 2 Korinito 7:10.] O le vaai lea, e faapei foi ona vaaia e



Paulo, le “mitamita i puapuaga. . . : ina ua tatou iloa o le puapuaga e tupu ai le onosai; o le onosai e tupu ai le mautinoa; o le mautinoa foi e tupu ai le faamoemoe.” (Roma 5:3–4.) E tatau ona e naunau e “fesui i a outou avega, ina ia mama ia.” E tatau ona outou naunau e faanoanoa faatasi ma ē faanoanoa ma faamafanafana ia i latou e manaomia le faamafanafanaga. (Mosaea 18:8–9.) Afai e faanoanoa se tina na o ia ona o le toe foi mai o sana tama teine faalogogata, o oe lena e alofa e lē tatau ona e faatagaina se tasi e lua’i faia se faitioga. . . . O lou faanoanoa faatasi ma ē ua afu le soifua, o le fafine ua oti lana tane ma le tamaitiiti matuaoti, e tatau ona taitai atu ai oe e aumaia le fesoasoani o loo latou manaomia. A faaupuina, e tatau ona avea oe e faapei o le telona ae lē o le Faresaio. “Le Atua e, ia e alofa mai ia te au le tagata agasala.” [Tagai Luka 18:10–13.] O lou tauai mo le faia [o lenei] o le olioli sili lea i le faamafanafanaina o lou lava agaga e ala i le faamagaloina o au agasala.

*O le fia aai ma fia inu*

Pe i ai ea se taimi ua e fia ‘ai ai i se meaai pe fia inu foi i se vai ae na o se pa’u falaoa mafu pe na o sina miti o se vai mafanafana e tau faate’a ai lagona tiga o loo mamafa ia e oe, ae na foliga mai o ni mea aupito taugata [lena fasi falaoa po o sinā vai] nai lo mea uma o ia te oe? Afai la na e matuā fia ‘ai, ona mafai lea ona e amata malamalama i le uiga o le fetalaiga a le Matai e tatau ona tatou fia aai ma fia inu i le amiotonu. O le tulaga lena o le fia aai ma le fia inu e taitai ese atu ai i latou mai o latou fale ina ia saili e faaumea ma le au paia i sauniga āfua ai ona tapuai i le Aso o le Alii i soo se mea tatou te i ai. O le mea foi lena e uunaia ai le tatalo faatauanau ma taitai atu ai o tatou vae i malumalu paia ma uunaia ai i tatou ina ia faaaloalo iina. O le tagata na te tausisia le paia o le Aso Sapati o le a sili atu ona faatumulia i le olioli tumau e manaomia nai lo fiafiaga e lē tumau e maua mai gaoioiga e tau ina faamalie ai le loto ae lē ogatasi ma poloaiga a le Atua. Afai e te ole atu ma “le loto faamaoni, ma le manatu tonu i ai, male faatuatua ia Keriso, na te faaalila le. . . tonu. . . ia te outou, i le mana o le Agaga Paia,” ma o lona mana foi “tou te iloa ai le tonu i mea uma lava.” (Moronae 10:4–5). . .

*Ina ia loto mama*

Afai e te fia manao e vaai i le Atua, e tatau ona e mama atoa-toa. . . .E i ai nisi sa mafuta ma Iesu, sa latou vaai ia te ia ua na o se atalii o Iosefa le kamuta. O nisi sa latou manatu o se tagata inu uaina po o se tagata ‘onā ona o ana upu. O isi foi sa mafau-fau ua uluitinoina o ia e agaga leaga. Ua na o tagata amiotonu lava na vaai ia te ia o le Alo o le Atua. Seiloga lava e mama lou loto ona mafai lea ona e vaai i le Atua, ma i se isi tulaga e itiiti ifo i lo lena, e mafai ona e vaai i le “Atua” po o le lelei i se tagata ma alofa ia te ia ona o le lelei o loo e vaaia ia te ia. Ia maitau lelei lena tagata e faitio ma upuleaga i le tagata o le Atua po o taitai faauuina a le Alii i lana Ekalesia. O se tagata faapena e tautala mai i se loto e lē mama.

Ae ina ia mafai ona ulufale atu i le Malo o le Lagi, e le gata ina tatau ona tatou lelei ae e manaomia foi lo tatou faia o mea lelei ma ia tatou lelei foi mo se faamoemoega. O le mea lea, afai e te manao e savali i aso taitasi i lena sini o le faaatoatoaina ma le atoga o le olaga, e tatau ona aoaoina oe i “mataupu” e fa o loo totoe o le Faavae a le Matai mo se olaga faaatoatoaina. O faamuia nei e faasino i fegalegaleaiga a le tagata ma isi:

Amuia e agamalu.

Amuia e alolofa atu.

Amuia e faatupuina le filemu.

Amuia e sauaina. [Tagai Mataio 5:5, 7, 9–10.]

*O le agamalu*

O se tagata agamalu ua faauigaina o se tasi e lē itaitagofie e lē tauimasui pe a faamanu’alia pe faaita foi. O le agamalu e lē tutusa ma le vaivai. O le tagata agamalu o le tagata malosī, o le tagata maoae, o le tagata e loto pulea a’ia’i. O ia o le tagata e i ai le lototele i ona talitonuga, tusa lava pe tauanau malosī e lana vaega po o le kalapu. I se feeseeseaiga, o lana faamasinoga o le faaiuga mulimuli lea i se mataupu, ma o lana faaiuga manino e faamalieina ai le valelea o tagata vevesi. O ia o se tagata lotomauualalo; e lē avaavau. “E sili ona lelei le ua gesegese i le ita i lē ua malosī.” (Faataoto 16:32.) O ia moni lava o se taitai ma e filifilia e le fita-

fitā ma le fuavaa, o pisinisi ma le ekalesia e avea ma taitai ina ia mulimuli i ai isi tagata. O ia o le “masima” o le lalolagi ma o le a fai foi mona tofi.

*Ia alofa atu*

E faalagolago lo tatou faaolataga i le alofa tatou te faaalā mo isi. O upu leaga ma le lē alofa, po o faiga faatautala i tagata po o meaola, e ui lava ina foliga mai o se mea na fai ona o se mea na manu'a ai, e lē agavaa ai lea tagata mo le alofa pe a ia manaomia le alofa mutimutivale i le aso o le faamasinoga i luma o le au faamasino i le lalolagi po o le lagi foi. E i ai se tasi e le'i faamanu'alia i se tuua'iga sese a se tasi namanatu o sana uo? E te manatua lau tauiviga ina ia aloese mai le faasalaga? Amuia i latou uma e alolofa atu aua e alofaina mai i latou!

*O le avea ma faatupu filemu*

O e faatupu le filemu e ta'ua i latou o atalii o le Atua. O le faatupu faalavelave, o lē e tetee i tulafono ma poloaiga, o le taitai o tagata faatupu vevesi, o e solitulafono, e uuna'ia i faamoemoega leaga ma sei vagana ua latou aloese mai ai o le a ta'ua i latou o fanau a Satani ae le o ni fanau a le Atua. Ia taofia outou lava mai lē o le a faatupuina le fememea'i e ala lea i le ta'ufaatauvaaina o mea paia auā ua lē sailia e ia le filemu ae ua faasalalauina le fenumia'i. O lē e faamisa pe faafitauli, ma o mea e finau ai e mo nisi faamoemoega e ese mai le faia o le mea moni, ua ia solia se mataupu faavae taua ua uma ona faataatia e le Matai o se mea taua mo le fausiaina o se ola e tumu i le tamaoaiga. “O le manuia i le lalolagi ma le finagalo alofa i tagata” o le pese lea a le agelu na tuvaoina mai le soifua mai o le Pelenise o le Filemu. [Tagai Luka 2:14.]. . .

*O le sauaina ona o le amiotonu*

O le sauaina ona o le amiotonu ona o se mafuaaga tele ua lamatia ai le upumoni ma le amioatua ma le mamalu, o se tulaga faale-atua ia. Sa masani ona i ai tagata e tagatavaleina ona o mafuaaga lelei uma. O le faatama'iga tele e ono oo mai sauaga, e lē mai le sauaga lava ia ae e mai le aafiaga e ono oo i ai ē na faasauaina ma atonu o le a faalotovaiaia ai lo latou naunau mo

le amiotonu. O le tele lava o na sauaga e mafua mai i le lē lava o le malamalama, auā e ‘augofie tagata e tetee i mea latou te lē malamalama ai. O se isi vaega e mafua mai i tagata e faamoemoe i mea leaga. Ae pe o le a lava le mafuaaga, e foliga mai ua matuā faasoloatoa sauaga e faasaga ia i latou o loo punoua’i i se mafuaaga amiotonu ma o lea ua lapata’ia ai i tatou e le Matai e faapea, “Oi talofa ia te outou pe a tautala lelei tagata uma ia tte outou! auā sa faapea lava ona fai e o latou tamā i perofeta pepelo.” (Luka 6:26.)

. . . Ia manatua lena lapataiga pe a tauemuina ma amusia oe ona o lou musu e suia ou tulaga faatonuina o le lē inu ava oona, ti ma le kofe, o lou faamaoni ma le ola mama, ina ia patipati fiafia mai i ai tagata. Afai e te tu mausali mo le mea sa’o tusa lava pe tauemu mai tagata, pe sauaina foi oe i la le tino, o le a faapaleina lava oe i faamanuiaga o le olioli lea e faavavau. Atonu foi o le a toe tulai mai i ona po nei, o nisi o le au paia e oo lava i apose-tolo, e faapei o aso ua mavae, o le a manaomia ai le tuuina atu o o latou ola mo le puipuiga o le upumoni? Afai e oo mai lena taimi, o le a lē tuuina e le Atua ia latou toilalo!

A o tatou manatunatu loloto ma le agaga tatalo i nei aoaoga uma, o le a tatou iloa ai ma le maofa, o nei mea uma, o le fua faatatau a le Atua i lo tatou taua i lona malo e lē o tulaga maualuluga ua tatou umia i le olaga nei i faapotopotoga po o lana Ekalesia, e lē o mamalu foi na tatou manumalo ai, ae o olaga na tatou ola ai ma mea lelei sa tatou faia, e tusa ai ma le “Faavae mo se Olaga Faaatoatoaina” lea na faaalii i le soifuaga o le Alo o le Atua.

Talosa ia outou aveia ia Faaamuia ma Faavae o outou lava olaga ma ia outou maua ai faamanuiaga o loo folafola mai ai.<sup>3</sup>

## **Fautuaga mo Suesuega ma Talanoaga**

---

- E mafai faapefea ona tatou aoao i aso taitasi mai le “tusi lesona sili” o le soifuaga o Keriso?
- A o tatou taumafai e aveia e faapei o Keriso, aisea e taua ai ona tatou fesili soo ifo ia i tatou lava pe o a mea o tatou vaivai ai?
- O a mea na e oo i ai ua fesoasoani e te malamalama ai, tatou te iloa aoaoga o le talalelei i lo tatou ola ai lea?

- Pe a tatou iloa o loo tatou faalagolago i le Alii mo faamanuiaga uma i o tatou olaga, e aafia faapefea ai o tatou uiga faaalua ma a tatou amioga?
- O a ni uiga o le saunoaga lea, “Amuia i latou e faanoanoa”?
- E mafai faapefea i lo tatou fiafia i mea o le lalolagi ona faamuta lo tatou fia aai ma le fia inu i mea faaleagaga?
- E fesoasoani faapefea le loto mama ia tatou iloa mea lelei i isi tagata?
- E fesoasoani faapefea le agamalu ia tatou malolosi?
- O a ni auala tatou te faaalua ai lo tatou alolofa i isi i aso taitasi o lo tatou ola?

### *Faamatalaga*

1. *Decisions for Successful Living* (1973), 40–41, 44.
2. *Stand Ye in Holy Places* (1974), 208–16.
3. *Decisions for Successful Living*, 55–62.



# Ia I Ai le Filemu i Lou Agaga

*E tatau i se a ona i ai faigata e faataunuu  
ai faamoemoega e faavavau o le Alii?*

## Faatomuaga

“O i latou uma e soifua i luga o lenei fogaeleele e ao ona tofotofoina e matagi o faigata,” o le saunoaga lea a Harold B. Lee. 1 E lē se mea fou ia te ia faigata, na maliliu le faletua o Harold B. Lee, o Fern Tanner Lee, ma lona afafine o Maurine Lee Wilkins i se taimi o le 1960. Na puapuagatia foi o ia i faafitauli tuga o le soifua maloloina i tausaga uma na avea ai ma se Pulega Aoao. Na ia faasilasila mai foi i le konafesi aoao i le 1967: “Na ou gau-a’i atu i nisi tofotofoga, o ni tofotofoga mata’utia, i luma o le Alii, atonu pe a’oa’i ai au ia iloa pe ou te naunau e talia mea uma pe o a lava mea e silafia e le Alii e tatau ona faatiga ai a’u, e faapei ona gau-a’i atu o se tamaitiiti i lona tama.” [Tagai Mosaea 3:19.]<sup>2</sup>

Peitai na tuuina mai e Peresitene Lee se faamafanafanaga pe a feagai ma faigata po o mafatiaga: “O le tagata e naunau atu ma le toto’a i se tau e faavavau mo ana taumafaiga i le olaga nei, e tausia pea lava pea o ia i taimi o ona tofotofoga aupito loloto. Pe a afāina o ia ona o le alofa, na te lē pule i lona ola. A maliliu foi o ē pele ia te ia, e lē faavavavau; pe a faia’ina i se tauvaga sa faana-nau i ai, e lē solomuli; pe a faaletonu lona lumanai ona o taua ma faatafunaga, e lē goto ifo o ia i le faanoanoa. E ola o ia i luga a’e o lona lalolagi ma na te lē tuulafoaia lava lana sini mo lona faaolataga.”<sup>3</sup>

“O le ala i le [faaeaina] e gaoā ma tifato. E toatele e tauteva-teva ma pauu, ma ona o lo latou lotovaivai e le mafai ai ona toe tutu ma toe āfua le taeao. E faapogisaina e ‘au a le tiapolo le ala i mea faalafuā, ma masani ona taumafai e taitaiese i tatou i alasopo taufaasese. Peitai, o lenei faigamalaga atoa,” na faamau-tinoa mai e Peresitene Lee, “o loo i ai le tulaga mautinoa toafi-

malie afai tatou te filifili le mea tonu, o le a manuia i tatou, ma o le faataunuaina o le a faatulagaina ai i tatou ma gaosia i tatou i le ituaiga tagata ua agavaa e taliaina i le afioaga o le Atua. O le a se isi manuia e sili atu nai lo le maua o mea uma ua i le Atua?”

## **Aoaoga a Harold B. Lee**

---

### **E fesoasoani faapefea faigata ma mafatiaga e avea atili ai ia faapei o le Atua?**

O loo i ai le faiga faamama e ala mai i mafatiaga, ou te manatu, e le mafai ona tatou oo i ai i se isi lava ala sei vagana puapuga. . . . Tatou te latalata atili ia te ia o Lē na tuuina mai Lona soifua ina ia ola le tagata. Ua tatou lagonaina se sootaga vavalalata tatou te le'i iloa muamua. . . . Na tele lona puapugatia nai lo le mea e mafai ona tatou mafaufau i ai. Peitai a oo i le tulaga ua tatou mafatia ai, e foliga ua tatou oo i se tulaga o le latalata atu i le Alii, e fesoasoani e faamama ai o tatou agaga, ma fesoasoani e lafoai ese ai mea e lē tusa ma le silafaga a le Alii.<sup>5</sup>

Na ta'ua e Isaia: “A o lenei, Ieova e, o oe lava lo matou Tama; o i matou nei o le omea, a o oe le tufuga; o le galuega a ou aao i matou uma.” (Isaia 64:8.)

E tele taimi sa ou faitauina ai lena fuaiupu ae ou te le'i mauaina atoatoa lona taua seia oo ina ou alu i Mekisiko i ni nai tausaga talu ai i Telacapaca, i le mea e galueaiina ai e tagata le omea e fai ai ituaiga ipu eseese. O iina na ou vaai ai o latou aumaia le omea na paluina i faiga faanamua, e āsa le tagata fai ōmea i le palapala e palu faalelei ai. Ona tuu lea i le mea e vili ai e le fai ōmea, ma sa ia amata ai loa ona teuteu ipu, na te faatauina atu i maketi. Ma a'o matou maitauina, sa i ai taimi na matou vaaia ai, ona o ni nai mea na faaletonu i le paluga, o lea sa tatau ai ona toe talepe atoa le omea ma toe tuu i totonu e toe paluina ai, ma o nisi taimi e fai ma toe fai lea lava faiga seia oo lava ina lelei le paluga.

O le i ai o lena ata i lo'u mafaufau, sa amata ai ona ou iloa le uiga o lenei mau. Ioe, e tatau foi ona tofotofoina i tatou e ala i le mativa, o ma'i, o le oti o nisi e pele, o faaososoga, o nisi taimi o le faafitia e tagata ua manatu o ni uo, o le tele o le tamaoaiga ma oa, o le tulaga sologa lelei ma mea taugata, o manatu see faa-

leaoaoga, ma mea taufaasese o le lalolagi. Na faamatala e se tamā i sona atalii lenei mataupu, e faapea:

“Ua ao lava ina ia faataunuaina ana mataupu faavavau i le iuga o tagata, ina ua uma ona faia e ia o tatou mātua muamua ma manu vaefa o le vao, ma manu felelei, ioe, o mea uma ua faia, ua ao ina i ai le faafeagai; o le laau lava ua faasaina e feagai ma le laau o le ola, e suamalie le tasi ae oona le tasi.” [ 2 Nifae 2:15.]

O le Perofeta o Iosefa Samita lea na saunoa, i le tautalagia o lenei faiga o le faamamaina, fai mai sa pei o ia o se maa talatala lapoa na taavale ifo i lalo o le mauga, ma na pau lava le tulaga faaiila na ia maua o le taimi e feto’ai ai se tulimanu talatala i se isi mea, ma ta’e ese ai sia fasi mea ma sia fasi mea. Peitai, na ia saunoa, “O le mea lea o le a avea ai au o se ‘au i le ato ‘au a le Silisiliese.” [*History of the Church*, 5:401.]

O le mea lea, e tatau ai ona faamamaina lelei i tatou; e tatau ona tofotofoina i tatou ina ia mafai ai ona faamaonia le malosi ma le mana o loo ia te i tatou.<sup>6</sup>

Tatou te vaavaai i le olaga o se faagasologa tele o le aoaoina o tagata, a’o taitaiina e le faatuatua o loo aoao mai i le afioga a le Atua. I lalo o le taitaiga mata’itū a se Tama alofa, tatou te aoao ai e ala i “mea tatou te mafatia ai,” tatou te maua le malosi i le faaitoilaloina o mea faasoesa, ma e tatou te faaitoilaloina foi le atu-atuvale i le manumalo a’ia’i i nofoaga o loo faatalitali mai ai tulaga mata’utia [tagai Eperu 5:8]. O le faatuatua, e faapei ona aoao mai i afioga a le Atua, tatou te malamalama ai pe o a lava mea e faia i le olaga mo le tulaga maualuga o Iesu—“O lenei, ia atoatoa ona lelei o la outou amio, e pei o lo outou Tama o i le lagi e atoatoa ona lelei o ia” (Mataio 5:48)—e mo lo tatou lava lelei ma mo lo tatou manuia e faavavau, e ui lava o lena faiga e faalamolemole ai e aofia ai ma le a’oa’iga mata’utia a se Atua poto, “Aua o le ua alofagia e le Alii, ua aoai atu o ia ia te ia; ua sasaina foi e ia atalii uma ua talia e ia.” (Eperu 12:6.)

O lea o le aoaoina ma le faia o faatinoga mo le tauvaga ma le malosi o le pogisa atoa ai ma le amioleaga faaleagaga, e mafai ona tatou “puapuagatia i mea uma, a e le faaatuatuvaleina; ua fememeai, ae le matua fememeai; ua sauaina, ae le tuulafoaiina; ua lafotuina i lalo, ae le fano.” (2 Korinito 4:8–9.)<sup>7</sup>



O lē e i ai se molimau i le faamoemoega o le olaga, na te vaai atu i mea faaosesa ma faigata o le olaga o ni avanoa e maua ai le potō masani e tatau ai mo le galuega o le faavavau. . . .

Afai o le a faafesagai ma le oti, o le a lē atuatuvaile lea tagata pe afai sa “faaseevaaina vae i le sauniga o le tala lelei o le filemu,” [Efeso 6:15] ma o i latou e fasiotia ē pele ia i latou, o le a i ai le faatuatua o Moronae, le taitai o le autau, o lē na tautino atu, “Aua ua tuuina atu e le Atua ia fasia ē amiotonu, ina ia oo lana faamasinoga tonu i ē amioleaga; o le mea lea e le aoga ai ona outou manatu uamalaia o ē amiotonu ona ua fasia i latou; ae faauta, ua latou ulu atu i le malologa o le Alii lo latou Atua.” (Alema 60:13)<sup>8</sup>

Faafofoga i le lesona a le Matai i le faato’aina o tagata soifua—“O la uma lava o ia te au e le fua, e aveeseina e ia; a o la uma e fua, e teuteu e ia, ina ia fua mai ai atili” (tagai Ioane 15:2). . . .

E seāseā, pe afai e i ai, se tagata maoae moni e le’i tofotofoina i loimata, ma mafatiaga—na teuteu lelei e aao o se faitogalaau tomā. O le faaogaina o le agaese ma le meafaigaluega faamātau, e teu ai le lala laau ma faafoliga i mamanu silisili ese a le Atua, ina ia mafai ai ona fua tele mai.

E tatau ona tofō onosaia e outou uma tofotofoga, ma mea faigata, o mafatiaga ma mea e faavaivai ai le loto. Pe afai tou te manatua i le taimi o faanoanoaga ma le fememeai, o le a faamafanafaina outou pe afai tou te aoaoina lenēi lesona: “Aua o le ua alofagia e le Alii, ua aoai atu o ia ia te ia; ua sasaina foi e ia atalii uma ua talia e ia” (Eperu 12:6)—ma lenēi foi: “Lo’u atalii e, aua le faatauvaa ia te oe le aoaiga a Ieova; aua foi e te inoino pe a aoaiina oe e ia: auā o le ua alofagia e Ieova, e aoaiina o ia e ia; e pei o le tamā ona aoaiina o lona atalii ua ia fialia i ai” (Faataoto 3:11–12).<sup>9</sup>

Sa popole le Perofeta o Iosefa [Samita]. . . ona o faiga faatupu vevesi e faasaga i le Au Paia, ma i le totonugalemu o nei faigata na ia alaga ai, “Le Atua e, o afea ea e te silasila mai ma e silafia ma e faafogaina ai foi le tagitu’i a le Au Paia ma tauai atu o latou sese i ulu o o latou fili?” [Tagai MFF 121:1-6.] Sa pei na sii e le Matai se tamaitiiti fefe ma faapea atu i ai:



A o feagai le Perofeta o Iosefa Samita ma puapuaga e tele i le Falepuipui o Liperate, sa ia mauaina ni faaaliga faamafanafana ia na avea ma vaega e 121 ma le 122 o le Mataupu Faavae ma Feagaiga.

“Lo’u atalii e, ia i ai le filemu i lou agaga; o lou tiga ma ou puapuaga o le a na o sina ituaso itiiti lava;

“Ona faaeaina lea o oe e le Atua i le mea maualuga; afai e te onosai o le a e manumalo foi iou fili uma.” (MFF 121:7, 8)

Ona ia fetalai lea i se mea e maofa ai:

“. . . ia e iloa, lo’u atalii e, e tuuina atu ia te oe le poto masani ona o ia mea uma, ma avea mou lelei.” (MFF 122:7)

. . . Ona fetalai mai lea o le Matai:

“Na oo ifo i lalo o mea uma le Atalii o le Tagata. Pe sili ea oe i lo ia?

“O lea, ia tumau ai pea i lou ala. . . Aua le fefe ai i mea e mafai e tagata ona faia, aua e i ai le Atua faatasi ma oe e faavavau faavavau lava.” (MFF 122:8, 9)

Sa i ai se taimi o le olaga na tatau ai ona ou faaogaina e a’u lava ia lena tulaga. Na oo le Atalii o le Tagata i nei mea uma.<sup>10</sup>

O le mafuaaga lava o lo tatou i ai iinei, ua faamatala manino mai i le faaaliga a le Alii ia Mose. Na Ia fetalai, “O la’u galuega

lenei ma lo'u mamalu—ia faataunuuina le faaofuina o le tagata i le tino ola pea ma le ola e faavavau.” [Mose 1:39.] O le “ola e faavavau” o lona uiga o le toe foi atu lea i le afioaga o le Atua le Tama ma Lona Alo e ola ai faavavau ma i La'ua. O lea, e le'i faapea mai o Ia o Lona faamoemoega o le tatau lea i Ana fanau uma ona ola ai i lenei fogaeleele i ni mea taugata, ma ni oa ma ni tamaoauga ma i se tulaga faigofie, ma lē tatau ona feagai i latou ma ni tiga po o ni faanoanoaga. E le'i fetalai mai o Ia i lenei mea. E i ai nisi taimi, e pei ona ta'ua e Isaia, e tupu a'e le perosi e sui a'i le laau tuitui [tagai Isaia 55:13]. . . . Atonu o le mea o loo tatou vaai atu nei i ai o ni mea mata'utia, pe a tatou vaai atu i le ata atoa mai le amataga e oo i le iuga, i le tofā poto a lo tatou Tama, e mo se tasi o faamanuiaga sili ae lē o se iuga matautia e pei ona tatou manatu ai.<sup>11</sup>

---

**E mafai faapefea ona tatou maua le filemu  
i le loto i taimi o faalavelave?**

A tagata uma lava e soifua i le fogaeleele, o oe ma a'u, ma i tatou uma lava—pe tatou te mauoa pe matitiva, pe lelei pe leaga, laititi pe matua—o le a tofotofoina ma tigaina tagata uma i afā o faigata ma puapuaga, o matagi e tatau ona tatou puipuia mai ai i tatou lava. Na o le pau tagata o le a lē toilalo o i latou ia na fausia o latou fale i luga o le papa. Ma o le a ea lea papa? O le papa o le ususitai i mataupu faavae ma aoaoga a le talalelei a Iesu Keriso e pei ona aoao mai e le Matai.<sup>12</sup>

Ou te lē faamalulu atu. . . ina ua ou talosagaina outou i lenei taeao, ia outou talitonu faatasi ma au i mataupu faavae o le lotu moni—o le faatuatua i le Atua ma Lona Alo o Iesu Keriso o le Faaola o le lalolagi ma o Lona suafa ua faia ai vaega i ona po nei, ma na o le taliaina atoatoa o nei upumoni e mafai ai ona tatou tuutaula i uafu lē faamaluelueina pe a oo ina osofaia malosi i tatou e afā o le olaga.

O le mea lea, ou te valaau atu ai ia te outou, ia outou lotomaualalo. . . . ma faatasi ai ma ni loto tatalo, ia outou talitonu i mea uma ua aoaoina ai i tatou e perofeta mai Tusitusiga Paia mai le amataga. e uiga i le talalelei<sup>13</sup>

O lona uiga o le mea taua i le olaga e lē o le mea na tupu ia te oe, ae o le mea taua o le auala na e taulimaina ai. O le mea taua lena. I le faaiuga o le Lauga i luga o le Mauga, tou te manatua na tuuina mai ai e le Matai se faataoto. Na Ia fetalai:

“O lenei, ai se faalogo i a’u upu nei, ma faia e ia, ou te faatusaina o ia i le tagata poto, ua na faia lona fale i luga o le papa:

“Ona to mai lea ouaga, ua oo mai foi tafega, ua agi mai foi o matagi, ua pesi mai i lea fale; ae le i pau lava ia: aua ua faavaeina i luga o le papa. . . .” [Mataio 7:24–25.]

O le a le mea lea sa ia taumafai e faamamafa mai? Sa taumafai o ia e ta’u mai o matagi o mafatiaga, o lologa foi o puapuaga, o le a pesi mai i tagata uma o i lenei fogaelele; ma na o le pau tagata o le a lē pauu—ma solo i lalo ‘aupa, pe maliu se tasi e pele, i soo se faalavelave matautia—na o le pau le mea tatou te mau ai i nei afā uma ma toatuga o le olaga o le tulaga lea pe afai sa tatou fauina o tatou fale i luga o papa e ala i le tausia o poloaiga a le Atua. . . .

Faatalitali ma le onosai i le Alii i le vaitau o sauaga ma le ogaoga o puapuaga. Na fetalai mai le Alii,

“E moni ou te fai atu ia te outou a’u uo e, aua le fefefe, ia faafanafanaina o outou loto; ioe, ia olioli e faavavau, ma ave a’e le faafetai i mea uma lava;

“Ia faatalitali ma le onosai i le Alii, aua o a outou tatalo ua oo mai i taliga o le Alii o Sapaota, ma ua tusia faatasi ma lenei faaufaailoga ma molimau—ua tauto le Alii ma poloaiina o le a talia lava.” (MFF 98:1–2)<sup>14</sup>

O le a se mea e mafai ona tatou fai atu ia i latou o loo pulunaunau mo se filemu i le loto ina ia aveesea ai le atuatuvaile, ia faatoafilemu ai le loto tiga, ia maua ai le malamalama, ia vaavaai atu ai i luga atu o mafatiaga o le olaga nei ma iloa atu ai le manumalo o faamoemoega ma moomooga i se lalolagi e sili atu i lo le olaga nei? . . .

Na ta’ua e le Matai le punavai e maua mai ai le filemu moni ina ua ia fetalai i ona soo, “Ou te tuuina atu ia te outou le manuia; o lo’u manuia ou te avatu ai ia te outou. Ou te le avatu ia te

outou faapei ona avatu e le lalolagi. Aua le atuatuvaile o outou loto, aua foi tou te matatau.” (Ioane 14:27.)<sup>15</sup>

“Ia tausī poloaiga a le Atua,” aua na o le pau lena o le ala e maua mai ai le manuia po o le filemu o le loto lea na fetalai i ai le Matau ina ua Ia faatofa atu i Ona soo: “Ua ou fai atu nei mea ia te outou, ina ia outou maua le manuia ia te au. E maua foi outou e le puapuaga i le lalolagi, a ia outou loto tetele, ua ou manumalo i le lalolagi.” (Ioane 16:33) O le mea lea ia taitasi ai outou, i le lotolotoi o fita ma faigata o loo siomia ai outou, ma maua lena faamautinoaga faalelagi mai le Matai o lē e alofa ia te outou, e aveesea ai le atuatuvaile uma pe a, outou faatoilaloina foi mea o le lalolagi e faapei ona faia e le Matai.<sup>16</sup>

O fea o i ai le saogalemu i le lalolagi i aso nei? E le mafai ona maua le saogalemu i tane tau ma fana ma vaalele ma pulu atomika. E na o le tasi lava le nofoaga o le saogalemu ma o totonu lea o le siosiomaga o le mana o le Atua Silisiliese, lea na te tuuina atu ia i latou o ē tausī ana poloaiga ma faalogo atu i lona siufofoga, a’o ia fetalai mai i auala ua ia faauuina mo lena faamoemoega. . . .

Ia ia te outou le filemu po o le manuia, e le o le filemu lea e maua mai i fonotaga a le maota faitulafono, ae o le filemu e maua mai i le ala na fetalai ai le Matai, o le faatoilaloina lea o mea uma o le lalolagi. Ia fesoasoani mai le Atua ia tatou malamalama ma ia outou silafia, ou te iloa ma le mautinoa e aunoa ma se masalosalo, o lana galuega lenei, o loo ia taitaiina ma faatonutonu i tatou i aso nei, e faapei foi ona ia faia i augatupulaga uma o le talalelei.<sup>17</sup>

O le taimi nei, e pei ona valoia, e foliga mai ua vavao le lalolagi atoa ma ua loto vaivai foi tagata. E tatau ona tatou faamoe-moe e ola faatasi ma lena filemu i le loto e maua i le faaogaina lea o le talalelei a Iesu Keriso i le lalolagi o faalavelave ma faigata. E ono oo mai le loto vaivai i tagata ona o le lē mau manatu ma e faatitino ona oo mai i se taimi e maalili ai le alofa o tagata. E ao ona valaau atu i le mana o le perisitua o ia i tatou ma e tatau foi ona tatou alolofa atu ia te i latou ua fetuuina i tatou ma ia tonu lelei o tatou mafaufau e pei ona apoapoai atu le Aposetolo o

Paulo ia Timoteo. [Tagai 2 Timoteo 1:7.] Afai e leai, o le a le aoga i tatou. O le a lē lava lo tatou mautiloa. Ona tau lē manaomia lea e le fili i tatou e soli ia poloaiga pe liliu ese foi. Aua ua uma lava ona faama'imau lo tatou malosi.<sup>18</sup>

Sa taumafai se tagata fai pisinisi i Atalana, i Georgia, o lea alii sa ma faifai mea faatasi. . . .sa taumafai e faamafanafana mai ia te au i se taimi faanoanoa matautia ; na ia fai mai ia te au, “Ia, ou te fia ta’u atu ia te oe se mea. E sili lo’u matua nai lo oe. I le tolu-sefulu fa tausaga talu ai, na tatagi mai ai le telefoni i le faletupe sa ou peresitene ai. Fai mai le tala [i le telefoni] o loo manu’a tigaina lo’u toalua i se faalavelave tau taavale. O le taimi lava lea na ou fai atu ai, ‘Oi, o le a lē faatagaina lava e le Atua se mea tupu i la’u manamea—e ese le ofoofogia o ia, e ese la lalelei, e ese le matagofie.’ Ae a o le’i atoa se itula, na toe maua mai se tala ua maliu o ia. Ona tagi aue ai lea o lo’u loto, ‘Ua ou fia oti; ua ou lē toe fia ola; ou te fia faalogo i lona leo.’ Peitai ou te le i oti, ma ou te le i faalogo foi i lona leo. Ona ou nofo ifo ai lea i lalo ma taumafai e taumatemate. Mata o le a le uiga o ia ituaiga lagona tuulafoaiina ma ia tulaga matautia e faalavelave mai i o tatou ala? Ona oo mai ai lea o se manatu ia te au, o le tofotofoga aupito matuia lenei e tataua ona oulua fetaii i le olaga. Ma afai e mafai ona e pasi ai, e leai lava se isi tofotofoga o le a e lē mafai ona pasia pe onosa’ia.

Ma, ina ua ou toe malaga i le vaalele i lena po, sa i ai le filemu, ma o le taimi muamua lena sa mafai ai ona ou tau malamalama. Ma sa oo mai ia te au le saunoaga a le Aposetolo o Paulo e uiga i le matai, “e ui lava o ia o le Alo, a o mea sa tiga ai o ia na aoaoina ai o ia ia usiusitai, ua faaatoatoaina foi o ia, ona avea ailea oia ma tupuga o le ola e faavavau ia i latou uma o e usiusitai ia te ia” (Eperu 5:8–9). O lea, a outou mafaufau i lena mea, o le faagasologa mo le faamamaina e ala i mafutaga motusia, o le tuulafoaiina, o mafatiaga, ou te manatu o se mea e ao ona oo mai ae tatou te le i saunia e fetaii’i ma isi tofotofoga o le olaga.<sup>19</sup>

Ua tofia i tatou e fai ni galuega faigata i se vaitau faigata o le soifuaga, ae peitai, atonu o se taimi lea mo i tatou taitoatasi e sailiili ai mea fou, o le taimi o aoaoga sili atu, o le faamalieina foi

o le loto. O luitau tuufaatasi e afua mai i taua, suiga o le olaga, o le ta'umāmāina o aoaoga faavae, ma le malepelepe o aiga, ua tatou maua tonu ai le tulaga e tutusa lelei ma le sopoia o laufanua lafulafua, onosaia o le lē malamalama, ma le faatuina o se malo i le lalolagi atoa i le lotolotoi o puapuaga. Ou te tatalo ina ia tatou faia la tatou vaega i le gasologa o le faigamalaga, ma ia tatou i ai, ma taitai i le solo a le Ekalesia a'olulufale atu i lona nofoaga mau ua filifilia—O Lona afioaga lea.<sup>20</sup>

## Fautuaga mo Suesuega ma Talanoaga

---

- O a ni sosia po o ni punavai o le saogalemu ma le filemu i taimi o puapuaga? O a nimea na faamalosia ai oe ma e maua ai le filemu i le taimi o tofotofoga i lou olaga?
- Aisea e tatau ai ona feagai ma tofotofoga ma puapuaga ia tagata uma—o e amiotonu ma e amioletonu?
- E faapefea ona avea puapuaga ma se faamanuiaga i o tatou olaga? E mafai faapefea ona fesoasoani tofotofoga tatou te malolosi ai ma atili mafai ai ona tatou auuana i le Alii?
- Aisea e tatau ai ona tatou tuu lo tatou faatuatuaga i le “ata po o le mamamu silisili” a lo tatou Tama o i le Lagi? O le a le uiga o le avea faapei o le omea i aao o le Alii?
- O le a le uiga o le faatalitali ma le onosai mo le Alii i taimi o faigata? O le a se mea na e aoaoina ina ua e faataunuaina lea tulaga?
- E faapefea ona aumaia e le Atua le filemu ia i tatou e lagolagoina ai i tatou i taimi o puapuaga?

### *Faamatalaga*

1. Lauga i le Faaliga mo le Saolotoga i le Iunivesite o Polika Iaga, 1 Iulai 1962, Harold B. Lee Library Archives, Brigham Young University, 6.
2. In Conference Report, Oke. 1967, 98; po o le *Improvement Era*, Ian. 1968, 26.
3. *The Teachings of Harold B. Lee*, ed. Clyde J. Williams (1996), 171.
4. *The Teachings of Harold B. Lee*, 69–70.
5. *The Teachings of Harold B. Lee*, 187–88.
6. *Stand Ye in Holy Places* (1974), 114–15.
7. *Stand Ye in Holy Places*, 339.
8. In Conference Report, Oct. 1942, 72–73.
9. *The Teachings of Harold B. Lee*, 191.
10. *Education for Eternity*, lauga i le Inisititiuti a Sate Leki “Lectures in Theology: Last Message Series,” 15 Ian. 1971, Historical Library files, O Le Ekalesia a Iesu Keriso o le Au Paia o Aso e Gata Ai, 6.

11. Lauga i le falelauasiga o Mabel Hale Forsey, 24 Oct. 1960, Historical Department Archives, O Le Ekalesia a Iesu Keriso o le Au Paia o Aso e Gata Ai, 6.
12. Lauga i le faigalotu i le Iunivesite o Polika Iaga, 15 Nov. 1949, Historical Department Archives, O Le Ekalesia a Iesu Keriso o le Au Paia o Aso e Gata Ai, 10.
13. “‘I Dare You to Believe’: Elder Lee Urges USAC Graduates Seek Spiritual Facts,” *Deseret News*, 6 June 1953, vaega o Tala Fou a le Ekalesia, 4.
14. *Education for Eternity*, 7–8.
15. “Ia Faafilemu le Loto Tiga,” *Liabona*, Me. 1973, 7.
16. “A Message to Members in the Service,” *Church News*, 2 Dec. 1972, 3.
17. In Conference Report, Oct. 1973, 169, 171; po o le *Ensign*, Jan. 1974, 128–29.
18. Lauga i le semina a sui risone, 3 Ape. 1970, Historical Department Archives, O Le Ekalesia a Iesu Keriso o le Au Paia o Aso e Gata Ai, 4.
19. *The Teachings of Harold B. Lee*, 54.
20. *The Teachings of Harold B. Lee*, 408.





# O Le Toetu, o se Taula o le Agaga

*E faamalolosia faapefea i tatou i o tatou puapuaga  
i le olaga nei, ona o se molimau i le Toetu o  
Iesu Keriso ma lo tatou foi toetutu?*

## Faatomuaga

**S**a i ai ia Peresitene Harold B. Lee se molimau mautu i le Toetu o Iesu Keriso, lea sa saga faamalosia atili ina ua maea ona valaauina o ia i le Korama a Aposetolo e Toasefululua ia Aperila 1941. Na ia toe ta'ua: "Na sau se tasi o le Toasefululua ma faapea mai ia te au, 'Matou te mananao e avea oe ma failauga i le sauniga lotu i le po o le Aso Sa. O le Aso Sa o le Eseta. I le avea ai o oe ma se aposetolo ua faauuina, o lea ua avea ai oe ma se molimau faapitoa o le misiona ma le toetu o le Alii ma le Faaola o Iesu Keriso.' Na ou manatu, o se mea na matua faate'ia ai a'u, o se mea na aupito lofituina ai au ma umi se taimi o manatunatu loloto i ai nai lo mea uma na tutupu.

"Sa ou lokaina a'u i se potu o le Fale e i ai Ofisa o le Ekalesia ae tago i le Tusi Paia. Sa ou faitauina tusi e fa o le Talalelei, aemaise lava o mau e faatatau i le maliu, faasatauroga, ma le toetu o le Alii, ma a'o ou faitauina, sa faafuasei ona ou iloa se mea uiga ese na tupu. Ua lē na o se tala sa ou faitauina, aua ua foliga mai o mea ia ou te faitauina e matua moni lava e pei o loo ou aofia ai i totonu o na aafiaga. I le po o le Aso Sa, sa ou tuuina atu ai la'u savali ma le lotomauualalo ma faapea atu, 'Ma o lenei, o a'u, o se tasi o aposetolo aupito faatauvaa o i ai i luga o le fogaeleele i le taimi nei, ou te tuuina atu la'u molimau ua ou iloa foi ma lo'u loto atoa, o Iesu o le Faaola o le lalolagi ma sa soifua o ia ma maliu ma ua toetu mo i tatou.'

“Sa ou iloaina ona o se ituaiga molimau faapitoa na oo mai ia te au i le vaiaso na mavae nei. Ona fesili mai ai lea o se tagata, ‘E faapefea ona e iloa? Na e vaai i ai?’ E mafai ona ou fai atu e sili atu ona malosi nai lo le vaai o mata, le molimau e maua mai i le mana o le Agaga Paia e molimau mai ai i o tatou agaga o Iesu o le Keriso, o le Faaola o le lalolagi.”<sup>1</sup>

## Aoaoga a Harold B. Lee

---


### E faapefea ona avea le moni o le toetu ma se “folafolaga faafiafia loto”?

“O le uluai aso o le vaisapati, ua o atu ai fafine i le tuugamau i le tafa o ata. . . .Ua iloa e i latou ua fulieseina le maa nai le tuugamau. Ona latou ulu atu lea i totonu, a e lei iloa le tino o le Alii o Iesu. Ua fememeai i latou i lenei mea, faauta foi, ua tutu mai ia te i latou tagata e toalua ua oofu i ofu pupula! Ua matatau i latou, ua punou foi o latou mata i le eleele, ona la fai mai lea ia te i latou, Se a le mea tou te saili ai le ua soifua i e ua oti? Aua lua te matatau oulua; aua ua ou iloa ua oulua sailia mai Iesu le Nasareta, lea na faasatauroina.

“E le o iinei o Ia, aua ua toe tu mai o Ia, pei ona fetalai atu ai o Ia. O mai, ina matamata i le mea na tuu ai le Alii—le mea na latou faataoto ai o Ia.

“Ina o atu ia ia vave ma ta’u atu i ona soo, ua toe tu mai o Ia nai e ua oti—faauta foi, e muamua atuia te outou i Kalilaia; tou te iloa ai o Ia i lea mea. Ia outou manatu i lona fetalai atu ia te outou, ina o i ai o Ia i Kalialia, ua faapea atu: e tatau ona tuuina atu o le Atalii o le tagata i lima o tagata agasala, ma ia faasatauroina, ma toe tu mai i le aso tolu. Faauta, ua ou fai atu ai.” [Tagai Luka 24:1–7; Mataio 28:5–7; Mareko 16:5–7.]

O lea na tusia ai e tusitala o le talalelei a Mataio, Mareko, ma Luka, le mea aupito sili na tupu i le talafaasolopito o le lalolagi, o le toetu moni mai o le Alii o Iesu Keriso, le faaola o tagata. I se faiga malie na faaalua ai le aupito silisili o mana paia uma o se Alo moni o le Atua. Na Ia tautino atu i le [tamaitai] faanoanoa o Mareta, i le taimi o le oti o lona tuagane o Lasalo: “O au nei o le



Na faaali le Faaola toetu ia Maria i le tuugamau. O le molimau a le Agaga Paia, e mafai ai ona tatou tofu maua le faamafanafanaga mautinoa ua toetu le Faaola mai le oti, ma ua motusia ai noataga o le oti mo tagata uma.

toetu, ma le ola: o lē faatuatua mai ia te au, e ui lava ina oti, ae ola lava ia.” (Ioane 11:25.)

I tagata Iutaia ma o latou faamoemoega e fasioti, sa sili ona manino ma ‘anoa Lona faasilasilaina atu o Lona mana paia. “E moni, e moni ou te fai atu ia te outou, e oo i le aso, ua oo nei foi i ai, e faalogo mai ai e ua oti i le leo o le Atalii o le Atua; o e faalogo ai foi, e ola ai i latou.

“Aua faapei o le Tama e i totonu ia te ia lava le ola; e faapea foi ona foai mai e ia i le Atalii, ia i totonu ia te ia lava le ola,

“Ma . . . ia fai e ia le faamasinoga, aua o ia o le Alo o le [Atua].” [Ioane 5:25–27.]

Ina ua mavae Lona lava toetu, sa oo mai foi se faamaoniga o se isi mana e maualuga atu e toe faatu mai ai i le tuugamau, e lē gata ia te Ia lava, a o isi “e ui ina ua oti, ae ua talitonu ia te Ia.” Na tusia e Mataio se faamaumauga faigofie, ma le manino o le toetu ofoofogia o ē faamaoni, mai le oti faaletino, “Ua avanoa foi tuugamau, ua toe tutu mai tino o tagata paia e toatele na momoe, na mavae foi lona toe tu mai, ona latou o mai ai lea nai tuugamau, ma latou o atu i le aai paia, ua iloa i latou e tagata e toatele.” [Mataio 27:52–53.]

E le o le mutaaga foi lea o mana togiola o lenei Alo lauiloa o le Atua. I le gasologa o tausaga i augatupulaga uma, o loo aumaia ai pea le folafolaga faafiafia loto. “Aua faapei ona oti uma ia Atamu, e faapea foi ona faaolaina uma ia Keriso,” (1 Kori. 15:22), “. . . o e na amio lelei, e toe tutu i le ola; a o e na amio leaga, e toe tutu i le faasala.” (Ioane 5:29). Ua vave agai atu le taimi i se taunuuga atoatoa o Lana misiona paia.

A na fai e malamalama i le taua atoatoa o nei mea maoae na tutupu i lea taimi, e faapei ona muai tau mai e perofeta: O loo sauniuni e amioleaga e fasioti ē amioleaga; ma “o le a oo mai le mata’u i tagata uma” (MFF 63:33), o lenei malamalama o le aveesea ai le tele o le mata’u ma le atuatuva lea ua aafia ai tagata ma malo. E moni afai tatou te “matatau i le Atua ma ava i le tupu” [tagai 1 Peteru 2:17], ona mafai lea ona tatou maua le folafolaga matagofie a le Matai: “Afai tou te tuu ese le losilo-

sivale ma le atuatuvaile, o le a outou vaai mai ia te Au” [tagai MFF 67:10].<sup>2</sup>

O le faamoemoega o le olaga, o le aumaia lea o le tino ola pea ma le ola faavavau [tagai Mose 1:39]. O lona uiga, o le tino ola pea, e i ai le taimi e maua ai se tino e lē toe oo i ai tiga o le olaga nei, e lē toe oti, ma lē toe suia, ua mavae na tulaga uma.<sup>3</sup>

---

**E lagolagoina faapefea i tatou i taimi o puapuaga po o le oti, e se malamalama e uiga i le toetu?**

E i ai ea se taimi ua e lagonaina ai lou faataumaioina faale-agaga i se faanoanoaga lē mafaamafanafanaina?

Se’i oui aveina outou i se vaaiga paia o loo faaalua mai ai se tagata na foliga mai e lē mafai ona tatalia, ma ia outou lagona ai lona malosi i se itula taua tele! O lalo o le satauro, sa tutu faapupu ma le lē leoa se tina lalelei faamatuā tagata, ma lona pulupulu ua pulutaa ai lona ulu ma ona tauau. O ona luga a’e sa soona faataugā ai lana ulumatua i luga o le satauro. E mafai ona malamalama se tasi, ae itiiti lava, i le tele naua o le mafatia o le loto o Maria. Ua feagai tonu nei o ia ma le uiga o le valoaga faamomoiloto a le toeaina o Simeona a’o ia faamanuiaina lana tama i lona pepe meamea, “E fai [o Ia] ma faailoga e tauleagaina; Ioe e tuia foi lou lava loto ia ati i le pelu.” [Tagai Luka 2:34–35.]

O le a le mea na fesoasoani ma lagolagoina o ia i lona puapuaga matautia? Sa ia iloa le moni o le ola i tua atu o lenei olaga. Pe la te le’i talanoa ea ma se agelu, o se avefeau mai le Atua? E le’i faaluafesasi lona faalagoina o le toe tatalo o loo tusia a lana tama a o le’i faalataina o Ia e pei ona tusia ai e Ioane: “O lenei foi, lo’u Tama e, ia e tuu mai ia te au le manuia faatasi ma oe, o le manuia lava sa ia te i taua ma’oe, a o lei faia le lalolagi.” (Ioane 17:5) O lenei lava foi tina paia, a o punou lona ao, sa ia faafogaina foi Lana toe tatalo na memumemu mai ai ona laufogaga mafatia i luga o le satauro: “Lo’u Tama e, ou te tuuina atu lo’u nei agaga i ou aao,” (Luka 23:46) ma o lea sa musuia ai lona tina i le agaga maualalo ma se molimau, e faamautinoa ai se toe faatasiga ma Ia ma le Atua lona Tama

Faalelagi. E le o mamao ese le lagi mai le tagata o loo vaavaai atu ma le talitonu i se aso mamalu o le toetutu, e ui i le loloto o le faanoanoa.<sup>4</sup>

Pe o i ai ea se tulaga mautinoa o se toe faatasiga ma se faa-taunuuiina o o tatou moomooga pe a mavae le oti? O le tagi lena a se tina faanoanoa a'o faataoto ese atu lana tama ua oti. O le fesili musumusua lena ae lē lagona a tagata mamai ma ua pulapula lagoto le soifua pe a ua vave ona oo mai le toe taimi. O le a le malosiaga ma le faamafanafanaga e tatau ona maua e le tagata ua faalogo i le folafolaga matagofie a le Alii, i soo se tasi o nei tulaga,:

“E toe ola mai ou tagata oti, olaotu tino oti e toe tutu mai. Ina ala mai ia, ma alalaga fiafia outou e ononofo i le efuefu; aua o lou sau e pei o le sau o le vao iti ia, e lafo atu foi e le eleele e ua oti.” (Isaia 26:19.)

O le mamafatu o le oti ua faamāmāina, o le ie paauli foi o le faanoanoa ua saeia, ma ua faamafanafanaina manu'a tuga a'o siitia a'e e le faatuatua i tatou i luga a'e o tofotofoga mataga ma faanoanoaga o le olaga faitino, ma aumaia ai se vaaiga o aso sili atu ma avanoa e sili atu ona olioli, e pei ona faaaliga mai, pe a “soloi-esea foi e le Atua loimata uma i o latou mata; e leai foi se toe oti, po o se faanoanoa, po o se aue, e leai foi se toe puapuaga: aua ua mavae atu mea muamua” (Faaaliga 21:4) e ala i le togiola a le Alii o Iesu Keriso. Faatasi ai ma lea faatuatua ma le malamalama o oe lena atonu o le a oo i ai le faanoanoa, ua mafai nei ona e pese aua ua tusia, “Ua faaumatia le oti i le manumalo. Le oti e, o fea o i ai lou tui? Le tuugamau e, o fea o i ai lou manumalo?” (1 Kori. 15:54–55.)<sup>5</sup>

O oe foi ia, e mafai ona e iloa o loo soifua lou Togiola, e faapei o Iopu i le totonugalemu o ona tofotofoga e “faifai ia i le Atua, ma oti ai,” [tagai Iopu 2:9; 19:25] ma ia e iloa, e te mafaia foi ona tatala le faitotoa ae valaaulia o Ia “e tali sua ma oe.” [Tagai Faaaliga 3:20.] Vaai atu foi ia te outou lava e i ai se aso e ave a o ni tagata ua toetutu, ma maua le sootaga ma Ia o lē na tuuina mai Lona soifua ina ia ave a ma tau i o tauiviga ma aafiaga o tagata i le lalolagi, ia fua o le ola faavavau tusa lava pe o fua faa-

tatauina i tulaga faale-tagata soifua ana galuega i le olaga e pei ua faatoilaloina.<sup>6</sup>

---

**E faapefea ona avea le malamalama i le toetutu  
ma se taula mo o tatou agaga?**

Sei o tatou vaavaai atu i le faataitaiga a Peteru, [o lē]. . .na faafitia faatolu le Matai i le po na faalataina ai. Ia faatusatusa lenei Peteru ua mafatia i le fefe ma lona lototoa i luma o na lava tagata lolotu ae faasausili sa poloaiina ia fasiotia Iesu. Sa ia ta'uleagina i latou o ni fasioti tagata ma ia ta'u atu ia te i latou ia salamo, sa pagatia i le falepuipui, ma sa ia talia e aunoa ma le fefe lona faamaturaina.

O le a le mea na suia ai o ia? Sa avea o ia ma molimau patino i le suiga e oo mai i le tino ua momomo, ma mafatia i le satauro, i se tino toetu mamalu. O le tali manino ma le faatauva, o Peteru o se tagata na suia aua sa ia iloina le mana o le Alii ua toetu. Ua le toe tuulafoaiina i apitagalua o Kalilaia, po o le falepuipui, po o le oti foi. O le a i ai lona Alii faatasi ma ia.<sup>7</sup>

Ua ou iloa. . . le uiga o le matua matautia o le tuulafoaiina po o le tuua toatasi ona o le aveeseina faatopetope o sē e pele ia te oe. I le gasologa o tausaga o lo'u ola, sa tofia au ou te taumafai e faamafanafana i latou e faanoanoa, ae a na ou lē faia faafia na mea sa ou ta'uina atu i isi mo au lava ia, ou te le iloina se mea sa sili atu i lo na o upu, o se mea e tatau ona pa'i ifo i le ta'ele o le loto a o le'i mafai e se tasi ona tuuina atu se faamafanafanaga moni. E tatau ona e vaai i se vaega o oe lava ia o tanumia i le tuugamau. E tatau ona e vaai i le pele ua maliu ona e fesili ifo lea ia te oe lava—Pe e te talitonu ea i mea o loo e aoaoina atu i isi? Pe e te talitonu moni ea o loo soifua le Atua? Pe e te talitonu ea i le Togiola a leAlii ma le Matai—na Ia tatalaina faitotoa i le toetutu i le olaga e sili atu lona mamalu? E i ai nisi taimi pe a tatou tutu i le laolao na o i tatou, o iina e tatau ai ona oo ifo i le loloto a tatou molimau, pe afai tatou te le mananao e malili ma toulua i le ala.

E faapei ona fai mai. . .le ava a Iopu, “Aisea e te le faifai ai i le Atua ma oti ai.” [Tagai Iopu 2:9.] Ae peitai, i le mamalu o puapuga o Iopu, na ia saunoa ai i se mea ou te manatu afai e lē ta'ua i se sauniga o se falelauasiga, o lona uiga ua le atoatoa. Na ia

fai mai, “Ua ou iloa o loo soifua le na te togiolaina au, o aso amuli foi e tulai mai ai o ia i luga o le eleele: e ui lava foi ina faaumatia lenei tino pe a mavae atu lo’u pa’u, ae ou te iloa atu le Atua i lo’u tino: ou te iloa atu o ia mo a’u lava, . . .ae le o se tasi, . . .pe a le toe i ai o’u manao i totonu ia te au.” [Iopu 19:25–27.] O outou na i le asō, afai ua outou iloa ua taula o outou loto i lena moli-mau paia o loo soifua o Ia, ma o le a tu o Ia i lenei eleele i aso amuli, ma o le a outou fetaia’i faafesagai ma Ia—afai ua outou iloa lena mea, tusa lava pe o a faigata, po o a foi tiute ma mafatiaga—afai ua fausia lou fale i luga o le papa, o le a e lē vaivai lava. Ioe, o le a e oo i aafiaga matautia o le faanoanoa pe a oti se tasi e pele ia te oe, ae e te lē faavaivai ai lava; e iu lava ina faateleina atili lou faatuatua nai lo le mea sa i ai muamua.<sup>8</sup>

O le faateleina o le faigata o o tatou olaga ma tulaga o le a i ai le lalolagi, o le tele foi lena o le taua o lo tatou tausia manino o faamoemoega ma mataupu faavae o le talalelei a Iesu Keriso. E le se galuega a le lotu le taliina o fesili uma e uiga i le pulea o le atulaulau e le Atua, ae ia tuuina atu i le tagata le lototele, e ala i le faatuatua, e faaauau ai pea e ui ina i ai fesili e le mafai ona ia maua le tali i le tulaga o i ai nei.<sup>9</sup>

O le vaitaimi nei i le faamanatuina o le manumalo aupito sili i le lalolagi [le toetu o Keriso ma le faatoilaloina o le oti], ou te valaau atu ma le lotomauualalo naua i ē ua faamaoni o latou loto i soo se mea, ina ia tulai mai i luga atu o o latou tulaga atuatuvaletu ma mafatiaga faaletaga soifua, ma ia alalaga fiafia e faapei o apotetolo i Nuu Ese “Faafetai i le Atua, ole na te foaiina mai le manumalo ia te i tatou talu lo tatou Alii o Iesu Keriso.” (1 Kori. 15:57.)<sup>10</sup>

## **Fautuaga mo Suesuega ma Talanoaga**

---

- O le a le uiga o le fetalaiga a le Faaola, “O au nei le toetu, ma le ola”? (Ioane 11:25). O le a sou lagona pe a mafaufau e uiga i le Toetu o le Faaola?
- O aafia faapefea lou olaga i aso taitasi ona o lou malamalama e moni le toetu?
- E faapefea ona fesoasoani ia i tatou se molimau i le toetu pe a oti se tasi tatou te alolofa i ai? O a isi tulaga tatou te maua ai



le faamafanafanaga mai se molimau i le toetu, ma fesoasoani foi tatou te faatoilaloina ai le atuatuvalet?

- O le a se mea e mafai ona tatou faia ina ia maua ai se malamalama sili atu ma se molimau i le toetu?

### *Faamatalaga*

1. *Ye Are the Light of the World* (1974), 26–27.
2. CBS “Church of the Air” broadcast, in Conference Report, Apr. 1958, 133–34.
3. *The Teachings of Harold B. Lee*, ed. Clyde J. Williams (1996), 30.
4. CBS “Church of the Air” broadcast, 134–35.
5. *Decisions for Successful Living* (1973), 179–80.
6. In Conference Report, Ape. 1958, 136.
7. *The Teachings of Harold B. Lee*, 63.
8. Lauga i le falelauasiga o David H. Cannon, 29 Ian. 1968, Historical Department Archives, O Le Ekalesia a Iesu Keriso o le Au Paia o Aso e Gata Ai, 5–6.
9. In Conference Report, Oct. 1963, 108; po o le *Improvement Era*, Dec. 1963, 1103.
10. In Conference Report, Ape. 1958, 136.



## Ua I’u Lava ina Taunuu Saogalemu i le Fale

*Pe o tatou saogalemu ea ile ala e tau atu i lo tatou aiga  
e faavavau ma le olaga i le afioaga o le Tama?*

### Faatomuaga

**O** le misiona atoa a Harold B. Lee na ia faamamafaina ai lenei aoaoga: “O le mea o loo tatou taumafai atu nei i ai, o le tausia lea o i tatou lava ma ia ola ina ia i ai se aso e mafai ai ona tatou toe foi atu i le maota o le Atua o lē na foai maia lena ola—i le afioaga o le Tama Faalelagi.”<sup>1</sup>

Na ia toe ta’ua: “Sa i ai se taimi ua mavae, sa ou faitauina ai se tala na tusia e se tusitala tautaua i nusipepa, o lē na ia faamatalaina lona taumafai e faatulaga se talanoaga ‘anoa ma se tagata na ia manao e faatalanoa. O fesili faapea na tuu e fesili atu ai: ‘E mafai ona e faamatala mai ia te au se faaupuga e te manao e tusia i le maa o lou tuugamau?’ Na ia lipotia mai o le toatele lava e tali mai faapea ‘ia fiafia,’ ‘o lea ou te alu i se isi fonotaga,’ ma isi lava faaupuga. Ona fesiligia lea o le tusitala pe o le a sana ia faaupuga e tusi i le maa o lona tuugamau. Na ia tali lemu mai ma le faamaoni, ‘Ua i’u lava ina taunuu saogalemu, i le fale.’

“Pe a oo ina mautu le taua o lenei faaupuga ia i tatou, atonu e lelei foi ona tatou fesili ifo ia i tatou lava, ‘A uma ona fuafua mea uma, o le a la le uiga o le olaga, ma o le a foi lo tatou faamoe-moega i luga atu o lenei ola, e pei ona tatou talitonu ai i se olaga pe a mavae lenei?’ E toetoe o tagata uma, e le afaina pe o le a lona faatuatuaga faalelotu, e faatalitali atu i se isi olaga e mafai ona faamatalaina i ni auala eseese. Afai e sa’o lo’u manatu, o le a tatou mananao uma lava e tusi i maa o o tatou tuugamau, se fuaitau e fai ma aotelega o a tatou galuega i le olaga, e faapea, ua ‘i’u lava ina tatou taunuu ‘saogalemu, i le fale.’”<sup>2</sup>

## Aoaoga a Harold B. Lee

---

### O le a le faamoemoega o lo tatou olaga faitino?

O le a le faamoemoega o le olaga . . . ? Na pau lava le tali e mafai ona maua i le mau e tasi lea o loo faaaliga ai le faamoemoega o le Atua na aumai le ola i mea uma, ma o lena faamoemoega na faamatalaina i se faaaliga i le perofeta o Mose: “O la’u galuega lenei ma lo’u mamalu—ia faataunuuina le faaofuina o le tagata i le tino ola pea ma le ola faavavau.” [Mose 1:39.] Afai e i ai se tasi e na o sina taimi i le olaga nei e manava ai pe ola ai foi, ona toe aveesea lea, pe ola foi e pei ona umi o le ola o se laau, ua tataua ona faataunuuina le faamoemoega o lo tatou Tama e tusa ai ma le mauaina o le tino ola pea. Ma o lenei mea ua ta’ua o le ola faavavau, o le ola ai lea i lona olaga, ina ia mafai ona faitaulia ua agavaa mo le ola faavavau i le afioaga o le Atua leTama ma le Alo.<sup>3</sup>

O le tagata i le lalolagi o agaga o se atalii o le Atua. Sa foafoaina le lalolagi ma faatulagaina e fai ma mea e nonofo ai agaga o le lagi ua tuuina i ai ni tino faitino e “faataitai ai i latou, ia iloa ai, pe latou te faia mea uma e poloaiina ai i latou e le Alii lo latou Atua.” [Tagai Aperaamo 3:25.] O le faamoemoega o le Atua na faia ai lena fuafuaga “ina ia faataunuuina le faaofuina i le tino ola pea ma le ola faavavau” pe i se isi foi faaupuga, o le tau i o le faamanuiaina i le olaga nei, o le toe aumaia lea o agaga taitasi i le afioaga o lena “Atua na foai mai ai le ola” faatasi ai ma se tino toetu e lē toe oo i ai le oti ma ua faaatoatoaina, e nofo ai e faavavau i le afioaga o le Alii lo tatou Matai ma le Tama o i tatou uma.<sup>4</sup>

Na faamatalaina e [Peresitene George F. Richards] le tala lenei, o se tala i se taulealea sa matua naunau lava o ia ia lelei lana aoga. Sa le mafai e ona matua ona auina atu o ia i le kolisi, o lea sa savali ai o ia i le aai e i ai le kolisi, ma ina ua mavae ana saili-iliga filiga, sa faamanuiaina o ia ina ua maua se nofoaga e mafai ona totogi e nofo ai. I se taimi mulimuli ane, sa ofo atu e se tasi o polofesa ia te ia se galuega o le tata fafie e totogi ai lona pili. Sa i ai nisi, na latou maua tala i le lelei o lana tata fafie, sa latou faafaigaluegaina foi o ia e tata a latou fafie. Sa oo ina ua iloa, ua

leai se taimi e alu ai i le kolisi, ma sa faamalieina o ia i le avea ai ma se tata fafie ua faamanuiaina.

O se tulaga foi lea ua maua ai le toatele o i tatou. Na tatou o mai i le lalolagi mo se faamoemoega patino—o le galulue lea mo o tatou lava faaolataga, a tuu i se isi faaupuga, ia saunia ai mo le olaga a sau, lea e faavavau. O nisi o i tatou ua foliga ua galo le faamoemoega sa i o tatou luma, ma ua faamalilieina lava i la tatou sailiga mo le oa po o le tamaoaiga ma tulaga lauiloa lea e maua i le olaga, i se isi faaupuga, ua fiafia lava pe ua faamalieina i le na ona “tatina o fafie.”<sup>5</sup>

Talosa ia o i tatou ua i ai molimau [ia Iesu]. . . mai o tatou loto, ia tagi atu i lo tatou Tama: “Le Alii e, se a le mea e te finalo i ai ou te faia?” [Galuega 9:6.]

Ma afai tatou te tatalo atu i le maelega atoatoa ma le faatuatua, ona oo mai ai lea ia i tatou mai tusitusiga paia o le tali i lena olega ma le agaga tatalo. Ua faatele ona oo mai le tali, o lea taimi ma lea taimi, o mea uma tatou te fai, e tatau ona faia “ma le manatu tasi i le mamalu o le Atua.” [MFF 82:19.] O le a le mamalu o le Atua? Na ta’u atu e le Alii ia Mose:

“. . . o la’u galuega ma lo’u mamalu lenei—ia faataunuu le faaofuina o le tagata i le tino ola pea ma le ola faavavau.” (Penina Tau Tele, Mose 1:39.)

Faatasi ma le i ai pea lava pea o lena sini i o tatou luma, ma le vaaia o āga uma i o tatou olaga, o faaiuga uma tatou te faia a o faatulaga atu agai i le atinaeina o se olaga e mafai ai ona tatou ulufale atu i le afioaga o le Alii ma lo tatou Tama Faalelagi, ina ia maua ai le ola faavavau, pe o le a la le tele o se atamai o i ai i le tele o mea i le olaga.<sup>6</sup>

Mai le tele o mai, mai foi i tusitusiga a taitai musuia o le Ekalesia, ma faamatalaga tusitusia mai le poto salalau, e mafai ona faauigaina le ola faavavau o se olaga i le afioaga o na Tagata ua faavavau, o le Atua le Tama ma Lona Alo o Iesu Keriso. Ina ia faapuupuua lena uiga, atonu e mafai ona tatou faapea o le ola faavavau o le soifua lea o le Atua. . . .

Ina ia i’u ina ausia lenei mamalu faaselesitila, e tatau ona avea pea ma sailiga e lē muta a tagata soifua uma.<sup>7</sup>

**Pe ua tatou saunia ea e tutu atu i luma  
o le nofoa faamasino o le Atua?**

O outou uma lava. . . e tataua ona tutu i luma “o le nofoa faamasino o Lē Paia o Isaraelu. . . ona faamasinoina ai la o i latou i le faamasinoga paia a le Atua.” (2 Nifae 9:15.) Ma e tusa ai ma le faaaliga ia Ioane, “Ona fofola lea o tusi; ua fofola foi ma le tasi tusi, o le tusi lea o le ola; ona faamasinoina ai lea o e na oti i mea ua tusia i tusi, e tusa ma a latou amio.” (Faaa. 20:12.) O “tusi” o loo tautala i ai, o faamaumauga ia [o a outou amio po o galuega] o loo teuina i le lalolagi. . . O le tusi o le ola o le faamaumauga lea o loo teuina i le lagi.” (Mataupu Faavae ma Feagaiga 128:7.) O outou na ola i ni olaga amiotonu ma ua oti e aunoa ma le avea ma ni auauna a le agasala, pe o ē foi ua salamo atoatoa ai a outou agasala, o le a ulufale atu i le “malologa o le Alii,” o lea malologa foi “o le atoatoaga lea o le mamalu o le Alii.” [Tagai MFF 84:24.]<sup>8</sup>

Ua ta’u mai ia te i tatou mai tusitusiga musuia “o a tatou upu e ta’usalaina ai i tatou (pe faaeaina ai foi i tatou), e ta’usalaina foi i tatou i a tatou galuega (pe siitia ai foi i tatou). . . [tagai Alema 12:14], pe a tatou faafesagai ma le Faamasino Sili o i tatou uma, e faamoemoe ina ia tatou mauaina le faamalo a le Matai: “Ua lelei ia, le auauna lelei e, ma le faamaoni.” [Mataio 25:21.] E eseese ma mataupu masani a isi lotu, e faapea o le Aposetolo o Peteru o le leoleo lea o le faitotoa i le isi olaga, ae ua ta’uina mai ia te i tatou “o le leoleo o le faitotoa o Lē Paia o Isaraelu lea; na te le tofia foi i ai se auauna” (2 Nifae 9:41.)<sup>9</sup>

O le seoli aupito tele e mafai ona pagatia ai se tasi o le mu lea o ona manatu. Ua ta’uina mai i mau o ona manatu o le a ta’usalaina ai o ia, e i ai foi le manatu pupula i lona olaga uma (tagai Alema 12:14; 11:43). Tou te manatua o loo ta’ua i tusitusiga paia le tusi o le ola a le Tamai Mamoe, o se faamaumauga lea o le olaga o le tagata o loo teuina i le lagi. . . O le a faamasinoina tagata e tusa ai ma faamaumauga na teuina o o tatou olaga. (Tagai MFF 128:6–7.) O lea, pe a tatou le mauaina lena tulaga aupito maua o le mamalu ma tatou iloaina mea ua tatou lē maua, o le a mu ai o tatou manatu ma lagona, ma o le a sili atu ona leaga nai lo soo se ituaiga afi faaletino ou te manatu e mafai ona puapuagatia ai se tagata.<sup>10</sup>



Ua aoaoina i tatou e Peresitene Harold B. Lee, o a tatou taumafaiga i le olaga nei, e tataua ona tulimatai atu i le “ola ai i le tulaga atoatoa e tataua ona i ai i le olaga nei ma. . .sauniuni ai mo le lalolagi selesitila.”

Pe a tatou pasi atu i faitotoa o le oti. . . o le a Ia fetalai mai ia te i tatou, “Na outou tauaveina lo’u igoa. O le a le mea ua outou faia i lo’u igoa? Pe ua outou faamāina ea le suafa o le Alii o Iesu Keriso, i le avea ai ma se tasi o la’u ekalesia?” Manatu faalemafaufau i se pupula faanoanoa, manatu faalemafaufau i le lulu o Lona ao ona liliu lea ma toe savali ese. . . Ae manatu faalemafaufau foi pe a tatou feiloai ma Ia ona susulu mai ai lea o le fiafia i Ona fofoga. Ua Ia fofola mai ona aao, ma fetalai mai, “Lo’u atalii e, lo’u afafine, sa e faamaoni i le fogaeleele. Sa e tausia le faatuatua. Ua mae’a au galuega. O loo i ai nei se palealii ua saunia mo oe i lo’u malo.” [Tagai 2 Timoteo 4:7–8.] Ou te le manatua se isi tulaga faaeaea i le lalolagi atoatoa e sili atu i lo lona tulaga e taliaina ai i le afioaga o le Silisiliese, i lona lalolagi a sau.<sup>11</sup>

---

### **E faapefea ona tatou sauniuni e fetai ai ma le Alii?**

Ua tōina mai e le Alii ia i tatou ni nai aso po o ni nai vaiaso po o ni nai tausaga a o gasolo pea le taimi—e le afaina pe o le a le umi—aua i le tausiga o tusi a le Silisiliese, e taua aso taitasi o sauniuniga. Sa tusia e se tasi perofeta, “E tataua i tagata ona sauniuni i lenei olaga e fetai ai ma le Atua; ioe, faauta, o le aso o lenei olaga, o le aso lea e tataua ona fai ai e tagata a latou galuega. . . .Aua faauta, afai ua uma ona outou faatuai i le aso o lo outou salamo e oo

lava i le oti, . . . o le tiapolo. . . na te faamaufaailogaina outou mona.” (Alema 34:32, 35.)<sup>12</sup>

E tatau ona tatou manatua e leai se eseesega tele pe tatou te vave oti a o laiti pe faamatuā tagata foi, o le mea aupito taua e lē o le taimi e oti ai, ae pe o le a le tulaga o i ai lo tatou sauniuni pe a oti. O se aso lenei o sauniuniga a tagata e fetai ai ma lo latou Atua. E maoae ma alofa mutimutivale o Ia ina ua ia faatagaina mai se taimi e faanofo vaavaaia ai i tatou, ma o le taimi foi lea e tatau ai i le tagata ona faaatoatoaina o ia lava.<sup>13</sup>

O le asō, o le taimi lea e amata ai ona tatou suesue i o tatou loto. Pe ua e iloa ea o lē fea poloaiga e aupito sili ona taua ia te oe i le asō?. . . Pe o le a amata ea ona e galue ai i le asō? Pe o le a e faatalitali seia i’u ina tuai tele? Fai mai se tamaitiiti, “Afai e avea a’u ma tama matua, ona ou faia lea.” Ma o le a le uiga o lena mea? Pe a avea o ia ma tama matua,. . . ona ia fai mai lea, “Pe a ou faaiipoipo, ona ou faia lea o lea mea ma lea mea.” A oo ina uma ona faaiipoipo o ia, ona suia uma ai lea, ma faapea, “Ia se’i ou litaea.” Ma a oo foi ina litaea, ona agi mai ai lea o se matagi malosi ma taia ai o ia ona faafuasei ai lea ona ia iloa a ua tuai, ua leai uma ni ana mea. Ae ua tuai tele. Ae sa tele le taimi na ia maua i lona olaga atoa. Ae na te le’i faaogaina. O le mea lea, o le asō, o le aso lea ua tatau ai ona tatou amata ona fai se fuafuaga, ae le’i tuai.<sup>14</sup>

[Ua ou toe manatua ai] se tala na faamatala mai ia te au i Atumotu o Hawaii i le taumafanafana talu ai e uiga i se teineitiiti na o ma lana uo i lona aiga. Sa taaalo i la’ua iina, a o faaaluina e le tinamatua le tele o le taimi e faitau ai le Tusi Paia i le fale. O taimi uma lava e sau ai lea teineitiiti o lo latou tuaoi, o la lava e faitau le Tusi Paia a le tinamatua, ona i’u lava lea ina fai atu i le afafine o le tama a le tinamatua, “Aisea e faaalu ai e lou tina le tele o lona taimi e faitau ai le Tusi Paia?” Ma sa tali ane lea teineitiiti, “Oi, o loo suesue loloto ma faatopetope tinamatua mo le suega faaiu.”

Ia, e le sese lava o ia. Ma ou te manatu e tatau ia i tatou uma lava ona mafaufau atili i le taua o le suesue loloto ma faatopetope mo le suega faaiu.<sup>15</sup>

O le a le umi talu ona e toloina le aso e te salamo ai mai au amio sese? O le faamasinoga o le a tatou feagai o le a faia i luma

o le Faamasino Amiotonu, o le a ia silasila i mea tatou te gafatia ma mea foi e le tatau ona tatou oo atu i ai, o o tatou avanoa ma mea tatou te vaivai ai. O le tagata e agasala ma ua salamo ma tumu ai lona olaga i taumafaiga lelei, e mafai ona lē tele ni mea na te misia i lena aso o le faamasinoga amiotonu e pei o lē, e ui ina lē faia se agasala matuia, ae ua toilalo ma le faanoanoa ona o le lē faia o mea na te gafatia ona fai, ma maua foi le avanoa e fai ai ae lē faia.<sup>16</sup>

A o tatou nonofo ai iinei i le asō, ma mafaufau loloto i o tatou olaga, manatu faapea ua i ai se mea e tatau ona tupu pe a tatou tuua lenei faapotopotoga, ma faamuta ai o tatou ola. Pe o i ai ea se galuega e le'i maea e tatau ona e faia a o le'i oo mai lena taimi? Pe o i ai ea ni tagata o i le isi itu o loo faatalitali mai ia te oe, ma o le a e mitamita e feiloai atu i ai pe afai e te faia ni mea patino e le'i maea ma e tatau ona e faia i le asō? Pe ua e saunia ea e feiloai atu i o outou aiga iina, ina ua e faia mea uma e te mafaia mo le fiafia o lo latou lumanai? Pe o i ai ea ni au agasala e tatau ona e salamo ai ae e te le'i foi atu i le maota o Lē na foai atu ia te oe le ola?<sup>17</sup>

O le olaga lenei, ua tofu maua e i tatou uma le avanoa e filifili ai ituaiga tulafono na tonu ia i tatou e usitaia. O loo tatou ola nei ma usiusitai i tulafono faaselesitila e mafai ai ona avea i tatou ma ni uso o le mamalu selesitila, pe o tatou ola nei foi i tulafono terasitila e mafai ai ona avea i tatou ma ni sui mo le . . . mamalu terasitila, po o tulafono telesitila. O le nofoaga o le a tatou nonofo ai i lalolagi e faavavau o le a fuafua lava i le ituaiga usitai tatou te tuu atu i tulafono o nei malo eseese i le taimi o loo tatou ola ai nei i luga o le fogaeleele.<sup>18</sup>

E faapefea ona sauniuni e fetaii ma le Alii? . . . Na fetalai mai le Alii, “O lea, ia outou faapaiaina ai outou lava ina ia tasi o outou mafaufau i le Atua, ma o le a oo mai foi aso tou te vaai ai ia te ia; . . . o le a fai foi lena mea i lona lava aso tatau, ma i lona lava ala, e tusa ma lona lava finagalo.” (MFF 88:68.) O le fua faatatau lea na ia tuuina mai ia te i tatou i se faaaliga . . . , “E moni, ua faapea maile Alii: O le a oo i tagata taitoatasi o lē lafoai ana agasala ma sau ia te au, ma valaau mai i lo'u igoa, ma usiusitai i lo'uleo, ma tausii mai i a'u poloaiga, o le a vaai i o'u mata ma iloa o loo i ai au.” [MFF 93:1.]<sup>19</sup>



**O le a le tau'i mo le tagata e ola "agavaa mo se molimau o loo soifua le Atua ma o Iesu o le Keriso"?**

O le lagi, e pei ona tatou manatu pea i ai, o le nofoaga lea e nonofo ai e amiotonu, pe a o latou tuua lenei olaga, ma oe le nofoaga foi e afifio ai le Atua ma Keriso. O lea tulaga fiafia na ta'ua ai e le Aposetolo o Paulo, "O mea e le i vaaia e mata, e lei lagona foi e taliga, e lei oo foi i le loto o se tagata, o mea ia ua saunia e le Atua mo i latou o e alolofa ia te ia." (1 Korinito 2:9)<sup>20</sup>

O le toatele o tagata latou te manatu o le tulaga faamanuiaina o le tele lea o ni mea, ae peitai, i fanau taitasi lava ia a le Atua, o le [tulaga faamanuiaina] o le maua lea i le iuga o le afioaga o le Atua ma mafuta lelei ai ma ia.<sup>21</sup>

E na o le tasi lava le faamoemoega e tusa ai ma le galuega a lo tatou Tama, ma o lea faamoemoega, a oo i le iuga pe a maea a tatou galuega i lenei lalolagi, pe i se taimi puupuu po o se taimi umi, a ua tatou faatoilaloina foi le lalolagi ma mauaina le aia tatau i lena nofoaga ua taua o le Malo Selesitila.<sup>22</sup>

O le tagata e ola. . . agavaa mo se molimau o loo soifua le Atua ma o Iesu o le Keriso, ma o loo naunau e fesootai atu ia te Ia e fesili pea lava pea ina ia iloa pe o tusa lona finagalo ma mea o loo ia faia, o le tagata lea o loo ola i le tulaga atoatoa e tatau ona i ai i le olaga nei, ma o loo sauniuni foi mo le lalolagi selesitila, o le ola ai lea e faavavau ma lona Tama Faalelagi.<sup>23</sup>

Ou te fia faamanatu atu foi ia te outou ina ia manatunatu loloto i le folafolaga ofoofogia a le Alii mo i latou uma o ē faamaoni:

"Afai foi tou te manatu tasi i lo'u mamalu, o le a faatumuina o outou tino atoatoa i le malamalama, o le a leai foi se pouliuli ia te outou; o le tino foi ua faatumuina i le malamalama e malamalama i mea uma." (MFF 88:67.)

O tagata taitoatasi e sailiili, e mafai foi ona maua tonu e ia mo ia lava lena molimau e lē mafaamaluelueina, ma o le a faatumuina ai ma le mausali ona vae i le ala e tau moni atu i le sini mamalu o le tino ola pea ma le ola e faavavau, o la'u tatalo lea ma le lotomauualalo.<sup>24</sup>

## Fautuaga mo Suesuega ma Talanoaga

---

- E faapefea ona avea i tatou i nisi taimi e faapei o le taulealea sa tata fafie?
- O le a se mea e mafai ona fesoasoani tatou te tepa taulai atu ai i aso taitasi i le sini o le toe foi atu ma le saogalemu i lo tatou Tama o i le Lagi?
- O faapefea ona e filifilia i le taimi nei le nofoaga o le a e nofo ai i le lalolagi e faavavau? O a taunuuga o le faatuatua o au sauniuniga e te tu atu i luma o le nofoalii faamasino o le Atua?
- O a mea e mafai ona tatou faia i le toe tasi o le aso mai le Atua?
- O le a le uiga o le ola ma le manatu tasi i le viiga o le Atua? (Tagai MFF 88:67–68.)
- O le a lona uiga ia te oe o le tauaveina i ou lava luga o le suafa o le Alii o Iesu Keriso? O le a se mea e mafai ona tatou faia e faamamalu ai i Lona suafa?
- O a ni mea ua e aoaoina i au suesuega o aoaoga a Peresitene Harold B. Lee e uiga i le ala e toe foi saogalemu atu ai i le Atua?

### Faamatalaga

1. *Be Loyal to the Royal within You*, Brigham Young University Speeches of the Year (20 Oct. 1957), 10–11.
2. *Ye Are the Light of the World* (1974), 261–62.
3. Lauga i le falelauasiga o Aldridge N. Evans, 7 Ian. 1950, Historical Department Archives, O Le Ekalesia a Iesu Keriso o le Au Paia o Aso e Gata Ai, 4.
4. “The Sixth Commandment: Thou Shalt Not Kill,” in *The Ten Commandments Today* (1955), 87.
5. “Elder Lee Recalls Counsel Given by Pres. Richards to Family, Associates,” *Deseret News*, 16 Aok. 1950, vaega a le Ekalesia, 2, 4.
6. I le Lipoti o le Konafesi, Oke. 1946, 145.
7. “Eternal Life,” *Instructor*, Oct. 1966, 378.
8. *Decisions for Successful Living* (1973), 186–87.
9. “The Greatest Need in the World Today,” Lauga o le faauuga a le Iunivesite o le Setete o Iuta, 5 Iuni 1970, Historical Department Archives, O Le Ekalesia a Iesu Keriso o le Au Paia o Aso e Gata Ai, 6.
10. *The Teachings of Harold B. Lee*, ed. Clyde J. Williams (1996), 67.
11. Lauga i le konafesi o le Siteki a Detroit, Aok. 1958, Harold B. Lee Library Archives, Brigham Young University, 6–7.
12. Lauga i le falelauasiga o Irene Tolman Hammond, 18 Mati. 1968, Historical Department Archives, O Le Ekalesia a Iesu Keriso o le Au Paia o Aso e Gata Ai, 5.
13. Lauga i le falelauasiga o William G. Sears, 13 Mati. 1943, Historical Department Archives, O Le Ekalesia a Iesu Keriso o le Au Paia o Aso e Gata Ai, 14.

14. Lauga i le kolisi ma taitai o Ricks College, 3 Mati. 1962, Historical Department Archives, O Le Ekalesia a Iesu Keriso o le Au Paia o Aso e Gata Ai, 20–21.
15. *The Teachings of Harold B. Lee*, 65–66.
16. *The Teachings of Harold B. Lee*, 67–68.
17. Lauga i le konafesi a le Siteki o Detroit, 4–5.
18. I le Lipoti o le Konafesi, Ape. 1947, 46.
19. “Preparing to Meet the Lord,” *Improvement Era*, Feb. 1965, 124.
20. *The Teachings of Harold B. Lee*, 77.
21. *Decisions for Successful Living*, 2.
22. Lauga i le falelauasiga o Aldridge N. Evans, 8.
23. *The Teachings of Harold B. Lee*, 614.
24. *Stand Ye in Holy Places* (1974), 319.



## Lisi o Ata Vali

- Itulau xxii: *Ua valaauina Peteru ma Aneterea e Keriso*, tusia e Harry Anderson.
- Itulau 14: *O Keriso ma Tamaiti*, tusia e Del Parson.
- Itulau 19: *O Iesu Keriso*, saunia e C. Bosseron Chambers. © Barnard Fine Art, Manchester Center, Vermont 05255.
- Itulau 48: *O Enosa o loo Tatalo*, saunia e Robert T. Barrett.
- Itulau 54: *Na Faaali atu le Atua i se Faaaliga i le Po i le Perofeta Taulealea o Samuelu*, tusia e Harry Anderson.
- Itulau 70: *O Uso Iosefa*, tusia e David Lindsley. © 1997 David Lindsley.
- Itulau 74: *O Le Uluai Faaaliga a Iosefa Samita*, tusia e Greg Olsen. © Greg K. Olsen.
- Itulau 95: *O Keriso i le Malumalu*, tusia e Heinrich Hofmann. Ata © C. Harrison Conroy.
- Itulau 203: *O le Lauga i luga o le Mauga*, saunia e Carl Bloch. The National Historic Museum at Frederiksborg in Hiller d.
- Itulau 212: *O Iosefa Samita i le Falepuipui i Liperate*, saunia e Greg Olsen. © Greg K. Olsen.
- Itulau 220: *Ona fetalai atu lea o Iesu ia te Ia, "Maria e,"* saunia e William Whitaker.
- Itulau 229: *O Le Faamasinoiga Mulimuli*, saunia e John Scott.



# Faasino Upu

## A

### Aiga

e tatau i le Ekalesia ona faamalosa,  
146–47

faaalua le alofa tele i le, 139–47

*Tagai foi* i Fanau; Tama; Fale; Tina;  
Talavou

Aitalafu, 185–86

### Aoao atu

afiafi faaleaiga, 135–37

faaagaina tusitusiga paia i le, 65–66

i totonu o le fale o le nofoaga sili lea  
ona taua e aoao atu ai, 129–32

le talalelei ma le mana ma le pule,  
159–61

mataupu faavae o le talalelei e aoao-  
ina ai fanau, 129–34

o le tiutetauave o matua le aoao atu  
o le talalelei, 119–27, 142–44

Aoaiina o le fanau, 130–34

Aufono i le lagi, 3, 10–12

### Ausilali

faamalolosia ai aiga, 148–51

faagaioia i lalo o le taitaiga faale-  
perisitua, 162–63

Auaunaga faafaifeautalai a Harold B.  
Lee, xv

Aualofa, matafaioi i le galuega o le uele-  
fea, 179–80

### Auauna atu

aoaoina o fanau e uiga i le, 129

e i latou o loo umia le perisitua,  
100–05

i le faaipoipoga, 107–10

sauniuniga mo galuega faalemalu-  
malsa, 107

Afiafi faaleaiga, aoaoina fanau i, 135–37

### Agaga

e pei o tino faaletino, 11–12

fafagaina o le, 189–93

o le Atua o le Tama o agaga uma,  
9–12, 225

Agaga o Elia i totonu o o tatou fale,  
135, 139

### Agaga Paia

e faatoilaloina le oti faaleagaga e ala i  
le fesoasoani a le, 32–33

faaalua mai le molimau, 38–40

faaaliga e ala mai le, 50–52

faamanuiga o le mauaina o le mea-  
alofa o le, 32–33

moomia e aoao atu ai le talalelei,  
159–61

o le le amiotonu e tupu ai le le toe  
maua o le, 96, 188–92

Agamalu, 213, 217

### Agavaa

moomia mo le galuega faalemaluma-  
lusa, 107–15

*Tagai foi* Usiusitai

### Alofa

atinaeina i totonu o le fale, 139–49

atinaeina i le faaipoipoga, 118–23

e tatau i taitai perisitua ona faaali  
atu, 96–105

mo fanau ua taase, 130–38

Alofa mutimutivale, 221

Alofatunoa, 24–25, 34

Anapogi

faamanuiaga o le, 180–82  
mea na oo i seaiga i se atalii fita-  
fita, 181–82  
ma le tatalo, 54–55

Apolo 13 vaa o le vateatea 1–2, 6

Aposetolo

Harold B. Lee na tofia o se, xvii  
pule a, 82

Aso Sapati, fafagaina e le agaga, 188–89

Ata o le Faaolataga

e na o le pau lea o le ala i le filemu, 7  
faamoemoega o le, 3, 225–26, 228–30  
mataupu faavae o le, 4–5  
tau atu i le ola e faavavau, 1–8

Atamai i le muai olaga, 9–11

Atamu

faaiipoipoga faavavau a, 110–11  
Pau o, 18–23, 110

Atua, fanau a le, 9–12, 225–26

Atua, o lo tatou malosiaga ina ia ave  
ma, 15–16

Atua le Tama

Tama o o tatou agaga, 3, 9–12, 225  
tatalo i le, 52–57

Atoatoa

e fesoasoani le Ekalesia ina ia tatou  
maua le, 209  
o faamuia o se taiala lea i le, 199–205  
poloaiaga ina ia maua le, 195  
taumafai mo le, 195–205

Ava. *Tagai* Faaipoipoga, faavavau

C

Callis, Charles A.

liua o, 156  
tatalo e ala i le talanoa ma le Atua, 52

E

Ekalesia

faamoemoega o le, 147–48  
gaoioga uma e tatau ona faamalolo-  
sia ai aiga, 129–39

Elia, Agaga o, i o tatou aiga, 125, 129

Epikopo

faamasino moni o Isaraelu, 29–30  
faatatalanoaga mo pepa faataga o le  
malumalu, 105–07

Eva

faaiipoipoina e faavavau o, 118–20  
Pa'u o, 18–23, 118

F

Faaaliga

e ala i le manatunatu loloto, 188–89  
e ala mai le Peresitene o le Ekalesia,  
80–81, 84–87

i le galuega o talafaasolopito o aiga, 110  
ituaiga o, 49–52

maua i totonu o malumalu, 107–11

maua e ala i le tatalo, 52–57

mataupu, e maua i, 51

molimau i, 38–40

na lapataiina ia Harold B. Lee e leo e  
lagonaina, 47

Faaamuia, faavae mo se olaga e faaato-  
atoaina, 209–17

Faaeaga. *Tagai* Ola faavavau

Faafeagai. *Tagai* Faigata

Faaeega paia, malumalu, 106–107

Faaipoipoga, faavavau

avea ma soa i le, 118–21

faamallosia i le olaga atoa, 111–14

faamanuiaga o, 118–24

fautuaga ia i latou o e le'i maua ni,  
121–27

moomia mo le ola e faavavau,  
15–16, 118–21

- saunia o le autalavou mo, 115–17  
 sootaga faafeusuai i, 112, 186  
 Faaipoipoga i le malumalu. *Tagai*  
 Faaipoipoga, faavavau  
 Faalagolago o le tagata ia te ia lava,  
 177–84  
 Faalauteleina valaauga o le perisitua,  
 96–104  
 Faaleagaga  
 atinaeina e ala i le anapogi, 180–82  
 atinaeina e ala i le manatunatu  
 loloto, 182–83  
 atinaeina e ala i le tausia o le Aso  
 Sapati, 188–90  
 atinaeina e ala i le suesueina o tusitu-  
 siga paia, 59–64, 66–67  
 e moomia e mau ai tali i tatalo, 55–57  
 tausia ai o tatou tino faaleagaga,  
 175–78  
 Faaulugalii o le ituaiga lava e tasi,  
 199–206  
 Faamasinoga, mulimuli, 244–45  
 Faamaopoopoga  
 faauigaina o le, 146, 149  
 Tiutetauave o Harold B. Lee i le,  
 xx, 146–47  
 Faamagaloga, 197–98. *Tagai foi* Salamo  
 Faamauga, 32–33  
 Faanoanoa, amuia i latou o e, 209  
 Faaola i le Mauga o Siona, 103–4  
 Faaolataga, ata o le. *Tagai* Ata o le  
 faaolataga  
 Faapaiaina, o le usiusitai e moomia mo  
 le, 33–35  
 Faasologa o le suitulaga atu i le Au  
 Perisitene o le Ekalesia, 81–84  
 Faataitaiga, e taua i le galuega faafai-  
 feautalai, 165–75  
 Faatuatua  
 atinaeina, 28–29  
 mataupu faavae o le talalelei, 5, 28–29  
 ia Iesu Keriso, 5, 23–25  
 moomia e tumau ai i faigata, 221–29  
 tatalo o le, 52–55  
 Faatupu filemu, 209  
 Fale  
 aafiaga a tina i totonu o le, 150–56  
 aoaina atu le talalelei i totonu o  
 le, 129–37  
 faaalua le alofa tele i totonu o le, 129–34  
 fesoasoaniga a polokalama a le perisi-  
 tua ma ausilali, 96–104  
 fiafia i totonu o le, 139–47  
 o le nofoaga sili ona taua e aoao atu  
 ai le talalelei, 129–37  
 o le galuega sili ona taua o loo faia i  
 totonu o, 134  
 o le aoga sili ona taua o aoga uma a  
 le Atua, 148–49  
*Tagai foi* Aiga  
 Faleteuolua o Epikopo, 173–77  
 Fanau  
 alofa mo [tamaiti] faalogogata, 139–42  
 aoai ma le alofa, 140–46  
 aoaoga i afiafi faaleaiga, 133–39  
 aoaoga i totonu o le aiga, 129–37  
 aoaoga o le talalelei e tina, 150–56  
 e le mafai ona tofotofoina a’o lei au-  
 lia le vaitausaga e malamalama ai  
 ma tali atu, 122, 142–45  
 faaalua le alofa tele mo, 139–46  
 mea e tatau ona aoao i, 123–24  
*Tagai foi* Tama, Aiga; Tina  
 Fanau a le Atua, 9–12, 225–26  
 Fanau ua taase, alofa i, 134–36  
 Fiaai ma fiainu mo le amiotonu, 202  
 Filemu  
 i taimi o faigata, 221–29

malamalama o le toetu e maua ai e i  
tatau le, 232–38  
Filifiliga. *Tagai* Saolotoga  
Fitafita  
    manao e auaua atu i se misiona,  
    157–58  
    na anapogi se aiga mo se, 181–82

## G

---

Galue  
    aoao atu le taua o le, 124  
    taua o le, 168–69, 171–73  
Galuega faafaifeautalai  
    aoao atu ma le mana ma le pule,  
    159–61  
    faamoemoega o le toefuataiga o le  
    talalelei, 76–78  
    faataitaiga e talafeagai mo le, 165–67  
    matafaioi a le Tusi a Mamona i le,  
    65–68  
    matafaioi a le Agaga i le, 159–61  
    mea na tupu i le fitafita na toe foi  
    mai, 157–58  
    taua o le, 153–56  
Galuega o talafaasolopito o aiga e faia i  
    tononu o malumalu, 103–07  
Galuega tau gafa, 103–04  
Galuega o le Uelefea  
    amataga o le, xvi–xvii, 165–66  
    faalagolago o le tagata ia te ia lava e  
    taua i le, 168–73  
    matafaioi o fale teuoloa, 174–77  
    matafaioi o korama a le perisitua ma  
    le Aualofa, 174–77  
    mataupu faavae o le, 166–83  
    na ta'imua ia Harold B. Lee i,  
    xvi–xvii, 165–66  
    teuina o meaai, 177–83  
    tiutetauave o tagata taitoatasi ma le  
    aiga, 169–73

## H

---

Hinckley, Gordon B., aotelega o le soi-  
fuaga o Peresitene Lee, xi–xxi  
Ho Jik Kim, Dr., liuaina o, 162

## I

---

Iesu Keriso  
    Ao o le Ekalesia, 80  
    aoaoina le fanau ia maua le molimau  
    ia, 129–30  
    e fesoasoani faigata ia tatau avea ai e  
    faapei o, 209–13  
    Faamasino, 226–30  
    faanoanoa o Lona tina, 220  
    faatuatua ia, 23–25  
    fetufaai le molimau ia, 153–61  
    Foafoa, 3  
    mauaina le molimau ia, 38–40  
    papatísoga o, 31  
    tuuina mai le filemu i taimi o fai-  
    gata, 211–14  
    Toetu o, 216–23  
    *Tagai foi* Togiola  
Iosefa Samita. *Tagai* Samita, Iosefa  
Ipu a le faioamea, o tagata e pei, 207

## L

---

Lauga i luga o le Mauga, Faaamuia,  
199–205  
Lee, Fern Lucinda Tanner, xv, xix, 206  
Lee, Freda Joan Jensen, xix  
Lee, Harold B.  
    aoao atu mai tusitusiga paia, 59  
    o le galuega a le tina na laveaiina  
    ai, 141–50  
    faamaopoopoina o taumafaiga a, xx,  
    146  
    faaiipoipoga a, xv, xix  
    fanau mai o, xii  
    fetufaai atu le talalelei i se tamaitai  
    faigaluega, 153



- ma se atalii o lona atalii i le faaaliga siva, 131–32
- maliu o, xxi
- matua o, xi–xii
- mea na oo i ai a o tamaitiiti i le faalogoina o le leo o le lapataiga, 47
- mea na oo i ai a o tamaitiiti i puua, 132–33
- misiona a, xv
- Peresitene o le Ekalesia, xx–xxi, 79
- peresitene o le siteki, xvi
- taumafaiga o le uelefea a, xvi–xvii, 165–66
- tofotofoina e ala i faigata, 206, 209–10, 213–14
- valaaaina o se Aposetolo, xvii
- Lee, Helen, xv
- Lee, Maurine, xv, xix, 206
- Le tagolima, auala a le Alii mo le tausia o e, 177–83
- Lēgavia
- aoaoina o tupulaga e uiga i le, 199–205
- taunuuga o le solia o le tulafono o le, 199–207
- taua le usitai i le tulafono o le, 199–201
- tagata o umia le perisitua ua i ai le tiute mo le, 199–206
- Liua
- e ala i le Tusi a Mamona, 62–64
- faaletagata, 40–41
- Tagai foi* galuega faa-faifeautalai; Molimau
- Lotomama, 221–24
- Lotomauualalo, 200, 203
- M**
- 
- Mafatia. *Tagai* Faigata
- Mafaufauga, mama o, 188–90
- Mala. *Tagai* Faigata
- Maliliu, galuega faalemalumalu mo e, 107–09
- Malumalu
- faaaliga e maua i totonu o le, 107–15
- faaeega paia, 107–15, 119
- faamanuiaga e maua i totonu o le, 108–11
- galuega mo e ua maliliu i totonu o, 110–13
- Malumalu o Cardston Alberta, 116
- Malumalu o Manti Iuta, 105
- Malumalu o Sate Leki, 109
- saunia e auuina atu i totonu o, 109–12
- Malumalu o Cardston Alberta, solo o loo tusia i le, 116
- Malumalu o Manti, na vaaia i le taimi o se afa, 105
- Malumalu o Sate Leki, faatulagaga o fetu i luga o le, 109
- Mama
- moomia e mauaina ai le molimau, 40–43
- mafaufauga, 188–210
- Tagai foi* Legavia
- Manatunatu loloto
- mea na oo i le atalii o Epikopo John Wells, 196–97
- taua o le, 196–97
- Maria, tina o Iesu, 220
- Matitiva ma le le tagolima, auala a le Alii mo le tausiga o e, 177–82
- Matitiva i le agaga, 209–12, 221
- Matua
- aoaiina o fanau i le alofa, 130–34
- aoaoina atu le talalelei i fanau, 119–27, 142–43
- aoaoina le autalavou e uiga i le legavia, 190–93
- aoaoga i afiafi faaleaiga, 129–33

- alofa i fanau faalogogata, 134–36  
 o mea e aoao atu i fanau, 123–24  
 faaalua le alofa tele mo fanau, 139–46  
*Tagai foi* Fanau; Tama; Tina
- Meleniuma, o le toefuataiga o le talalelei e saunia ai i tatou mo le, 75–76
- Misiona, na muai faauuina ai i tatou, 12–13
- Miti  
 tulaga manaomia o le auuina atu i isi, 107  
 faaaliga e maua mai i, 51–52
- Molimau  
 aoaoina o fanau ina ia, 129–32  
 e tau atu i le ola e faavavau, 241–43  
 faamalosi o le, 42–43  
 fetufaai atu i isi, 165–73  
 ia Iosefa Samita e taua, 69–72  
 mauaina o le, 40–42  
 o le usiusitai e faatupuina ai le, 40–43, 209–11  
 o le sutesueina o tusitusiga paia e faateleina ai le, 59–64, 66–67  
 taula i le agaga, 44–45  
 uiga o le, 37–40
- Muai olaga  
 atamai i le, 9–11  
 fanau agaga a le Atua, 9–12  
 muai faauuina i le, 12–13
- Muai faauuina i le muai olaga, 12–13
- Mulilua. *Tagai* Lēgavia
- O**
- 
- O mea lilo faaleatua e faaalua i totonu o malumalu, 100–103
- Ola faavavau  
 amioga i aso taitasi e tau atu ai i le, 7–8, 228–30  
 ata o le faaolataga e taitai atu ai i le, 1–8
- Ekalesia e saunia ai i tatou mo le, 147–48
- faaipoipoga faavavau e taua mo le, 15–16, 118–20
- faamoemoega o le ola faitino, 241–46
- faatoilaloina o puapuaga e fesoasoani tatou te maua ai le, 209–16
- leai se amataga leai se gataaga, 9
- molimau e taua mo le, 241–43
- Togiola e mafai ai ona maua le, 21–25
- uiga o le, 15–16
- Ola mama. *Tagai* Legavia
- Ola le mama. *Tagai* Legavia
- Olaga faaletino  
 faamoemoega o le, 3–4, 232–33  
 taimi e sauniuni ai, 232–34
- Ositaulaga  
 moomia mo le faaipoipoga e faavavau, 118–22  
 taua o le, 165–69
- Oti, faaleagaga. *Tagai* oti faaleagaga
- Oti faaleagaga  
 e fesoasoani le Agaga Paia ina ia tatou faatoilaloina le, 32–33  
 mai le le talitonu i perofeta soifua, 85–86  
 uiga o le, 21
- Oti, faaletino  
 malamalama i le toetu tatou te maua ai le filemu, 221–26  
 taulimaina o se oti/maliu o sē pele, 23–24, 206, 213–14, 220–23
- P**
- 
- Paia, faifaimalie lona atinaeina, 188–96
- Pailate  
 auala e faailogaina i le sami, 86  
 auala e taialaina e fetu, 99  
 mea na oo i le tauaso, 190–91

Papatisoga

feagaiga o le, 31–32  
 mo e ua maliliu, 103–4  
 taua e ulufale atu ai i le malo o le  
 Atua, 5, 31–32

Pa'u o Atamu ma Eva, 18–23, 110

Peresitene o le Ekalesia

auala e filifilia ai, 81–84  
 mauaina faaaliga mo le Ekalesia,  
 80–81, 84–87  
 na faauuina Harold B. Lee e avea o  
 se, xx  
 taua o le mulimuli i, 84–87

*Tagai foi* Perofeta

Peresitene o le siteki, na auuaina ia  
 Harold B. Lee o se, xvi–xvii, 165

Perisitua

faasalaga mo le faaaogaina ma le  
 amioletonu, 96  
 korama, matafaioi i le galuega o le  
 uelefea, 177–79  
 matafaioi o taitai, 96–97  
 o e umiaina o sui o le Alii, 92–97  
 o e umiaina e tatau ona amioletonu,  
 94–96  
 o le tiutetauave a e umiaina mo le  
 legavia, 189–90  
 o le auala e faaoga ai ma le amio-  
 tonu, 91–96  
 taitaia faalapopotoga a ausilali,  
 149–51  
 uiga o le, 89–91

Perisitua Arona

faamoemoega o le, 96  
*Tagai foi* Perisitua

Perisitua Mekisateko

faamoemoega o le, 96  
*Tagai foi* Perisitua

Perofeta

mulimuli i le perofeta soifua, 79–87

o le auala e filifilia ma saunia ai,  
 72–73, 81–84

taua o le mulimuli i le, 84–87

*Tagai foi* Peresitene o le Ekalesia;  
 Samita, Iosefa

Peteru ma le Toetu o le Faola, 232–35

Poloaiga. *Tagai* Usiusitai, taua o le

Puapuaga

fesoasoani tatou te avea ai faapei o le  
 Atua, 209–16

filemu i le taimi o, 221–26

Iosefa Samita sa tofotofoina i, 209–10

molimau e tumau i le taimi o, 44–45

molimau i le toetu e fesoasoani i le  
 taimi o, 220–21

sauaina ona o le amioletonu, 204

S

Salamo

e tau atu i le faamagaloga, 197–98  
 e moomia i aso taitasi, 29–30  
 e moomia mo le faaolataga, 5, 228–30  
 o le faanoanoa mo agasala e moomia  
 ai le, 209–13  
 o le filemu o le mafaufua e maua mai  
 pe a uma ona, 197–98  
 ta'uta'u atu e moomia mo le, 29–30  
 tulafono faavae, 5

Samita, Iosefa

Tusi a Mamona na aumaia e ala mai  
 ia, 75–76

Uluai Faaaliga a, 73–74

e tele mea ofoofogia na faavaeina e  
 ala ia, 73–76

e pei o Iosefa o anamua, 73

tatalo a le tina mo, 141

e tatau ona i ai se molimau ia, 69–72

saunia mo lona valaauga, 72–73

ositaulagaina mea uma, 157

tofotofoina e faigata, 208–10

## Saolotoga

faataunu ai a tatou misiona i le foga-  
elele, 12–15

taua mo le ata o le faaolataga, 4, 13–15  
matafaioi i le, Pau, 20–21

Sauaga, tumau i le amiotonu, 204

Seoli, susunuina o manatu, 232–39

Sootaga faaulugalii i le faaipoipoga,  
118, 200

*Tagai foi* Legavia

## T

Tagata ta laau, tala e uiga i le, 232–35

Taitaiga, perisitua, 89–97

## Talalelei

aoaoina i totonu o le fale, 129–38

aoao atu ma le mana ma le pule,  
165–68

saunia tali i soo se faaifitauli, 160

Talalelei, fetufaai atu. *Tagai* Galuega  
faafaifeautalai

## Talavou

aoaoina i totonu o le fale, 129–38

aoaoina e uiga i le legavia, 199–213

saunia mo le faaipoipoga e faava-  
vau, 118–21

taase, aua ne'i fiu i, 139–45

## Tama

aoao atu e uiga i le legavia, 199–213

aoao atu le talalelei i totonu o le  
fale, 129–38

e gafa mo le manuia e faavavau o le  
aiga, 139

faaalua le alofa mo fanau, 129–34

faaaogaina ma le amiotonu le perisi-  
tua, 96–98

taua o le latou galuega, 148–50

*Tagai foi i* Fanau; Fale; Tina; Talavou

Tama Faalelagi. *Tagai* Atua le Tama

Tama o i le Lagi. *Tagai* Atua le Tama

## Tamaitai

o e le maua se faaipoipoga e faava-  
vau, 118–21

*Tagai foi* Tina

Tane. *Tagai* Faaipoipoga, faavavau

## Taulaga anapogi

faaaogaina o le, 177–83

faamanuiaga o le foai atu i, 181–83

## Tatalo

a tina mo fanau, 150

auala e tatalo ai, 52–57

mauaina faaaliga e ala i le, 52–57

o le faatuatua, 52

usiusitai e moomia e maua ai tali i,  
55–57

## Teofani, 49

Teuina o meaai, 177–79

## Tina

aoao atu e uiga i le legavia, 199–205

aoaoina atu le talalelei i totonu o le  
fale, 129–38, 165–69

faaalua le alofa mo fanau, 129–34

faatupuina se siosiomaga i totonu o  
le fale, 139–42

i fetaulaigaala o le fale, 139–40

tatalo mo fanau, 134–36, 141

tamaitai e le mafai ona maua ni  
fanau, 114–15

tina o le Perofeta o Iosefa Samita, 141

*Tagai foi* fanau; Aiga; Tama; Fale,  
Aulavou

Tino, e faapei o o tatou agaga, 11–12

## Tino ola pea

na mafai ona maua e ala i le  
Togiola, 21–25

uiga o le, 15

## Tisipenisione

o le atoaga o taimi, 73–76

uiga o le, 73–76

Toetu

o Iesu Keriso, 232  
 malamalama i le, lagolagoina ai i  
 tatou i taimi o faigata, 220–23  
 molimau a Harold B. Lee i le, 216  
 moni o le, 216–19  
*Tagai foi* Togiola

Toe fanaufouina, e tatau ona, 199–204

Tofotofoga. *Tagai* Faigata

Togiola

Faatoilaloina le Pau i le, 18–23  
 malamalama i le, fesoasoani ia i tatou  
 i puapuaga, 216–23  
 maua ai le faamagaloga, 199–204  
 taua mo le ata o le faaolataga, 4–5  
 tino ola pea ma le ola faavavau e  
 mafai i le, 21–25

*Tagai foi* Alofa tunoa; Toetu

Tulaga o le upumoni, o tusitusiga  
 paia o, 64–65

Tulelei, 186

Tumau e oo i le iuga, 33–35

Tupulaga matutua nofofua, mauaina o le  
 olioli e ala i le auauna atu i isi, 114–15

Tusi a Mamona

Iosefa Samita na aumaia le, 75–76  
 suesue e faateleina ai le faaleagaga,  
 62–64

Tusi faavae. *Tagai* Tusitusiga paia

Tusitusiga paia

atinaeina o le faaleagaga, 59–64, 66–67

faamanuiaga i le suesueina o le Tusi a  
 Mamona, 62–64

faaaoaga pe a aooina le talalelei, 65–66

moomia o le suesueina, 59–62, 66–67

na aoao mai Harold B. Lee mai, 59

suesue o, i le galuega faafaifeautai,  
 lai, 165–67

tulaga o le upumoni, 64–65

**U**

---

Uluai Faaaliga, 73–74

Upumoni, o tusitusiga paia o le tulaga  
 o le, 64–65

Usiusitai, e moomia

i uluai mataupu faavae ma sauniga, 5

mo le atoatoa, 199, 209–11

mo le ola e faavavau, 23–25, 33–35,  
 228–31

mo le faapaiaina, 33–35

mo le filemu i taimi o faigata, 221–26

mo le mauaina o tali i tatolo, 55–57

mo le mauaina o le molimau,  
 40–43, 209

mo le molimau o mataupu faavae o  
 le talalelei, 209–11

**V**

---

Vaa o le vateatea, Apolo 13, 1–2, 6

**W**

---

Wells, Epikopo John, mea na oo i le  
 atalii na oti, 196–97

O LE EKALEZIA A  
**IESU KERISO**  
O LE AU PAIA O ASO  
E GATA AI

SAMOAN



35892 890